

310

22

Ex Bibliotheca
majori Coll. Rom.
Societ. Jesu
III . 12 . c

66.6.2.

III


14

D

III

14

D



SERMONS

SVR LE QVATRIESME

Chapitre de l'Epistre de S.
Paul aux Ephesiens.

Par MICHEL LE FAVCHEVR,
Ministre du Saint Euangile.



Se vendent à Charenton,
Par SAMVEL PETIT, demeurant à Paris,
dans la Cour du Palais, à la Bible d'or.

M. DC. XLII.

210117

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

11-17-17

S E R M O N
DE LA
CONVERSATION
CHRESTIENNE.

Sur les paroles de l'Apostre S.
Paul au chap. 4. de l'Epistre
aux Ephesiens.


Verf. 1. *Je vous prie donc, moy le prisonnier
au Seigneur, que vous cheminiez digne-
ment, comme il est seant à la vocation à
laquelle vous estes appelez :*

2. *Avec toute humilité & douceur, avec un
esprit patient, supportans l'un l'autre en
charité.*



'Est vne question qu'on
agite communément
dans les Escoles, si la
saincte Theologie est
vne science contempla-
tiue, ou vne discipline pratique ; &
il y a des raisons apparentes de part &

A



d'autre. Mais qui considerera bien la nature de cette doctrine celeste, trouuera, que comme Dieu n'est borné à aucune des especes d'estre es-quelles se distinguent les choses du monde, mais est vn estre souuerain, qui possede avec eminence toutes les perfections qui se trouuent en toutes les choses créées, de quelque genre qu'elles soient: ainsi cette discipline, vrayement diuine contient eminemment en soy tout ce qu'ont de plus excellent toutes les sciences humaines, tant celles qui s'occupent à la contemplation de la verité, que celles qui adressent l'homme en la conduite de sa vie. Car elle est tout ensemble contemplatiue, voire de toutes les contemplatiues la plus noble, soit pour la grandeur incomparable de son obiet, qui est Dieu, soit pour la certitude indubitable de son principe, qui est la Reuelation diuine; & operatiue, voire de toutes les operatiues la plus parfaite, soit à l'égard des fins auxquelles elle nous adresse, qui sont la gloire de Dieu & la beatitude de l'homme, les deux plus desi-

rables fins que l'esprit humain puisse avoir ; soit à l'égard du moyen qu'elle nous ordonne pour y parvenir, à savoir cette sainte Religion que le Fils de Dieu a luy-mesme apportée au monde, qui est & le plus legitime & le plus asseuré de tous les moyens dont l'homme se puisse servir pour conduire ses actions à vne heureuse fin. C'est pourquoy nostre grand Apostre au 3. de sa seconde à Timothée exposant les vtilitez de l'Ecriture Canonique, qui est le liure où Dieu nous donne les theoremes & les reigles de cette diuine science, dit qu'elle est profitable non seulement à nous endoctriner en la verité, & à redarguer les erreurs contraires, mais aussi à nous corriger de nos vices & à nous instruire selon justice. Et de faict vous voyez comme il diuise ordinairement ses Epistres en deux parties principales, dont l'une est dogmatique, où il expose aux fideles les mysteres de la vraye foy ; & l'autre morale, où il leur prescrit les deuoirs de la vie Chrestienne. Comme il l'a obserué dans ses Epistres

aux Romains, aux Galates, aux Colossiens & ailleurs, ainsi l'a-il fait en celle cy. Car dans les trois premiers chapitres que nous vous auons exposez, il a traité de tous les principaux mysteres de la creance des Chrestiens; & en ces trois derniers qui restent à vous expliquer, il exhorte les fideles à l'exercice de la vraye sainteté, & leur en donne les preceptes. Cette partie est moins difficile que l'autre, nos devoirs enuers Dieu & enuers nos freres estans choses beaucoup plus proportionnées à la capacité naturelle de nos entendemens, que les mysteres de la foy: mais elle n'est pas moins necessaire, & mesme on peut dire avec verité que cette derniere est l'vnique but auquel tēd la premiere, & que sans elle la premiere seroit entieremēt inutile. C'est donc à nous, chers freres, à exciter icy nos esprits à vne nouuelle attention, & à prier nostre bon Dieu qu'à mesure que les diuines leçons que nous orrons desormais de l'Apostre entreront dans nos oreilles, il les grave luy mesme en nos cœurs comme

avec vñe touche de fer & vne ongle de diamant, afin que nous les ayons tous-jours en la pensèe & en l'affection, & que par elle nous reglions toute nostre vie, pour la rendre conforme au patron qu'il nous a donné en son Fils, & vraiment digne de la vocation de laquelle il nous a honorez.

Il commence ces leçons là par les mots que vous venez d'entendre, sur lesquels nous auons deux choses à considerer; La premiere, la priere generale qu'il fait aux fideles d'Ephese de viure comme il est seant à leur vocation. Et la seconde, l'exhortation speciale qu'il leur adresse aux vertus dispositiues à la concorde qui doit estre entre les Chrestiens. Mais remarquez avant toutes choses la forme en laquelle est conceuë sa remonstrance. *Je vous prie donc*, dit-il, *moy le prisonnier au Seigneur. Ce donc*, est comme vne boucle qui lie cette partie morale de son Epistre avec la dogmatique, comme pour dire, le vous ay monstreé jusqu'icy que tous ceux, soit Iuifs, soit Gentils,

qui ont vne vraye foy en Christ, ont esté predestinez par le conseil eternal de Dieu à cette foy là, qu'ils l'ont obtenuë par la vocation de son Euan-gile & de son Esprit, que par elle ils ont esté entez en Christ, reconciliez avec Dieu, & scellez du saint Esprit de la promesse jusques au iour de la redemption, pour estre de plus en plus fortifiez en l'homme interieur, tellement que Christ habite par foy en leurs cœurs; & je vous ay fait voir en vous appliquant toutes ces grandes grâces l'estroite obligation que vous luy avez, comme ayans esté predestinez, appelez, reconciliez, adoptez, & en vn mot sauuez par sa pure grace. Puis donc qu'il vous a appelez à vne si haute & si aduantageuse condition, cheminez comme il est seant à des personnes adoptées par le Roy des Roys, & destinées à vn si glorieux estat que celuy qu'il reserve aux siens dedans son Royau-me celeste.

Pesons en suite ce doux mot de *prier*, dont il vse. *Je vous prie*, dit-il. Il auoit droit de leur commander

soit en qualité d'Apostre de Christ, qui auoit la vengeance toute preste contre les desobeissans & les rebelles, soit en qualité de Pasteur de cete Eglise là, sur laquelle il auoit acquis de tres-grandes obligations par de grâds, assidus & penibles seruices, & par vne infinité de bien-faiçts. Mais il aime mieux vser de priere, comme souuent ailleurs. *Je vous prie, freres, 1. Cor. par le nom de nostre Seigneur Iesus 1. 10. Christ, que vous parliez tous vn mesme langage, Je vous prie que vous soyez 1. Cor. mes imitateurs, Nous vous supplions 4. 16. pour Christ que vous soyez reconciliez 2. Cor. à Dieu, Nous vous prions que vous 5. 20. n'ayez point receu la grace de Dieu en 2. Cor. vain. Ce n'est pas, que quand il est 6. 1. necessaire, il ne sçache bien vser de son autorité, & employer la seuerité, aussi bien comme la douceur. Car il a en son Arche & la Verge & la Manne, comme il le témoignoit aux Corinthiens en disant, Viendray-je à vous avec la verge, ou en charité & en esprit de douceur? Mais il tempere l'une par l'autre, selon qu'il voit estre à propos pour la plus grande*

S E R M O N

dification des ames; & comme le fer
 estant dans le feu s'amollit & se ploye,
 & prend toutes les formes qu'on luy
 veut donner; ainsi le feu de cette ar-
 dente charité qui brûloit en son ame,
 luy faisoit prendre toutes les formes
 qu'il voyoit estre les plus propres
 pour gagner les ames à Christ: Tan-
 tost celle de pere, *Quand vous auriez*
1. Cor. 4.15. dix mille pédagogues en Christ, neant-
moins vous n'avez point plusieurs pe-
res. C'est moy qui vous ay engendrez
en Iesus Christ par l'Evangile: Tan-
Gal. 4. 19. tost celle de mere, Mes petits enfans,
disoit-il, que j'enfante de rechef au
1. Tess. 2. 7. Seigneur: Tantost celle de nourrice,
Nous auons esté doux entre vous, com-
me si une nourrice nourrissoit tendre-
1. Cor. 9. 19. ment ses enfans: Tantost celle de ser-
uiteur, Combien que ie sois en liberté
à l'égard de vous, je me suis asservi
à tous, afin de gagner plus de per-
sonnes.

Mais encores voyons en quelle
 qualité il fait cette priere aux fide-
 les. *Je vous prie, dit-il, moy le pri-*
sonnier au Seigneur. Au Seigneur,
 c'est à dire, Pour le Seigneur & par

la volonté du Seigneur. Car il estoit
le prisonnier de Christ doublement,
& parce que c'estoit pour son Nom
qu'il souffroit cette peine, suivant ce
qu'il disoit au 28. des Actes, *C'est pour
l'esperance d'Israël que je suis environ-
né de cette chaine ;* & parce que le Fils
de Dieu l'ayant aduerti de fort loin
qu'il deuoit estre lié en Ierusalem,
y auoit amené comme son captif,
le tirant par vne secrette vertu, &
avec vne violence si douce & vne
douceur si violente qu'il ne pût estre
tenu ni par les affections de la
chair, dont il disoit aux Anciens d'E-
phese à Milet, *Voicy estant lié par l'Es-
prit je m'en vay en Ierusalem, ignorant
les choses qui m'y doiuent arriuer, sinon
que l'Esprit m'aduertit, que liens &
tribulations m'y attendent ; mais je ne
fay cas de rien, & ma vie ne m'est
point precieuse, moyennant qu'avec
ioye j'acheue ma course : ny par les
prieres & par les exhortations de ses
freres : car comme en Cesarée le Pro-
phete Agabus luy ayant pris la cein-
ture & s'en estant lié les mains & les
pieds eut dit de par le Saint Esprit,*

Act.

20. 22.

23. 24.

Actes Ainsi lieront les Iuifs l'homme à qui
21. 11. est cette ceinture, & le liureront aux.
12. 13. Gentils ; tous les freres qui estoient
là l'exhorterent à n'y monter point,
mais il leur respondit, *Que faites-*
vous en pleurant & affligeant mor-
cœur ? Car quant à moy, ie suis tout
prest d'estre lié, mais aussi de mourir
en Ierusalem pour le Nom du Sei-
gneur Iesus. C'est là ce qu'il appelle
estre prisonnier au Seigneur, & c'est
de quoy il se glorifie, & de quoy il
triomphe, plus que s'il se voyoit vn
sceptre en la main, & vne couronne
sur la teste. Ce n'estoit pas qu'il pre-
tendist s'en donner de la vanité, car
il sçauoit bien que ces liens qu'il por-
toit pour son Maistre, il auoit meritè
deles porter pour ses crimes auant sa
conuersion à la foy, qu'autant qu'il
auoit emprisonné de Chrestiens au
temps qu'il estoit infidele, autant il
auoit meritè de prisons, afin que ie
ne die de supplices, & que tout ce
qu'il auoit de vertu pour supporter si
gayement ses fers, ne venoit point
de luy, mais de Dieu, par la grace du-
quel il luy estoit dōné non seulement

le croire en Christ, mais aussi de souffrir pour luy. C'estoit seulement pour monstrier qu'il ne prenoit à honneur ni l'Evangile, ni la croix, ni la chaine, mais qu'il s'estimoit tres-honoré de suiure son Maistre en quelque condition que ce fust, & de porter apres luy son opprobre; & pour donner plus de poids, plus d'autorité, plus de vertu & d'efficace à ses prieres & à ses remonstrances. Ainsi quand il prioit Philemon pour son seruiteur Onesime, pour le faire plus puissamment, il disoit, *Moy Paul ancien, & mesme maintenant prisonnier de Iesus Christ, je te prie pour mon fils Onesime, lequel j'ay engendré en mes iens.* Ainsi autres-fois les prieres des Confesseurs & des Martyrs (on appelloit lors Confesseurs ceux qui soustenoient constamment la verité de l'Evangile deuant les Magistrats, & neantmoins apres cela demeuroient en vie, & Martyrs ceux qui estoient enuoyez à cette occasion au supplice) leurs prieres, di-je, estoient de si grande consideration en l'Eglise, que tout ce qu'ils desiroient d'elle,

*Philemon 9.
10.*

leur estoit accordé, & que pour ceux qui travailloient à estre reconciliez avec elle, il n'y auoit intercession si puissante qu'estoit la leur.

Venons maintenant à la chose mesme, & voyons que c'est que l'Apostre exige des fideles par cette priere. *Je vous prie*, dit-il, *que vous cheminiez dignement comme il est seant à la vocation à laquelle vous estes appellez.* Autresfois quand vous croupissiez dans les tenebres de vostre ignorance, estans morts en vos fautes & en vos pechez, vous cheminiez selon le train de ce monde, suiuant le Prince de la puissance de l'air, qui domine avec efficace és enfans de rebellion. Mais maintenant que Dieu par sa grande misericorde vous a illuminez en sa verité, & viuifiez avec Christ, & qu'il vous a fait asscoir ensemble és lieux celestes avec luy, il faut changer de vie, & considerer qui est celuy qui vous a appellez. Celuy qui vous a appellez, c'est le Saint des Saints. Viuez donc saintement, afin qu'il apparaisse aux autres, & que ce vous soit vne assurance à vous-mesmes,

que vous estes veritablement ses en-
fants, portans sa vraye image & son
ray caractere. Ce à quoy il vous
appellez, c'est la sainteté, sainteté
dans laquelle nul ne verra sa face.
Adonnez vous y donc en toute vo-
tre vie, afin de luy estre agreables,
& d'estre de ces bien-heureux, dont
la verité dit en l'Evangile, *Bien-heu-* *Matt.*
reux sont ceux qui sont nets de cœur, *5.8.*
car ils verront Dieu. C'est la remon-
trance que faisoit Saint Paul aux
Chrestiens de Theſſalonique en ces
termes, *Nous vous prions & reque-* *1. Theſſ*
rons par le Seigneur Iesus, qu'ainsi que *4. 1. 2.*
vous avez receu de nous comme il faut *3. 4. 5.*
conuerſer & plaire à Dieu, vous abon- *7.*
liez de plus en plus. Car vous ſauez
quels commandemens nous vous auons
donnez de par le Seigneur Iesus. Car
cette est la volonté de Dieu, voſtre
ſanctification, & que vous vous abste-
niez de paillardise, à ce que chacun de
vous ſache poſſeder ſon vaiſſeau en
ſanctification & honneur, non point
avec paſſion de conuoitise, comme les
Gentils qui ne cognoiſſent point Dieu.
Dieu ne vous a point appellez à ordure,

mais à sanctification. C'est celle aussi que faisoit Saint Pierre aux fideles
2. Pier. quand il leur escriuoit, Comme celuy
1. 15. 16 qui vous a appelez est Saint, vous
17. 18. aussi pareillement soyez saints en toute
19. votre conuersation, d'autant qu'il est escrit, Soyez saints, car je suis Saint. Et si vous inuquez pour Pere celuy qui sans auoir égard à l'apparence des personnes iuge selon l'œuvre de chacun, conuersez en crainte durant le temps de vostre séjour temporel, sachans que vous avez esté rachetez de vostre vaine conuersation par le sang de Christ, afin que le temps qui reste en chair, vous ne viuiez plus selon les conuoitises des hommes, mais selon la volonté de Dieu. Car le temps passé vous doit auoir suffi pour auoir accompli la volonté des Gentils, quand vous conuersiez en insolences, en conuoitises, en yurogneries, en beuueries, & en idolatries abominables. Remonstrances que les Saints Apostres fondent sur la difference qui est entre la vraye Religion & les fausses, d'où ils inferent celle qui doit estre entre la conuersation des

Chrestiens & celle des infideles. C'estoit dire aux premiers, Considérez ce que vous estes au prix de tout le reste du monde. Que les Payens qui croient vn Saturne, vn Iupiter, vn Mars, vne Venus, vn Bacchus, vn Mercure, c'est à dire des Dieux parricides, paillards, adulteres, incestueux, cruels, yuognes & larrons, se plongent dans ces vices dont ils ont pour patrons les fausses diuinitez qu'ils adorent. Que les Iuifs qui sont esleuez ou sous la discipline des Phariens, qui mettent toute leur sainteté en leurs mines, en leurs habits, en leurs phylacteres, & en leurs laumens; ou en celle des Sadduciens, qui ne croient ni l'immortalité de l'ame, ni la resurrection de la chair, ni la vie eternelle, & qui n'aspirent qu'au salaire de la vie presente, vivent ou dans la superstition & dans l'hypocrisie, ou dans la profaneté & dans la licence. Vous qui par la misericorde de Dieu n'estes plus ni Iuifs ni Payens, mais Chrestiens, seruans vn Dieu tout saint, tout bon, tout iuste, tout misericordieux & tout

charitable, qui hait également l'hypocrisie du cœur & les débordemens de la vie, & qui avez esté appellez à la communion de Christ, à l'imitation de ses vertus, & à la participation de sa gloire celeste, comme vous avez renoncé aux erreurs & aux idolatries de leurs Religions, esloignez vous aussi de la corruption de leurs mœurs, qu'on ne voye dans les vôtres que pieté, qu'honnesteté, que temperance, que modestie, que justice, que charité, & que miséricorde, comme il est conuenable à ceux que Dieu a honnorez du glorieux titre de ses enfans. Soyez jaloux de conseruer pure & sans tache vne si belle qualité, afin que vous la portiez à bonnes enseignes, & que le Nom de celuy qui vous l'a donnée, en soit glorifié. Conuersez sur la terre comme bourgeois des cieux. Laissez aux gens du monde, desquels le partage est en cette vie, le soin des choses de la terre. Ils y ont leur thresor, qu'ils y ayent aussi leur cœur; les vns se rendans esclaves de l'auarice, les autres s'en yurans des fumées de l'ambition,

bition, & les autres se veautrans en leurs sales plaisirs, & faisans leur Dieu de leur ventre, & leur gloire de leur confusion. Pour vous, qui estes esleuez à de plus hautes esperances, toutes ces choses là sont indignes de vous, & vostre condition ne vous permet pas de vous y amuser. Dieu vous appelle à la gloire de son Royaume, c'est là qu'il vous faut tendre. Vous estes ressuscitez avec Christ, il ne faut plus penser qu'au Ciel, où il vous est allé preparer la place. Vostre soin desormais ne doit plus estre que de plaire à celuy de qui vous attendés ce grand heritage, & de cheminer comme il est seant à vne si honorable vocation.

De cette exhortation generale l'Apostre descend aux particuliers, & parce qu'il leur auoit representé au precedēt chapitre, que Dieu les auoit appellez à estre vn mesme corps avec tous les Saints, & consors de mesmes promesses & de mesme heritage, Il les prie de se comporter en la communion de ce corp en toute humilité & douceur, avec vn esprit patient,

supportans l'un l'autre en charité ;
estans soigneux de garder l'unité
d'esprit par le lien de paix. Vertus
qu'il leur propose non confusément
& entourbe , mais en vn ordre tres-
conuenable à la nature de ces choses,
& tres digne de la prudence. Car ce
qu'encor que Dieu nous ait mis au
corps mystique de son Fils , nous ne
viuons pas en l'unité que nous de-
uions , c'est parce que nous ne som-
mes pas soigneux d'entretenir cette v-
nité par le lien de paix ; ce que nous
n'auons pas de paix , c'est que nous
n'auons pas assez de charité pour
nous supporter les vns les autres ; ce
que nous ne nous supportons pas l'un
l'autre , c'est que nous sommes impa-
tiens ; ce que nous sommes impa-
tiens , c'est à cause que nous sommes
aigres & violens en nos passions ; & ce
que nous sommes ainsi aigres & vio-
lents , vient de ce que nous presu-
mons beaucoup de nous mesmes , &
méprisons grandement nos prochains.
Voila pourquoy il met première-
ment l'humilité , & puis fait suivre la
douceur , qui procede de l'humilité ;

& puis adiouste la patience qui procede de la douceur, & puis y joint le support charitable, duquel procede la patience. Ce qu'il appelle Humilité, c'est cette vertu par laquelle nous reconnoissons que nous ne sommes rien de nous mesmes, que nos défauts sont grands & en grand nombre, & que s'il y a quelque bien en nous, il est extrêmement imparfait: ce qui fait que nous nous abaissons devant Dieu le plus profondement qu'il nous est possible, non seulement au dessous de sa Majesté souveraine, à cause de nostre bassesse, au dessous de sa Justice à cause de la grandeur de nos fautes, au dessous de sa Misericorde à cause de la multitude de ses bien-faits; mais au dessous de tous nos freres, comme les reconnoissans louer de diuerses perfections que nous ne trouuons point en nous, & exempts de diuers défauts que nous voyons en nous & que nous n'appercevons point en eux. Cette humilité semble deuoir tenir le dernier lieu entre les vertus du Chrestien: mais par ce texte de l'Apostre elle tient le

premier, & certes iustement, parce qu'elle est la racine de toutes les autres. Elle se cache en terre, mais elle pousse leur tige vers le Ciel, & charge leurs branches de tres-bons fructs. Elle semble nous raualer, mais en effect elle est le fondement de nostre future exaltation. Elle est méprisée des hommes vains, mais elle est tellement agreable à Dieu qu'en-
cor qu'il prenne plaisir en toutes les autres, & qu'il haïsse tous les vices contraires, neantmoins il est dit particulièrement par les Apostres Sainct
1. Pier. Pierre & S. Iacques qu'il *fait grace*
5. 5. *aux humbles & qu'il resiste aux orgueilleux.* C'est celle qu'au 2. de l'Epi-
Iaq. 4. tre aux Philippiens il recommande
6. si serieusement aux fideles, *Que rien ne se face, dit-il, par contention & par vaine gloire, mais en estimant l'un l'autre par humilité de cœur plus excellent que soy-mesme.* Nous extenuons bien quelquesfois nos bonnes qualitez, & exaltons celles des autres; mais c'est pour en estre estimez humbles & en estre d'autant plus loüez, qui est la fine fleur de l'orgueil le plus

delié. Celuy des vanteurs est grossier , car quand ils preschent leurs loüanges, ils se font autant mépriser qu'ils se prisent eux mesmes, & sont comme des tonneaux de vin doux qui se salissent de leur propre baue. Nous y procedons bien plus finement, car nous parlons de nous en paroles d'humilité, afin que l'on en parle en termes de loüange, & que l'on nous esleue autant que nous nous abaissions. Nous ne resonons que bassesse, & ne respirons que sublimité. Si on nous donne des loüanges, nous les rejettons, mais pour en obtenir de plus grandes, comme ces rameurs qui repoussent l'eau avec leurs auirons, afin qu'elle reuiene avec plus de force & plus de roideur contre leur vaisseau. Nous preferons les autres à nous en les haussant & en nous deprimant, mais en effect nous serions bien marris qu'on nous excluist de ce que nous disons à leur loüange & à nostre desauantage, & si on les preferoit à nous en effect autant que nous le faisons de parole, nous croirions qu'on nous feroit tort. C'en'est



donc qu'une humilité en mine & en parole, qui ne vaut pas mieux devant Dieu qu'un orgueil manifeste, & mesme luy est d'autant plus déplaisant, que nous joignons à la presumption l'hypocrisie, qui est une double iniquité. C'est pourquoy S. Paul nous ordonne de preferer les autres à nous mesme par une vraye humilité de cœur; la modestie de nos paroles & de nos actions n'estant qu'une expression naïfue du sentiment que nous auons interieurement de nous mesmes & de nos freres.

A cette vertu il joint la douceur, c'est à dire la debonnaireté. Car le mot dont il use icy est le mesme duquel Iesus Christ a usé quand il a dit en un endroit, *Apprenez de moy que ie suis debonnaire*, & en un autre, *Bien-heureux sont les debonnaires*. Et ce mot de douceur est mis tres-à propos par nos interpretes, selon l'usage commun de nostre langue, pour synonyme à celui de debonnaireté, parce que comme la douceur est une faueur qui est fort agreable au goust, ainsi cette debonnaireté par laquelle

nous viuons paisiblement & humainement avecques nos prochains, sans malice, sans fiel, sans aigreur & sans violence, & nous rendons affables & faciles en nostre conuersation, est vne chose tres-aimable à l'esprit. C'est la propre vertu des Chrestiens, qui sont à cette occasion comparez aux colombes & aux brebis : voire la propre vertu des hommes, dont meisme elle est vulgairement appelée du nom d'humanité, là où les humeurs aspres, intraitables & incompatibles sont comparées à celle des bestes sauvages. Mais ne vous imaginez pas, ie vous prie, que par cette douceur il entende cette vertu de conuersation par laquelle les gens du monde se rendent exterieurement courtois & affables aux personnes en la familiarité desquelles ils desirent de s'insinuer, & dont ils veulent gagner la confidence pour s'en preualoir dans les affaires, & prennent soigneusement garde qu'on ne remarque rien de fier en leur abord, rien d'aigre en leurs paroles, rien de violent en leur proceder / mais vne grande facilité de

mœurs accompagnée de toute démonstration de bonté , afin que jamais personne, s'il est possible, ne s'en retourne mescontent d'aupres d'eux. Beaucoup moins entend-il vne douceur extérieure qui couure vne haine secrète , telle que celle des méchans , desquels le Psalmiste disoit au Pseaume cinquante cinqiesme, *leur bouche est plus douce que beurre , mais dans leur cœur , ils n'ont que guerre : leurs paroles sont plus coulantes qu'huyle ; mais ce sont des coups de couteau.* La douceur dont il parle est vne debonnaireté sincere qui a son siege dans le cœur & dans les plus intimes affections des Chrétiens , & par laquelle ils s'estudient à se rendre, autant qu'il se peut , conformes à leur Chef , qui en cela particulièrement s'est donné aux saints pour modèle. Qualité si puissante qu'elle charme & enchante , par maniere de dire, les Lions mesmes & les Aspics , c'est à dire les plus fiers courages & les esprits les plus malins ; & qu'elle a bien souuent, non seulement fait tomber les armes des mains de

ceux qui les auoient prises pour en méfaire aux fidelles , mais conuerti leur haine en amour , & serui mesme d'instrument pour les gagner à Iesus-Christ ; au lieu que l'aspreté des mœurs & l'aigreur des paroles n'eust fait que les effaroucher & les enuener d'auantage. Or si cette vertu a tant d'efficace pour concilier aux fidelles les cœurs de leurs plus grands ennemis , combien plus en doit elle auoir pour entretenir entre les fidelles mesmes la paix , & empescher qu'il ne naisse iamais entr'eux de cōtention ny de querelle ? Quand il n'y auroit que cela , la pratique leur en deuroit estre tres-agreable , mais beaucoup plus, quand ils se representent combien elle plaist à nostre Seigneur, & combien grande recompense il leur en promet, non seulement au siecle à venir , mais dès cette vie mesme , quand il leur dit , *Bien-Mat. heureux sont les debonnaires , car ils s. s. heriteront la terre.*

En suite de cette douceur l'Apôstre met la Patience ou l'esprit patient , qui est vne vertu Chre-

stienné , par laquelle l'homme supporte sans trouble & sans murmure les iniures qui luy sont faites par ses prochains , non par stupidité , qui seroit vne patience de beste ; non par impuissance ou crainte de pis , qui seroit vne patience forcée ; non par artifice pour cacher durant quelque temps son ressentiment , & pour prendre plus à propos le temps de se venger , qui seroit vne patience simulée & traistresse ; mais par vne humble & volontaire obeissance à celuy qui a dit,

Mat. 5. Ne resiste point au mal ; mais si quel-
39. 40. qu'un te frappe en la joue droite, tour-
41. ne luy aussi l'autre, & à celuy qui veut
plaider contre toy & t'ôster ton saye,
laisse luy aussi le manteau , & à ce-
luy qui te voudra contraindre d'aller
vne lieue , vas-en deux avec luy ;
c'est à dire , souffre plustost deux
iniures pour vne que d'offenser ton
Dieu , de troubler la paix de ta con-
science , de violer la charité que tu
dois à ton frere , & de donner lieu au
Diabie , qui tasche à vous commet-
tre l'un avec l'autre, pour vous ruiner

l'un par l'autre. C'est là la vraye patience, par laquelle les enfans de Dieu imitent leur Pere celeste, qui estant offensé tous les iours en vne infinité de sortes par l'ingratitude & par l'impieté des hommes, ne laisse pas de faire leuer son soleil sur eux, de faire decouler sa pluye & sa rosée sur leurs vignes & sur leurs champs, de leur adresser sa Parole, & de leur presenter sa grace & son salut, pour les conuier à repentance & pour les amener, s'il ne tient à eux, à la vie eternelle; au lieu de les esclaser de ses foudres, & de les precipiter dedans les Enfers, comme il le pouuoit faire tres-iustement. Ainsi nostre Seigneur Iesus quand il nous recommande la pratique de cette vertu, nous dit, *Afin que Mat. vous soyez enfans de vostre Pere qui s. 45. est és cieux.* Et luy mesme pour se monstrier vray Fils de son Pere, & pour nous seruir tout ensemble de precepteur & de patron de cette patience, que n'a-il point fait? Il s'est approché d'une ville des Samaritains comme y voulant entrer; & au lieu que cette ville-là deuoit s'arracher,

par maniere de dire , de ses fondemens pour luy aller au deuant , & qu'ils luy deuoyent faire vne entrée triomphale comme au Prince de leur salut , ils luy en ont fermé les portes. Jacques & Jean s'en sont esmeus & **Luc 9.** luy ont dit, *Veux-tu que nous disions*
54. 55. que le feu descende du Ciel , & qu'il les consume , comme aussi fit Elie. Et au lieu de le faire, il a tanlé l'impatience de ces deux disciples, leur disant qu'ils ne sauoient de quel Esprit ils estoient menez , & luy a suffi de se
Luc 4. retirer. Les Nazariens l'ont mis hors
29. de l'enceinte de leurs murailles , luy de qui le seul nom anoblissoit leur ville , & de qui la presence la pouuoit rendre eternellement bien-heureuse. O ville qui eust esté comme vn Paradis, si ayât Iesus-Christ avec ses Apostres elle eust prîs & conserué comme elle deuoit vn si grand aduantage; mais qui estoit digne que le Diable avec ses satellites y demeurast plus tost comme en vn Enfer! Ils ont bien passé plus auât, ils l'ont mené au bord de la montaigne pour le ietter du haut en bas, pires en cela, s'il faut ainsi

dire, que le Diable mesme, qui luy a bien dit qu'il se precipitast, mais n'a point entrepris de le precipiter luy mesme. Et cependant ils'est contenté de se déucloper de leurs mains, & n'en a point recherché de vengeance. Judas qu'il auoit honoré de la charge d'Apostre, qu'il auoit reçu en sa compagnie, qu'il auoit admis à sa table, à qui il auoit laué les pieds, l'a trahi pour trente deniers. Et ce pendant il l'a toleré avec vne patience admirable, & quand ils'est approché pour le liurer en le saluant & en le baisant, il n'a fait que luy dire, *Compagnon, à quoy faire es-tu icy? Trahis-tu le Fils de l'homme par un baiser?* Ses ennemis non contents de luy auoir fait vne infinité de maux durant sa vie, ont pourchassé sa mort, ont crié contre luy, Crucifie, crucifie le, l'ont cloüé en fin à la croix, & en cette croix luy ont fait tous les opprobres & toutes les indignitez imaginables. Et toutes-fois au lieu des'en venger, il les a excusez enuers son Pere, & élcuant à luy pour eux non ses mains qu'ils luy auoyent cloüées, mais tout ce qui luy

*Mat?**26.50.**Luc**22. v.**48.*

restoit de libre, ses yeux, sa voix, son
Luc cœur, luy a dit, *Pere, pardonne leur,*
23. 34. *car ils ne savent ce qu'ils font.* Et afin
 que nous ne disions point, C'estoit le
 Fils de Dieu, son exemple est inimi-
 table, il nous a montré la pratique
 de cette patience en des exemples
 plus accommodez à nostre portée; en
Ex od. vn Moÿse qui a toléré si long-temps
32. 32. ce peuple de col roide que Dieu luy
 auoit donne à conduire, & comme
 Dieu parloit de l'exterminer, l'a prié
 avec grande ardeur de l'effacer plu-
 tost luy mesme du liure de vie; en vn
 Daud, qui estant chargé d'iniures
 par Semei, n'a point voulu qu'on luy
 mesfist, mais a dit aux siens, *Laissez-*
2. Sam
16. 10. *le, & qu'il me maudisse, car l'Eternel*
le luy a dit, c'est à dire, ie reconnoy
 que c'est Dieu qui veut m'humilier
 par cét homme; en vn S. Estienne, qui
 estant lapidé par les Iuifs, a prié Dieu
 qu'il ne leur imputast point ce peché;
Act.
7. 60. en vn S. Paul, à qui les mal-heureux
 ont fait toute sorte de maux, & qui
 au lieu de leur en vouloir mal & de
 s'en ressentir, les a aimez avec tant de
 tendresse que mesme il estoit prest à

estre fait pour eux anatheme, & separé de Iesus Christ, s'il eust esté possible, afin qu'ils luy fussent vnis. C'est là la patience à laquelle nous exhorte ce grand Apostre, quand il nous prie de cheminer en toute humilité & douceur, avec vn esprit patient.

A quoy il joint le support charitable que nous nous deuons les vns aux autres, deuoir grandement necessaire en l'Eglise de Dieu. Car comme en vn bastiment toutes les pierres se soustiennent, & les premieres & plus grandes supportent dauantage: ainsi en doit-il estre en cét edifice spirituel. Ceux qui y tiennent le premier rang, soit en vertu, soit en science, soit en autorité, doiuent estre les plus supportans. En nostre corps, s'il y a du defect en quelqu'un des membres, les autres y remedient, estant qu'ils peuuent, & s'ils ne peuuent, pour le moins ils le couurent. Le pied est-il malade? La teste toute sublime qu'elle est, ne dédaigne pas de s'abaisser pour voir son mal, & pour luy en procurer le remede. Tout le corps se courbe pour le se-

*Rom.**9. 3.*

courir, les mains s'occupent à le servir; & si la douleur est bien grande, la bouche s'en plaint, & les yeux en versent quelquefois des larmes, parce que tous les interests des membres sont communs. *Soit que l'un d'eux souffre quelque chose, tous les autres souffrent avec luy; soit que l'un soit honoré, tous les autres s'en réjouissent.* Ainsi en devons nous faire les vns aux autres, comme estans tous le corps de Christ, & les membres les vns des autres: non pour applaudir aux crimes énormes, ou pour y con- niuer, ce seroit nous rendre complices des vicieux, & attirer sur nous la malediction de celuy qui ne condamne pas seulement ceux qui font le mal; mais ceux qui y consentent; mais pour condescendre aux humeurs de ceux avec qui nous viuons; considerans qu'elles peuuent estre fort differentes des nostres, sans estre pour cela mauuaises, cette difference naissant de la diuersité des temperamens, de l'education, de la nation, de l'aage, du sexe, & de la condition des personnes. Pour le temperament, les

vns

1. Cor.
12. 26.

les vns sont plus Saturniens, & les autres plus Iouiaux ; les vns plus lèts, & les autres plus prompts. Mais comme en la composition de nos corps, les quatre humeurs, quelques diuerses qu'elles soient, s'accordent bien ensemble, se temperants l'une par l'autre: ainsi en la société ciuile & Ecclesiastique la prudence & la charité nous doit faire entre-supporter, & contraindre en quelque façon nostre nature, pour nous rendre moins ennuyeux & plus agreables les vns aux autres. Pour l'education, les vns sont plus honestes & plus ciuilez, les autres ont des mœurs plus rudes & agrestes. Mais cette difference de mœurs ne regardant que la bien-seance, & n'estant que de l'ornement exterieur de la vertu, & non de l'interieur de son essence, les fideles ne s'y doiuent point arrester, ny s'empescher pourtant de viure ensemble comme vrais chrestiens doiuent faire, c'est à dire, avec amour & avec charité. Quant à la nation, chaque peuple a ses mœurs & ses façons de viure particulieres. Mais il y auroit de l'iniustice & de l'impossibilité

tout ensemble à les vouloir tous obliger à vne mesme maniere de vie ; & partant cela ne nous doit point dōner de dégoust ni d'auersiõ aux vns cōtre les autres. La charité doit estre plus forte que tout cela , & nous faire entr'aimer & entretolerer cōme membres d'un mesme corps , qui est le corps mystique de Iesus-Christ. Quāt à l'aage , les vieux sont plus seueres & plus chagrins , les jeunes au contraire plus gays & plus licentieux en leurs actions , & pourtāt ils ont de la peine à s'affortir ensemble, mais il est raisonnable qu'ils s'entresupportent ; les anciens excusans la licēce des jeunes , & les jeunes reciproquemēt la morosité des anciens. Car l'ancien doit dire en soy mesme , Autresfois i'estoy jeune aussi bien que ceux-cy , & j'ay biē eu besoin que les anciens ayent supporté mes excez ; il faut que j'vse de pareille indulgēce enuers ceux qui ōt maintenant ce que i'estois alors. Le jeune homme de son costé doit dire à part soy , lors qu'il se rencontre avec vne chagrine vieillesse, vn iour, si Dieu le veut, ie seray vieux aussi, & auray be-

soin que les jeunes supportēt mes humeurs, & donnēt quelque chose à mes cheueux blancs. Ce sont humeurs bigearres, mais l'aage est vénérable. Je dile mesme des conditions différentes. Les petits doiuent supporter avecques patiēce, & dissimuler par charité ce qu'il leur sēble y auoir de fier, d'arrogāt & d'insupportable en la hantise & en la conuersation des grands; & les grands semblablement tolerer ce qu'ils trouuent de vil, de messeant & d'importun dans les deportemens des petits. Que si outre ces choses qui ne regardent que l'exterieur de la conuersation, il y en a qui touchēt l'interieur de la consciēce, ie veux dire des vices & des pechez en ceux avec qui nous viuons, nous nous deuons représenter qu'il n'y a point de saincteté parfaite ni de vertu accōplie en ce monde. Le plus beau feu n'est point sās sa fumée; ni le meilleur vin sans sa lie. Nous auōs tous nos vices, & tel se plaint de ceux de ses freres qui en a de pires & en plus grand nōbre. Quand nous en aurīōs moins que nos prochains, toujours deuons nous reconnoistre que

nous n'en sommes point exempts. Comme nous auons besoin pour ce regard qu'ils vſent de ſupport enuers nous, auſſi en deuôs-nous vſer enuers eux. *Gal. 6. Freres, dit S. Paul aux Galates, 1. encor qu'un homme ſoit ſurpris en quelque faute, vous qui eſtes ſpirituels, ſupportez-le avec un eſprit de douceur, & vous conſiderez vous meſmes, que vous ne ſoyez auſſi tentez. Prenés les charges les vns des autres, & ainſi accompliſſez la loy de Chriſt.*

Cette loy de Chriſt c'eſt la charité, charité qui eſt le fondement, l'edifice, le comble de ſes commandemens, & de laquelle il nous dit en ſon Euan-
Jeh. 13. gile, Je vous donne un nouveau cōman-
34. 35. demēt, que vous vous aimiez l'un l'autre. A cela connoiſtra-on que vous eſtes mes Diſciples. Le Iuiſſe reconnoiſſoit autresfois au cordon de pourpre qu'il portoit en ſon veſtemēt; le Pharifien à ſes grāds phylacteres, le Philoſophe à ſon mâteau: mais le Chreſtien ſe reconnoiſt à la charité, cōme à ſon vray & propre caractere. C'eſt cette charité dōt l'Apoſtre nous fait la deſcription au 13. de la premiere aux Corin-

thiens en ces excellētes paroles, *Charité est d'un esprit patient, elle se mōstre benigne, elle n'vse point d'insolence, elle ne s'enfle point, elle n'est point de piteuse, elle ne pense point à mal, elle endure tout, elle croit tout, elle espere tout, elle supporte tout, & dont il reconnoist si bien l'excellence, l'vtilité, la necessité, au prix des autres qualitez qui estans separées d'auec elle pourroyent estre creües des vertus & des perfectiones, qu'il ne fait point difficulté de dire, Quand ie parleroy le langage des hōmes & des Anges, si ie n'ay point la charité, ie suis cōme l'airain qui resonne, & cōme la cymbale qui tinte. Quādbien i'auroy le don de prophetie & connoistroy tous secrets & toutes sciences, & quādi'auroy toute la foy, tellemēt que ie transportasse les montagnes, si ie n'ay point la charité, ie ne suis rien. Quand bien ie distribueroy tout mon auoir à la nourriture des pources, & que ie liureroy mon corps pour estre brusté, si ie n'ay point la charité, cela ne me profite en rien.*

Icy, mes freres, ie vous diray cela mesme que Iesus Christ disoit à ses *Ieh. 13. Disciples, vous estes bien heureux si. 17.*

dedās, duquel Chrestie la louange ne vient point des hōmes, mais de Dieu. Puis que vous estes participans de sa vocatiō celeste, allez où il vous appelle par son Euangile. Il ne vous appelle pas à ordure, mais à sanctification. Nettoyez-vous dōc de toute souillure de chair & d'esprit, pour suiuan la sanctificatiō en la crainte. Que le bon nō de Christ qui est reclamé sur vous, ne soit point à vostre occasion blasphemé parmi les infidelles : mais au contraire que les hommes voyans vos bonnes œuures, en prennent sujet de benir & de glorifier vostre Pere qui est és Cieux, & que par ce moyen l'entrée au Royaume eternal de nostre Seigneur & Sauueur soit abondamment fournie à vous & à eux.

Quand puis apres nous entēdons ce que l'Apostre nous prie de cheminer en toute humilité & douceur, avec vn esprit patient, supportans l'vn l'autre par charité, apprenōs à auoir d'humbles sentimens de nous mesmes, nous abaissans & nous ancantissans à l'exemple de nostre Sauueur, qui estant en forme de Dieu, a voulu estre veu

en forme de seruiteur, & estant égal à Dieu son Peren'a point dedaigné de s'égalcr aux plus chetifs des hommes, iusqu'à estre comme vn ver , & non comme vn homme. Imitons en cette vertu son Apostre , nous reconnoissans comme luy les plus grands de tous les pecheurs, & les moindres de tous les Saints , & auoüans que tout ce que nous auons de bien, nous l'auons de la grace & de la misericorde de Dieu. Quelque auantage que nous ayons receu de luy, & quelque rang que nous tenions dans le monde ou dans son Eglise , ne méprisons iamais nos freres. Les plus petits & plus contemptibles selon le monde, ne le doiuent point estre à nostre esgard , Car quels qu'ils soyent, & en quelle estime que les ayent les hommes estans enfans de Dieu , ils sont *les gens notables de la terre* & les *precieux ioyaux* du Seigneur. Leur chetive condition dans le monde les peut raualer au deffous de nous, mais en effect ils sont formez à vne mesme image que nous, rachetez par vn mesme sang , sanctifiez par vn mesme

Esprit, honorez d'un mesme Baptisme, adinis à vne mesme Table, & appelez à vne mesme gloire. Nous ne les saurions mépriser sans mépriser & Iesus Christ, qui est leur Chef, & le corps de toutel'Eglise, dont ils ont l'honneur d'estre membres aussi bien

Prou. comme nous. Car, comme dit le Sage

17.5. és Prouerbes, *celuy qui méprise le poure, deshonore celuy qui l'a fait.* Honorons le plustost en eux, & nous humilions au dessus des moindres,

nous rendans seruiteurs de tous pour l'amour de Christ. Montrons nous doux, traitables, benins & gracieux à tous ceux avec qui nous viuons,

Phil. que nostre debonnaireté soit connue à

4.5. tous hommes, que toute arrogance, toute fierté, toute aigreur, & toute violéce soit esloignée de nos mœurs,

& qu'on n'y voye que bonté, douceur, humanité, qui nous rende agreables à Dieu & aux hommes. S'il arriue à nos prochains de nous offenser,

souffrons-le pour l'amour de Dieu avec un esprit patiét, & leur pardonnons, comme nous voulons que nostre Seigneur nous pardonne, afin que

nous puissiōs dire en bonne conscience, comme nostre Maistre nous a appris, *Pardonne nous nos offenses, comme nous pardonnons à ceux qui nous ont offensés. Car si nous ne pardonnons aux Mar-* *6.15.*
hommes leurs offenses, nostre Pere ce-
leste ne nous pardonnera point les no-
stres. Si à l'heure que l'on nous fait ou
tort ou déplaisir, le feu de la colere s'é-
pend en nostre ame, que ce ne soit
qu'un feu de paille, & qu'un mesme
moment le voye s'allumer & s'estein-
dre. Que le Soleil ne se couche jamais
sur nostre courroux. Quand il nous
souvient que nos prochains nous ont
fait quelque injure, & que nos passiōs
nous sollicitent à la vengeance, que le
caractere de Dieu qu'ils ont, nous
retienne. Si on respecte les sauuegar-
des des Princes & leurs Palais, & si les
Payens mesmes ont espargné les
temples, les autels, & les images de
leurs Dieux en la terre de leurs en-
nemis au plus chaud de la guerre,
combien plus deuons-nous en la
personne de nos freres reuerer l'ima-
ge de Dieu, son Palais & son temple?
Nous lisons d'un Auguste qu'il par-

dōna aux habitās d'Alexādrie à cause de Serapis qui y estoit adoré, d'Alexādre qui l'auoit bastie, & du Philosophe Arius, qui la luy auoit recōmandée comme sa patrie: & ne pardonnerons nous point à nos freres pour l'amour du vray Dieu, de cette venerable main qui les a créez, & de nostre Seigneur Iesus Christ qui nous les recommande. Il n'y a nul qui ne loüe ce soldat qui ayant dit à Ioab qu'il auoit veu Absalom pēdu à vn cheſne, comme Ioab luy dit, *Si tu l'as veu, que ne l'as-tu tué? Et ie t'eusse donné dix* 2. Sam. 18. 11. *pieces d'argent & vne ceinture,* 12. 13. *luy re-
pliqua, Quand ie conterois en ma main
mille pieces d'argent, si ne mettroy-je
pas ma main sur le fils du Roy, car nous
auons bien entendu que le Roy t'a com-
mandé, cōme aussi à Abisai & à Ittai,
Prenez-garde au ieune homme Absa-
lon. Autrement i'eusse commis la scheté
au danger de ma vie. Car rien n'eust esté
caché au Roy, & mesme tu m'eusses esté
cōtraire. Il auoit deux raisons, c'estoit
le fils du Roy, & le Roy auoit defen-
du d'attenter à sa vie. Nous deuons
auoir le mesme respect alendroit de*

tous nos prochains. Car nous en auons les mesmes raisons. Ils sont enfans de Dieu , & il nous a defendu de les offenser. Quand il n'y auroit que cette qualite qu'ils ont d'estre les ouurages de Dieu, les images, les seruiteurs, les enfans , cela nous deuroit suffire pour nous contenir en deuoir : mais quand il y a vn commandement exprez & formel de ne leur point mefaire, mais de leur pardonner quand ils nous offensent, de les aimer, de benir, de prier Dieu pour eux, cela doit estre encor beaucoup plus puissant enuers nous pour estouffer tous les ressentimens que nous pourrions auoir contr'eux. Quand ton frere t'offense, ô Chrestien, ce n'est pas à sa personne qu'il t'en faut prendre, c'esteroit te prendre à Dieu mesme, c'est à sa passion, à sa maladie, au Diable auteur & instigateur de tout mal. Si vnegrosse fieure l'auoit mis en delire, & qu'il commist en cet estat quelque excez contre toy, à moins que d'estre aussi phrenetique que luy tu ne voudrois pas t'en venger, au contraire tu le plaindrois comme

souffrant beaucoup plus de mal qu'il ne t'en fait, & estant par là beaucoup plus digne de ta compassion que de ta colere. Et te vengeras-tu de luy s'il luy auient de t'offenser en l'accez d'une maladie beaucoup plus violente, plus dangereuse, & capable de le damner s'ils ne reuient à soy ? Au contraire comme l'eau froide iettée dans de l'eau bouillante en arreste tout à l'instant les bouillons : ainsi esteindras-tu, entant qu'en toy sera, l'ardeur de sa haine par la froideur de ta patience. S'il estoit auparavant ton ami, tu imputeras sa faute ou à ignorance, à inaduer-tance, à infirmité, ou à l'induction & seduction de tes malucillans, & en tout cas tu compenseras son injure presente avec ses bienfaits precedents. S'il estoit ton ennemi, tu tascheras plustost à le rendre capable de raison, & à gagner sa bien-vueillance qu'à imiter sa passion & à effaroucher sa malignité. Et de cette façon ou tu l'amenderas, & ainsi sauueras vne ame de mort, ou si sa passion est plus forte en luy que


le ressentiment de ta charité , Dieu
t'en fera raison , parce que pour
l'amour de luy tu ne te la feras
pas faite à toy mesme. Mais si ie
souffre ainsi aisément vn affront
ou vne injure qui m'aura esté fai-
te , tout le monde m'estimera vn
homme lasche & pusillanime. Tout
le monde ! O homme vrayment
lasche & pusillanime , & t'amuses-
tu encor à ce que le monde aucu-
gle , fol & insensé , auquel tu as re-
noncé si solennellement en ton Ba-
ptême , dira ou pensera de toy ,
comme s'il deuoit estre ton iuge , &
non pas toy le sien ! Aimes-tu donc
mieux , afin d'auoir son approba-
tion , adherer à ses sentimens & te
rendre complice de ses pechez pour
estre enuveloppé en vne mesme con-
demnation avec luy , qu'en imitant
la charité & la patience de ton Sau-
ueur , en estre recompensé dès cet-
te heure par la satisfaction de ta
conscience , & au siecle à venir par
vne beatitude immortelle. Mais en
supportant vne iniure , i'en attireray
plusieurs autres. Au contraire , dit

1. Pier. Saint Pierre , qui est-ce qui vous
3. 13. fera mal , si vous ensuivez le bien ?
Et quand à cette occasion il te faudroit endurer quelque mal , n'ois-tu pas le mesme Apostre qui dit , que
1. Pier. c'est en cela que Dieu prend plaisir que
2. 20. nous endurions patiemment le mal en
21. 22. bienfaisant , & que nous sommes
23. appelez à cela , veu aussi que Christ a souffert pour nous , nous laissant un patron , afin que nous ensuivions ses traces , lequel quand on luy disoit outrage , n'en rendoit point , & quand on luy faisoit mal , n'usoit point de menaces , mais se remettoit à celuy qui iuge iustement ? Mou-lons nous tous à ce saint exemple , mes freres , & nous formons avec tout le soin qu'il nous est possible , à cette patience Chrestienne , nous pardonnans les vns aux autres , & nous supportans respectiuement en nos infirmités & en nos defauts. Cela est difficile à la chair , qui bouillonne d'impatience aussi tost qu'on la pique , & qui ne peut rien endurer. Mais c'est à mortifier cette chair avec toutes ses passions

passions que nous nous deuons exercer, afin qu'estant comme cloüée à la croix de nostre Sauueur elle ne puisse plus se soufleuer ny se mutiner contre Dieu, contre son commandement, contre son Esprit, ny nous porter a aucun mouuement de vengeance contre nos prochains. Trauailions à cela, chers freres, & nous addonnons de tout nostre cœur à cette sainte charité que Iesus-Christ par son Apostre nous a si fort recommandée. Aimons nous tous les vns les autres, *non point de parole & de langue, mais d'œuvre & de verité*, pourchassans l'auantage, le contentement, l'honneur & le salut de nos freres, avec autant d'integrité & d'ardeur que le nostre propre. O que nostre condition seroit heureuse, fidelles, si nous viuions de la façon! Car n'estans tous qu'un cœur & vne ame, nostre vie sur la terre seroit vne image de celle que menent les Anges au ciel, entant que nous viurions comme eux, sans passion, sans trouble, sans animosité, sans rancune, dans vne paix & dans vne tranquillité eternelle. Ces bien-heureux esprits qui nous

gardent, & qui obseruent toutes nos actions, en feroient ravis d'aïse, nous serions en exemple & edification à tous les fideles, les aduersaires memes nous en admireroient, & nous en porteroient enuie, disant de nous comme les Payens disoient des Chrestiens au siecle de Tertullian, *Voyez comme ils s'aymēt, & comme ils sont tous prests à mourir l'un pour l'autre; & ce qui est le principal, Dieu y prendroit vn tel plaisir, qu'il n'y auroit sorte de benediction ny de grace qu'il n'espan-dist en toute abondance sur nous, ius-qu'à ce qu'il nous en donnast dans son Paradis les recompenses qu'il y a preparées aux ames humbles, debonnaires, patientes & charitables. Mais ce bien ne nous peut venir que de sa pure grace, comme c'est de luy seul*
Jac. 1. 17. que descend tout don parfait, & toute bonne donation. Prions-le donc de toutes les affections de nos ames qu'il nous donne son S. Esprit, qui bannisse du milieu de nous toute haine, enuie, cholere, appetit de vengeance & autres passions semblables, qui empeschent que nous ne viuions avec

L'unanimité fraternelle qui doit estre
entre vrayz Chrestiens, & y establisſe
& faſſe regner la vraye charité, par
laquelle nous ſoyons faits vn les vns
auec les autres, & tous enſemble auec-
ques luy, par Ieſus-Chriſt noſtre Sei-
gneur, auquel auec le Pere & le ſainct
Eſprit ſoit honneur, gloire, benedi-
ction & louange és ſiecles des ſiecles;
Amen.



S E R M O N

DE LA

C O N C O R D E,


Sur ces paroles de l'Apostre S.
Paul au 4. chap. de l'Epistre
aux Ephesiens.

Vers. 3. Estans soigneux de garder l'unité d'esprit par le lien de paix.

4. Il y a un seul corps & un seul esprit, comme aussi vous estes appelez en une seule esperance de vostre vocation.

5. Il y a un seul Seigneur, une seule Foy, un seul Baptisme.

6. Un seul Dieu & Pere de tous, qui est sur tous, & parmy tous, & en vous tous.



N T R E plusieurs marques tres-assurées qui distinguent le bon & legitime Prince d'auecques le Tyran, les plus excellents auteurs de la Politique remarquent particulièrement celle-

y, comme l'une des principales, que le Tyran qui se deffie de ses sujets, de peur qu'ils ne tournent la pointe de leurs passions contre luy, la tourne contre eux-mesmes; & par toute sorte d'artifices excite entre eux des partialitez, des noises & des contentions, par lesquelles il fait qu'ils s'acharnent les vns contre les autres, & qu'ils s'entremordent & s'entredeffirent: au lieu que le bon Prince qui ne respire que le salut de son Estat, & le repos de ses sujets, entretient autant qu'il peut parmy eux la paix & la concorde. C'est la difference qui est entre la domination injuste & inhumaine de Satan, & le benin & equitable gouvernement de Dieu. Le Diable qui est vn tyran, ne travaille qu'à nous tenir en discorde, pour nous ffoiblir & nous perdre nous-mesmes par nous-mesmes. Dieu au contraire, qui est nostre legitime Monarque, nous appelle par tout à la paix, nous recommande sur toutes choses, & veut qu'estans liez ensemble par la charité, qui est le lien de perfection, & Coloss. 3. donnans à la paix le principal lien en 14. 15.

nos cœurs, nous nous entretenions les vns avec les autres non seulement comme citoyens d'une mesme ville, ou comme enfans d'une mesme famille, mais comme membres d'un mesme corps, qui sont tous animez par un mesme esprit. C'est à quoy il a exhorté les fidelles sous l'ancien Testament, leur loüant la concorde, comme une chose extremement plaisante & souverainement profitable, & leur disant par son Prophete,

Psal. 133. O que c'est chose bonne & plaisante de voir les freres s'entretenir ensemble. C'est comme cette huyle precieuse qui est espendue sur la teste d'Aaron, & qui découle sur sa barbe & sur le bord de son vestement, & comme la rosée d'Hermon, & celle qui descend sur les montagnes de Sion. Car l'Eternel a là ordonné benediction & vie à toujours. Sous le Nouveau il l'a fait encore plus souvent & plus expressément par le ministere de ses Apostres, & spécialement de S. Paul, comme vous le voyez en diuers lieux de ses escrits. Car au lieu qu'au temps de son ignorance le Diable se seruoit de luy comme d'un organe

hoisi pour rauager & dissiper le troupeau de nostre Seigneur, depuis la conuersion à la Foy nostre Seigneur s'en est seruy comme d'un instrument d'eslite pour conseruer & unir ce mesme troupeau par le lien d'une sainte concorde & d'une amitié fraternelle. C'est à quoy ce diuin Apôstre traueille particulièrement en ce texte, où en suite de ce qu'il uoit dit aux Ephesiens, *Je vous prie, soy le prisonnier au Seigneur, que vous cheminiex dignement comme il est seant la vocation à laquelle vous estes appelez, avec toute humilité & douceur, avec un esprit patient, supportant l'un autre en charité. Il les exhorte, & tous les fidelles en leur personne, à entretenir l'unité d'esprit par le lien de la paix, & leur en donne pour raison, qu'il y a un seul corps, & un seul esprit, & une seule esperance de leur vocation, un seul Seigneur, une seule Foy, un seul Baptisme, & un seul Dieu & pere de tous, qui est sur tous, & parmy tous, & en eux tous. Ce qui sera pour le matin, moyennant la faueur de Dieu, le sujet de nostre exercice. Car*

*Matth. 5:
23. 24.*

nous n'auons pas creu qu'il fust necessaire à l'occasion de la participation au saint Sacrement, à laquelle Dieu nous conuie, d'interrompre le cours de nos Sermons sur ceste Epistre, & de laisser ce texte pour en prendre vn autre, parce que comme nostre Sauueur dit en l'Euangile, *Si tu apportes ton offrande à l'autel, & là il te souuient que ton frere a quelque chose contre toy, laisse là ton offrande, & t'en vas pour t'accorder avec ton frere, & alors offre là*: Ainsi auons-nous estimé que ce seroit vne preparation fort conuenable à l'usage de ce Sacrement, que de vous exposer en l'examen de ces paroles de l'Apostre l'obligation qu'ont tous vrayes Chrestiens à la paix & à la concorde avecques leurs prochains, afin que renoncans de bon cœur à toute sorte de debats, de querelles & de procez, & vous despouillans de toute haine & de toute animosité, vous vous puissiez presenter à sa Table d'une façon qui luy soit agreable, & que vous y receuiez comme de sa main le Sacrement de nostre paix, pour vostre consola-

ion & pour vostre salut.

En ces paroles l'Apostre fait deux choses. Il nous enseigne premièrement le deuoir que Dieu requiert de nous, en ces mots : *Estans soigneux de garder l'vnité d'esprit par le lien de la paix.* Et puis il nous met en auant les principaux motifs qui nous y doiuent obliger, quand il dit : *Il y a vn seul corps & vn seul esprit, & vne seule esperance de nostre vocation, vn seul Seigneur, vne seule Foy, vn seul Baptisme, & vn seul Dieu & Pere de tous, qui est en tous, & parmi tous, & en vous tous.* L'vnité dont il parle n'est autre chose que l'uniō que les personnes qui composent le corps de l'Eglise ont les vnes avec les autres, & toutes ensemble avec Iesus-Christ, & par Iesus Christ avec Dieu. Mais il vse plustost du mot d'*vnité* que de celuy d'*union*, pour monstrier d'un costé combien cette conjunction des fideles de toute nation, de tout aage, de tout sexe, & de toute condition doit estre intime, n'estant pas comme de diuerses personnes iointes en vne mesme societé, mais comme de plusieurs membres

composans ensemble le corps d'une
mesme personne; & de l'autre, com-
bien elle est necessaire à la compo-
sition & à la subsistence de cette bien-
heureuse Communauté. Car comme
l'estre & la perfection des corps natu-
rels consiste en l'union de leurs par-
ties; laquelle venant à se dissoudre, ils
perdent avec elle non seulement leur
forme & leur beauté, mais leur force
& leur vie: ainsi en est il de toutes les
societez, soit Civiles, soit Ecclesiasti-
ques, qui sont entre les hommes.
L'union les conserue & les fait subsi-
ster, & la desunion les dissipe & les
perd. Mais il nous faut sçauoir quelle
est la nature de cette union, pour ne
nous y méprendre: Car il y en a de
diuerfes sortes, soit és choses com-
munes de la vie, soit specialement en
celles de la Religion, qui ne sont ny
agrecables à Dieu, ny dignes des fi-
delles. Il y a des gens, pour exem-
ple, qui par vne conspiration detesta-
ble s'accordent contre Dieu & con-
tre son Christ, comme Herode & Pi-
late: & ceux dont il est dit au Pseaume
deuxième, *Pourquoy se mutinent les*

ations, & les peuples projettent choses
aines? Pourquoi se trouvent en person-
les Roys de la terre, & les Princes con-
ultent ensemble contre l'Eternel & con-
e son Oinēt? Ou qui se liguent con-
e son Eglise, comme ceux desquels
Asaph dit au Pseaume 83. Ils ont con-
ulté ensemble contre ton peuple, & ont
it, Venez, & les destruisons, tellement
u'il ne soit plus fait mention du nom
Israël. Ils ont consulté ensemble d'un
esme courage, & ont traité contre
oy. Les tentes des Idumeens des Is-
naélites, des Moabites & des Hagariës.
Les Guebalites, les Hammonites, les Ha-
nalecites & les Philistins avec les habi-
ans de Tyr. Assur aussi s'est joint avec
ux, ils ont serui de bras aux enfans de
Lot. Confederation execrable, telle
que celle des renards de Samson liez
ensemble pour mettre le feu dans les
bleds, ou que celle de ces dragons
dont les anciens escriuent qu'ils tra-
uersent le Golfe Arabique, pliez en-
semble en forme de clayes & de ra-
deaux, pour aller rauager & infecter
de meilleurs pasturages. D'autres s'al-
ient pour le ieu, pour la gourman-

dise & pour l'yurongnerie , qui est vne conjunction sensuelle & brutale, semblable propremēt à ces iumeaux prodigieux , qui estans separez par tous les autres membres , ne sont liez que par le ventre. D'autres s'associent par artifice , pour se tromper plus aisément l'un l'autre par de feintes caresses , & par des demonstrations infidieuses d'amitié. Il y a d'autres vnions qui semblent plus saintes, entant qu'elles regardent le culte de la Diuinité, mais qui en effect ne valent pas mieux , comme sont celles des personnes ou qui sont vnies en l'exercice d'une Religion superstitieuse & charnelle , & qui n'a point esté instituée & dictée par le saint Esprit , ou qui se joignent en la profession de la vraye , mais en la profession seulement , entant qu'ils se trouuent en vn mesme temple , qu'ils oyent mesmes Presches , qu'ils chantent mesmes Pseaumes , qu'ils communient à vne mesme Table , & qui n'ont point pourtant de vraye liaison ny de foy avec nostre Seigneur Iesus-Christ , ny de charité les vns avec les autres.

Toutes ces sortes d'vnions sont vicieuses & maudites de Dieu. Celle qui luy est agreable, où il a ordonné benediction & vie à tousiours, & dont l'Apostre nous recommande que nous soyons soigneux de l'entretenir, est l'une toute autre nature. C'est, dit-il, *l'unité d'esprit*, c'est à dire une vnion si intime qu'elle merite plustost le nom l'unité que celui de simple vnion; une vnion en choses spirituelles & diuines; une vnion procurée & faite par le saint Esprit; une vnion qui fait que les fideles adorent tous un mesme Dieu, qu'ils reconnoissent tous un mesme Sauueur, qu'ils soient tous membres d'une mesme Eglise, qu'ils croyent tous une mesme doctrine de verité, qu'ils seruent tous Dieu *d'une mesme espaulle*, comme il est dit en *Soph. 1. 9.* *Concordie*, qu'ils vivent tous comme freres & comme membres les uns des autres: & en un mot, comme il est esmoigné des premiers fideles qui estoient en Ierusalem, qu'ils ne sont tous *qu'un cœur & une ame.* *Act. 4. 32.*

C'est l'unité qu'il veut qu'ils entretiennent par le lien de paix, c'est à

dire par cette humeur debonnaire & paisible, qui fait qu'ils se supportent les vns les autres, que s'il leur est arriué par mesgarde ou par infirmité humaine des'offenser l'un l'autre, ils se pardonnent respectiuellement, qu'ils fuyent toutes querelles & tous debats, qu'ils viuent en concorde & en amitié, sans enuie, sans fiel, sans animosité, sans aigreur, sans appetit ny mouuement de vengeance, comme de vrayes colombes & de vrayes brebis. Et certes c'est le vray moyen de conseruer cette tant precieuse vni-té. Car ce qui fait qu'encor que nostre Seigneur Iesus-Christ nous ait par la Predication de son Euangile assemblez en son Eglise cōme en vn corps, nous n'y auons pas l'vnion des cœurs, des sentimens & des affections que nous deurions auoir pour viser tous à mesme fin, & respirer tous mesme zele à la gloire de Dieu, à l'auantage general de l'Eglise, au bien & au salut de nos freres, aussi bien comme au nostre propre, comme estans tous membres les vns des autres: c'est cette humeur aigre, fiere, contentieuse

& impatiente qu'ont la plus-part des hommes, qui ne regardans qu'à leurs intérêts & à leurs passions, veulent que tout le monde s'accommode à elle, & ne se veulent accommoder à personne, prennent tout en mauvaise part, mesme les paroles & les actions les plus innocentes, sur le moindre soupçon ou dissentimēt s'acharment de leurs prochains, s'esmeuvent contr'eux pour la moindre injure qu'ils pensent en auoir receuë, & estans vne fois esmeus ont mille peines à s'appaiser. C'est ce qui de temps en temps a causé les schismes, & bien souvent en suite des schismes les heresies, avec vne infinité de desordres & de malheurs en l'Eglise de Dieu, comme nous l'apprenons par l'histoire de tous les siècles, & pleust à Dieu que nous n'en vissions point au nostre tant de funestes & de lamentables effets comme nous en voyons. Voila pourquoy l'Apostre recommande si fort aux fidelles la paix, la concorde, la debonnaireté, la douceur & la patience, dont nostre Sauueur nous a donné tant de beaux preceptes en

son Euangile, & vn si accomply patron en soy-mesme, afin qu'elle soit le lien & comme le ciment de leur vnité spirituelle. Estans soigneux, dit-il, de garder l'vnité d'esprit par le lien de paix. Remarquez, ie vous prie, qu'il ne dit pas simplement *gardans*, mais, *estans soigneux de garder*; parce que bien souuent nous rompons cette sainte vnion par inaduertance, par nonchalance, & par indifferēce enuers le prochain, n'ayans pas la prudence & la charité que nous deurions auoir pour prendre garde à ce qui pourra luy dōner sujet d'offense ou de scandale, & pour l'euitier, & nous estudier à luy plaire aux choses bonnes & aux indifferentes. Il nous monstre donc par ce terme que l'vnité de l'esprit est vn bien si precieux & si important à l'Eglise de Dieu & à tous les fidelles, qu'ils doiuent s'abstenir avec vn grand soin, ie ne dy pas de la violer tout à fait, mais de faire aucune action, ou de dire aucune parole qui puisse l'interesser tant soit peu, & qu'au contraire ils doiuent trauailler à en reserrer de plus

plus en plus les liens, & pourchasser
ces choses qui sont de paix & d'edifi-
cation mutuelle, selon l'exhortation
qu'il leur en fait luy-mesme au 14. de
l'Épistre aux Romains.

Ce nom de *Paix* est si aimable, &
l'effect en est si absolument necessai-
re, que quand la remonstrance par la-
quelle il nous y exhorte ne seroit for-
mée d'aucune raison, la chose porte-
roit sa persuasion d'elle-mesme. Mais
parce que les passions déraisonnables
des hommes leur font bien souvent
oublier & leur deuoir & leur bien
tout ensemble, & qu'il voyoit sans
coute en l'Eglise d'Ephese des par-
alitez & des contentions dangereu-
ses, contre lesquelles elle auoit besoin
d'estre premunie par de puissantes
exhortations à concorde & à charité
eternelle, il n'a pas creu deuoir
craindre sa peine à leur représenter
les plus considerables motifs qui les y
deuoient animer. *Il y a vn seul corps,*
et il, & vn seul Esprit, comme aussi
vous estes appelez à vne seule esperance
vostre vocation. Il y a vn seul Sei-
neur, vne seule Foy, vn seul Baptisme,

Vn seul Dieu & Pere de tous, qui est sur tous, & parmi tous, & en vous tous. Il dit premierement qu'il y a *vn seul corps*, entendant par ce corps toute l'Eglise vniuerselle, qu'il a appellée *cy-deuant le corps de Christ, & l'accomplissement de celuy qui accomplit tout en tous* : & le disant n'estre qu'un, parce qu'encor que cette Eglise vniuerselle soit composée de plusieurs Eglises particulieres, & chacune de ces Eglises de beaucoup de personnes, neantmoins elles ne sont qu'un, entant qu'elles n'ont & ne recognoissent toutes qu'un Chef, qui est nostre Seigneur Iesus, de la seule influence duquel elles reçoient tous les sentimens & les mouuemens de la vie spirituelle. Qui est vne consideration & vne metaphore tres-propre à son dessein. Car il nous veut montrer par là que comme au corps humain ni la multitude des parties dont il est composé, ni la diuersité de leurs temperamens & de leurs fonctions, ni la varieté des humeurs qui y sont, n'empeschent point l'vnité du corps, ni n'en troublent point l'harmonie,

orce qu'elles sont jointes les vnes
ix autres avec vne merueilleuse sa-
esse, que l'une tempere les qualitez
e l'autre, que les membres s'entr'ay-
ent, s'entresupportent & s'entre-
courent l'un l'autre, & qu'il n'y en
aucun qui possede ses propres auan-
ages, ni qui exerce ses propres fon-
ctions pour son particulier seulemēt,
que chacun contribuē ce qu'il a de
propre au bien de tout le corps &
de chacun des autres membres : ainsi
n l'Eglise de Dieu ni le grand nom-
bre des fidelles qui la composent, ni
la diuersité de leurs complexions, de
leur sexe, de leur aage, de leurs vo-
cations & de leurs emplois ne doi-
ent point empescher qu'ils ne s'en-
tr'ayment & s'entr'aydent, & qu'ils
se vivent en vne fort bonne corres-
pondance les vns avec les autres,
communiquans à toutes les necessi-
tez des Saints, les assistans de toute
leur puissance au temporel & au spi-
rituel, compatissans à toutes leurs
douleurs, & se réjouïssans en leurs
joies de tous les auantages & de tou-
tes les ioyes qui leur arriuent, comme

n'estans tous qu'un en Iesus-Christ nostre Seigneur. C'est le mesme argument dont il se sert à mesme intention, Rom, 12. & 1. Cor. 12.

A cela il ajousté vne seconde consideration, qui esclaireit & fortifie grandement la premiere, c'est que comme il n'y a qu'un seul corps, il n'y a aussi qu'un mesme Esprit. Pour viure de la vie naturelle nous auons chacun vne ame en particulier; & pourtant estans distinguez l'un de l'autre & de corps & d'esprit, ce n'est pas chose estrange si nous auons nos inclinations, nos mouuemens & nos interests separez en ce qui est des choses de cette vie. Mais pour viure de la vie spirituelle & diuine, tous les saints n'ont ensemble qu'un mesme Esprit; si bien que ce seroit chose non moins prodigieuse que nous eussions des jalousies, des enuies, des animositez & des haines les vns contre les autres, que si on voyoit les membres d'un mesme corps, & qui ne se meuvent que par la vertu d'un seul & mesme esprit, duquel ils sont tous animez, se bander & roidir les vns con-

re les autres , & se blesser & déchirer
 vn l'autre. Cet Esprit là est l'Esprit
 le Dieu , Esprit procedant eternelle-
 ment du Pere & du Fils , qui est don-
 né à tous les fideles , & habite en
 eux comme en ses temples , pour les
 regenerer , les illuminer , les sancti-
 fier , leur tesmoigner qu'ils sont en-
 fans de Dieu , leur donner accez à
 son thrône , les faire crier Abba, Pe-
 re , & produire en eux & par eux tou-
 te sorte de bonnes œuvres. Et cet
 Esprit n'est qu'un. Car quant à ce
 qu'au premier & quatriesme chapi-
 tres de l'Apocalypse il est appelé *les sept Esprits* *Apoc. 1. 4.*
qui sont devant le thrône , ce *Es 4 5.*
 n'est pas pour le diuiser en sept per-
 sonnes , mais en partie pour monst-
 rer la plenitude & la perfection de ses
 graces , plenitude & perfection que
 l'Ecriture designe d'ordinaire par le
 nombre de sept , & en partie pour fai-
 re allusion ou aux sept titres qui luy
 ont donnez en l'onzieme chapitre
 d'Esaïe, où il est appelé *l'Esprit de l'E-* *Esaï. 11. 2.*
ternel , *l'Esprit de sagesse & d'intelligen-*
ce , *l'Esprit de conseil & de force* , *l'Es-*
prit de science & de crainte de l'Eternel ,

ou aux sept branches ou lampes du châdelier d'or qui estoit au lieu saint, chandelier auquel elles ne tenoiēt pas par additiō, par liaisō, ou par soudure, mais estoient tirées de son corps mesme, comme cela nous est représenté au 25. d'Exode, ou en fin aux sept Eglises d'Asie, dont il estoit là question, pour leur signifier que la vertu estoit aussi capable de remplir chacune d'elles des graces nécessaires à son salut, que s'il estoit en pareil nombre qu'elles, ou que si chacune l'auoit pour elle seule. Autrement l'Ecriture enseigne constamment par tout que c'est vn seul & mesme Esprit qui opere en toute l'Eglise, & en tous les fidelles qui la composent: ce qu'elle nous propose & ailleurs & particulièrement en ce lieu pour vne induction puissante à concorde. *Soyez soigneux,* dit l'Apostre, *de garder l'vnité d'Esprit par le lien de paix*, c'est à dire, d'estre toujours bien vnis en mesmes sentimens & en mesmes affections, comme n'estans tous ensemble qu'un corps, qui est animé par vn seul Esprit. *Comme aussi*, adiouste-il, *vous estes*

*appelez à vne seule esperance de vostre
 vocation, c'est à dire, à vn mesme
 salut, lequel il appelle Esperance,
 comme aussi au premier de l'Epistre
 aux Colossiens il l'appelle l'esperance
 qui nous est reseruee au ciel, parce que,
 comme il est dit, Rom. 8. Nous ne som-
 mes sauuez encore que par esperance.
 Dieu, veut-il dire, vous a tous desti-
 nez par vn mesme conseil, & vous
 appelle tous par vn mesme Euangile
 à la participation d'un mesme herita-
 ge, de cét heritage incorruptible, qui ne ^{1. Pier. 1. 4.}
 se peut contaminer ny flestrir, & qui est
 conserué es cieux pour vous, duquel
 vostre Sauueur vous dira au iour de
 son apparition glorieuse, Venez les ^{Matt. 25.}
 benits de mon Pere, possedez en heritage ^{14.}
 le Royaume qui vous a esté preparé dès la
 fondation du monde.*

Vous y aspirez tous par vn mesme
 desir qu'il vous inspire à tous par son
 Esprit, & y tendez tous par vne mes-
 me voye, en laquelle il vous a tous
 nis. Ne seroit-ce pas chose bien ab-
 surde qu'ayans tous esté appelez par
 vne mesme grace, cheminans tous
 par vne mesme voye, qui est appellée

la voye de paix , tendans tous à vn mesme but , & ayans tous à demeurer eternellement en vne mesme gloire, vous vinsiez à vous quereler & à vous entrebattre ? Partant ce que Ioseph disoit à ses freres reconciliez comme ils s'en alloient tous en vne mesme

Gen. 45. 24. Canaan vers leur pere commun, *Ne vous debattez point en chemin :* Je vous le dis à tous avec beaucoup plus de sujet , soyez soigneux en ce chemin de garder l'vnité d'esprit par le lien de paix. Vne mesme pretension bien souuent diuise les hommes , au lieu de les vnir. Car ou plusieurs aspirent à vn bien qui ne peut estre possedé que par vn seul , comme plusieurs Princes à la Royauté , ou mesmes plusieurs Roys à la Monarchie vniuerselle ; & alors chacun d'eux ne pense qu'à debusquer son compagnon par voyes justes & injustes ; où ils pretendent à vn bien diuisible , mais dont chacun possede d'autant moins qu'il y a plus de gens à y prendre part ; & alors chacun fait aux autres la plus petite part qu'il peut , pour en auantager la sienne , & mesme fait tous ses efforts pour

à exclurre les autres tout à fait, & demeurer seul possesseur du tout. Et c'est de là quenaissent tant de procès dans les familles, tant de diuisions dans les villes, tant de guerres dans les Estats. De vostre esperance, Chrétiens, il n'en est pas ainsi. L'heritage qui vous est promis, est vn bien indissoluble de sa nature. La multitude de vos coheritiers ne diminuëra point vostre part. Chacun le possedera tout entier sans enuie, sans querelle, & sans contention, & ne tirera pas moins de contentement & de gloire du contentement & de la gloire de ses prochains que de sa propre felicité, parce que vous vous regarderez tous les vns les autres avec les yeux d'une vraye charité. Je dis bien plus, & le dis avec verité & à vostre grande consolation, vous multiplierez vos ioyes à la proportion de vostre nombre, & chacun de vous se tiendra autant de fois beatifié comme il aura de compagnons de sa beatitude. O douce & agreable esperance, quand te verrons nous accomplie, & les douleurs dont tu nous entretiens aujour-

d'huy changées en celles de la iouyffance d'un si glorieux heritage! Comme vous le fouhaittez tous, Chrétiens, tafchez à vous en rendre dignes en gardant l'vnité d'efprit par le lien de paix. *Bien-heureux font les pacifiques*, dit Nofre Seigneur Iefus-Christ, *car ils feront appelez enfans de Dieu*; & *fi enfans, donc heritiers, heritiers, dis-je, de Dieu, & coheritiers de fon Fils*, en l'vnion eternelle de tous les Saints.

Confiderez de plus, que vous auez tous *vn mefme Seigneur*. Si vous feruiez à diuers Princes, qui euffent chacun fon Estat, fes loix, & fes deffeins à part, & qui mefme fe fifsent la guerre les vns aux autres; ce ne feroit pas chofe efrange que vous combatiffiez les vns contre les autres, & que vous ne peuffiez vous accorder. Mais vous n'aez tous qu'un feul Seigneur, qui eft nofre Sauueur Iefus-Christ, que Dieu vous a donné à tous pour Chef & pour fouuerain Prince, qui vous regit tous par mefmes loix, qui vous commande à tous mefmes chofes, & qui vous recommande à tous la paix

et la concorde, comme la chose du monde qui luy est la plus agreable, & moyennant laquelle il vous promet de vous ottroyer toutes les choses dont vous consentirez sur la terre. Il y a des Maistres qui ont pour maxime, à l'exemple du vieil Caton, de tenir toûjours leurs domestiques en dissention & en pique les vns contre les autres, parce qu'ils ont leur amitié suspecte, & apprehendent qu'ils ne voyent de trop bon accord pour leur nuire. Nostre Seigneur Iesus n'en fait pas ainsi à l'endroit des siens. Il ne les traite point en maistre comme quelques meschans esclaves, desquels il craigne les conspirations contr'euy, & qu'il soit necessaire pour son service de tenir diuisez; mais en pere comme ses enfans, ou mesme en chef comme ses membres, desquels il connoist la fidelité & l'affection cordiale, & lesquels il est expedient pour sa gloire aussi bien que pour leur propre salut d'entretenir en bonne intelligence. Vous ne sauriez faire de plus grand plaisir à vn si bon Seigneur, ny rien plus digne de l'honneur que vous

avez d'estre ses sujets & ses seruiteurs, que d'estre toûjours bien ensemble, pour le servir tous d'un mesme courage, le prier tous avec vne mesme intention, chanter tous ses loüanges avec vn mesme zele, & vous tenans les vns les autres comme par la main, vous auancer d'un mesme pas en la voye de son Royaume par l'estude & par l'exercice de toutes les vertus Chrestiennes. Gardez-donc entre vous cette tant precieuse vnion avec toute sorte de soin, afin de luy estre agreables, & d'attirer sur vous tous, en commun & en particulier, sa benediction & la paix.

Les diuerses Religions bien souvent diuisent les hommes, & les font passer aisément du dissentiment des esprits à l'alienation des volonte, & des altercations de paroles aux anathemes & aux excommunications, & de là quelquefois aux seditions, aux guerres & aux massacres : le Diable qui est l'auteur de toutes les faussetes, les commettant entr'elles, & les bandant toutes contre la vraye. Vous n'avez pas ces causes de dissension en,

re vous, car vous avez tous *une mesme* foy, & tenez tous *une mesme* doctrine, vn mesme moyen de salut, vn mesme objet que vous croyez & que vous adorez. Comme vous estes d'accord au principal, soyiez-le aussi en tout le reste. Que cette foy commune par laquelle vous conspirez tous en la creance d'un mesme Euangile, engendre en vous *une* commune charité, par laquelle vous vous aimez & vous embrassiez les vns les autres. Que la Religion qui vous lie tous avec Dieu, vous lie aussi les vns avec les autres, & vous joigne si estroittement qu'il n'y ait ruse ni effort ni des hommes ni des demons qui soit capable de fausser ni de rompre vostre vnion. Qu'il ne vous arriue iamais ni pour les choses de la Religion de faire schisme dans l'Eglise, de dresser autel contre autel, & de déchirer par vos passions la robe sans cousture de nostre Seigneur Iesus-Christ, sous quelque pretexte que ce puisse estre; ni pour les affaires de cette vie de vous attacher tellement à vos interests, que vous veniez à rom-

pre avecques vos prochains, & à vous aliener d'eux: mais faites voir en toutes choses & en toutes rencontres par l'entretien d'une sainte correspondance entre vous la verité & l'efficace de la foy, par laquelle nostre Sauveur, l'auteur & le centre de vostre vnion, habite en vos cœurs.

Vous avez tous *vn mesme Baptisme*, vn mesme lauement de vostre regeneration, par lequel vous avez tous esté entez en Iesus-Christ nostre Seigneur, tous incorporez en son corps mystique, tous receus en l'alliance de la grace, tous nettoyez de vos pechez, tous consacrez à vne mesme sainteté, & par vne seule & mesme formule, au nom du Pere, du Fils, & du saint Esprit. Comme vous avez tous mesmes liurées, mesmes symboles & mesmes Sacremens, ayez tous aussi mesmes cœurs, mesmes affectiōs & mesmes volontez. Que les feux de vos haines, de vos enuies, de vos animositez & de vos coleres s'esteignent tous dans cette eau sacrée; que cette diuine liqueur soit vn baume qui ferme & consolide toutes les playes par

esquelles Satan, qui est l'esprit de noirceur, de partialité, de dissension & de discorde, pouuoit iusques icy vous auoir diuisez. Ne regardez point aux differences qui peuuent estre entre vous quant à la nation, à la vocation, au sexe & autres telles choses. Car vous tous qui estes baptisez, estes reue- *Gal. 3. 27. 28.*
lus de Christ, là où il n'y a ny Iuif, ny Grec, ny seif, ny franc, ny masle ny femelle. Car vous estes tous en Iesus-Christ. Respectez donc vostre Baptisme, & entretenez cette vunité là de tout vostre pouuoir.

Representez-vous en fin que vous estes tous enfans de Dieu par la foy qui est en Iesus-Christ, & qu'il y a vn seul Dieu & Pere, qui est en tous & parmy tous, & en vous tous. Autres-fois quand vous estiez detenus dans les erreurs & dans les tenebres du Paganisme, vous croyiez & adoriez plusieurs Dieux. Car autres estoient ceux d'un peuple, & autres ceux d'un autre. L'un tenoit le party des Grecs, & l'autre celuy des Troyens; l'un combattoit pour Rome, & l'autre pour Carthage. Il y auoit selon les

fictions de vos beaux Theologiens,
 qui estoient les Poëtes, des partiali-
 tez & des dissensions entr'eux: com-
 ment n'y en eust-il eu parmy vous?
 Mais maintenant que l'Evangile vous
 a ouvert les yeux, & vous a fait claire-
 ment reconnoistre qu'il n'y a qu'un
 seul Dieu, qui est vostre Pere com-
 mun, comment pouvez-vous ou for-
 mer des schismes, ou nourrir des pro-
 cez & des querelles parmy vous, sans
 offenser vn si bon Pere, qui n'a rien
 tant à cœur que l'union de sa famille,
 & l'amitié mutuelle de ses enfans?
 Remarquez bien, mes freres, qu'il
 ne dit pas seulement, il y a vn seul
 Dieu, mais, *vn seul Dieu & Pere de*
tous, l'appellant Pere non à l'esgard
 de tous les hommes en tant qu'il les
 a tous formez à son image, ou mes-
 me de toutes les choses du monde
 en tant qu'il est leur Createur, au
 mesme sens qu'il est dit *le Pere de*
la pluye & de la rosée: mais à l'es-
 gard de ceux auxquels il enjoint de
 garder l'unité d'esprit par le lien
 de la paix, comme ne faisans tous
 qu'un seul corps, estans animez par
 vn

106.38.18.

vn seul Esprit, estans appelez à vne
mesme esperance, reconnoissans vn
mesme Seigneur, embrassans vne
mesme Foy, & ayans receu vn mes-
me Baptesme. Car comme c'est à eux
seuls qu'il donne ce glorieux tiltre
de ses enfans, aussi est-ce pour eux
seuls qu'il prend en ce lieu cette aimable
qualité de Pere, entant que c'est
luy qui les engendre à la vie nouuelle
et diuine par la semence incorrupti-
ble de sa Parole, & par la vertu viui-
uante de son Esprit. Et c'est en ce sens
qu'il faut prendre aussi ce qu'il adjou-
te immediatement apres, *qui est sur
vous, & parmi tous, & en vous tous* :
est à dire, sur vous tous, parmi vous
tous, & en vous tous. Par où il signi-
fie qu'il y a vn seul Dieu qui domine
sur tous les fidelles, qui les gouuerne
par son autorité, qui les couure
de sa protection, qui opere en
eux tous comme au sujet qu'il s'est
choisi pour l'exercice ordinaire de sa
grosse & de sa bonté paternelle, &
qui habite en eux tous par sa grace,
comme vn pere dans sa famille. C'est
consideratiō dont se seruoit autres-

Malach. 2.
10.

Gen. 13. 8.

Act. 7. 16.

fois Malachie pour obliger les Israélites à l'exercice de la charité, de la iustice & de la loyauté, qui doit regner entre les enfans d'un mesme pere, & les membres d'un mesme Estat, & d'une mesme Eglise. *N'avez-vous pas tous un mesme Pere ? Un seul Dieu ne vous a il pas creés ? Pourquoi se porte deloyamment un chacun contre son frere, en violant l'Alliance de nos peres ? C'est celle que tous vrais fidelles doivent auoir deuant les yeux, pour vivre en la famille de Dieu comme ses vrais enfans, & comme freres les uns des autres, se disans l'un à l'autre, toutes les fois qu'il se presente quelque occasion de debat comme Abraham disoit à Lot, *Je te prie qu'il n'y ait point de debat entre toy & moy, car nous sommes freres.* C'est ce que remonstroit Moysse aux Hebreux qui se quereloient en Egypte, *Hommes, vous estes freres. Pourquoi faites-vous tort l'un à l'autre ?* Ce que si tous les Chrestiens consideroient comme ils doiuent, il n'y auroit iamais parmy eux de malveillance, de querelle, ni de procez : mais vne paix & vne concorde perpe-*

uelle, qui les feroit viure dessus la terre, comme les Anges viuent dedans le ciel.

Voila, chers freres, le sens des paroles de nostre Apostre. O si nous estions aussi disposez à les pratiquer, qu'il nous est facile de les entendre, que nous serions heureux ! Quelles douceurs, quels contentemens, quels plaisirs nous apporteroit cette vnion spirituelle, si nous l'entretentions comme nous deuons par le lien de paix ! Representez vous, ie vous prie, chacun en son particulier, ce que ie vay vous dire. Vous voyez bien cette grande assemblée, en haut, en bas, leuant, derriere, à vos costez. Si vous ces fidelles que vous voyez, vous ymoient tellement, & estoient liez avec vous par vn si estroit lien de charité qu'ils estimassent vos interests estre les leurs propres, qu'ils s'éjouissent de vos biens autant que vous mesmes, qu'ils pleurassent vos maux d'aussi chaudes larmes que vous, & qu'ils priaissent Dieu pour vostre bonheur avec la mesme ardeur qu'ils pourroient faire pour la leur, & que

vous de vostre costé leur correspon-
dissiez en amour, que vous fissiez tous
efforts pour les surmonter, & que
vous joignissiez vos vœux avec les
leurs pour voler au ciel de mesme aile,
& demander à Dieu leur salut avec-
ques le vostre; se peut-il rien imagi-
ner de plus doux que seroit vne telle
vie? Et outre la satisfaction que vous
en receuriez en vos ames, combien en
seroit grand le profit? Premièrement
vous vous prevaudriez du conseil, de
l'adresse, de la faueur, du credit, des
moyens, & de l'assistance les vns des
autres. Tout ce que vos malveillans
ont de pouuoir, d'industrie, & de dex-
terité pour vous faire du mal, ils l'em-
ployeroient à vous faire du bien, &
ainsi toutes les machines destinées à
vostre ruine seroient conuerties à vo-
stre auantage. Cette hydre de pro-
cez qui va renaissant tous les iours,
s'accroissant de ses pertes, & se forti-
fiant de ses playes, & qui fait perdre si
mal-heureusement à ceux qui en sont
trauaillez, non seulement la plus
grande partie de leur temps, mais le
plus clair de leurs moyens, & ce

ui leur doit estre plus cher que tout, le repos mesme de leurs mes, seroit tout à fait retranchée. Les guerres, où les hommes quittant leur nature pour prendre celle des bestes sauvages, font gloire de tuer des hommes, & qui avec tant d'excez de fureur vont dépeuplant la terre pour peupler les enfers, après auoir bien tourmenté la terre, cederoient à la paix, leur barbarie à sa douceur, leur orage à son calme, & leurs miseres à ses felicitez. On n'orroit plus ny conuices ny mocqueries, ny de nous contre nos prochains, ny de nos prochains contre nous. La médifance cesseroit, & avec elle tous les faux esmoignages, tous les malicieux rapports, & toute cette sorte de fascheux propos qui enaigrissent si souuent, & qui vlcèrent si auant nos esprits. Nous n'aurions plus que faire de nous garder les vns des autres, mais passerions doucement nostre vie en l'exercice de nos vocations, nous entr'aydans par vn soulagement reciproque. Et ce qui est le principal, nous seruirions Dieu beaucoup plus puissamment,

• nous nous animerions les vns les autres à la pieté, à la charité, à toutes sortes de vertus & de bonnes œuvres. Et icy & dans nos maisons nous priërions nostre commun Pere d'une commune ardeur. Et alors quels efforts pensez-vous que fissent nos vœux, quand ils feroient tous emanez de mesme affection, tous animez de mesme zele, & tous tendans à mesfin; & qu'ainsi joints ils s'en iroient tesmoigner à Dieu dans le ciel nostre deuotion & nostre charité? Si tous ces feux particuliers venoient à se conjoindre en vn, quel en feroit l'embrasement? Alors le ciel ne verseroit sur nous que benedictions & que graces, & nostre terre nous seroit veritablement vne terre décollante de lait & de miel, ie veux dire de charité & de toute douceur.

A quoy tient-il, mes freres, que nous ne iouissions de ce bon-heur là? Au lieu que nos enuies, nos haines, nos médifances, nos malices, nos coleres & nos appetits de vengeance nous font passer la vie parmi tant d'espines & d'amertumes, & causent tant

de troubles & de scandales en l'Eglise de Dieu, qui est souvent contrainte de se plaindre de la douleur de ses entrailles, & de dire comme Rebecca en sentant ses deux iumeaux lutter en son ventre, *Si cela est, & pour- Gen. 25. 22.*
quoy suis-je ? Car s'il faut regarder les Eglises entieres, n'est-ce pas vne chose extremement scandaleuse d'en voir vn si grand nombre que Dieu a retirées aussi bien que nous de l'ignorance & de la superstition au temps de nos peres, se tenir depuis si long temps separées d'auec nous pour quelque difference de sentimens en vn point ou deux de doctrine, & que ce schisme soit entretenu par la passion de ceux qui deuroient auoir plus de disposition à la paix, & plus de soin d'y disposer les autres ? Ce nous est certes vne grande douleur, de souffrir vne telle solution de continuité en nostre corps. Les parties mortifiées par la gangrene endurent sans ressentiment leur separation d'auec les saines & viuentes. Mais quant à nous, qui sommes membres viuens de ce corps, nous ne pouuons voir nos

freres s'esloigner de nous , sans en auoir vn fort sensible déplaisir, pour le trouble que cela donne à l'Eglise de Dieu , & pour l'obstacle qu'il apporte au cours de l'Euangile. Toutesfois en cette douleur nous auons dequoy estre satisfaits en nostre conscience, de ce que nous les auons toujourns recherchées de reconciliation & de paix , & n'auons oublié aucun office de charité pour guerir cette grande aigreur qu'elles ont contre nous , & pour obtenir d'elles que nous puissions seruir Dieu tous ensemble d'une mesme affection & d'un mesme zele. Car Dieu nous est tesmoin du cuisant déplaisir que nous ressentons de cette separation , & du desir ardent que nous auons qu'il nous donne de voir en nos iours les playes de Sion guerries, & ses dispersions ralliées sous les enseignes de nostre commun Redempteur. Et s'il faut parler de nous en particulier , & nous esprouuer & examiner, selon le commandement de l'Apostre, auant que nous presenter à la sainte Table à laquelle Dieu nous conuie , qu'y verrons-nous qui

ne nous fasse baisser les yeux, & qui ne nous couvre de honte & de confusion devant Dieu ? Nous voyons les uns qui se tourmentent & se confusent par procès, au lieu de se faire raison l'un à l'autre, & s'ils ne peuvent convenir ensemble à cause que la passion de leur propre interest les aveugle, de s'en remettre au jugement de leurs communs amis. Nous voyons les autres qui se querellent sur des occasions de neant, & qui nourrissent de cruelles inimitiez pour quelques petites injures que l'un a reçues de l'autre, ou qu'il pretend fausement en avoir reçues. Nous voyons entre des freres & des parens des haines plus aspres, plus violentes & plus irreconciliables qu'entre des estrangers. Nous voyons des maris & des femmes qui sont en perpetuelle division & querelle, au grand ennuy de tous ceux qui leur appartiennent, au scandale de leurs voisins, & ce qui est le pis, au diffame de la vraye Religion. Nous voyons les autres qui sans inimitié ni querelle avecques leurs prochains, vivent avec eux en

indifference, qui les regardent d'un œil ou de mépris, s'ils les croient estre moins qu'eux, ou d'enuie s'ils s'imaginēt qu'ils ayent quelque avantage sur eux, qui en médisent dedans les compagnies; & qui, s'ils sont liez d'amitié avecques les autres, ne le sont que par des liens ou d'intérest, ou de plaisir, entretenans entre-eux vne vnion toute sensuelle & charnelle, & pour des considérations purement mondaines: & nul presque qui soit soit soigneux de garder véritablement l'vnité d'esprit par le lien de paix, & par vne charité Chrestienne.

D'où nous vient vn si grand malheur? Est-ce que nous ne sachions pas ce qui est de nostre deuoir? Mais ce Temple mesme où nous nous assemblons tous les jours de Presche de tous les endroits de la ville, & des lieux voisins, pour y estre faits participans d'une mesme grace, comme nous nous assemblerons tous vn jour de tous les endroits de la terre pour entrer avec nostre Chef en son temple celeste, & pour y estre faits iouis-

ans d'une mesme gloire, ne nous
 enseigne-il pas assez? Et tout ce que
 vous y venons faire, ne nous y pres-
 che-il pas le mesme deuoir? Nous y
 yons la Parole de Dieu, où tous les
 Prophetes & tous les Apostres nous
 demonstrent que Dieu n'habite point
 dans le feu & dans la tempeste, mais
 dans le son coy & subtil; que qui veut ^{Pse. 34. 13. 15.}
 voir longue vie & voir du bien, doit ^{1. Pier. 3. 10.}
 chercher la paix & la poursuiure; que ^{11.}
 le fruct de justice se sème en paix pour ^{laq. 3. 18.}
 ceux qui s'addonnent à la paix; où ils
 exhortent à despoiller toute malice, ^{1. Pier. 2. 1.}
 toute fraude, toute enuie & detraction, ^{Es. 1. 22.}
 & à nous aimer les uns les autres affe-
 ctueusement d'un cœur pur; où Iesus-
 Christ luy mesme nous dit, Je vous ^{leb. 13. 34. 35.}
 donne un nouveau commandement, que
 vous vous aimiez l'un l'autre, comme ie
 vous ay aimez. A cela connoistra-on
 que vous estes mes Disciples, si vous vous
 aimez l'un l'autre; où nostre grand
 Apostre nous crie, Ayez un mesme ^{Rom. 12. 18.}
 sentiment les uns avec les autres, s'il se ^{19.}
 peut faire, entant qu'en vous est, ayez
 paix avec tous hommes; Ne rendez à
 personne mal pour mal, Ne vous vengez

Col 3. 12. 13.
14. 15.

point vous mesmes, mes bien-amez, mais donnez lieu à l'ire, & soyez comme élus de Dieu, saints & bien-amez, revestus des entrailles de benignité, d'humilité, de douceur, d'esprit patient, supportans l'un l'autre, & pardonnans les uns aux autres, comme Christ vous a pardonné. Soyez unis par charité, qui est le lien de perfection, & que la paix de Dieu tienne le principal lieu en vos cœurs; à laquelle vous estes appelez en un corps. Après cela comment nous osons-nous quereller, ou garder quelque mal-talent contre nostre frere? Nous y faisons nos prieres à Dieu, où nous luy disons tous ensemble, *Nostre Pere qui es es Cieux.* Nous nous reconnoissons donc pour freres, & pourquoy vivons-nous comme des ennemis? Luy disans tous par vne seule bouche, *Pardonne nous nos offenses, comme nous pardonnons à ceux qui nous ont offensez.* Comment tesmoignons-nous tant de ressentiment des injures que nous avons reçues de nos freres, & comment en recherchons-nous avec tant de passion la vengeance, comme si nous

voulions inciter Dieu à se venger
aussi de celles qu'il reçoit tous les
jours de nous ? Nous y disons tous en
nostre Symbole , *Je croy la sainte
Eglise vniuerselle , & la communion des
saincts*. Comment donc, si nous som-
mes saincts , auons-nous si peu de
communion de paix & de vraye cha-
rité les vns avec les autres ? Nous y
entendons reciter & les commande-
mens du Pere , & l'abregé que le Fils
en a fait , qui porte , *Tu aimeras le
Seigneur ton Dieu de tout ton cœur, &
ton prochain comme toy-mesme*. Com-
ment dōc auons-nous si peu d'amour
l'un pour l'autre , & comment pour
nos particuliers interests nous diui-
sons-nous si facilement ? Nous y chan-
tons les Pseaumes de Dauid tous d'v-
ne mesme voix , comme ravis de la
douceur , de la charité & de l'vnani-
mité fraternelle , *O combien est plai-
sant & souhaittable de voir ensemble
en concorde amiable freres vnis s'entre-
tenir* ! Comment cette diuine Musi-
que ne chasse-elle dū milieu de nous
ces demons, de haine, d'enuie, de co-
lere , de malice & d'appetit de ven-

geance qui nous agitent, comme autresfois elle a chassé de Saül le mauvais esprit qui le tourmentoit ? Nous y voyons administrer le Baptême, par lequel nous sommes tous entez en Christ les vns apres les autres pour n'estre qu'un en luy. Comment apres cela nous diuisions-nous si malheureusement les vns d'auec les autres, & par consequent d'auec luy ? Dieu nous y conuie tous à vne mesme Table, qui est la Table sacrée de son Fils, afin qu'y mangeans tous d'une mesme viande spirituelle, y beuuans tous d'un mesme breuuage spirituel, qui est le corps & le sang mesme de ce grand Redempteur, nous viuions tous d'une vie, & que comme dit nostre Apostre 1. Cor. 10. nous soyons tous faits *vn mesme pain*; c'est à dire, que comme outre l'union naturelle que les grains de bled ont ensemble, entant qu'ils sont tous de mesme nature, & qu'ils sont joints en vn mesme champ & en vn mesme espi, union telle qu'ils ne laissent pas d'estre distinguez les vns d'auec les autres, chacun d'eux ayant son escorce

& sa propre enuelope, ils en ont vne beaucoup plus estroite, quand estans separez de leur bale, dépouillez de leur peau, mis en farine & pestris tous ensemble, au lieu qu'auparauant ils estoient plusieurs grains singuliers, ils cessent d'estre singuliers, & deuiennent vn seul & mesme pain tous ensemble : ainsi outre la conjunction que nous auons entant qu'hommes, freres', parens, concitoyens ; conjunction qui n'empesche pas que quāt à la chair & au monde nous n'ayons toũjours nos interests separez, nous en ayons vne beaucoup plus intime, entant que fidelles & regenerez par l'Esprit de Christ, qui dompte, froisse, mortifie toutes les affections de nostre chair, nous despoille de toutes les passions de nos interests charnels & mondains, & nous vnit si bien ensemble que nous ne cherchons plus ce qui est à nous mesmes, mais ce qui est à autrui, & n'auons plus que le seul interest commun de la gloire de Iesus - Christ & du bien de l'Eglise, comme ne faisons tous ensemble qu'vn seul corps & vn seul Esprit. Ce

n'est donc pas faute d'instruction que nous entretenons si mal cette tant nécessaire vnion, veu que les Saints Prophetes, les bien-heureux Apostres, nostre Seigneur Iesus-Christ mesme, ce Temple en fin, & cette Chaire nous l'enseigne si hautement. Et quand il n'y auroit que cette Table où nostre Sauueur nous conuie tous à vn banquet commun, comme personnes reconciliées par lui avec Dieu, & les vnes avec les autres, si nous la regardions avec les yeux que nous deuons toutes les fois qu'elle est dressée deuant nous, elle deuroit suffire à nous l'apprendre, & à nous y porter. Car quoy? seroit-il dit que les Grecs sur vn seul aduis de leur faux Oracle, eussent esteint autrefois tous les feux qui estoient en tout leur pais, comme ayans esté contaminez par les barbares, & en fussent allé prendre du pur & du net en la ville de Delphes sur leur commun autel; & que nous sur tant d'aduertissemens de la Parole de Dieu, le vray Oracle des Chrestiens, ne peussions nous resoudre à estouffer
les

feux prophanes de nos haines & nos coleres, & en nous approchant de la Table comme de nostre autel commun, à y allumer en nos cœurs feu pur & sacré de la vraye charité hrestienne, pour viure de là en avant en vne bonne & sainte concord?

D'où vient donc que nous nous acquittons si mal d'un dévoir auquel tant de raisonnables motifs nous obligent? Certes de ce que la Parole de Dieu entre bien dans nos oreilles, mais ne descend point dedans nostre cœur; que nous receuons bien les saints Sacremens, mais que nous n'en considerons point la nature, excellence & la fin; que nous voulons bien suiure nostre Seigneur Iesus, mais non à la condition qu'il requiert de nous, qui est de renoncer à nous-mesmes, à nostre amour charnel, à nos particuliers interests, aux passions & aux conuoitises de nostre chair. Ce sont ces conuoitises & ces passions-là qui nous diuisent les vns les autres, qui font que la predication du saint Euangile, & la connoissan-

ce de Iesus - Christ demeure infructueuse en nous , & qui empeschent que la charité ne puisse prendre racine dans nostre cœur , & que la paix de Dieu , qui y deuroit tenir le principal lieu , ne s'y establisse. Partant, chers freres , si nous sommes vraiment amateurs du salut de nos ames , & desireux de bien faire nostre profit de cette exhortation de l'Apostre , & de ce saint & salutaire Sacremēt auquel Iesus-Christ nous conuie, retranchons tout presentement avec le glaive de l'Esprit ces maudites racines de nos discordes & de nos malveillances , & les ayans toutes coupées , faisons de tout cela , ie dis de l'amour de nous mesmes , de nos conuoitises , de nos passions , de nos procez , de nos querelles , de nos rancunes , & de nos appetits de vengeance , vn tas & vn bucher , & avec le flambeau de l'amour de Dieu & de la vraye charité mettons y tellement le feu que la flamme en monte iusques au ciel , que les Anges élus s'en réjouissent avec nous , comme du plus agreable spectacle qu'ils puissent auoir sur la terre , & que Satan

voyant bruler à sa honte toutes ces
ernicieuses semences de dissensions
& de haines qu'il auoit jettées parmy
ous, s'en aille cacher tout confus
ans les plus noires tenebres de son
nfer. O que ce sera là vn digne feu
e ioye dont nous honorerons la vi-
toire & la resurrection glorieuse de
ostre Redempteur ! O qu'il le verra
olontiers du palais de sa gloire ! O
ue ce sera bien veritablement faire
ostre bon-jour, jour tout de paix,
out d'amour, tout de charité, tout
e contentemēt & de ioye ! Car apres
ela toutes ces affections turbulentes,
ui bruyans dedans nous nous empes-
hoyent d'ouyr la voix salutaire de
ostre Dieu, estans entieremēt amor-
es, nous l'orrons avec des ames pai-
bles, & en recueillirons des fruiets
nestimables tant pour la consolation
e nos ames que pour la sanctification
le nos vies. Les prieres que nous luy
erons, leuans les mains pures à luy
n tout lieu, sans ire & sans question,
& le prians avec des ames deuotieuses
& charitables tout ensemble pour
ous mesmes & pour nos freres, se-

Esa. l. i. 15.

1. Cor. 5. 7. 8.

ront receuës de luy comme vn parfum de tres-souëue odeur ; au lieu qu'il a en execration celles qui luy sôt faites par des ames pleines de haine, leur disant par la bouche de son Prophete, *Quant vous multiplierez vos requestes, ie ne les exauceray point, car vos mains sont pleines de sang.* Les Pseaumes que nous luy chanterons en son temple, tous d'une mesme affectiõ aussi bien que d'une mesme voix, feront vne Musique tres-harmonieuse dans ses oreilles. Toutes les fois qu'il nous appellera, comme vous voyez qu'il fait aujourd'huy, à faire la feste de nostre Pasque, c'est à dire de Iesus-Christ, qui a esté sacrifié pour nous, nous la ferons en la maniere qui seule luy est agreable ; non avec vieil leuain, ni avec leuain de mauuaistié & de malice, dont nous nous serons entierement repurgez, pour estre faits vne nouvelle paste, mais avec des pains sans leuain, de sincerité & de verité ; nous nous presenterons à sa Table avec assurance, pour avecques des cœurs d'agneaux participer à l'Agneau de Dieu, avec des ames charitables à celuy qui est la

Charité mesme, & y receurons avec
 es symboles & les gages de son Al-
 iance, sa chair & son sang mesme en
 nourriture de vie eternelle. Toutes
 nos œuures, comme estans parfumées
 & aromatisées de cette diuine charité
 en laquelle il prend tant de plaisir, luy
 seront rendues agreables, & attire-
 ront sur nous ses plus saintes & plus
 precieuses benedictions. Alors, com-
 me autresfois les Apostres *estans tout* AA. 2. 1.
en vn accord en vn mesme lieu, le saint
 Esprit descendit sur eux, & les rem-
 plit de ses dons admirables; nous
 voyant disposez de mesme en vne
 mesme Eglise, il descendra de mesme
 sur nous, & nous comblera de ses gra-
 ces. Alors les saints Anges que nous
 auons & pour gardes de nos person-
 nes & pour spectateurs de nos actions,
 nous garderont avecques soin, &
 nous regarderont avecques respect,
 comme nous reconnoissons verita-
 blement pour membres de leur Mai-
 tre. Alors serons-nous redoutables CANT. 6. 10.
 tous les demons de l'enfer, comme
 une armée qui bien vnies en elle mes-
 me & rangée en belle ordonnance,

marche à enseignes déployées. Alors se respandra par tout par le moyen de nostre charité & de nostre concorde la bõne odeur de l'Euangile & de l'Eglise de nostre Seigneur Iesus-Christ. Alors en fin l'Eglise, dont nous auons l'honneur d'estre membres, sera vne vraye Ierusalem, où l'on ne verra rien que paix, ou plustost vn vray Paradis; où nous commencerons à viure comme font les saincts Anges, à nous sentir exempts des passions qui troublent & agitent les autres hommes, & à goûster les auantages & les douceurs de cette paix que Dieu a establie en ses hauts lieux, iusqu'à ce qu'effectiue-ment il nous recueille selon ses promesses en la beatitude immortelle de son Royaume.



S E R M O N

TROISIÈSME,

Sur ces paroles de l'Apostre S.
Paul au 4. chap. de l'Epistre
aux Ephesiens.

Verf. 7. *Mais la grace est donnée à chacun de nous selon la mesure du don de Christ.*

Verf. 8. *Pour laquelle chose il dit, Estant monté en haut il a mené captive grande multitude de captifs, & a donné des dons aux hommes.*

Verf. 9. *Or ce qu'il est monté, qu'est-ce autre chose sinon que premierement il estoit descendu és parties les plus basses de la terre?*

Verf. 10. *Celuy qui est descendu est le mesme qui est monté sur tous les cieux, afin qu'il remplist toutes choses.*



O v sauez oüy cy-deuant,
freres bien-aimez au Sei-
gneur Iesus, nostre diuin
Apostre sollicitant les fi-
delles à la concorde, & leur disant,

G iij

Soyez soigneux de garder l'unité d'Esprit par le lien de paix. Il y a vn seul corps & vn seul Esprit, & vne seule esperance de nostre vocation. Il y a vn seul Seigneur, vne seule foy, vn seul Baptisme, vn seul Dieu & Pere de tous, qui est sur tous, & parmi tous, & en vous tous. C'estoit les exhorter à la chose la plus agreable & la plus fructueuse qui se puisse trouuer sur la terre, dont le Prophete au Pseaume 133. l'accomparoit à cette onction precieuse dont on oignoit le souuerain Sacrificateur sous la Loy, & à la rosée qui coule sur les montagnes de Sion & d'Hermon, & qui les rend fertiles en tous biens; & les y obliger par des motifs tres justes, & qui deuoient estre de fort grand poids enuers eux. Car qu'y a-il de plus raisonnable que de voir ceux qui sont membres d'vn mesme corps, & animez d'vn mesme esprit, s'entretenir en bonne intelligence; ceux qui sont appelez à vne mesme esperance de gloire, y aspirer avec vn mesme zele; ceux qui ont vn mesme Seigneur, le seruir d'vn mesme courage; ceux qui

professent vne mesme foy , exercer vne mesme charité ; ceux qui ont esté consacrez par vn mesme Baptisme , auoir mesmes affections aussi bien que mesmes liurées ; ceux qui ne reconnoissent & n'adorent qu'un mesme Dieu , conspirer tous vnanimement à sa gloire ? Mais parce qu'entor qu'ils conuiennent en toutes ces choses , ils disconuiennent en beaucoup d'autres , ayans & diuerses graces de Dieu , & diuerses vocations en l'Eglise, selon qu'il plaist à nostre Seigneur Iesus-Christ, qui en est le souverain Prince, de les leur departir : ils eussent peu penser que comme ces conuenances là leur estoient des argumens puissans à vnion ; aussi toutes ces disconuenances-cy leur pouuoient seruir de raison sinon pour autoriser leurs querelles , au moins pour excuser en quelque façon la diuersité de leurs sentimens ; il entreprend icy & aux versets suiuians de monstrier premierement que c'est nostre Seigneur Iesus qui selon son autorité & sa sagesse a distribué d'en haut à ses saints ces vocations & ces graces avec cette

diuersité & inégalité; Secondement, qu'il les a ainsi diuerfement partagez non pour les diuifer, mais pour les vnir tant plus estroittement, en les rendant plus vtilés & plus nécessaires les vns aux autres, & pour faire que l'harmonie qui resulteroit de ces diuerses voix, & de ces differents instruments, fust tant plus admirable. De ces deux considerations il expose la premiere en ce Texte, & il expliquera la seconde aux versets suiuaus, comme vous l'entendrez cy-apres. Pour nous tenir à la premiere, qui doit estre pour ce matin le sujet de nostre meditation, il monstre icy aux fideles d'Ephese que tout ce qu'ont de grace ou les Pasteurs ou les particuliers en l'Eglise, ils l'ont selon qu'il plaist à Christ, qui est le souuerain œconome & dispensateur des graces de son Pere, le leur mesurer à chacun; & puis il le confirme par ces paroles du Psalmiste, *Estant monté en hant il a mené captiue grande multitude de captifs, & a donné des dons aux hommes;* lesquelles il explique de Iesus-Christ & de la distribution qu'il fait de ses

graces à tous les saints depuis qu'il est monté à la dextre de Dieu. Or ce qu'il est monté, dit-il, qu'est-ce autre chose sinon qu'il estoit descendu és parties basses de la terre? Celuy qui est descendu, c'est le mesme qui est monté sur tous les cieux, afin qu'il remplist toutes choses.

Ce mot de *Grace* dont il use, signifie tous les dons spirituels & naturels dont Dieu gratifie tous les fideles, toutes les charges dont il honore les Ministres, & tous les succez fauorables qu'il donne à leurs labeurs il appelle tout cela *Grace*, afin que les fideles soit Ministres, soit particuliers, ne s'enorgueillissent point en eux-mesmes, de peur qu'il ne leur soit dit, *Qu'as-tu que tu n'ayes receu? Et si* 1. Cor. 4. 7. *tu l'as receu, pourquoy t'en glorifies-tu, comme si tu ne l'auois point receu? mais qu'ils rapportent tout le bien qu'ils ont à la bonté gratuite de Dieu, disans avec son Apostre, Par la grace de* 1. Cor. 13. 10. *Dieu ie suis ce que ie suis. Ce n'est pas moy, mais la grace de Dieu qui est avec moy. De cette grace il dit qu'elle n'est pas toute conferée à vn seul, mais*

qu'il en est donné vne certaine mesure à chacun. Car Dieu pratique en la grace la mesme chose qu'il a obseruée en la Nature. Il n'a pas fait le monde tout d'vne piece. Il l'a fait de plusieurs parties de fort inégale condition; les vnes spirituelles, les autres corporelles; les vnes simples, les autres mixtes; les vnes hautes & illustres, les autres basses & obscures; les vnes incorruptibles & permanentes, les autres corruptibles & successives, afin que dans cette agreable variété la sagesse, *qui est diuerse en toutes sortes*, se puisse tant plus distinctement reconnoistre. Au ciel il a mis plusieurs astres, mais fort differents l'un de l'autre en eleuation, en grandeur & en gloire. Car, comme dit l'Apostre, *autre est celle du Soleil, autre celle de la Lune, & autre celle des estoilles.* Il a fait de la terre vn seul element, mais distingué en diuers climats, à chacun desquels il a donné quelque commodité & quelque auantage, qui ne se trouue point aux autres. Ainsi en l'Estat, où tout vn peuple est rangé sous vn seul Monarque, il y a trois

Eph. 3. 10.

1. Cor. 15. 41.

ordres, chacun desquels se sousdiuise encore en diuers degrez, & en diuerses qualitez & vocations, & toutes tendantes à mesmes fins; qui sont le seruice du Prince & le bien general. En la famille il y a plusieurs qualitez, de mari & de femme, de pere & de mere & d'enfans, de maistres & maistresses, & de seruiteurs & seruantes, à chacune desquelles il a assigné sa propre fonction & sa propre vertu, pour l'auantage de toute la maison. En nostre corps finalement il nous fait voir vne composition merueilleuse de plusieurs membres, qui tous ensemble ne font qu'un tout, & neantmoins ont chacun son temperament, sa quantité, sa figure, sa situation & son operation speciale. Il en a fait de mesme à l'Eglise, qui est le corps, la famille, l'Estat & le nouveau monde de Iesus-Christ. Il luy a eslargy plusieurs graces, & mesmes plusieurs vertus extraordinaires & miraculeuses; mais il les a distribuées en sorte que comme il n'y a iamais eu aucun qui se peust glorifier de les auoir toutes, & de se pouuoir passer des autres

membres: aussi n'y en a-il aucun qui ait sujet de se mescontenter, comme n'ayant pas assez de part à sa beneficence, & estant inutile aux autres. Chacun d'eux a receu son rang & sa propre vertu, & ce non pour son particulier seulement, mais pour l'edification & pour le bien de tous les autres. Et pourtāt il n'y doit point auoir entr'eux, non plus qu'entre les membres d'un mesme corps, d'enuie, de contention, de mespris, ni de ialousie; mais vne d'autant plus grande vnion que par cette dispensation des diuerses graces de Dieu tous les autres membres nous sont necessaires, & nous semblablement à eux, comme l'Apostre le remonstroit aux Romains au 12. de son Epistre, & aux Corinthiens au 12. de sa premiere. Cette dispensation là il l'attribuē ailleurs à toutes les trois personnes également, comme quand il dit à ceux de Corinthe, *Il y a diuersité de dons, mais il y a vn mesme Esprit; diuersité d'administrations, mais vn mesme Seigneur; diuersité d'operatiōs, mais vn mesme Dieu qui opere toutes choses en tous.* Icy il

s'arreste à Iesus-Christ seul. *La grace, dit-il, est donnée à chacun de nous selon la mesure du don de Christ, c'est à dire, selon qu'il plaist à nostre Seigneur Iesus-Christ la luy mesurer. Car comme au monde le Soleil est celuy qui donne aux astres cette clarté brillante qu'ils nous renuoyent icy bas, qui forme en l'air les vents, les pluyes, & autres meteores, qui donne les fleurs à nos jardins, les fruiets à nos vergers, & les moissons à nos campagnes, qui fait naistre les perles au fonds des mers Orientales, qui enrichit de mines d'or les terres d'Occident, qui fait vegeter dans les roches les diamans & autres pierres precieuses, & en vn mot, qui communique à toutes les parties de la Nature tout ce qu'elles ont de lumiere, de grace, de beauté, de sentiment, de mouuement, & de vie : aussi nostre Seigneur Iesus, vray* *Mal. 4. 2.*
Soleil de Iustice, & Orient d'en haut, com- *Zach. 6. 12.*
me l'appellent les Prophetes, est celuy *Luc. 1. 78.*
par qui Dieu distribuë toutes ses gra-
ces à son Eglise, comme ayant esté
institué de Dieu, heritier de tout, & *Mat. 28. 18.*
ayant receu toute puissance au ciel &

1eb. 17. 2. en la terre, & authorité sur toute chair, afin qu'à tous ceux que le Pere luy a donnez, il donne la vie eternelle. Il a receu la grace du Pere, & nous la receuons de luy, mais avec grande difference. Car quant à luy, qui est le Christ, il est dit, que Dieu ne luy a point donné l'Esprit par mesure, parce qu'il falloit qu'il eust en soy vne parfaite plenitude de toute grace, afin que de sa plenitude nous puissions tous puiser grace sur grace : mais quant à nous, nous le receuons tellement de luy, comme Chrestiens, c'est à dire, participans à son onction, que ce n'est qu'en certaine mesure telle qu'il luy plaist nous la departir, plus grande ou moindre, selon que le requiert ou le salut de chacun de nous, ou l'edification commune de son Eglise. Et c'est ce que l'Apostre entend quand il dit que la grace est donnée à chacun de nous selõ la mesure du don de Christ.

Mais pourquoy est-ce qu'il allegue cela sur le sujet de l'vnion & de la bonne intelligence qui doit estre entre les fidesles ? C'est parce qu'une grande partie des contentions & des diuisions

diuisions qui estoient alors parmy eux, venoit de ce que Dieu ayant estably en l'Eglise diuerses fonctions, & departy à ses seruiteurs plusieurs sortes de graces ordinaires & extraordinaires, il arriuoit souuent que ceux qu'il employoit aux principales charges s'en rendoient fiers contre leurs freres qui auoient de moindres employs, & que ceux qui en la distribution de ses dons se trouuoient plus auantageusement partagez, s'en donnoient de la vanité, & mesprisoient ceux qui en auoient receu moindre part. L'un s'enorgueillissoit de ce qu'il auoit plus de sçauoir, plus d'eloquence ou plus d'adresse en la cõduite de l'Eglise, l'autre de ce qu'il auoit receu de plus grands dons miraculeux, soit pour la prophetie, soit pour les langues, soit pour les guerisons; l'autre de ce qu'il auoit vn plus grand nombre de disciples & de sectateurs. Sur cela donc l'Apostre leur remonstre deux choses, l'vne que les graces de Dieu ne sont données à personne toutes ensemble, mais que chacun en a sa part: si bien que celuy qui en certaines choses est superieur

à ses freres, leur est inferieur en plusieurs autres ; Dieu le voulant ainsi, afin que ce leur soit vne occasion de s'honorer l'un l'autre, & de s'unir tant plus estroittement ensemble pour profiter des vertus l'un de l'autre. L'autre que'ils ont quelque auantage sur leurs prochains, cela ne leur vient point de leur merite, de leur capacité naturelle, de leur sagesse ou de leur saincteté, mais du seul & pur bon plaisir de leur commun Seigneur, qui donne à chacun d'eux telle mesure qu'il luy plaist de ses graces. Car comme la teste est celle qui du lieu eminent où elle est deriue sur tous les membres de la personne les esprits animaux, & par mesme moyen tous les sens & tous les mouuemens qui leur sont necessaires pour l'vtilité commune de tout le corps, & qui en influe à chacun la portion qui luy fait besoin pour l'exercice de ses fonctions ainsi nostre Seigneur Iesus, que *Dieu a donné sur toutes choses pour Chef à l'Eglise*, est celuy qui du haut estat de sa gloire enuoye à son corps mystique tous les sentiments & tous les mouuemens de la vie spiri-

tuelle, & qui distribue à chaque fidelle la mesure de son Esprit qui luy est convenable selon le rang & l'employ qu'il luy donne.

Or que ce soit luy qui nous ayant acquis ses graces par son sang lors qu'il estoit attaché pour nous à la Croix, nous les confere par son Esprit depuis qu'il est assis à la dextre de Dieu, & qu'il y ait esté esleué pour cela, l'Apostre le confirme par le témoignage du Pseaume 68. quand il adjouste, *Pour laquelle cause il dit, à sçavoir le Prophete, estant monté en haut il a mené captive la captivité, & a donné des dons aux hommes; Où par captiver la captivité, il n'entend autre chose que prendre & emmener prisonniers les ennemis qu'il a vaincus, comme cela se voit au 21. des Nombres, au 20. du Deuteronomie, au 5. des Juges, & au 28. du second liure des Chroniques, où cette façon de parler est employée en ce sens. En cette allegation il pourroit sembler que l'Apostre a alteré les mots du Prophete, & en a destourné le sens. Car pour les mots, il y a proprement,*

Tu es monté en haut, & as mené captiue la captiuité, & as pris des dons aux hommes, ou, pour les hommes. Mais ni ce changement de personne, Il a mené, au lieu de, Tu as mené, n'est de nulle consideration; ni le mot de donner, mis au lieu de celuy de prendre, n'est point considerable non plus, parce que là celuy de prendre se prend necessairement pour donner, tout de mesme qu'au 25. d'Exode, Pren moy, c'est à dire donne moy, vne offrande; & au 14. des Iuges, Prenez la moy, c'est à dire, donnez la moy, à femme; & au 3. du premier des Roys, prenez moy, c'est à dire donnez moy, vne espée; & au 17. du mesme liure, Pren moy, c'est à dire donne moy, vn peu d'eau. Et quant au sens, au texte du Prophete les paroles semblent bien s'adresser simplement à Dieu, pour dire par vne metaphore illustre & merueilleusement emphatique, qu'estant descendu en terre pour combattre ses ennemis, apres les auoir vaincus & défaits, il en a triomphé remontant glorieusement dans le Ciel, qui est le Palais de sa gloire, & a don-

né en suite de cela de grandes benedictions à son peuple. Mais nostre Apostre, fidelle & infailible interprete des intentions de l'Esprit qui a parlé par ce Prophete, les approprie à nostre Seigneur Iesus-Christ, comme a celuy en la personne duquel elles se verifient bien plus clairement & plus parfaitement. Car ce que Dieu estoit dit autresfois estre descendu vers les hommes, ce n'estoit qu'entant qu'il s'estoit manifesté à eux par des formes visibles prises à temps, comme quand il disoit à Abraham en parlant de Sodome, *Je descendray & verray*; & qu'il auoit combattu contre les ennemis charnels de son peuple, comme quand il disoit à Moyse, *Je suis descendu pour deliurer mon peuple de la main des Egyptiens.* Et ce qu'il estoit dit estre remonté, c'estoit entant qu'il leur ostoit de deuant les yeux la figure sensible en laquelle il leur estoit apparu, comme quand il est dit au 36. de Genese, qu'apres estre apparu à Iacob reuenant de Paddan-Aran, *il remonta d'avecques luy.* Mais nostre Seigneur Iesus-Christ est

descendu & venu au monde, en s'exhibant soy-même aux hommes en vne vraye nature humaine, laquelle il a prise à soy pour jamais en l'vnité de sa personne, pour combattre contre les vrays & spirituels ennemis de son peuple, le Diable, le peché, la mort. Et il est remonté quand apres les auoir vaincus il a osté aux yeux des hommes cette presence visible de sa chair, & a esté esleué à la dextre de Dieu, où estant il les a tous mis à ses pieds, & a enuoyé de là haut son Esprit avec toutes ses graces sur ses Apostres & sur toute l'Eglise. Ainsi donc nostre Apostre a allegué tres à propos ces paroles pour l'Ascension de nostre Sauueur au dessus de toutes les creatures qui sont au monde, pour son entrée triomphante dans son Royaume, apres auoir vaincu & subjugué tous les ennemis & les nostres, & pour la distribution qu'il a faite aux hommes de ses dons diuins & celestes en vne beaucoup plus grande abondance qu'il n'auoit fait en tous les siecles précédens.

Pour le premier, c'est vn spectacle
vrayement digne d'estre considéré
avec toute l'attention de vostre pen-
sée, comme estant vne œuvre pleine
de merueille & de consolation tout
ensemble. Car n'est-ce pas vne gran-
de merueille de voir celuy qui estoit
quarante iours auparauant comme vn
ver en la poudre, estre comme vne
aigle dans les nuées, & avec vn corps
humain & solide non seulement s'é-
leuer de la terre, contre l'inclination
des choses pesantes qui d'elles mes-
mes tendent touïours au centre, mais
trauerſer toutes les regions de l'air,
& toutes les spher'es celestes, & pour
derniere borne d'une incomparable
esleuation s'aller asseoir dans le thrô-
ne du Roy des Roys, pour y auoir
l'administration souueraine de tout
son Empire ? N'est-ce pas aussi vne
consolation tres douce pour nous de
voir nostre chair esleuée par cette
exaltation glorieuse, au dessus des
Ange's, des Thrônes, des Domina-
tions, des Principautez, des Puissan-
ces, des Seraphins & des Cherubins,
& d'estre en la personne de nostre


Eph. 2. 6.

Chef assis aux lieux celestes , comme nous a dit cy-deuant l'Apostre? Cette Ascension là apres la victoire. qu'il a obtenuë par sa Croix sur tous nos ennemis spirituels est comparée à vne espece de triomphe, quand le Prophete dit , *Tu as emmené*, ouï, comme le cite icy nostre Apostre, *Il a emmené captive la captivité*, c'est à dire, il a pris ses ennemis prisonniers, & en a triomphé: entendant par ces captifs là ceux qu'il appelle au second de l'Epistre aux Colossiens *les Principautez & les Puissances*, lesquelles il dit qu'il a *dépoüillées & menées publiquement en monstre*; & par les *emmener captifs*, les faire voir à son peuple comme vaincus, debellez & assujettis à sa puissance, & tellement liez qu'ils n'ont & qu'ils n'auront jamais aucun pouuoir contre luy ni contre les siens. Et certes c'est bien là le triomphe le plus esclattant & le plus magnifique qui ait jamais esté, & qui se sauroit concevoir, au prix duquel tous les plus illustres triomphes du monde ne sont que jeux d'enfans. Autresfois entre les Romains quand le General d'une armée

auoit emporté de grandes victoires, & fait des conquestes fort signalées à l'auantage de l'Empire, pour lesquelles l'honneur du Triomphe, par l'aduis du Senat & par les communs suffrages du peuple, luy estoit oëtroyé, on le recueilloit en fort grande pompe en la ville de Rome, & là avec tous les honneurs qu'on se pouuoit imaginer, on le menoit au Capitole, qu'ils appelloiēt le dongeon de l'Empire & le domicile des Dieux; lieu le plus superbe qui fust au monde, non seulement pour auoir ses portes de brōze, son couuert de tuiles de cuyure doré, son interieur plein de statuës massiues d'or, & de colomnes de jaspe & de porphyre; mais parce que là estoient les registres & les principaux actes de tout ce grand Estat en trois mille tables de bronze, des thresors incroyables, & leurs temples les plus augustes, comme, celuy de Iupiter tres-bon & tres-grand, du Tonnant & du Gardien, celuy de la Misericorde, celuy de la Foy, & celuy de l'Intelligence. Mais comme les combats de nostre Seigneur Iesus-Christ auoient esté

beaucoup plus admirables , aussi son triomphe a esté beaucoup plus glorieux. Car il a esté recueilly apres ses victoires non dans Rome , mais dans le ciel , où est le throne de Dieu son Pere , qui est vrayment le tres-bon , le tres-grand , le tonnant , & le gardien ; où est le vray asyle de la misericorde , le vray domicile de l'intelligence le vray sanctuaire de la fidelité , & où sont rangées par millions les effigies & les statuës animées de la Diuinité. En ce lieu-là il est monté non sur vn chariot doré & attelé de coursiers blancs , de cerfs , ou de lions , comme autresfois les triomphans entroient en la ville de Rome , mais sur vne nuée , qui est le chariot de Dieu. Car comme le Roy d'Egypte autresfois pour honorer Ioseph le fit monter sur le second de ses chariots , fit crier deuant luy , *Qu'on s'agenouille , & l'establit sur tout son Royaume :* ainsi ce grand Dieu souuerain , qui *Gen. 41. 43.* *fait des nuées son chariot , & se pour-*
meue sur les ailes du vent , voulant honorer Iesus-Christ , l'a fait porter sur vne nuée pour l'introduire en son

Paradis, & l'y faire seoir à sa dextre
avec vne autorité souueraine, *afin phil. 2. 10.*
qu'à son Nom tout genoüil se ploye au ^{11.}
ciel & en la terre, & par deffous la terre,
& que toute langue confesse que Iesus-
Christ est le Seigneur à la gloire de Dieu
le Pere. Et il y est entré non vestu d'v-
ne tunique de pourpre, parsemée d'e-
stoilles d'or, mais quant à l'ame de
toutes sortes de vertus, & quant au
corps d'une lumiere & d'une beauté
nompareille: non coloré de vermil-
lon, cōme les Chefs Romains quand
ils triomphoient, mais couuert de son
propre sang: car ainsi nous le repre-
sente l'Apostre entrant au Saint des
Saints; non menant comme eux des
victimes pour estre offertes, & des
sacrificateurs pour les immoler, mais
se presentant luy mesme comme le
Sacrificateur & la Victime tout en-
semble, dont l'oblation venoit d'estre
faite en la Croix pour la recōciliation
des hommes avec Dieu: non faisant
voir aux yeux de la chair des hom-
mes vaincus & liez deuant son cha-
riot, mais montrant à l'entendement
des Anges & des Saints tous les Ma-



lins Esprits dépoüillez de leur autorité & de leur pouuoir, & tellement liez par les chaines de sa Toute-puissance, que quelque malice qu'ils ayent, & quoy qu'ils fremissent contre l'Eglise, ils ne luy sauroient nuire: non enfin avec la Musique des voix sensibles & des instrumens corporels, faisant retentir ses loüanges à son passage, mais avec les concerts des Anges & de tous les Esprits bien-heureux, crians par maniere de dire, comme il est dit au Pseaume 24. sur le sujet de l'entrée de l'Arche dans le Temple de Salomon, *Portes, esleuez vos linteaux, & vous huys eternels, hausssez vous, & le Roy de gloire entrera.*

2^e. 24. 9

Voila comment il a veritablement triomphé de tous ses ennemis. Mais qu'a-il fait en suite pour son peuple, pour lequel il auoit entrepris cette guerre qu'il a si glorieusement acheuée? Oyez ce qu'en dit le Prophete, *Il a donné des dons aux hommes.* Quels dons? Non certes du pain & du vin avecques de la chair, comme Dauid en donna au peuple à l'entrée triomphale de l'Arche en sa cité; non de

l'argent, des bracelets, des colliers & des couronnes de plusieurs sortes, comme les triomphans Romains en donnoient à leurs soldats immédiatement avant leur triomphe : mais, ce qui est infiniment plus considerable & plus digne de la grandeur & de la beneficence de Dieu, le saint Esprit avec toutes ses graces. Ainsi l'auoit-il predict par Ioël beaucoup de siecles avant l'euenement, *Il auendra és derniers iours*, disoit-il, *que ie resþádray de mon Esprit sur toute chair,* *& vos fils & vos filles prophetiseront,* *& vos ieunes gens verront des visions,* *& vos anciens songeront des songes.* Et ainsi l'a-il accompli en la premiere Pentecoste, qui a suiuy son Ascension dans le ciel, comme S. Pierre le remonstroit aux Iuifs, leur disant, *Après* Ioël 2. 28. Act. 2. 17. *qu'il a esté eslé à la dextre de Dieu,* *& qu'il a receu de son Pere la promesse du saint Esprit*, c'est à dire, le saint Esprit promis, *il a resþandu ce que maintenant vous voyez & oyez.* Et cette effusiõ solemnelle des dons du saint Esprit ne deuoit estre faite qu'apres son exaltation en gloire, dont il est

Ieh. 7. 39.

dit en l'Evangile, que l'Esprit n'estoit pas encore donné, parce que Iesus n'estoit pas encore glorifié. C'est ce que luy-mesme disoit à ses Disciples en saint

Ieh. 16. 7.

Iehan, Si ie ne m'en vay, le Consolateur ne viendra point à vous; & si ie m'en vay, ie vous l'enuoyeray. Car il falloit que ces trois personnes diuines fussent ainsi successiuelement reuelées, & non pas toutes à la fois. Le Pere s'est reuelé autresfois en la montagne de Sina, où il a donné sa Loy aux Israélites, par laquelle il les a gouuernez durant plusieurs siecles. Tant que cette dispensation a duré, le Fils n'a point paru au monde, mais s'est tenu avec Dieu, ou, par deuers Dieu, comme il est dit au premier de saint Iehan. Le Fils s'est reuelé puis apres, ayant esté fait chair, & ayant conuersé entre les hommes. Et durant ce temps là le saint Esprit ne s'est point manifesté par l'effusion sensible de sa grace sur son Eglise, mais est demeuré par deuers Dieu. Enfin nostre Seigneur Iesus ayant laissé le monde pour aller au Pere, le Saint Esprit descendant du ciel en forme de

Ieh. 1. 1.

l'anges de feu, s'est manifesté sur la terre, & a pris possession du gouvernement de l'Eglise, lequel il doit continuer iusques à la fin du monde ; suivant ce que nostre Seigneur Iesus-Christ dit au 14. de saint Iehan, *Le Pere vous donnera un autre Consolateur, pour demeurer avec vous eternellement.* Ioh. 14. 16.

Reste maintenant de considerer ce que l'Apostre adjoust pour expliquer & illustrer ce discours du Prophete, en opposant cette ascension de nostre Sauueur à sa descente prealable. Sur quoy nous ne ferons pas longs, parce qu'il ne nous reste que peu de temps. Il dit donc, *Or ce qu'il est monté, qu'est-ce autre chose sinon qu'il estoit premierement descendu és parties les plus basses de la terre*, c'est à dire, non, comme pretendent les Docteurs de la communion de Rome, au Limbe des Peres, ou au Purgatoire, mais en la terre, appelée *les parties les plus basses*, comme les cieux en l'Ecriture sont appeliez *les lieux tres-hauts*. Or ce qu'il veut dire par là, n'est autre cho-

se sinon que ce que Iesus-Christ, qui est Dieu benit eternellement, aussi bien que le Pere, qui remplit aussi bien que luy les cieux & la terre, qui a eu aussi bien que luy dès le commencement du monde le ciel pour son thrône, est dit icy y estre monté, c'est parce qu'il estoit premierement descendu en terre, y ayant vestu nostre chair, & en cette chair ayant fait l'expiation de nos pechez par sa mort.

Phil. 2. 7. 8. Car celuy qui s'estoit ainsi aneanty soy-mesme, prenant forme de seruiteur, fait à la semblance des hommes, & qui s'estoit abaissé soy-mesme en se rendant obeissant iusques à la mort de la Croix, est celuy mesme que Dieu a souue-

Eph. 1. 20. 21. rainement esleué, & qu'il a fait seoir à sa dextre par dessus toute Principauté, Puissance, Vertu & Seigneurie, luy donnant plein pouuoir, comme à son Fils vnique & à son heritier, de disposer de tous ses biens; afin qu'enuoyât des Apostres, des Prophetes, des Euangelistes, des Pasteurs & Docteurs pour prescher son Euangile par tout le monde, & les ornant des dons celestes & surnaturels necessai-

res

res pour cet effect, il remplisse tous les climats de la terre de la connoissance de sa verité, de la grace de son Esprit, & de la gloire de son Nom, & qu'il accomplisse toutes les choses qu'il auoit predites par ses Prophetes touchant ses souffrances, & touchant les gloires qui s'en deuoient ensuiure. Et à chacun de ces deux estats là, ie dis de l'ancantissement de nostre Sauueur, & de sa glorification, Dieu a affecté son lieu conuenable. Car il a voulu que celuy de son abaissement fust la terre, & non pas le ciel : parce que comme ce n'est pas dans les Temples de la Diuinité, dans les Palais des Roys, ni dans les Sanctuaires de la Iustice qu'on dresse des potences pour la punition des crimes, & que l'on fait les executions ; aussi ne falloit-il pas que ce fust au ciel que la Croix de Christ fust dressée, & qu'il souffrit la mort. Il falloit que ce fust en terre, séjour de mal & de misere. Celuy au contraire de sa glorification, il a voulu que ce fust le ciel, & non pas la terre, parce que commel'Apostre dit que la chair & le sang ne peuvent he- 1. Cor. 15. 50.

riter le Royaume de Dieu, à cause de la disproportion qu'il y a entre cette vie terrienne, qu'il appelle *chair & sang*, & la gloire celeste qu'il appelle *le Royaume de Dieu*: aussi ce qui est spirituel & celeste ne peut demeurer en ce séjour de corruption & de misere, à cause de la grande disconuenance qui est entre sa condition glorieuse & cette basse & miserable demeure. Et puis nostre Seigneur Iesus ayant esté créé Chef & Prince de toute l'Eglise & Militante & Triomphante, il estoit raisonnable qu'il eust son thrône au dessus de l'une & de l'autre; c'est à dire, au dessus de tous les cieux visibles & materiels, & en la plus eminente partie de ce ciel des cieux, qui est le propre domicile de Dieu. Outre qu'il estoit necessaire qu'apres nous auoir acquis le salut & la beatitude celeste, il en allast prendre possession en nostre nom & en nostre nature, & qu'il y attirast continuellement nos cœurs, nos affections & nos esperances, comme vn aimant plein d'une efficace diuine. Or remarquez en ces paroles de l'Apostre qu'il attribue



cet abaissement dont il parle, & cette exaltation qu'il luy oppose, à vne mesme personne, disant que *celuy qui est descendu est celuy mesme qui est monté au ciel*, afin de monstrier l'yniō des deux natures de Iesus-Christ en vne mesme personne, & de fournir à l'Eglise Orthodoxe vn puissant argument contre la pernicieuse erreur des Nestoriens, qui vouloient que le Fils de Dieu qui est descendu fust vne autre personne que le Fils de l'homme qui est monté. Car puis que c'est le Fils de Dieu qui est dit estre descendu, & le Fils de l'homme qui est dit estre monté, & que l'Apostre dit que celuy qui est descendu, est celuy mesme qui est monté au ciel, il s'ensuit necessairement que le Fils de Dieu & le Fils de l'homme ne sont qu'une seule personne, quoy que constituée de deux natures, à l'esgard de l'une desquelles Christ est dit estre descendu en terre, & à l'esgard de l'autre monté au ciel. Et cela importe merueilleusement à nostre consolation & à l'assurance de nostre salut. Car si celuy qui a souffert pour nous sur la

terre, & qui intercede pour nous dans le ciel, n'estoit qu'une personne humaine, encor qu'elle fust assistée d'une persone divine, nostre salut seroit en mauuais termes, parce que ny la mort ne seroit pas d'une valeur infinie, ce qui toutesfois est necessaire pour satisfaire à la Iustice de Dieu pour nous, ni son intercession ne seroit point d'une infinie vertu, ce qui est necessaire aussi pour les effets diuins & salutaires qu'elle produit. Mais ce qui fait que l'une & l'autre est d'un prix & d'un poids infini, & que nous y pouuons mettre assurement l'esperance de nostre salut, est que ce grand Sauueur qui a racheté l'Eglise par son sang est Dieu, c'est à dire la propre personne du Fils de Dieu égale & consubstantielle à son Pere; & que c'est cette mesme personne qui interuient pour nous enuers le Pere par une comparition continuelle deuant sa face dans le vray Saint des Saints.

Nous aurions à vous dire beaucoup d'autres choses sur ce sujet; mais qui va à la fontaine, ny va pas pour l'es-

puiser tout à vne fois. Il se contente de prendre ce qu'il luy en faut pour sa necessité presente. Vous en aurez assez pour ce coup, si vous retenez bien ce qui vous a esté proposé. Ramenteuez vous donc premierement ce que vous avez oüy de l'Apostre, que *la grace de Dieu est donnée à chacun de vous selon la mesure du don de Christ,* & l'imprimez bien dedans vos memoires. Vous qui avez receu de plus grandes graces de Dieu que les autres, meditez cét enseignement, & qu'il ne vous arriue iamais ni de vous enorgueillir en vous mesmes à cette occasion, ni d'en mespriser vos prochains. Tout ce que vous avez de bien, vous le tenez de Iesus-Christ, qui vous l'a donné de sa pure grace en la mesure que vous l'avez. C'est donc matiere de reconnoissance enuers luy & non de presumption de vous mesmes. Tu as possible plus d'esprit, plus de memoire, plus de sauoir, plus d'eloquence, plus de prudence & d'adresse dans les affaires que n'a ton frere. Rens-en graces à Dieu, & au lieu d'en mespriser ton prochain, fay va-

loir à son aduantage, s'il t'est possible, ce que tu as de plus que luy. Tu as ta part de la grace de Dieu, & il a la sienne, selon que Iesus-Christ vous l'a départie à tous deux. Tu en as vne plus ample que luy, & d'autres l'ont encores plus ample que toy: & peut-estre celuy-là mesme que tu deuances en ces dons, te deuance en d'autres, qui ne sont pas moins precieux, ni moins vtiles à l'Eglise de Dieu. Et quand cela ne seroit point, s'il est vrayment Chrestien, quel qu'il soit d'ailleurs, ayant Dieu pour son Pere, Iesus-Christ pour son Redempteur, le S. Esprit pour son Consolateur, ayant esté baptizé comme toy, participant aux delices de la maison de Dieu comme toy, ayant droit aussi bien que toy à son heritage celeste, il a des auantages que tu ne saurois mespriser qu'au mespris de celuy de la grace duquel il le tient. Vous aussi qui auez receu moins de dons que les autres, puis que c'est Iesus-Christ qui vous a mesuré ce que vous en auez, vous ne deuez point en murmurer, ni porter enuie à vos freres qui en ont plus que



vous. Celuy qui vous a fait vostre part sçait bien ce qu'il vous faut. Si vous possédez vostre don avec humilité & avecques reconnoissance, & faites valoir son talent selon les occasions qu'il vous en presente, & les moyens qu'il vous en donne, il saura bien vous l'augmenter quand il en sera temps, & comme vous luy aurez esté fidelle en peu de chose, vous establir sur de plus grandes. Et quand il ne deuroit point vous l'accroistre, vous devez faire estat qu'il vous vaut mieux auoir moins de ces dons esclatans dont le Pharisien se vante, & qui ne le rendēt en rien meilleur, & auoir plus de cette humilité interieure, avec laquelle le Peager s'en retourna chez soy iustificié. Si d'autres ont receu de plus grandes graces que vous, puis que c'est Iesus-Christ qui a fait ce partage, il ne peut estre que bien fait, & si vous n'y acquiescez, vous n'estes pas Chrestien. Quand il les leur auroit données pour eux seuls, estans vos prochains comme ils sont, que vous devez aimer comme vous mesmes, vous vous devez réjouir de leurs a-

uantages , aussi bien que s'ils vous estoient escheus à vous mesmes. Mais les leur ayāt données pour vous aussi bien que pour eux , vostre propre interest vous oblige à l'en remercier d'aussi bon cœur que ceux mesmes qui les ont receuës. Mais laissons à part l'interest ; la gloire de Dieu n'est-ce pas vostre vnique but , l'vnique but auquel tendent toutes les graces que Iesus-Christ mesure à ses fidelles ? Si donc cette gloire est auancée par les graces qu'il a mises en eux , n'en deuez vous pas estre aussi contens que s'il les auoit mises en vous ? Et si vous desirez qu'elle soit auancée par vous , & estes marris qu'elle le soit par les autres , n'est-ce pas vne marque euidente que vous estes possédez par vn esprit d'ambition & d'enuie , & non touchez d'vn vray zele à sa gloire ? Je dy le mesme de tous les employs & de toutes les vocations qu'il a données aux fidelles en son Eglise. Il y a establi les charges extraordinaires d'Apostres, de Prophetes & d'Euangelistes; il y a institué les ordinaires de Pasteurs, de Docteurs,

d'Anciens & de Diacres : & quant aux fidelles particuliers, il les appelle à le servir l'un en vne occasion , & l'autre en vne autre: cōme en l'Estat il a ordōné des charges publiques pour ce qui est des armes , des finances & de la Iustice ; & des vocations particulieres de toutes sortes , selon que le requiert le bien de la societé ciuile. C'est à vous à le servir fidellement en la station où il vous a mis, à vous contenter de la fonction qu'il vous a commise , à ne point mettre vostre soc & vostre faucille, ni mesme vostre desir & vostre conuoitise dans le champ d'autrui , à ne point porter enuie à ceux à qui Iesus-Christ a donné vn plus digne employ, ou vne plus eminente place , à cultiuer avec tout le soin & toute la diligence qui vous est possible ce qui vous est escheu en partage , & à en tirer le plus de fruit que vous pourrez pour l'honneur & pour le seruice de celuy qui vous employe, afin que quand vous serez appelé à conte, il ne vous soit point reproché par vostre maistre que vous auez enfoüi son talent , &

1. Pierre. 4.
20. 11.

que vous luy auez dérobé le fruit de la terre, mais que vous soyez loué & recompensé comme vn fidelle seruiteur. Ceux principalement que Dieu a appellez à la charge de Pasteurs & d'Anciens dedans son Eglise. *Que chacun*, dit saint Pierre, *selon qu'il a receu le don, l'administre enuers les autres, comme bon dispensateur de la diuerse grace de Dieu. Si quelqu'un parle, qu'il parle comme les paroles de Dieu. Si quelqu'un administre, qu'il administre comme par la puissance que Dieu fournit, afin qu'en toutes choses Dieu soit gloifié par Iesus-Christ.*

Souuenez-vous en deuxiesme lieu, tres chers freres, de ce qui nous a esté dit de l'Ascension de nostre Seigneur Iesus-Christ au ciel, pour apprendre de là où c'est qu'il nous le faut chercher; non certes dedans vn Ciboire, entre les doigts d'un Prestre, mais au ciel, où il est à la dextre de son Pere, & pour nous y esleuer nous mesmes, autant qu'il nous est possible, apres luy par de saints mouuemens de Foy, d'esperance, & de deuotion, nous arrachant avec vn genereux effort de

la terre & de toutes les affections & sollicitudes mondaines, *oublions les Phil. 3. 14.* choses qui sont en arriere, nous avançons à celles qui sont en devant, pour parvenir au but, qui est le prix de nostre vocation *supernelle, volans comme aigles là où est le corps en la communion duquel consiste nostre vie, & en fin ayans tout nostre cœur là où nous auons tout nostre thresor. O que nous ferions heureux, fidelles, si nous nous y pouuions bien resoudre ! Mais ou nous n'y pensons point tout à fait, ou si nous y pensons quelquefois, nous n'en auons que des desirs tiedes & languissans. Nous voudrions bien nous joindre à Iesus-Christ, mais sans quitter le monde, aller au ciel, mais sans abandonner la terre, voler à la beatitude, mais avec des ailes d'or. Cela ne se peut pas, c'est vouloir faire de la matiere la plus pesante de toutes ce qui doit estre de la plus legere. Tout homme qui pretend à la gloire d'en haut, doit renoncer à toutes les pretentions d'icy bas. Qui tient au monde ne peut voler à Dieu. C'est aux gens de ce* *ps. 17. 54.* monde, *desquels le partage est en cette*

Vie, à auoir tousiours, comme des
pourceaux, le museau contre terre.
Nous qui sommes nourris à de meil-
leures esperances, & qui auons nostre
pretention au ciel, nous deuons re-
noncer à toutes ces pensées basses de
l'auarice, de l'ambition, & de la vo-
lupté, & aspirer en haut, où nostre
Seigneur Iesus est monté, pour nous
y attirer apres soy. Et si le malheur de
nostre naissancé, ie veux dire ce que
nous sommes tous nez en peché, nous
fait pencher contre la terre plus que
nous ne voudrions, comme cette
pauvre femme courbée, dont nous
auons l'histoire en l'Euangile; c'est à
nous à prier celuy qui la guerit de sa
maladie, qu'il nous guerisse de la no-
stre, qu'il nous redresse vers le ciel,
& qu'il y esleue nostre pensée & no-
stre affection, iusques à ce qu'en effect
il nous y rauisse en corps & en ame,
afin qu'estans là où il est, nous y
ioüissions avec luy d'une mesme bea-
titude.

Luc. 13. 11.

Quand puis apres nous entendons
qu'il a pris prisonniers ses ennemis &
les nostres, apres les auoir vaincus en

la Croix, ce nous est vn enseignemēt de grande consolation contre toutes les apprehensions que nous pourrions auoir autrement de leur force & de leur malice. Nous ne les deuons point craindre, mes freres, quoy qu'ils machinent ou qu'ils fassent ou par eux-mesmes ou par leurs satellites, soit contre l'Eglise de Dieu en commun, soit contre chacun de nous en particulier. Ce sont des ennemis que Iesus-Christ a desarmez, & qu'il tient prisonniers & comme sous ses pieds, en attendant le grand iour qu'il a destiné à leur supplice & à nostre felicité. En l'estat où ils sont, ils ne peuvent rien contre luy, qui est en sa gloire; ni contre nous, qui sommes en sa grace. Nous au contraire pou- *Phil. 4. 13.* uons tout en Iesus-Christ qui nous fortifie. Mais il nous en prend bien souuent comme à Iether le premier né de Gedeon. Lors que son pere luy *Jud. 8. 10.* monstrant les deux Roys de Madian qu'il auoit vaincus luy disoit, Leue toy, tuë les, quoy qu'il les vist desarmez & vaincus entre les mains de leur vainqueur, il n'osa mettre la main

à l'espée contre eux , parce qu'il en auoit peur, estant encor jeune garçon, comme il est dit au 8. des Iuges. Nous aussi quand nous entendons les bravares & les menaces du Prince de ce monde , & de tous ceux qui sous ses enseignes font la guerre à Dieu & à son Christ , quand nous voyons les efforts qu'ils font pour nous perdre, & que nous considerons en nous memes combien cela leur est facile selon le monde , veu leur force & nostre foiblesse, leur audace & nostre timidité, leur multitude & nostre petit nombre; nous tremblons & sommes esbranlez comme les arbres des forests par le vent ; ainsi qu'il est dit d'Achas & de son peuple à l'arriuée des Syriens . Contre cét esbranlement là, chers freres , armons nous de cette pensée, que tous ces ennemis qui font tant de peur à nostre chair, sont les prisonniers de nostre Sauueur, qu'ils peuvent bien abayer & rugir contre nous, comme des dogues ou des lions enchainez, mais qu'ils ne peuvent s'auancer qu'autant qu'il leur allonge leur chaine, & qu'il ne la leur

Esai. 7. 2.

allonge iamaïs iusqu'à pouuoir nuire au salut des siēs, lesquels il garde en sa vertu par la foy, pour obtenir le salut qui doit estre reuelé au dernier temps. Ils ont attaqué Iesus-Christ, mais il les a vaincus, & en a triomphé. Ils nous attaquent aussi, mais nous les vaincrons & en triompherons tout de mēme. Car nostre foy sera la vi- *1. Ioh. 5. 4.* stoire du monde, celuy qui nous a appellez à ce combat, nous rendant en *Rom. 8. 36.* toutes choses plus que vainqueurs à nostre grande joye & à leur cōfusion eternelle. Il leur laisse bien durant quelque temps trainer leur lien, parce qu'il se veut seruir d'eux pour la mortification de nostre chair, & pour l'espreuue de nostre patience, & durant ce temps là tous vaincus qu'ils sont, ils brauent comme s'ils estoient vainqueurs: mais ils ne luy eschapperont pas pourtant, ni n'eueront pas le supplice qui leur est preparé. Car comme és anciens triumphes Romains les ennemis qu'on auoit amenez des païs où ils auoient esté vaincus, estoient premierement produits deuant tout le peuple, & puis menez dans les pri-

son où on les esgorgeoit: ainsi au iour du grand & dernier triomphe de Iesus-Christ, tous ces ennemis de nostre salut, lesquels il a vaincus en la Croix, seront publiquement amenez deuant son Tribunal pour y entendre leur sentēce, & de là enuoyez au feu eternel qui leur a esté destiné. Et alors comme nous verrons Satan brisé sous nos pieds, le monde condamné, la mort engloutie à victoire, en vn mot tous nos ennemis défaits pour la derniere fois, nous les brauerons à nostre tour, & dirons, O monde, où sont tes menaces? O Satan, où sont tes fureurs? O mort, où est ta victoire? Où est, ô sepulchre, ton aiguillon? *Graces soient rendues à Dieu, qui nous a donné la victoire par Iesus-Christ, & qui nous donne de triompher en luy.*

1. Cor. 15. 55.

2. Cor. 2. 14.

Vaincre de si puissans ennemis, n'est pas chose que nous puissions nous promettre de nous mesmes & de nos forces, mais nous les deuons esperer de la grace & de l'assistance de nostre Seigneur Iesus-Christ. Quand ce diuin & glorieux athlete est entré en ce grand combat, il a
esté

esté oint d'huyle de lieffe par dessus ses *Pse. 45. 2.*
conforts. Quant il nous y verra entrer
apres luy, il nous oindra de la mesme
onction, & ne nous abandonnera
point en nostre besoin. Car estant
monté en haut apres sa victoire, il
regarde de là les combats des siens,
& de là il leur donne les dons de foy,
de patience, d'esperance & de zele
qui leur sôt necessaires pour y reüssir.
Demandons les luy en nostre besoin
avec des vœux sincerés & ardents, &
ayons cette ferme esperance qu'il
nous les ottroyera. Car il ne refuse *Luc. 11. 13.*
jamais son bon Esprit à qui le luy de-
mande. Lors qu'il fit son entrée dans
le Royaume de sa gloire, il enuoya
de là son Esprit à ses seruiteurs, avec
les dons des langues, des propheties,
des guerisons, & des miracles de tou-
tes sortes. Aussi nous l'enuoyera-il
en la façon & en la mesure qu'il verra
estre conuenable. Il nous donnera
par ce mesme Esprit, quand il sera
question de confesser son saint Nom,
& de combattre pour sa gloire contre
les aduersaires de son Euangile, vne
langue, vne sagesse, vne force à la-

quelle ils ne pourront resister. Il restituera par nostre parole la veuë aux aueugles, l'ouye aux sourds, le marcher aux paralytiques; ie dis aux aueugles, aux sourds & aux paralytiques spirituels, pour voir & ouïr Iesus-Christ, & pour venir à luy. Et en fin par vn miracle vrayement diuin il rendra les colombes victorieuses sur les aigles, & les brebis sur les lions, c'est à dire, les vrays fides, tous foibles & affligez qu'ils nous semblent, sur tous les hommes de la terre & sur tous les demons de l'Enfer.

Finalemēt quand l'Esprit de Dieu nous dit par S. Paul que *celuy qui est descendu es parties basses de la terre, est celuy mesme qui est monté par dessus tous les cieux, afin qu'il remplist ou accomplist, toutes choses*, réjouissons nous de ce changement de sa condition, & nous assurons que Dieu nous fera cōme il a fait à nostre Chef. Car il nous a *predestinez à estre faits conformes à son image*. Apres qu'il nous aura fait descēdre avec sō Eglise iusqu'au plus bas degré du mespris & de la misere, il nous releuera iusqu'au ciel, & nous y cou-

Rom. 8. 28.

onnera de gloire & d'immortalité. Souffrës donc avec patiëce les opprobres & les ennuys par lesquels il nous fait passer pour paruenir à vne si auantageuse condition, & poursuiuons con-

stamment la course qui nous est proposée, *Hebr. 12. 2. 2. 3.*

regardans à Iesus Chef & consommateur de la foy, lequel pour la joye qui luy estoit proposée, a souffert la Croix, ayant mesprisé la honte, & s'est assis à la dextre du

thrône de Dieu. Considerons diligemment celuy qui a souffert vne telle contradiction des pecheurs alencontre de soy, afin que nous ne deuënions point lasches en nos courages, mais que combattans le bon combat de la foy, nous obtenions la vie eternelle. Alors comme nostre


Seigneur, qui lors qu'il fut manifesté *1. Tim. 3. 16.*

en chair, sembloit n'estre rien, a enfin remply toutes choses de la Majesté de son Nom, des richesses de sa bonté & des merueilles de sa Toutepuissance, ayant esté justifié en Esprit, veu des Anges, presché aux Gentils, creu au monde & esleué en gloire: ainsi l'Eglise n'estant au commencement qu'une

petite pierre coupée sans main, apres *Dan. 2. 34.* auoir brisé le fer, l'airain, la terre, *35.*

l'argent & l'or de tous les Royaumes qui luy sont contraires, deuiendra à la fin vne grande montagne, & remplira toute la terre, suiuant la prophétie de Daniel. Elle fera bien plus, elle remplira tout le Ciel, où il luy est préparé vne demeure eternelle avec son Chef & son Sauueur. Et nous qui par la misericorde de Dieu auons l'honneur d'estre ses membres, apres auoir participé sur la terre à la peine de ses combats, jouirons dans le ciel de la gloire de son triomphe, verrons toutes les promesses de nostre Sauueur parfaitement accomplies en nous & pour nous, & viurons eternellement tous pleins de contentement & de joye en sa sainte presence. A luy, comme au Pere & au Saint Esprit, soit honneur, gloire, benediction & loüange aux siècles des siècles.

Amen.



S E R M O N

QVATRIESME,

Sur ces paroles de l'Apostre S.
Paul au 4. chap. de l'Epistre
aux Ephesiens.

*Verf. 11. Luy mesme donc a donné les vns pour
estre Apostres, & les autres pour estre Pro-
phetes, & les autres pour estre Euangelistes,
& les autres pour estre Pasteurs & Docteurs.*

*Verf. 12. Pour l'assemblage des Saints, pour
l'œuvre du Ministère, pour l'edification du
corps de Christ.*



Nous auons bien sans
doute vne grande obli-
gation, & plus grande
que nous ne sçaurions
dire, à nostre Redem-
pteur, de ce qu'il nous a racheptez de
la puissance des enfers par la satisfac-
tion de sa mort, & de ce qu'il nous a
acquis la gloire des cieux par le me-

rite de son obeissance. Mais ce grand benefice nous fust demeuré inutile, s'il n'eust pourueu quant & quant aux moyens de nous amener tous à luy, d'engendrer la foy en nos cœurs, & de l'y entretenir & accroistre, iusques à ce que nous fussions parfaitement fondez en luy, par vne pleine & ferme cōnoissance de ses mysteres. C'est pourquoy comme apres que Dieu eut deliuré les Israëlites de la captiuité d'Egypte, & qu'il leur eut fait passer la mer rouge, il leur donna sa Loy sur la montagne, & establit au milieu d'eux le Ministère de ses Sacrificateurs & de ses Leuites, pour vaquer & à son seruice dans le Tabernacle, & à l'instruction de ce peuple en tous les lieux de leurs demeures : ainsi nostre Seigneur Iesus, apres nous auoir acquis par son sang vne redemption eternelle, & estre passé de ce monde au Pere, a fait vne effusion abondante de son Elprit & de toutes ses graces sur ses Apostres, & les ayant ainsi reuestus de sa vertu d'enhaut, les a enuoyez à leurs charges, pour avec les autres Ministres, soit ordinaires soit

extraordinaires, dont ils ont eu besoin d'estre assistez à l'exécution d'une si grande œuvre, faire retentir l'Evangile aux oreilles de ses esleus, les fonder & edifier en la foy, & establir son regne par toute la terre habitable. C'est ce que nous enseigne l'Apostre, quand apres avoir allegué ces paroles du Pseaume, *Tu es monté en haut, tu as mené captifs les prisonniers, tu as donné des dons aux hommes; & les avoir appliquées à Christ en ces mots, Or ce qu'il est monté, qu'est-ce autre chose que ce qu'il estoit descendu és parties basses de la terre? Celuy qui est descendu, c'est le mesme qui est monté sur tous les cieux, afin qu'il remplist toutes choses, il adjouste, Et il a donné les vns pour estre Apostres, les autres pour estre Prophetes, les autres pour estre Euangelistes, les autres pour estre Pasteurs & Docteurs pour l'assemblage des Saints, pour l'œuvre du Ministère, pour l'edification du corps de Christ. Paroles qui contiennent plusieurs enseignemens tresdignes de vostre attention: premierement sur l'establissement du saint Ministère en l'Eglise, lequel s'est fait*

par nostre Seigneur Iesus-Christ apres qu'il a esté esleué par dessus tous les cieux, ce qu'il exprime par ces mots, *Et il les a donnez*; Secondement sur les diuerſes eſpeces de ce Ministere, qui ſont les charges d'Apostres, de Prophetes, d'Euangelistes, de Pasteurs & Docteurs; Tiercement sur la fin à laquelle ſont deſtinées toutes ces charges, qui eſt l'aſſemblage des ſaincts, l'œuure du Ministere, & l'edification du corps de Christ.

Celuy qui a fait cet eſtabliſſement au Royaume ſpirituel de l'Egliſe, c'eſt nostre Seigneur Iesus-Christ, comme celuy qui eſt le ſouuerain Monarque de cet Eſtat, & auquel ſeul il appartient d'y eſtabliſſir tel ordre, & d'y creer tels officiers qu'il luy plaist. Ailleurs l'Apoſtre dit que c'eſt Dieu qui en eſt l'auteur, comme quand il eſcrit au 12. de la premiere aux Corinthiens, que *Dieu en a mis les vns en l'Egliſe premierement Apostres, ſecondement Prophetes, tiercement Docteurs, & puis les vertus, conſequemment les dons de guerison, les ſecours, les gouuernemens, les diuerſitez de langages.* Ailleurs en-

tor il attribuë cela au saint Esprit, comme quand il dit aux Pasteurs de l'Eglise d'Ephese au 20. des Actes, *Prenez garde à vous-mesmes & à tout le troupeau, auquel le saint Esprit vous a establis Euesques pour paistre l'Eglise de Dieu.* Et vous ne trouuerez pas cela estrange si vous considerez que la vocation des Pasteurs est vne œuvre externe à la Diuinité, & qui s'exerce sur des creatures; & qui par consequent selon la maxime vulgaire des Theologiens est commune par indiuis à toutes les trois personnes diuines. La Parole de Dieu en fait souuent ainsi, attribuant vne mesme action externe tantost au Pere, tantost au Fils, tantost au saint Esprit, pour nous montrer que le Pere, le Fils, & le saint Esprit sont trois personnes vraiment diuines, qui ont vne mesme puissance & vne mesme autorité, d'où emanent & toutes les vocations Ecclesiastiques, & generalement tout ce qu'il y a, ou qui se fait de bien au monde & en l'Eglise; & qui par consequent y doiuent estre seruiés & adorées avec vn mesme culte religieux.

comme estans toutes trois nostre seul
 & vray Dieu. Icy l'Apostre l'attribue
 à nostre Seigneur Iesus-Christ
 plustost qu'au Pere ou au saint Es-
 prit, parce que c'estoit de Iesus-Christ
 qu'il parloit aux versets precedens,
 disant *que la grace est donnée à chacun
 selon la mesure du don de Christ*, que c'est
 de luy qu'il est dit au Pseaume, *qu'e-
 stant monté en haut il a donné des dons
 aux hommes*, & que comme il estoit
 descendu aux bas lieux de la terre, ainsi
 a-il esté esleué par dessus tous les cieux,
 afin qu'il remplist toutes choses. Et ainsi
 nous dit-il ailleurs, *Nous sommes am-
 bassadeurs pour Christ comme si Dieu ex-
 hortoit par nous, & nous vous supplions
 pour Christ que vous soyez reconciliez à
 Dieu*; & ailleurs encores, *Que chacun
 nous estime comme Ministres de Christ,
 & dispensateurs des secrets de Dieu*; &
 en vn autre lieu, *Qui est Paul, qui est
 Apollos, sinon Ministres par lesquels
 vous avez creu*? Ce qu'il inculque ainsi
 par tout premierement pour rendre à
 son Maistre & à son souverain Sei-
 gneur l'hommage qu'il luy doit com-
 me à l'auteur vnique de sa vocation;

2. Cor. 5. 20.

1. Cor. 4. 1.

1. Cor. 3. 5.

& puis pour donner plus de poids à ses enseignemens & à ses exhortations par la consideration de la Majesté de ce grand Monarque, & finalement pour s'exciter soy-mesme & tous ceux que Dieu auoit honorez, ou honoreroit à l'auenir, de ce saint Ministère à s'en acquitter avec conscience & avec vn grand zele, comme l'ayant receu du souuerain Pasteur & Euesque des ames, & ayant à luy en rendre conte quand il apparoiſtra en sa gloire.

Mais remarquez bien, je vous prie, l'expression dont vse l'Apostre, *Il les a donnez*, dit-il, c'est à dire, Il les a establis. Car c'est ce que signifie cette phrase au style ordinaire de l'Eſcriture, comme quand Pharaon dit à Ioseph au quatriesme de Genese, *Ie t'ay donné sur le pais d'Egypte*; & quand Moysc dit à Israel au dix-septiesme du Deuteronomie, *Tu donneras*, c'est à dire, tu establiras *sur toy vn de tes freres*, & *ne pourras donner*, c'est à dire, establiſ vn *eſtranger*; & quand Dieu dit au quarante-neufiesme d'Esaie, *Ie t'ay donné pour lumiere aux nations*, afin que tu sois

*mon serviteur iusqu'aux bords de la terre; & au 55. Je l'ay donné pour estre tesmoin aux peuples, pour estre conducteur & donner commandemens aux peuples; & au premier de Ieremie, Je l'ay donné, c'est à dire establi, Prophete pour les nations; & quand S. Paul dit au premier chapitre de l'Epistre que nous exposons, Il l'a donné sur toutes choses pour Chef à l'Eglise. Et de fait au douzième de la première aux Corinthiens faisant le denombrement des Ministres de Christ aussi bien qu'icy au lieu de, Il les a donnez, il dit, Il les a mis, ou establis, en l'Eglise. Icy il employe cette phrase plustost qu'une autre, parce que quand Iesus-Christ donne telles charges aux hommes, c'est un bien gratuit qu'il fait de bonne & franche volonté & à ceux qu'il reuest de son autorité & comme des rayons de sa gloire, ce qui est cause que S. Paul exprime souvent son Apostolat par le mot de *grace*; & à l'Eglise, à l'instruction & à la consolation de laquelle il les daigne employer. Les officiers que les Princes employent soit à l'administration de leur justice, soit à la*

dispensation de leurs finances, soit à la conduite de leur police, parviennent à leurs dignitez ou par faueur & par argent, qui sont des voyes iniustes & honteuses, mais fort cōmunes en la corruption de ce siecle; ou par le merite de leur vertu, ce qui est bien & plus juste & plus honorable, mais non le plus frequent. Mais ceux que Iesus-Christ establit dedans son Eglise en ces saintes charges d'Apostres, de Prophetes, d'Euangelistes, de Pasteurs & Docteurs, illes y appelle par grace. Le don de Dieu ne s'acquiert point ni par faueur ni par argent. S'il y en a qui entrent en ces charges par ces voyes humaines, afin qu'il ne die diaboliques, ce sont de sacrileges vsurpateurs, & non de vrais Ministres de Iesus-Christ. La vraye & legitime vocation est vne pure grace du ciel, dont il honore qui il luy plaist. Il n'a point non plus d'esgard en cel au merite de leur vertu. Car de vertu, ils n'en ont point que celle qu'il leur donne, & de merite, aucune creature n'en peut auoir enuers son Createur, duquel seul elle tient & tout ce qu'elle

a & tout ce qu'elle est. *La grace est donnée à chacun selon la mesure du don de Christ.* Et pour l'Eglise, en laquelle ils exercent leur Ministère, comme **Eph. 2. 8. 9.** elle est *sauvée par grace, par la foy; & cela non point d'elle, c'est le don de Dieu; non point par œuvres, afin que nul ne se glorifie: aussi doit-elle reconnoître que si Dieu luy enuoye ses seruiteurs pour luy annoncer ses mysteres & pour luy dispenser les graces, c'est vn effect de sa pure grace, & non d'aucun merite qui soit en elle.*

Mais voyons maintenant quelles sont les principales especes de ces Ministres qu'il a establis en l'Eglise. Il en met de deux sortes, les extraordinaires, qui sont les Apostres, les Prophetes & les Euangelistes, & les ordinaires, qui sont les Pasteurs & Docteurs. Nous ne vous parlerons point icy des premiers, qui sont les Apostres, parce que nous vous en auons parlé amplement en l'exposition du premier verset de l'Epistre, & que depuis encor vous en auez ouïy parler bien au long en l'examen des premieres paroles de la premiere Epistre de

S. Pierre, & de celle de S. Paul aux Galates. Nous y resoudrons seulement deux questions que l'on nous pourroit faire sur ce que S. Paul apres auoir dit que Iesus-Christ est monté par dessus tous les cieux, afin qu'il remplist toutes choses, adjouste immediatement, *Et il a donné les vns pour estre Apostres, L'une*, comment s'accorde ce qu'il met. la vocation des Apostres apres l'Ascension de Christ, avec ce que l'histoire de l'Euangile recite qu'il les auoit appellez à leur charge mesme deuant sa mort, & qu'apres sa resurrection il leur auoit donné son Esprit, & leur auoit dit, *Comme le Pere m'a en-*
uoyé, ainsi vous enuoyé-je. Allez, & en-
doctrinez toutes nations, les baptisans au
nom du Pere, du Fils, & du S. Esprit, &
les enseignans de garder tout ce que je
vous ay commandé. L'autre, pourquoy nostre Seigneur Iesus a attendu iusqu'apres son exaltation en la gloire à les installer solennellement en leurs charges, & à les y employer effecti-
 uement. A la premiere il ne sera pas mal-aisé de respondre. Car premie-
 rement encor qu'il les eust choisis &

Ieh. 20. 21.

Matth 28.

19. 10.

appelez dès deuant lo temps de sa passion , qu'il les eust instruits en sa doctrine , & enrichis de plusieurs dōs, & qu'apres la Resurrection il leur eust donné vne mesure encor plus ample de la connoissance, & des dons de son S. Esprit , neantmoins ils n'en auoient pas encor l'abondance qui leur estoit necessaire pour l'exercice de leur Apostolat entre toutes les nations de la terre. *L'Esprit n'estoit point encores donné*, est-il dit au 7. de l'Euangile selon S. Iean, *parce que Iesus n'estoit pas encores glorifié*. Et pourtant il leur commanda en s'en allant au ciel qu'ils attendissent en Ierusalem iusques à tant qu'ils eussent receu cēt Esprit, & qu'ils eussent esté reuestus de la vertu d'en-haut. Adjoustez à cela , que comme David fut bien oinct pour Roy en particulier au milieu de ses freres, & depuis encor en Hebron par ceux de la Tribu de Iuda, neantmoins il ne fut appellé Roy d'Israel que lors qu'il fut sacré solennellement par le consentement vnanime de toutes les Tribus, comme il nous est représenté en l'histoire de Samuel : ainsi nostre Seigneur

Act. 1. 4.

gneur Iesus appella bien ses Apostres avant sa mort, & apres sa resurrection les confirma en leur charge: mais parce qu'il ne les y installa pas alors publiquement & solennellement, & ne les en mit pas en possession & en actuel exercice, il n'est pas dit qu'ils furent dès lors donnez à l'Eglise. Ils le furent seulement lors que le S. Esprit descendit sur eux en langues de feu, & qu'ils se mirent à parler des choses magnifiques de Dieu en toute sorte de langages en la presence & au grand estonnement de tout Israel. Alors ceux qui deuant sa mort l'auoient abandonné laschement, & qui apres sa resurrection se tenoient encor enfermez en vne chambre haute, pour la crainte qu'ils auoient des Iuifs, se trouuans soudainement reuestus de l'Esprit de force & embrasés du feu celeste, sortirent courageusement pour prescher son Nom à tous ceux qui estoient en leur ville, & l'ayans presché en Ierusalem allerent l'annoncer en toute la Iudée, & puis de là en Samarie, & de là petit à petit iusques aux dernieres extremités de la terre. La seconde que,

stion estoit, pourquoy nostre Seigneur Iesus à differé iusques à ce qu'il fust assis à la dextre de Dieu, de remplir ses Apostres de son Esprit, de les establir solennellement en leur charge, & de leur en faire commencer l'exercice. A celle-là nous respondons, qu'il a voulu mōstrer par là qu'il estoit vrayemēt resuscité, vrayement montré au ciel, vrayement assis à la dextre de Dieu, & vrayement estably Chef & Prince de son Eglise. Comment cela ? parce que comme il auoit predit qu'apres sa resurrection il s'en iroit au Pere, & que de là il leur enuoyeroit le Consolateur, à sçauoir l'Esprit de verité, par la vertu duquel ils feroient des œuures semblables aux siennes, & mesme de plus grandes: ainsi l'a il effectiuement accompli, ayant enuoyé cēt Esprit, qui vint avec vn son comme d'vn vent soufflant en vehemen- ce, & se posa sur chacun d'eux en forme de langues de feu. Car dès ce moment-là il les remplit d'vne connoissance admirable de ses mysteres, il chāgea leur timidité naturelle en vne magnanimité heroïque, il conuertit

leur begayement en vne eloquence diuine, il fit par leurs mains & à leur parole vne infinité de miracles, il amena par eux dès leur premiere predication plusieurs milliers d'ames à la foy de son Euangile, & finalement il se seruit d'eux comme de tres-puissans instrumens pour ranger sous ses loix autant de nations que le ciel en embrasse. Ioignez à cela qu'il n'estoit pas conuenable qu'un tel Docteur & un tel Prince operast comme un homme par la presence de sa chair, & par des moyens humains & sensibles; que pour agir d'une façon qui fust digne de luy, il falloit qu'il agist comme Dieu, par la seule efficace de son Esprit, penetrant immediatement dans les cœurs, & operant en mesme temps en toutes les parties du monde. C'est pourquoy il a voulu premierement retirer sa chair dedans le ciel, & puis a enuoyé son Esprit sur la terre, & en a remply ses Apostres, afin qu'ils traueillassent avec efficace à la conuersion des peuples, & à l'establisement de son Regne.

Voila pour ce qui est des Apostres.

Exod. 18. 13.
61.

Mais comme Iethro remōstroit tres-bien à Moyse qu'il ne pouuoit pas suffire tout seul à porter vn si lourd fardeau que celuy qu'il auoit dessus les espaules; ce qui fut cause qu'il s'adjoignit plusieurs autres Iuges & Magistrats pris de toutes les Tribus d'Israël: ainsi ces diuins hommes ne pouuans pas fournir tous seuls à tout ce qui estoit necessaire à l'establissement & à la confirmation de toutes les Eglises du monde, il a falu de necessité qu'ils ayent eu d'autres Ministres pour les assister en cette œuvre. Tels ont este ces Prophetes & ces Euangelistes dont parle saint Paul. Quant au mot de Prophetes, il est bien vray qu'entre les Hebreux & les Arabes celuy que les Grecs ont traduit Prophete, se prend quelquefois pour tout homme qui annōce à l'Eglise les choses que Dieu a reuelées, & que ce nom se deriue d'un verbe qu'ils prennent quelquefois generalement pour simplement annoncer: mais saint Paul le distinguant, comme il fait, d'avec les Apostres, Euangelistes, Pasteurs & Docteurs, il est euident qu'il le faut

entendre en vn sens plus restraint, à
 fauoir pour certains Ministres à qui
 Dieu auoit donné l'Esprit de reuela-
 tion Prophetique, tant pour exposer
 à l'Eglise les propheties anciennes
 touchant Iesus-Christ & son regne,
 que pour luy en proposer de nouuel-
 les, selon qu'il les leur inspiroit. Et de
 cette sorte de Prophetes il est parlé
 en l'onzième, au quinzième & au
 vingt & vnième des Actes. Quant
 aux Euangelistes, c'estoient certains
 autres Ministres qui accompagnoient
 par tout les Apostres pour les assister
 en la predication de l'Euangile, les-
 quels pour cet effect ils enuoyoient
 par tout où il estoit necessaire, & où
 ils ne se pouuoient porter eux-mes-
 mes, soit pour emmailloter, alaieter
 & esleuer les enfans que les Apostres
 engendroient à Christ, soit pour esta-
 blir des Pasteurs, des Docteurs & des
 Anciens ordinaires dans les Eglises,
 & vne bonne & saincte discipline.
 Tels estoient vn Philippe qui est ainsi
 qualifié au vingt-vnième des Actes,
 vn Timothée, à qui l'Apostre dit, *Fay 2. Tim. 4. 5.*
 l'œuvre d'un Euangeliste, vn Tite, vn

Sosthenes, vn Silas, vn saint Luc, & autres semblables, desquels il est fait mention ou en l'histoire des Apostres, ou dans les Epistres de S. Paul.

Ces trois sortes de charges, ie di d'Apostres, de Prophetes, & d'Euan-gelistes, avec les graces speciales donnees pour les exercer, estoient extraordinaires, & necessaires seulement en ce premier establissement de l'Eglise: mais apres cela elles deuoient cesser, & faire place à celles des Pasteurs & Docteurs qui deuoient estre ordinaires & perpetuelles. Voila pourquoy l'Apostre voulant comprendre en ce denombrement toutes les vocations Ecclesiastiques joint celles-cy aux autres. Car apres auoir dit, *Il a donné les vns pour estre Apostres, les autres pour estre Prophetes, les autres pour estre Euangelistes*, il adjouste, *Et les autres pour estre Pasteurs & Docteurs*. Où il entend par le mot de Pasteurs ceux qui annoncent la Parole de Dieu dans les Assemblées des fideles, qui arguent, tansent, exhortent en temps & hors temps, publiquement & dans les maisons, qui in-

trifent les entendemens, réjoüissent les cœurs, consolent les consciences, & qui sont en leurs Presches la bouche de Dieu enuers l'Eglise, & en leurs prieres la bouche de l'Eglise enuers Dieu. Car parce que les fidelles sont appellez les brebis de Christ, l'Eglise son troupeau, l'Euangile sa bonne pasture, & que le deuoir de ses Ministres est d'administrer cette bonne & sainte pasture aux ames qui leur sont commises, ils sont iustement appellez *Pasteurs*, comme ceux que le *sainct Esprit a establis Euesques pour paistre l'Eglise de Dieu*, comme parle l'Apostre au vingtiesme chapitre des Actes. Le titre de *Docteurs* qu'il y joint, entant qu'il est distingué d'auec ceux des autres charges Ecclesiastiques, signifie proprement ceux qui exposent simplement le sens de l'Ecriture sainte, qui establisent la verité des dogmes, qui refutent les erreurs contraires, & qui façonnēt leurs auditeurs pour pouuoir vn iour enseigner les autres. Et la fonction de ces *Docteurs* differe grandement de celle des *Pasteurs*. Car les *Docteurs* se con-

tentent d'instruire les entendemens en expliquant les choses, en raisonnant pour la verité & contre le mensonge, & en montrant bien clairement ce qu'il faut faire & ce qu'il faut fuir : mais les Pasteurs travaillent à esmouuoir les affections de ceux qui les escoutent, ils leur dépeignent des plus viues couleurs qu'ils peuuent la beauté de la verité & de la vertu pour les leur faire aimer, & au contraire la laideur de l'erreur & du vice pour les leur faire auoir en detestation, ils les exhortent au bien avec efficace, ils les censurent de leurs vices avec esmotion, ils effrayent, ils consolent, ils prennent toute sorte de visages & de passions pour sauuer entant qu'en eux est, ceux dōt leur Maistre leur a commis le soin. Ces deux charges anciennement, aussi bien qu'aujourd'huy, estoient quelquefois exercées séparément par personnes distinctes, les vns estans employez simplement à prescher au peuple, les autres simplement à enseigner en l'eschole, comme ont esté vn Pantænus, vn Clement, vn Origené en l'Eglise d'Alexandrie,

qui les appelloit Catechistes. Et certes il estoit tres-à propos qu'il se fist ainsi, parce que tous n'estoient pas doüez des qualitez necessaires à l'une & à l'autre; mais auoient les vns le don d'enseigner, & les autres le don d'exhorter. D'autrefois elles estoient exercées conjointement par mesmes personnes, les dons de Dieu necessaires à l'exercice de l'une & de l'autre, & les occasions de les employer, se rencontrans souuent en vn mesme Ministre. Et c'est à quoy l'Apostre semble auoir regardé, parce qu'il a bien dit que Iesus Christ *a donné les vns pour estre Apostres, les autres pour estre Prophetes, les autres pour estre Euangelistes*; mais il n'a pas dit de mesme, les vns pour estre Pasteurs, & les autres pour estre Docteurs; mais a fait seruir vn mesme article à l'un & à l'autre, disant, *& les autres pour estre Pasteurs & Docteurs*; comme parlant non de diuers hommes, dont les vns soiēt Pasteurs & les autres Docteurs, mais de mesmes hommes qui sont Pasteurs & Docteurs tout ensemble. On peut dire encores plus simplement, & peut

1. Tim. 3. 1.
Tit. 1. 9.

estre plus probablement, que par ces deux termes de Pasteurs & de Docteurs l'Apostre n'a entendu qu'une mesme charge & une mesme fonction, parce que tous Pasteurs doiuent estre Docteurs, & ne sont vrayes Pasteurs qu'entant qu'ils sont Docteurs, c'est à dire entant qu'ils paissent les brebis de Christ de la bonne & saine doctrine de l'Euangile. Car il faut selon saint Paul que l'Euesque soit *propre à enseigner*, & suffisant tant à *admonester par saine doctrine*, qu'à *conuaincre les contredisans*. Et Dieu parlant au troisieme chapitre de Ieremie des bons & fides Pasteurs qu'il donnera à son peuple, dit, *Je vous donneray des Pasteurs selon mon cœur, lesquels vous paistront de science & d'intelligence*.

Voila, chers freres, le denombrement que nous fait l'Apostre des Ministres que Iesus-Christ nous a donnez du ciel. Où vous remarquerez contre les abus qui se sont fourrez en la Chrestienté depuis plusieurs siecles, qu'il ne fait mention ni d'aucun Pape qui doiue estre le Chef de l'Eglise, la source de toutes les voca-

tions Ecclesiastiques, & le centre de l'vnité de l'Eglise; ni d'aucuns Sacrificateurs qui doiuent offrir à Dieu le corps de son Fils en sacrifice propitiatoire pour les pechez des viuans & des morts. Et toutesfois au dire des Docteurs de la communion de Rome ce sont des charges extrêmement importantes & necessaires à l'Eglise de Dieu. Mais si elles sont telles, comme ils pretendent, comment est-il possible que ce grand Apostre les ait omises & en ce lieu, & generalement en tous ses escrits? D'où vient qu'ayant parlé si souuent de l'Eglise, de son vnité, de son Chef, de ses Ministres, de son ordre & de sa discipline, il n'a iamais dit vn seul mot du Pape, & n'a iamais renuoyé vers luy les fidelles pour receuoir eu ses decisions & ses arrests, ou ses commandemens & ses ordres, ou ses pardons & ses indulgences? Comment est-ce que nous exposant en diuers endroits les devoirs des Ministres enuers l'Eglise, & de l'Eglise enuers les Ministres, il n'a iamais expliqué nulle part quels sont ceux du Pape enuers l'Eglise, & de

l'Eglise enuers le Pape. A-ce esté par oubli ? Mais ce seroit en le blasmant de nonchalâce aux choses de sa charge en faire retomber le blasme sur le sainct Esprit mesme qui l'inspiroit & l'adrescoit. A-ce esté qu'il ait porté enuie à sainct Pierre & à ses pretendus successeurs de cette autorité souveraine qu'il auoit, selon eux, en l'Eglise ? Mais vne telle passion n'eust pû tomber en vne ame charitable comme la sienne. A-ce esté qu'il ait tenu cette charge pour vne chose de peu d'importance ? Mais si celles des Pasteurs & des Docteurs, qui ne sont, à leur dire, que subalternes, sont icy mentionnées par l'Apostre, commēt est-ce que celle-là qu'ils croyent estre souveraine, peut auoir esté omise par luy comme moins importante ? Si Iesus-Christ l'eust instituée, l'omettre en ce denombrement n'eust-ce pas esté vne chose aussi absurde, que si quelqu'un nous decriuoit l'ancien Estat de Rome & de ses Magistrats sans faire aucune mention ou de ses Consuls & de ses Preteurs durant que le gouuernement en a esté Democra-

ique, ou de ses Empereurs depuis qu'il est devenu Monarchique; ou si quelqu'autre en décrivant le gouvernement de l'Estat de Lacedemone ne se souvenoit point de parler de ses Roys & de ses Ephores? Et puis qu'ad l'Apostre saint Paul pour quelque cause que ce soit auroit oublié d'en parler, les autres Apostres n'en auroient-ils point fait mention en quelque endroit de leurs escrits? ce que toutesfois ils n'ont jamais fait. Nostre Seigneur Iesus qui auroit laissé l'Evesque de Rome pour son Lieutenant sur la terre, ne nous auroit-il point avertis, au moins vne fois, en son Euangile de le reconnoistre pour Chef de l'Eglise, & pour oracle infallible de verité? Quand donc nous voyons qu'il ne l'a point fait, non pas mesme par vn seul mot, ne nous est-ce pas vne preuve bien evidente qu'il n'a pas institué cette autorité & cette puissance dans son Eglise, & qu'il ne veut pas qu'elle y soit reconnue par les fidelles? Je dy le mesme de cette autre charge que s'attribuent les Prestres de nos aduersaires d'offrir le

corps de Christ à Dieu en vray sacrifice propiciatoire pour les pechez des hommes. Ils veulent que ce soit vne charge par l'exercice de laquelle se fasse l'expiation des pechez, & la reconciliation actuelle des hommes avec Dieu ; vne sacrificature dont la legale n'ait esté que l'ombre & la figure, & par le moyen de laquelle nostre Sauueur soit vn Sacrificateur eternal selon l'ordre de Melchisedec, vne fonction par laquelle est rendu à Dieu le seruice le plus solennel qui soit en la Religion Chrestienne, & mesme le seul qui luy est rendu à l'exclusion de la creature ; vn office enfin qui les releue en office & en dignité par dessus les Roys & les Princes, & mesme par dessus les Anges, les rendant capables de faire, detennir & de sacrifier à Dieu le propre corps de leur Createur toutes les fois qu'ils veulent. Or ie vous prie, vne charge de cette importance, si Iesus-Christ l'auoit instituée, ne meritoit-elle pas bien de tenir sa place en vn denombrement des vocations Ecclesiastiques ? Et cepédant, comme vous

oyez, l'Esprit de Dieu ne luy en
onne point icy. Ailleurs non plus,
mesme là où il traite amplement &
diffusément soit de la sacrificature le-
ale, soit de celle de Iesus-Christ,
omme vous sauez tous qu'il fait en
Epistre aux Hebreux. Quand nous
aurions point d'autre argument
ontre ces pretendus Sacrificateurs,
e silence si constant & perpetuel de
Escriture sainte en vn sujet de telle
onsequence, ne nous deuroit-il pas
affire pour reconnoistre qu'et ce sa-
rifice & ce sacerdoce sont de l'inuen-
ion des hommes, & non de l'institu-
ion de Christ, duquel l'Apostre nous
tteste qu'establissant en son Eglise
ous les Ministres necessaires à son
dification il ne luy a donné que les
Apostres, les Prophetes, les Euange-
istes, les Pasteurs & Docteurs ?

Voila les charges legitimes qu'il a
nstituées, mais voyons maintenant
quel vsage il les a destinées. *Il les a
donnez, dit l'Apostre, pour l'assem-
blage des saints, pour l'œuvre du Mini-
tere, pour l'edification du corps de Christ.*
Le mot de *saints* dont il se sert, signi-

fié les fidelles ; non qu'ils soyent parfaitement saints en eux-mêmes, mais parce qu'ils sont consacrez au service de Dieu, iustifiez au sang de son Fils & sanctifiez par le saint Esprit, au moins d'une sanctification commencée. Quant à celuy que nous auons tourné *assemblage*, en l'usage des Medecins Grecs il signifie proprement l'action par laquelle les os disloquez sont remis en leur place, & à le prendre en ce sens là il ne conuiendroit pas mal à l'effet du Ministère Euangelique. Car nous sommes tous décheus de l'estat auquel Dieu no⁹ auoit creéz, & du bon-heur que nous auions d'estre en son amour, & depuis que nous en sommes décheus, nous n'auons ni bien ni repos en nostre conscience. Mais par le Ministère de l'Euangile, par lequel la foy est engendrée en nos cœurs, nous sommes remis bien avec Dieu, & auons paix enuers luy par Iesus-Christ nostre Seigneur ; & s'il nous arriue apres cela de déchoir de nostre sainteté & de l'amour de Dieu, les Ministres de Christ, soit par la predication publique de cét Euangile,

ile, soit par leurs censures & par leurs
monstrances particulieres, nous
venent encor à nostre deuoir, & ex-
citans en nous de vifs mouuemens de
poy & de repentance nous reconciliēt
uec Dieu, & nous remettent en no-
tre premiere tranquillité. Mais quand
on confere ce mot avec tous les autres
qui suivent, & que je considere celuy
où il vient, qui signifie proprement
parfait & accompli de tous ses mem-
bres, j'estime qu'il vaut mieux le pren-
re comme a fait nostre version, à sa-
voir pour vn assemblage, c'est à dire
on pour vn ramas tumultuaire de
beaucoup de choses que l'on recueille
en vn monceau, mais pour vn juste
assemblage de toutes les pieces neces-
saires à la perfection d'un ouurage, ou
l'integrité d'un corps. Et certes c'est
quoy travaillent principalement les
Ministres de Iesus Christ d'assembler
en vn par la Parole de reconciliation
ue Dieu a mise en leur bouche tous
les esleus qui doiuent entrer en la
composition du corps de l'Eglise, &
de les adjoindre, chacun au temps &
en la maniere qu'il l'a decreté, à

la communion des Saints.

Or l'Apostre pour faire voir par quel moyen les seruiteurs de Christ font cét assemblage, adjouste en second lieu *pour l'œuvre du Ministère*. Car ils amènent les âmes à Dieu en vaquant avec soin, avec affection, avec zèle à l'exercice des fonctions que Iesus-Christ leur a ordonnées, lesquelles il réduit à trois chefs, à la predication de l'Evangile, à l'administration des Sacremens, & au soin de porter les hommes par exhortations & par remontrances à obeir à Dieu, quand il dit aux Apostres, *Allez & preschez l'Evangile à toute creature, les baptisans au nom du Pere, du Fils & du Saint Esprit, & les enseignant de garder tout ce que je vous ay commandé*. Il parle d'œuvre pour monstrier aux Ministres que Iesus-Christ ne les appelle pas à l'aise ni à l'oisiueté, ni mesme simplement à l'estude & à la speculation, mais à l'action, à l'exercice, au travail, afin qu'ils n'y espargnent aucune sorte de diligence, mais qu'ils facent valoir entant qu'en eux est, les talents de leur Maistre à l'exaltation

*Marc. 16. 15.
Matth. 28.
19. 20.*

de sa gloire, & au salut des ames qu'il leur a commises. Ainsi disoit S. Paul à Timothée, *Fay l'œuvre d'un Euan-* 2. Tim. 4. 5.
geliste, & parlant des Euesques, *Si* 1. Tim. 3. 1.
quelqu'un a affection d'estre Euesque, il
desire vne œuvre excellente. Et il quali-
 fie Ministère la charge dont cette
 œuvre là est la fonction, pour leur ap-
 prendre qu'ils ne doiuent point pre-
 endre de dominer sur les heritages
 du Seigneur, chose qu'il leur a ex-
 pressément defenduë, qu'ils ne sont
 que Ministres & seruiteurs en la mai-
 son de Dieu, qu'ils ont vn Maistre au-
 quel ils ont à rendre conte de leur ad-
 ministration, afin qu'ils s'y employent
 avec crainte, avec fidelité, avec dili-
 gence, avec zele, & que quand il ap-
 paroistra, ils reçoient de luy la cou-
 ronne incorruptible de gloire.

C'est par cette administration là que
 l'œuvre de nostre Seigneur s'auāce de
 jour en jour en l'Eglise. Ce que l'Apo-
 tre signifie quand il adjouste, *Et pour*
edificatiō du corps de Christ, c'est à dire,
 afin que cette bien-heureuse societé
 de l'Eglise, qui est le corps mystique
 de Iesus-Christ, non seulement s'ac-

1. Cor. 3. 7.

croisse en nombre de personnes par la conuersion des esleus qu'il a parmi les infidelles, mais s'auance & se fortifie en foy, en connoissance, en toute sorte de vertus religieuses & Chrestiennes. Effect diuin & glorieux qui suit les fonctions de ce sacré Ministère, non par la vertu des Ministres mesmes (car *celuy qui plante, n'est rien, ni celuy qui arrouse*) mais par la benediction celeste, car c'est elle qui en effect *donne l'accroissement*. Par tout où est ce Ministère & la predication du saint Euangile, Dieu reuele son bras & le sceptre de sa vertu, & ne permet jamais que sa Parole y soit annoncée sans effect. Cét effect est plus grand ou moindre en vn lieu qu'en vn autre, selon que Dieu y a plus grand ou moindre nombre d'esleus. Mais tant y a qu'il accomplit tousiours par elle son bon plaisir en quelques vns : & c'est en ce Ministère & en cette predication que tous les amateurs du salut de leurs ames en doiuent chercher les moyens pour les trouuer assurement. Car comme encor que Dieu, qui au commencement a éclairé le

monde, & fait produire à la terre les herbes & les arbres sans le Soleil, pourroit bien continuer à le faire sans luy, neantmoins l'ayāt créé pour l'ornement de l'Vniuers, & pour cōmuniquer la lumière, la vie & la fecondité à toutes les parties de la Nature, selon que chacune d'elles en est capable, il veut qu'elles la reçoient toutes par luy, comme par le moyen le plus beau qui se sauroit imaginer : ainsi encor que Dieu qui au commencement a illuminé ses Apostres immédiatement par son saint Esprit sans l'interuention d'aucun homme, nous pourroit bien illuminer de mesme, neantmoins ayant trouué plus expedient de se servir de ce Ministère public pour assembler ses saints, & faire retentir parmi eux les merueilles de sa sagesse & de sa grace, & pour en receuoir aussi les reconnoissances publiques en leurs Assemblées, il veut que la foy & toutes les vertus qui la suivent, soyent produites & augmentées en eux par cette voye. Il pourroit bien y employer les Anges, mais l'admirable vertu de sa grace n'y seroit pas si bien

Act. 10. 5.

reconnuë ; parce qu'on en pourroit imputer l'effet à l'excellence de ces grands Ministres descendus du ciel : au lieu que quand il y employe des hommes pecheurs & mortels comme nous, & que par eux il opere ces grâds effects dans les ames, il nous est force de reconnoistre en la grande foiblesse de tels instrumens la puissance infinie de la cause qui agit par eux. C'est pourquoy l'Ange parlant à Corneille pour sa conuersion à Christ, ne l'instruit pas luy mesme aux mylteres de son salut, mais le renuoye à l'Apostre saint Pierre.

Mais c'est assez pour l'explication de ce texte, c'est à nous maintenant, chers freres, à cōuertir à nostre vsage ce que nous auons entendu, afin que nous l'ayons entendu à nostre salut. Premièrement donc en general considerons icy avec rauissement la grande charité de nostre Seigneur Iesus enuers nous, en ce qu'apres nous auoir acquis par son sang vne redemption eternelle, & estre monté à son Pere pour interceder pour nous enuers luy, il a pris encor soin d'establir au milieu

de nous le saint Ministère de la Parole, ayant donné les uns pour estre Apostres, les autres pour estre Prophetes, les autres pour estre Evangelistes, pour l'assemblage des Saints, pour l'œuvre du Ministère, & pour l'edification du corps de Christ: & receuons vn si precieux tesmoignage de son amour avec vne religieuse reconnoissance, pour nous exciter à le seruir avec d'autant plus de courage. Et puis en particulier retenons les leçons qu'il y donne à ses Ministres d'vn costé, & à tous les fidelles de l'autre. Nous qu'il a honorez par la grace de ce saint Ministère, y en auôs vne excellente, que nous deuons auoir toûjours deuant les yeux, que c'est nostre Seigneur Iesus assis à la dextre de Dieu, qui nous a donnez à l'Eglise pour Pasteurs & Docteurs, qu'il regarde du ciel, où il est & d'où il conduit toutes choses, quel deuoir nous faisons de nous acquitter de nos charges, que de ce deuoir là nous auons à luy rendre conte à l'heure de la mort & au iour de son iugemēt, que si nous le seruons fidellement,

nous auons en luy vn bon Maistre, vn puissant protecteur contre tous les mespris, toutes les haines, & toutes les contradictions du monde, & vn tres-liberal remunerateur de nos peines & de nos trauaux, que la charge qu'il nous a donnée n'est pas vne dignité dans le monde, mais vn Ministère en l'Eglise, qu'il ne nous y a pas mis pour y dominer & y estre seruis, mais pour y estre ses Ministres, & mesmes les *seruiteurs de tous pour l'amour de luy*; que quand il nous y a appelez, il ne nous a point appelez à l'aise & à l'oisiueté, mais à vne œuvre & à vn exercice continuel, à l'assemblage de ses Saints, & à l'edification de son corps; que les fidelles dont il nous a commis le soin sont ses enfans, & que nous sommes leurs Docteurs, qu'en cette qualité nous deuons tous estre

1. Tim. 4. 13. *attentifs à la lecture, à l'exhortation, & à l'endoctrinement*, pour les instruire selon la portée de chacun, donnant

2. Pierr. 2. 2. *aux vns le lait d'intelligence qui est sans fraude*, pour leur accroissement spirituel, & aux autres la viande ferme de ses plus hauts mysteres, *insqu'à ce qu'ils*

*Se rencontrent tous en l'unité de la Foy
& de la cognoissance du Fils de Dieu en
homme parfait, à la mesure de la parfaite
stature de Christ; qu'ils sont les brebis de
sa pasture, & que nous en sommes les
Pasteurs; que c'est à nous non à man- Ezech 34.3.
ger leur graisse & à nous reuestir de
leur laine, cōme les mauuais Pasteurs
d'Israel, mais à l'exemple de nostre
grand Pasteur à les mener aux bons
pasturages, à les repaistre de la saine
doctrine, à renforcer les langoureu-
ses, à medeciner les malades, à ban-
der les blessées, à rechercher & rame-
ner celles qui se sont esgarées, à les
gouverner toutes non avec vne verge
de fer, avec dureté & avec rigueur,
mais avec vne verge de direction &
de douceur, qui comme celle d'Aaron
porte des fleurs & des fruits pour leur
salut & pour le nostre; que ce sont les
Saints du Seigneur, Saints dont le
moindre luy est incomparablement
plus cher & plus cōsiderable que n'est
tout le reste du monde; que nostre bien Pse. 16. 2. 3.
ne va point iusqu'à luy, mais qu'à ces
saints là qui sont les gens notables de la*

terre , & nos futurs coheritiers en la gloire celeste , doit *estre nostre affection* , pour procurer leur bien & leur salut avec la mesme passion que le nostre propre ; que l'Eglise de Iesus-Christ est son corps mystique , corps mystique qui luy est plus precieux & plus cher que son propre corps naturel,veu qu'il a liuré à la mort son corps naturel pour donner la vie à son corps mystique ; que cette consideration nous oblige à la servir avec toute sorte de soin , de respect & d'amour , comme seruans non des hommes mortels seulement , mais le Fils vnique de Dieu ; que nous deuons trouuer douce & heureuse toute la peine que nous employerons à vn si digne & si honorable seruice, & y vaquer avec zele & perseuerance,pour apres auoir acheué nostre course obtenir de sa main la couronne incorruptible de gloire.

Vous aussi de vostre costé, tres-chers freres , au milieu desquels nous exerçons aujourd'huy ce Ministere de sa grace , considerez la grande charité dont il daigne vser enuers nous , quand non content de vous

avoir donné les diuins écrits des Prophetes, des Apostres & des Euangelistes, il vous donne encor nombre de Pasteurs & de Docteurs, pour vous instruire en la verité, vous premunir contre l'erreur, vous remontrer vostre deuoir, vous reprendre de vos pechez, vous exhorter à repentance, vous former à la sainteté, vous prescher ses promesses, vous assurer de son amour, vous consoler en vos ennuis, & vous conduire en fin à la vie eternelle. Vous estes bien-heureux si vous vous en monstrez reconnoissans comme vous deuez, non seulement en le remerciant de parole de cette grace qu'il vous fait, mais principalement en menant vne vie vrayment Chrestienne, si vous vous faites voir pleins d'une religieuse ferueur en toutes les parties de son seruice, en l'oüye de sa Parole, en la participation de ses Sacremens, en la meditation de ses graces, en l'inuocation de son Nom & au chant de ses loüanges; si quant à vos prochains; vous conuersez avec eux *en toute humilité & douceur avec vn esprit patient, suppor-*

Eccl. 12. 1. sans l'un l'autre en charité, & estans
 soigneux de garder l'unité d'Esprit par
 le lien de paix; si vous, peres & meres,
 nourrissez ainsi vos enfans; si vous,
 enfans, estans ainsi nourris pas vos pe-
 res & par vos meres, *Ps. 119. 9.* auez souvenance
 de vostre Createur aux iours de vostre ieu-
 nesse, & rendez par vostre chemin en y
 prenant garde selon sa Parole, & en vn
 mot si vous faites honneur par vos
 bonnes & saintes mœurs à la discipli-
 ne de sa maison. Car tant que vous
 vous comporterez de cette façon,
 vous estes assurez qu'il ne retirera
 jamais sa grace du milieu de vous,
 mais qu'il vous continuera tout le
 long de vos iours ce bien inestimable
 dont il vous a donné la iouyssance
 iusqu'icy, ie veux dire ce saint Mi-
 nistère, lequel quand vous auez, vous
 pouuez dire que vous auez en luy vne
 source viue & profonde de benedi-
 ction, de consolation & de grace pour
 vous & pour les vostres, & en la vie &
 en la mort. Mais au contraire si vous
 receuez sa grace en vain, si vous vous
 ostinez en vos vices, si vous courez
 avec les mōdains en vn mesme aban-

don de dissolution & d'ordure, & si vous ne tenez conte des remontrances par lesquelles les seruiteurs vous exhortent iournellement à repentance & à sanctification, vous auez grand sujet de craindre qu'après que vous aurez long temps *mésprisé les richesses* *Rom. 2. 4.* *de sa benignité, & de sa patience & de sa longue attente, qui vous conuie à repentance,* il ne vous oste son chandelier *Apoc. 2. 5.* pour le porter ailleurs, & qu'il ne vous arriue en fin vn mal-heur pareil à celuy de ces Iuifs rebelles, dont il est dit au second liure des Chroniques, *Dieu* *2 Chron. 36.* *les auoit sonmez par ses messagers, les* *15. 16.* *enuoyant en toute diligence vers eux, parce qu'il estoit esmeu de compassion enuers son peuple & enuers sa demeure. Mais ils se moquoient des messagers de Dieu, ils méspriſoient ses paroles, & abusoient de ses Prophetes, iusqu'à ce que sa fureur s'esleua sur son peuple, & qu'il n'y eust plus de remede; & à celuy de ces villes & de ces bourgades de Galilée, au milieu desquelles nostre Sauueur ayant presché inutilement durant vn long temps, il leur disoit: *Mal-heur* *Matth. 11. 21.* *toy Corazin, mal-heur sur toy Bethsaïda:**

car si en Tyr & en Sidon eussent esté faites les vertus qui ont esté faites au milieu de vous, ils se fussent il y a long temps amendez avec sac & cendre. Pourtant vous di-je que Tyr & Sidon seront traitées au iour du Iugement plus tolerablement que vous. Et toy Capernaum qui as esté esleuée iusques au ciel, tu seras abaissée iusques en enfer: car si en Sodome eussent esté faites les vertus qui ont esté faites au milieu de toy, elle fut demeurée iusques à ce iour. Pourtant vous di-je, que ceux de Sodome seront traittez plus tolerablement que toy au iour du Iugement. Preuenenez ce mal-heur, fidelles, par vn prompt, serieux, & effectif amendement de vie, & si par le passé vous n'avez vsé comme vous deuiez de ce grand auantage que vous avez d'auoir le saint Ministère au milieu de vous, demandez-en pardon à Dieu avec vne vraye repentance, & luy faites vn vœu solennel d'en faire mieux vostre profit à l'auenir, & de vous rendre plus obeissans & plus souples aux remonstrances qu'il vous fait par la bouche de vos Pasteurs. Ainsi leur rendrez-vous leur administration plus

facile, & accroistrez leur ioye quand ils verront en vostre amendement le fruit de leurs labeurs. S'ils en ont le contentement, vous en aurez tout le profit, car ils vous seruiront avec d'autant plus de courage, & Dieu qui le verra, en respandra & sur vous & sur eux vne tant plus grande abondance de benediction. Au lieu que s'ils ne voyoient aucun fruit de leur predication au milieu de vous, & que vous resistassiez tousiours à leurs remonstresances & à leurs exhortations, cela ralentiroit leur zele, & les rempliroit de tristesse, dont vous receuriez vn grand preiudice. C'est ce que remonstroit l'Apostre aux Hebreux, *Obeissez, disoit-il, à vos conducteurs, & vous y soumettez. Car ils veillent pour vos ames, comme ceux qui ont à en rendre conte: afin que ce qu'ils en font, ils le fassent ioyeusement, & non point à regret, car cela ne vous viendrait pas à profit.* Hebr. 13. 17.

Excitez vous encor à cet estude de la sanctification par la consideration des choses que vous donne icy nostre Apostre. Il vous appelle des saints assemblez par le Ministère de l'Euan-

2. Cor. 7. 1.

Phil. 4. 8.

gile. Rendez vous dignes d'un si beau titre, vous nettoians de toute souillure de chair & d'esprit, & poursuivans la sanctification en la crainte de Dieu. Adonnez vous à toutes choses veritables, à toutes choses venerables, à toutes choses iustes, à toutes choses pures, à toutes choses aimables, à toutes choses de bonne renommée, & s'il y a quelque vertu & quelque loüange, appliquez vous à ces choses. C'est le moyen d'auancer la gloire de Dieu, d'edifier l'Eglise, d'affermir en vos cœurs vostre vocation & vostre election, de fermer la bouche au Diable, & d'attirer par la bonne odeur de vostre conuersation ceux de dehors à la connoissance de Iesus-Christ. Il passe encores plus auant, & vous appelle *le corps de Christ*. Quels deuez-vous donc estre en sainte conuersation pour correspõdre à la grandeur & à la majesté d'un titre si auguste, sinon conformes au plus pres qu'il vous est possible à ce grand Chef de qui vous auez l'honneur d'estre membres ? Car afin que vous le sachiez, mes freres, le corps de Christ n'est pas vne compagnie visible de personnes


personnes qui font profession de la Religion Chrestienne , qui sont baptisées, qui viennent au Presche, qui chantent les Pseaumes , qui font les prieres , qui communient à la Table de Iesus-Christ : mais vne société spirituelle & mystique de personnes qui n'ont ni vie, ni sentiment , ni mouvement que ce qu'elles en reçoivent de Iesus-Christ que Dieu leur a donné pour Chef , qui sont animez de son Esprit , qui s'adonnent de tout leur cœur à la vraye sainteté , & qui en toutes choses s'estudient à *plaire à Dieu* Col. 1. 10. *en fructifiant à toute bonne œuvre.* Ce sont ceux-là qui sont vrayment son corps , qui sont attachez de toute leur affection à sa Croix , qui sont crucifiez & mortifiez au monde avec luy, qui sont resuscitez avec luy , par la gloire du Pere, pour cheminer avecques luy en nouveauté de vie, qui sont dé-jà assis es lieux celestes en sa personne , & qui bien qu'ils soient en terre quant à la chair sauent que ce n'est pas leur vray domicile, & y conuersent comme estrangers , & comme *vrais bourgeois des ciens, d'où ils atten-* Phil. 3. 20.

N

dent le Sauveur. Et le vray moyen de vous rendre tels c'est d'escouter avecques reuerence, avec attention & avec zele les enseignemens que nostre Seigneur a donnez à l'Eglise par ses Prophetes, par ses Apostres, & par ses Euangelistes, & qu'il luy donne encor aujourd'huy par les Pasteurs & les Docteurs par lesquels il l'edifie iournellement. Car *il les a donnez*, dit l'Apostre, *pour l'assemblage des Saints, pour l'œuvre du Ministère, & pour l'edification du corps de Christ.* Mais parce que cette edification est vne œuvre toute diuine, & qui par consequent ne se peut faire par vne vertu purement humaine, & que les Ministres de l'Euangile ne sont que seruiteurs, de qui la predication, sans l'assistance de sa grace, n'est rien qu'un son qui bruit dans les oreilles, & qui s'esuanouit aussitost, mais que c'est Dieu qui fait seul avec efficace & le vouloir & le parfaire dans les ames de ses esleus, quand il y agist par son S. Esprit : le principal est que nous le supplions tous ensemble pour la fin de cette action, qu'il accompagne de la benedictio celeste

Phil. 2. 13.

de sa vertu le labour de ses seruiteurs, qu'à mesure qu'ils nous annoncēt exterieurement sa Parole, il l'imprime luy mesme interieurement en nos cœurs, qu'il adjoigne tous les iours nouvelles personnes à la communion de son Fils, & qu'il augmente de plus en plus la foy, la pieté, la deuotion, & la charité de ceux qu'il y a déjà amenez, iusques à ce que tous les Saints estans assemblez, & l'edifice de son Eglise estant paruenue à son comble, nous n'ayons plus besoin d'Apostres, de Prophetes, d'Euangelistes, de Pasteurs, ni de Docteurs, mais que Dieu soit fait tout en tous. A luy, Pere, Fils, & S. Esprit, soit honneur, gloire, benediction & loüange aux siecles des siecles. Amen.



S E R M O N

CINQVIESME,

Sur ces paroles de l'Apostre S.
Paul au 4. chap. de l'Epistre
aux Ephesiens.

*Verf. 13. Jusques à ce que nous nous rencontrions
sous en l'vnité de la foy & de la connoissance
du Fils de Dieu, en homme parfait, à la mesure
de la parfaite stature de Christ.*

*14. Afin que nous ne soyons plus enfans, flottans
& estans demenez çà & là à tout vent de do-
ctrine par la piperie des hommes, & par leur
ruse à cauteleusement seduire.*

*15. Mais afin que suiuanz verité avec charité
nous croissions en tout en celuy qui est le Chef,
à sçauoir Christ.*

*16. Duquel tout le corps bien adiufté & serré
ensemble par toutes les jointures du fournis-
sement prend accroissement du corps, selon la
vigueur qui est en la mesure d'vne chacune par-
tie pour l'edification de soy-mesme en charité.*

LEs peres & les meres ne se con-
tentent pas d'auoir donné la vie
à leurs enfans. Ils sont soigneux de la

leur conseruer, en les pouruoyant de toutes les choses necessaires à leur subsistence, iusqu'à-ce qu'ils soient grands; & soit grands soit petits de les tenir tellement vnis, nonobstant la diuersité de leur aage, de leur naturel, de leurs forces & de leurs dispositions qu'ils ne soient que comme vn seul corps, dont les membres s'entr'aydent & s'entresecourēt l'vn l'autre, pour leur salut & pour leur defense commune. S'ils ont ce soin pour la vie & la felicité temporelle de leurs enfans, Iesus-Christ le *Pere d'eternité*, n'en a pas moins pour la vie spirituelle & pour le bon-heur eternal des siens. Il ne luy suffit pas de les auoir vne fois engendrez par la *semence incorruptible de sa Parole*, & introduits en son Eglise par le lauement de regeneration & par la profession de la foy Chrestienne. Il entretient de plus au milieu d'eux le Ministère ordinaire de l'Euangile premierement pour les instruire continuellemēt en sa verité, iusqu'à-ce qu'estans deuenus robustes en la foy, ils soient capables de resister à toutes les tentations de Satan

& à toutes les seductions du monde,
& puis pour les vnir les vns avec les
autres par le lien d'une vraye charité,
en sorte que s'entr'assistans en toutes
leurs necessitez, s'entrecommuniquās
tous leurs biens, seruans tous d'un
mesme courage leur comun mai-
stre, & se defendans tous avec vn mes-
me zele contre leur comun aduer-
saire, ils soient tous ensemble comme
vn seul corps, duquel Iesus-Christ soit
le Chef, & le saint Esprit l'ame, & du-
quel le bon-heur & la gloire dure
eternellement. C'est ce que nous en-
seigne l'Apostre en ce texte, où apres
auoir dit, comme vous l'avez ouy cy-
deuant, *Il a donné les vns pour estre
Apostres, les autres pour estre Prophetes,
les autres pour estre Euangelistes, les au-
tres pour estre Pasteurs & Docteurs, pour
l'assemblage des Saints, pour l'œuvre du
Ministere, pour l'edification du corps de
Christ, il adioute, Jusques à ce que nous
nous rencontrions tous en l'vnité de la foy
& de la connoissance du Fils de Dieu, en
homme parfait, à la mesure de la parfaite
stature de Christ, afin que nous ne soyons
plus flottans & estans demenez çà & là*

à tout vent de doctrine par la piperie des hommes, & par leur ruse à cauteleusement seduire ; mais que suiuaus Verité avec charité, nous croissions en tout en celuy qui est le Chef, à sçauoir Christ, duquel tout le corps bien ajusté & serré ensemble par toutes les jointures du four-nissement, prend accroissement du corps selon la vigueur qui est en chacune partie, pour l'edification de soy-mesme en charité.

Belles & diuines paroles par lesquelles il nous estale les deux frui&ts principaux du Ministere Euangelique, que nostre Seigneur Iesus-Christ a establi dans son Eglise. L'un est l'union & l'affermissement des fidelles en vne mesme foy ; l'autre est la liaison & la bonne correspondance qu'ils ont les vns avec les autres en vne mesme charité. Il commence par la foy, comme par celle qui est la mere de toutes les vertus Chrestiennes ; & poursuit par la charité, comme par celle qui est la principale & plus belle production de la foy. Et ainsi en fait-il par tout ailleurs, comme quand il se conjoïit avec les fidelles de leur foy

enuers Iesus-Christ, & de leur charité enuers tous les saints. Quant à la foy il dit, *jusques à ce que nous nous rencontrions tous en l'vnité de la Foy & de la connoissance du Fils de Dieu.* Ce que la plupart des Interpretes entendent de la perfectiõ & de la plenitude de connoissance qui nous est reseruée au ciel, de laquelle l'Apostre dit au 13. de la premiere aux Corinthiens, que *maintenant nous connoissons en partie, & prophetisons en partie, mais que quand la perfection sera venue, alors ce qui estoit en partie, sera aboli; que nous voyons maintenant en vn miroir obscurément, mais qu'alors nous verrons face à face.* Mais la condition de la gloire future en laquelle nous verrons Dieu ainsi comme il est, sera telle qu'elle ne laissera point de lieu à la foy, qui est

1. Ieb. 32. *Une demonstration des choses que l'on ne voit point.*

Hebr. 11. 1. *Icy nous cheminons bien par foy, & non par veuë, mais là tout au contraire nous cheminerons par veuë & non par foy. Par consequent ce que l'Apostre dit icy que nous nous rencontrerons tous en l'vnité de la foy, ne peut point conuenir à cét estat*

là. De fait il montre clairement qu'il parle d'une chose qui se fait durant que les fidèles sont sur la terre, quand il adjouste, *Afin que nous ne soyons plus comme enfans flottans & estans demenez çà & là à tout vent de doctrine, par la piperie des hommes & par leur ruse à cauteleusement seduire, mais que suivans Verité avec charité, nous croissions en tout en celuy qui est le Chef &c.* Et le but qu'a l'Apostre en ces mots, le requiert necessairement. Car qu'est-ce qu'il se propose en parlant ainsi ? Rien autre certes que d'obliger les Ephesiens à *entretenir l'unité d'Esprit par le lien de paix*, & à se servir des diuerses graces de Dieu qui se trouuent en eux, non à se diuiser, mais à se mieux vnir. Pour le leur persuader que fait-il ? Il leur remonstre que *la grace a esté donnée à chacun d'eux selon la mesure du don de Christ*, qui est leur commun Chef & souverain Seigneur, qu'il a establi son Ministère au milieu d'eux pour les assembler tous en vn corps, & les amener tous à l'unité de la foy & de la connoissance, en honneur parfait, à la mesure de la parfaite stature de

Christ, afin qu'ils ne soient plus comme enfans flottans, & demenez à tout vent de doctrine par la piperie des hommes, mais qu'ayans vne vraye charité les vns enuers les autres, ils croissent de iour en iour en Christ, qu'ils soient tous sous luy comme vn corps bien ajusté & serré ensemble; & que quant aux dons differens en qualité & en grandeur, qu'ils possèdent les vns ou les autres, il les leur a donnez ainsi diuers pour les rendre necessaires les vns aux autres, par le besoin qu'ils ont tous de ces dons, & par la communication mutuelle qu'il veut qu'ils s'en facent les vns aux autres. Or toutes ces considerations ne regardent que la condition des fidelles durant qu'ils sont icy bas sur la terre. Car quand ils seront dans le ciel, ils n'auront plus de foy, qui leur *demonstre les choses que l'on ne void point*, parce qu'alors ils *verront face à face*. Ils n'auront plus besoin de Ministère qui les garde d'estre *comme enfans flottans* & demenez à tout vent de doctrine par la piperie des hommes, parce qu'ils seront bien haut au dessus de

tous les pieges & de toutes les tentations, soit des hommes, soit des demons. Ils n'iront plus croissans de iour en iour en Iesus-Christ, parce qu'ils seront tous paruenus à leur pleine & finale perfection. Ils n'auront plus besoin des dons les vns des autres, & ne seront plus liez ensemble par telles jointures, parce qu'ils tiendront immediatement à Dieu mesme, qui *sera tout en tous*. Voila pourquoy nous estimons qu'il est beaucoup plus conuenable de rapporter ce discours de l'Apostre à ce qui se fait icy bas entre les fidelles par le Ministère de l'Euangile. 1. Cor. 15. 28.

Examinons-en maintenant les paroles. Nostre Sauueur, dit-il, a donné ses Ministres *pour l'assemblage des Saints, pour l'œuvre du Ministère, & pour l'edification de son corps, jusques à ce que nous nous rencontrions tous en l'Vnité de la Foy, ou, que nous paruenions tous à l'Vnité de la Foy*. Car c'est ce que signifie le mot Grec en tous les liures, soit historiques, soit dogmatiques du Nouveau Testament, où il a esté employé par le saint Esprit.

Mais nostre version l'a rendu selon sa signification plus commune dans les autres auteurs, & qui conuient aussi fort bien au sujet que traite l'Apostre. *Nous tous*, c'est à dire, Iuifs & Gentils, grands & petits, sauans & ignorans, & moy mesme avec tous les autres que Dieu a honorez de sa vocation celeste. Car Dieu a ses esleus parmy toute sorte de gens, lesquels il appelle en son temps par la predication de son Euangile, les amenant tous à *l'vnité de la Foy*, c'est à dire, à vne seule & mesme foy qui est en Iesus-Christ. Ainsi y auoit-il amené saint Paul, ainsi les Ephesiens & les autres, les ayant tous faits vn en luy, au lieu qu'auparauant ils estoient extrêmement diuisez pour la Religion, les vns estans plongez dans les erreurs & dans les superstitions du Iudaïsme, & les autres dans les horreurs & dans les idolatries du Paganisme. Mais qu'entend-il par cette foy ? Il l'explique quand il adjouste, & *de la connoissance du Fils de Dieu*. Où quand il appelle ainsi singulierement nostre Seigneur Iesus-Christ *le Fils de Dieu*, ce qu'il fait

en diuers autres endroits, il monstre manifestement que Iesus-Christ n'est pas honoré de ce nom en la mesme qualité que nous, c'est à dire, comme fils adoptif, comme le pretendoient ces Euesques d'Espagne Felix & Eupandus, qui furent justement condamnés à cette occasion dans le Concile de Francfort, mais comme ayant esté engendré de toute eternité par le Pere, & estant de mesme nature & de mesme essence que luy. Car il n'est pas simplement nommé Fils, mais par exprés *le Fils*, & mesme ailleurs est appelé *le propre Fils*, *le Fils unique*, *le Fils bien-aimé*, comme celuy que Dieu a engendré & possédé dès le commencement de sa voye, deuant qu'il fist aucune de ses œuvres. Il nous propose ce Fils là pour objet de la foy parce que par la foy il entend proprement cette ferme persuasion que nous auons des promesses que Dieu nous a faites de la remission des pechez, & de la vie eternelle, & que c'est luy qui nous a acquis l'vne & l'autre, entant qu'il a esté liuré pour nos offenses, & qu'il a esté resuscité pour nostre iustification. C'est

Rom. 8. 32.

Ieh. 1. 14. &

3. 16. 18.

Col. 1. 13.

Prou. 8. 22.

Rom. 4. 25.

cét vnique objet dont la contemplation & la foy iustifie les pecheurs, & les deliure de la damnation, tout de mesme qu'autresfois le regard du serpent d'airain guerissoit les Israélites de la piqueure des serpents brulans du desert, & les garentissoit de la mort. C'est la raison pour laquelle l'Apostre dit de foy-mesme, *Ce que ie vis maintenant en la chair, ie vis en la foy du Fils de Dieu, qui m'a aimé, & qui s'est liuré foy-mesme pour moy.* Et l'Apostre saint Iehan de tous les fidelles en general, *Qui croit au Fils de Dieu, il a le tesmoignage de Dieu en foy-mesme, & c'est icy le tesmoignage, à sçauoir que Dieu nous a donné la vie eternelle, & cette vie est en son Fils. Qui a le Fils, il a la vie; & qui n'a point le Fils, il n'a point la vie.* Cette foy là il la qualifie *connoissance*, comme en diuers autres endroits il l'appelle *science, sagesse, intelligence.* Iugez par là si cette foy tenebreuse & enueloppée, qui se definit mieux par l'ignorance que par la connoissance, qui fait profession de croire, & ne fait que c'est qu'elle croit, qui à la mode des Athe-

Gal. 2. 20.

*1. Ieh. 5. 10.
11 12.*

niens idolatres sacrifie au Dieu inconnu, & qui avec les Samaritains adore ce qu'elle ne connoist point; Iugez, dis-je, si cette foy là est la vraie foy, que l'Apostre appelle la connoissance du Fils de Dieu; cette vraie foy de laquelle Iesus - Christ dit en S. Iehan, *Cette est la vie eternelle, qu'ils te con-* Ieh. 17. 3. *noissent seul Vray Dieu, & celui que tu as enuoyé, Iesus - Christ : cette* vraie foy dont les Apostres luy disoient, *Nous auons connu & creu que* Ieh. 6. 69. *tu es le Christ, le Fils du Dieu vivant; cette vraie foy en fin à laquelle l'Apostre saint Paul donne par tout de si magnifiques eloges, & laquelle il souhaite avec tant d'ardeur à ses Ephesiens, quand au premier chapitre de cette Epistre il prie le Pere de gloire de leur donner l'Esprit de sagesse & de reuelation par la reconnoissance de Iesus - Christ, à sçauoir les yeux de leurs entendemens illuminez, pour sçauoir quelle est l'esperance de leur vocation, & quelles les richesses de la gloire de son heritage és saints. Pourquoi tant de sagesse, de reuelation, de reconnoissance, d'illumination, de science, s'il est que-*

stion simplement de croire, sans sçavoir que c'est que l'on croit, & de s'en remettre à autrui? A cela certes vn esprit de stupidité, d'aveuglement, d'insensibilité peut suffire, mais non à la vraye foy, qui est, comme l'Apostre nous l'enseigne icy, *la connoissance du Fils de Dieu* Quoy donc? si quelqu'un n'a vne parfaite connoissance de Iesus-Christ & des mysteres de son Euangile, n'a-il point la foy? Ie nedy pas cela, ie dy seulement qu'il n'y a iamais eu de vraye foy, là où il n'y a point eu de vraye connoissance de la reuelation de la misericorde de Dieu donnée de tout temps aux hommes: & que sous le Nouveau Testament il n'y a point de foy qui soit vrayment Chrestienne & capable de nous iustifier & sauuer, sans vne connoissance distincte & precise de Iesus-Christ crucifié & resuscité pour nous. Mais cette foy a diuers degrez. Il y en a vne petite & foible, comme ne faisant que de naistre, & laquelle Iesus-Christ compare tantost à vn

Mat. 17 20.

Esaï. 42. 2.

Matt. 12 20.

grain de moustarde pour son extreme
petitesse, tantost à vn *lumignon* *fumant*

mant à cause du peu de lumiere & de chaleur qu'elle jette, comme celle de ce pource pere du Lunatique qui luy disoit, *Je croy, mais subuiens à mon incredulité.* Ily en a vne autre qui est robuste & vigoureuse, & que l'Apostre appelle vne *pleine certitude d'intelligence*, comme a esté celle d'un Abraham, d'un Daud, d'un S. Paul. De la premiere Dieu se contente dans les commencemens de la regeneration des siens : mais quand ils ont receu la premiere, il veut qu'ils aspirent à la dernière, qu'après le lait, ils recherchent la viande ferme, & que des premiers rudimens ils passent aux plus hauts mysteres. Pour cét effet il entretient ses Ministres au milieu d'eux, qui leur preschent continuellement sa Parole, & qui leur donnent tous les jours de nouuelles & plus claires instructions en toutes les parties de la discipline de Iesus-Christ, iusqu'à ce qu'ils soient maistres & capables d'enseigner les autres. C'est ce que signifie S. Paul quand il dit, *Iusques à ce que nous nous rencontrions tous en l'unité de la foy, & de la connoissance du Fils de*

O

Dieu, en homme parfait, à la mesure de la parfaite stature de Christ; ou, comme il y a dans le Grec, à la mesure de l'aage de l'accomplissement de Christ, c'est à dire, de l'aage meur de l'Eglise, laquelle au premier chapitre de cette Epistre est appelée l'accomplissement de celui qui accomplit tout en tous. Cela, mes freres, merite d'estre bien pesé, & que nous l'imprimions bien avant en nos cœurs, premiere-ment pour reconnoistre le soin charitable que Dieu daigne prendre de
Deut. 32. 2. *nostre salut, quand il fait couler sa doctrine comme la pluie, & degoutter sa Parole comme la rosee; comme la pluie menuë sur l'herbe poignante, & comme la grosse pluie sur l'herbe avancée, comme parle Moysse au trente-deuxiesme du Deuteronomie, ie veux dire quand par ses Ministres il apprend familièrement aux petits les rudiments de la Religion, & quand il donne aux autres des doctrines plus solides & plus profondes. Secondement pour en prendre sujet de nous rendre si dociles & si attentifs à ces salutaires leçons que les Ministres de Iesus-Christ nous*

donnent toutes les fois que nous nous
 assemblons dedans la maison, & qu'ils
 nous y exposent son Euangile, que
 nous nous auacions de foy en foy,
 de connoissance en connoissance, de
 force en force, de peur d'encourir les
 reproches que Iesus Christ faisoit à
 ses Disciples, *O nation incredule, ius-* *Marc. 9. 19.*
ques à quand seray-je avec vous ? iusques
à quand vous supporteray-je ? Et l'A-
 postre aux Hebreux, *Vous estes de-* *Hebr. 5. 11.*
uenus lasches à ouïr. Car là où vous de- *12. 13. 14.*
uriez estre maistres veu le temps, vous
auex derechef besoin que l'on vous ensei-
gne quels sont les rudiments du commen-
cement des paroles de Dieu, & estes de-
uenus tels que vous auex encor besoin de
laiet, & non point de viande ferme.
Qui vse de laiët, ne sait que c'est de
justice, car il est enfant : mais la viande
ferme est pour ceux qui sont hommes
faits, à sauoir pour ceux qui pour estre
habituez ont les sens exercez à discerner
le bien & le mal.

Comme ce Ministere ordinaire de
 l'Euangile est establi au milieu de
 nous pour nous donner de jour en
 jour vne plus ample connoissance

des myſteres du Fils de Dieu, auſſi tend-il à en imprimer tous les jours vne plus forte & plus inuincible perſuaſion en nos ames. C'eſt ce que ſignifie noſtre Apoſtre quand il adjoûte, *Afin que nous ne ſoyons plus comme enfans flottans & demenez à tout vent de doctrine, par la piperie des hommes & par leur ruse à cauteuſement ſeduire.* Où il pourſuit la ſimilitude qu'il auoit commencée, priſe des diuers aages de l'homme, juſqu'à-ce, dit-il, que nous paruenions à l'vnité de la foy & de la connoiſſance du Fils de Dieu, en homme parfait, à la meſure de la parfaite ſtature de Chriſt, afin que nous ne ſoyons plus enfans, c'eſt à dire legers, credules, inconstans, faciles à eſtre ſeduits; & nous monſtre quelle eſt la connoiſſance & la certitude que le Seigneur requiert de ceux qui ont eſté long tēps en ſon Eglise & ſous ſa diſcipline. Car il veut bien que nous ſoyons cōme petits enfans pour ce qui eſt de la ſimplicité du cœur, & de la douceur des affectionſ, & meſme nous denonce qu'à moins de cela nous ne ſaurions entrer en ſon Royau-

me: mais pour l'intelligence & pour la fermeté, il veut que nous soyons hommes faits. Apres cela il vse d'une autre comparaison prise ou des flots esmeus par les vents, comme quand il est dit au premier de S. Jacques, que *celuy qui doute, est semblable au flot de la mer agité & demené par le vent*, ou d'un vaisseau qui est sur la mer, & qui est agité & emporté çà & là par la violence de la tempeste, en danger à chaque moment de heurter contre quelque escueil, & d'y faire un triste naufrage. Tels sont tous ceux qui n'ont pour fondement de leur Religion que la tradition des hommes, & les maximes de leur propre raison, qui se trouuent pour la pluspart fautiues & defectueuses en plusieurs sortes. Tels auoient esté les Ephesiens avant que Dieu les eust appelez à sa grace, & S. Paul mesme au temps de son Pharisaïsme. Et c'est la raison pour laquelle, comme vous voyez, il ne dit pas, afin que nous ne soyons enfans: mais, afin que nous ne le soyons plus. C'estoit leur dire, Autresfois nous n'auions rien d'assuré en nos opi-

nions que la coustume inueterée des peuples, & l'autorité des Docteurs de nos Religions: nous Juifs celle des Scribes & des Pharisiens, qui occupoient la Chaire, & sous ombre de prescher la Loy la deprauoient par leurs interpretations, & par l'addition d'un grand nombre de superstitions & d'erreurs qu'ils auoient inuentées: & vous Gentils celle de vos Pontifes, de vos Augures, de vos Philosophes, & de vos Poëtes, qui estoient, ô chose honteuse ! vos meilleurs Theologiens. Mais maintenant nous auons au milieu de nous le Ministere ordinaire de l'Euangile, par lequel le conseil de Dieu, & le mystere de nostre Redemption en son Fils, nous est publiquement expliqué, non en enigme ni en figure, mais en toute l'euidence possible, afin *que nous ne soyons plus comme enfans flottans & demenez à tout vent de doctrine par la piperie des hommes.* Avant nostre cōuersion à Christ, ces hommes-là abusoient meschamment de nostre ignorâce & de nostre credulité, & nous pipoient & seduisoient cauteleusement par la subtilité

de leurs inuentions & de leurs sophismes, par les charmes de leur eloquence, par la pompe de leur seruice, par l'esclat de leurs faux miracles, par la supposition de leurs visions, de leurs songes, & de leurs reuelations, par l'autorité de nos ancestres, par la grande vogue que l'erreur auoit parmy les peuples, & par autres tels prejuges dont ils éblouissoient nos sens; & les plus artificieux par la souplesse qu'ils auoient à corrompre la Parole de Dieu par leurs gloses, & à eluder les raisons de la saine doctrine. C'est là ce que l'Apostre appelle vne *piperie*, & vn art ou vne *methode* de tromper les hommes, parce que les Docteurs de mensonge se joient de leur raison, de leur eloquence, & mesme de la Parole de Dieu, des oracles, des songes, des visions, des miracles, comme font les pipeurs de leurs cartes & de leurs dez, pour seduire & pour attraper les simples qui se fient en eux, & il dit, que nostre Seigneur a donné ses fidelles Ministres à son Eglise, pour la garder des piperies, des illusions, des prestiges, & des impostures

de telles gens, & pour la fonder & l'enraciner en sa verité par la predication continuelle de son Euangile. Cét aduis est fort bon à tous, mais il le donne icy particulièrement à l'Eglise d'Ephese, parce qu'il luy auoit esté reuelé qu'il s'y esleueroit de ces pipeurs & imposteurs, qui tascheroient à la débaucher de l'amour de la verité, comme cela se void en la predication qu'il en fit aux Pasteurs de cette Eglise là, au 20. des Actes. *Je say*, leur disoit-il, qu'apres mon depart il se fourrera parmy vous des loups tres dangereux, n'essargnans point le troupeau, & que d'entre-vous mesmes se leueront des hommes annonçans choses peruerfes, afin d'attirer des disciples apres eux, Pourtant veillez, ayans souuenance comme par l'espace de trois ans nuit & iour ie n'ay cessé avec larmes d'admonester vn chacun. Et maintenant, freres, ie vous recommande à Dieu & la Parole de sa grace, lequel est puissant de parachouer à vous edifier, & de vous donner heritage avec tous les Saints. Ainsi en cet endroit il leur dit que Iesus-Christ a establi entr'eux le Ministere de sa grace, afin

qu'ils soient continuellement sur leurs gardes pour ne se laisser point surprendre à la ruse & à la piperie des hommes, mais s'affermir de plus en plus en la Foy.

Voila quel est le premier effect du Ministère de la Parole de Dieu en l'Eglise, voyons maintenant quel est le second. L'Apostre nous l'expose quand il adjouste, *Mais que suiuaus Verité avec charité, nous croissions en tout en celuy qui est le Chef, à sauoir Christ: duquel tout le corps bien ajusté & serré ensemble par toutes les jointures du four-nissement, prend accroissement du corps selon la vigueur qui est en la mesure de chacune partie, pour l'edification de soy-mesme en charité.* Le mot que nous auons traduit, *suiuaus Verité*, signifie proprement dilans la verité, & se portans franchement & sincerement. Ainsi le prennent d'ordinaire non les auteurs prophanes seulement, mais aussi les Septante Interpretes, comme quand, selon eux, Abimelech dit à Sara, *Dy la Verité, ou porte toy sincerement en toutes choses; & quand Ioseph dit à ses freres, Je connoistray si* Gen. 10. 16. Gen. 42. 16.

Gal, 4. 16.

vous dites la verité, & vous portez sincerement ; & quand Salomon dit au vingt-vniesme des Prouerbes, que se porter en sincerité est vne chose plus agreable à Dieu que les sacrifices ; & nostre Apostre mesme quand il dit aux Galates, Pour vous auoir dit la verité, ou vous auoir parlé franchement & sincerement, suis-je deuenu vostre ennemy ? Et on le peut fort bien prendre ainsi en ce texte, pour dire, ayans vne vraye, sincere & cordiale charité. C'est en ce sens que l'interprete le Syriaque, ayant traduit, mais que nous soyons veritables & sincerés, ou bien fermes & constans en nostre charité. Et on pourroit mesme entendre ainsi les mots de nostre version, en prenant verité pour sincerité, comme souuent ailleurs. D'autres entendent, suiuañs la verité que Iesus-Christ nous manifeste en son Euangile ; ce qui, encor qu'il ne responde pas si bien à la propre signification du mot Grec, rend vn bon sens, à sauoir que l'E-uangile nous est presché en l'Eglise par les Ministres de Iesus-Christ, afin que nous suiuiions & embrassions la

doctrine de verité en charité , ces deux choses deuas toujours marcher ensemble, la foy en la verité de nostre Seigneur , & la charité enuers nos prochains. Or l'Apostre nous dit que le Ministère Euangelique engendre & entretient en nous l'vne & l'autre, *afin que nous croissions en tout*, en toutes les parties du nouuel homme , & de la vie spirituelle, abondans en toutes les graces & en tous les fruiets de l'esprit , *en celuy qui est le Chef*, à *sauoir Christ*, c'est à dire, par la communion spirituelle & mystique que nous auons tous avec Iesus-Christ, comme avec celuy que le Pere nous a donné pour Chef, & de la secrette vertu duquel nous receuons tous les sentimens, tous les mouuemens, toutes les inspirations, toutes les lumieres, toutes les consolations & toutes les graces qui nous sont necessaires pour viure de la vie de Dieu comme luy. Icy nous ne nous arresterons pas à vous représenter particulièrement les raisons pour lesquelles il est appelé le Chef de l'Eglise, & l'Eglise reciproquement appelée son corps, parce que nous l'a-

nous fait amplement en l'exposition du premier chapitre. Nous considerons seulement ce que l'Apostre dit de l'vnion & de l'accroissement & edification de ce corps. Pour l'vnion il dit qu'il est bien adiuſté & serré ensemble par toutes les jointures du fournissement, c'est à dire que tous les fideiles qui composent cette bien-heureuse societé, y sont vnīs d'une tres-estroite vnion, & y gardent entr'eux vn ordre, vne proportion & vne symmetrie admirable, nostre Seigneur la fournissant & pouruoyāt de toutes les vocations, de toutes les vertus & de toutes les graces qui sont necessaires à son instruction, à sa sanctification & à son salut, & les distribuant tellement entr'eux qu'ils sont tous necessaires les vns aux autres, & que chacun d'eux contribuant les dons qu'il a receus de Dieu, au bien & à l'edification de toute la communauté, il ne luy māque rien pour estre complete & heureuse. Car ce sont là vrayment les jointures, les liaisons, les nerfs, les veines, les arteres dont Iesus-Christ a fourni son Eglise, &

par lesquelles il la rend comme vn corps bien ajusté & serré ensemble; ce qu'elle ne seroit pas, si tous les saints dont elle est composée, estoient d'une mesme condition, s'ils tenoient tous vn mesme rang, & s'ils auoient tous vne mesme sorte de dons & vne mesme mesure de grace, parce que chacun d'eux ayant en son particulier tout ce qui luy seroit necessaire, ils se pourroient fort biē passer du secours & de l'assistance les vns des autres. En ce cas là ils se pourroient conseruer, quoy que diuisez, & faire leur salut chacun en son particulier: au lieu que les graces de Dieu estans partagées de telle façon qu'il n'y a aucun d'eux qui les ait toutes, & qui n'ait besoin du secours & de l'ayde des autres, il est entieremēt necessaire pour subsister & pour se maintenir qu'ils demeurent vnis ensemble, & qu'ils s'entretiennent en vne bonne concorde & en vne sainte correspondance. Ainsi de cette diuersité de graces & d'employs qui pouuoit donner occasion d'orgueil à ceux qui en estoient les plus auantagez, & d'en-

ue à ceux qui l'estoient moins, & par consequent sujet de discorde & de diuision en l'Eglise, l'Apostre tire vn puissant argument pour y entretenir la concorde. Voila quant à l'vñion de l'Eglise; quant à l'accroissement, il adjouste que ce corps ainsi *adjusté & serré ensemble prend accroissement du corps*, c'est à dire conuenable & tel qu'il le faut à vn tel corps, faisant tous les iours vn nouveau progrez en la foy & en la sanctification, iusques à ce qu'en fin elle paruienne à vne parfaite cōformité à nostre Seigneur Iesus-Christ son Chef & son Sauueur. Cét accroissement en la vie spirituelle ne paroist pas également & d'vne mesme façon en tous les fidelles, non plus que celuy des membres de la personne en la vie temporelle. Mais neantmoins comme ils sont tous animez & viuifiez par vn mesme esprit, aussi croissent-ils tous en ce corps à proportion des dons & des graces qu'ils ont receuës de Dieu, qui est ce que veut dire l'Apostre en ces mots, *selon la vigueur qui est en la mesure de chacune partie*. Car selon que le saint

Esprit agit diuerſement en eux, les vns croiſſent plus viſiblement, & donnent plus d'edification au public, les autres ſ'auancement avec moins d'éclat & plus imperceptiblement: les vns ſe fortifient en vne qualité, les autres en vne autre: les vns excellent principalement aux vertus intellectuelles, les autres principalement aux morales: les vns glorifient Dieu & edifient leurs prochains par les œuvres de patience, les autres par celles de beneficence, ſelon que Dieu, qui diſpenſe le tout avec vne ſageſſe infinie, voit eſtre neceſſaire & au ſalut de chacun d'eux, & au bien de toute l'Eglife. Et ainſi elle ſe conſtruit, ſ'edifie, ſe hauſſe & ſ'auance de jour en jour, comme ſainct Paul l'exprime en ces dernieres paroles de noſtre texte, *pour l'edification de ſoy-meſme en charité.* Car encor qu'il ait déjà fait mention de la charité au verſet precedēt, il ne fait pas difficulté d'en parler encores en celuy-cy, parce que c'eſt vne vertu qui ne ſauroit jamais eſtre aſſez recommandée aux fidelles, & ſans laquelle l'Eglife ne ſauroit auoir d'y-

nion, ni subsister aucunement.

Voilà , chers freres , ce que nous auions à vous dire pour l'intelligence de nostre texte. C'est à nous maintenant à le bien mediter , & à bien imprimer en nos cœurs ce que nous y auons appris de l'Apostre touchant les fruiçts & les vsages du Ministère que nostre Seigneur a establi en son Eglise , qui se reduisent à ces deux principaux , de nous auancer en la foy , & de nous vnir en la charité.

• Puis donc que Dieu nous fait cette grace d'être tenir encor aujourdhuy, nonobstant nos ingrattitudes & nos offenses, ce saint Ministère au milieu de nous , & qu'il nous donne d'ouïr encor S. Pierre , S. Paul , S. Luc , S. Iehan & les autres Apostres & Euan-gelistes nous preschans dans nos assemblées les mysteres de nostre salut, entant que leurs escrits , où ils les ont enregistrez pour nostre instruction, nous y sont leus & exposez tous les jours par la bouche de nos Pasteurs ; ne receuons point cette grace en vain : mais nous rendons attentifs & dociles à leurs salutaires enseignemens,

mens, pour nous fortifier en la foy de nostre Seigneur Iesus-Christ, & pour nous animer à la charité à l'endroit de nos freres. Aprenons premierement d'icy quel est l'object de la vraye foy, & la substance de la vraye Religion. C'est en vn mot nostre Seigneur Iesus. Car la foy, selon nostre Apostre, n'est autre chose que la connoissance du Fils de Dieu. C'est en luy que resident tous les thresors de science & d'intelligence, & que l'ame fidelle trouue ce qu'elle ne trouue nulle part ailleurs, sagesse, iustice, sanctification & redemption. C'est luy qui est nostre Sauueur, c'est à luy que nous nous devons arrester. Là où est le corps mort, là se doivent assembler les anges. Ce corps mort c'est luy mesme, mort pour nos fautes en la Croix. Volons doncques à luy avec faim & avec soif de sa iustice, & nous serons rassasiez. Car sa chair est vrayment viande, & son sang vrayment bruuage. Là où nous trouuerons nostre vie, & la trouuerons avec abondance. Par tout ailleurs il n'y a que misere, que pauureté, que mort pour les ames. C'est pour-

1. Cor. I. 23.

24.

Act. 9. 15.

quoy l'Apostre protestoit qu'il ne vouloit savoir autre chose que *Iesus-Christ crucifié*, qui est scandale au Juif, & folie au Gentil, mais en effet la sagesse & la puissance de Dieu en iustification & en salut à tous ceux qui croient en luy. Aussi certes ce qu'il auoit esté établi en la charge d'Apostre n'estoit que pour prescher ce nom. Nostre Seigneur Iesus le témoigne formellement quand il dit de luy à Ananias, *Ce m'est vn instrument d'eslite pour porter mon nom deuant les nations, & deuant les Roys, & deuant les enfans d'Israël.* Et generalement tous les Apostres, tous les Prophetes, tous les Euāgelistes, tous les Pasteurs & les Docteurs n'ont esté donnez à l'Eglise que pour nous amener à la foy & à la connoissance de cét objet, & nous faire attacher toute nostre pensée, toute nostre affection & toute nostre confiance, à son sacrifice, à sa satisfaction, à son merite & à son intercession, & nulle part ailleurs. Ceux qui proposent à l'Eglise d'autres sacrifices, d'autres merites & d'autres intercessions, ne sont ni vray Mi-

nistres de Christ, ni vrais Pasteurs & Docteurs de l'Eglise. Ils courent, mais Iesus-Christ ne les a point enuoyez. Car ils preschent les visions de leur cœur, & non les reuelations de son Euangile; le seruice des creatures, non la gloire de leur Sauueur; la superstition, non la vraye Religion. Les vrays Ministres sont ceux qui ne preschent que Iesus-Christ, qui ne peuuent souffrir qu'on presche autre que luy en l'Eglise, & qui sont jaloux 2. Cor. II. 2. d'elle d'une jalousie de Dieu, l'appropriant à un seul mary, pour la presenter comme une vierge chaste à Christ. Les autres sont des adulteres qui ne trauaillent qu'à la débaucher de l'amour de son Espoux celeste, & à corrompre sa foy & son integrité, en la faisant courir apres les creatures. Vous ames chastes & Chrestiennes les deuez auoir en horreur, & boucher vos oreilles à leurs enchantemens. Ce sont des estrangers. Vous qui estes les brebis de Christ, ne deuez point les ouïr ni les reconnoistre. Que ceux qui ne connoissent point l'excellence de cet object, escoutent ceux qui leur en

preschent d'autres. Vous qui la connoissez , ne devez prester l'oreille qu'à ceux qui vous preschent celuy-là seul.

Galat. 3.1.

Comme c'est le seul theme de leurs Sermons, aussi doit-ce estre le seul sujet de vostre estude & de vos meditations pour vous en acquérir vne solide connoissance. Car ce n'est pas assez que vous disiez , Je croy en Iesus-Christ, & que vous en ayez vne foy confuse , aueugle & implicite, comme parlent les Aduersaires. Il le faut connoistre en effect, je dy le connoistre distinctement tel qu'il se reuele en son Euangile, & qu'il est tous les jours comme *pourtrait devant vos yeux* par le ministere de ses seruiteurs. Le croire autrement, c'est ne le pas croire. Car comme cét ancien Philosophe disoit, Je ne say qu'une chose, c'est que ie ne say rien: ainsi ces idiots qui se reposent sur la foy de leurs Pasteurs, & qui ne tiennent compte d'auoir aucune connoissance des choses de la Religion & de leur salut, se contentans de dire , Je croy ce que l'Eglise croit , sans sauoir que c'est

qu'elle croit ; peuuent bien dire , Je ne croy qu'une chose, c'est que je ne croy rien. Vous, mes freres, qui avez appris de la bouche de son Apostre que la vraye foy consiste en la connoissance du Fils de Dieu, & de la sienne mesme que cette est la vie eternelle, que vous connoissiez le vray Dieu, & celuy qu'il a enuoyé, Iesus Christ ; devez travailler à vous acquérir cette cōnoissance par la lecture des saintes Escritures, par l'ouye attentive de nos sermons, par la meditation serieuse des doctrines que nous vous preschons, & principalement par prieres à Dieu pour obtenir de luy la lumiere & la grace de son Esprit, qui vous est necessaire pour cét effet.

Et comme nous vous annonçons continuellement ses mysteres, aussi devez vous de vostre costé profiter tellement de vostre predication, que vous faciez tous les jours de nouveaux progres en cette salutaire science, iusqu'à ce que vous parueniez à l'vnité de la foy, en homme parfait, à la mesure de la parfaite stature de Christ. Il ne faut pas estre tousiours enfans, il faut

Hebr. 6. 1.

estre enfin hommes faits. Il ne faut pas estre tousiours Cathecumenes, il faut estre enfin vrais fidelles. Il ne faut pas toûjours viure de lait, il faut viure enfin de viande ferme. Il est bien necessaire de commēcer par les rudimēs de la foy, mais apres il faut *delaisser la parole qui donne commencement de Christ, & rendre à la perfection, ne mettant point derechef le fondement de repentance des œuures mortes, & de la foy qu'on doit auoir en Dieu, & de la doctrine des Baptismes, & de l'imposition des mains & de la resurrection des morts, & du jugement eternal;* mais nous auanceans de degré en degré aux plus hauts mysteres que Iesus-Christ nous reuele en son Euangile, pour abonder, comme vieux Disciples de ce grand Maistre, en toute sapience & intelligence spirituelle. Si nous estions tousiours enfans, nous contentans d'une connoissance legere & superficielle de Iesus-Christ & de son Euangile, outre que nous nous priuerions nous mesmes des plus belles lumieres, & des plus nobles & salutaires connoissances que l'homme puisse conceuoir, & de tous

les contentemens quelles donnent à ceux qui les possèdent : nous ne pourrions en ce peu mesme que nous connoistrions de la vraye Religion, auoir aucune fermeté. Au premier vent ou de fausse doctrine, ou de persecution, qui souffleroit contre nous, nous nous laisserions emporter, & ferions vn miserable naufrage en la foy. Au contraire si nous en auons vne solide & profonde science, & si par la lecture, par l'ouye & par la meditation de la Parole de Dieu nous sommes persuadez en nos consciences que la Religion que nous suiuous est la pure doctrine de verité, & la vraye forme en laquelle Dieu veut estre seruy, il n'y aura jamais aucune chose qui soit capable de nous en faire abandonner la profession. La piperie des hommes ne nous surprendra point, parce que *l'Onction que nous auons receue du Sainct*, nous decouurira toutes leurs fraudes, & nous enseignera toutes choses. Et comme elle demeurera en nous, nous demeurerons en luy, afin que quand il apparoiſtra, nous ayons asseurance, & que nous ne soyons

1 Ioh. 2. 20.

17. 18.

point confus de sa presence à sa venue.

Les blandices & les promesses du monde nous sollicitans à reuolte, ne toucheront nullement nos affections.

Quand pour nous débaucher de la foy il nous offriroit tous les Royaux auec toute leur gloire, nous luy dirons comme Abraham au Roy de

Gen. 14. 22. Sodome, *23.* J'ay leué ma main à l'Eternel, de Dieu souuerain, possesseur des cieux & de la terre, que je ne prendray rien de ce qui est à toy, depuis vn fil iusqu'à la courroye du saulier. Et quand nostre Seigneur Iesus-Christ luy mesme nous diroit, Et vous ne vous en voulez-vous point aussi aller? comme nous donnant l'option de nous en aller, ou de demeurer, nous luy dirons auec des ames pleines de deuotion & d'amour,

Ieh. 6. 67. 68. Où irions-nous, Seigneur? Tu as les paroles de vie eternelle. Seigneur, ie seray toujours avec toy. Tu m'as pris par la main droite, tu me conduiras par ton conseil, & puis tu me recevras en gloire. Quel autre ay-je au ciel? Or n'ay-je pris plaisir en terre en nul autre qu'en toy. Mon cœur & ma chair estoyent defaillies, mais tu es le rocher de mon cœur, & mon partage.

Pse. 73. 23.

24. 25. 26.

27. 28.

à tousiours. Certainement tous ceux qui s'eloignent de toy, periront : tu retrancheras tous ceux qui se débauchent de toy. Mais quant à moy ~~de~~ approcher de Dieu, c'est mon bien. Les persecutions des Princes & des peuples ne nous ébranleroit point non plus, parce que nous sauons que celuy qui est en nous, est plus grand que celuy qui est au monde ; que toutes choses aydent ensemble *Rom. 8. 27.* en bien à ceux qui aiment Dieu, que si les *2. Cor. 1. 5.* souffrances de Christ abondent en nous, pareillement aussi par Christ abondera nostre consolation, & qu'il n'y a ni mort *Rom 8. 17.* ni vie, ni Anges, ni Principautez ni Puissances, ni choses presentes ni choses à venir, ni hautesse ni profondeur, ni aucune autre creature, qui nous puisse separer de la dilection de Dieu, qu'il nous a monstré en Iesus-Christ nostre Seigneur. Qu'ils nous opposent les oppressions, les angoisses, la famine, la nudité, les espées, les roues & les flammes, nous passerons au trauers de tous ces maux là apres cette grande nuée de martyrs qui marche deuant nous, & nous irons presenter avec eux à nostre commun Redempteur pour obtenir de luy cette

2. Tim. 4. 8. couronne de justice qu'il reserve là haut à tous ceux qui ont à cœur son apparition, qui combattent le bon combat, qui gardent la foy, & qui paracheuent leur course. Et comme il nous crie

Apoc. 2. 10. maintenant, *Soyez moy fidelles iusqu'à la mort, & je vous donneray la couronne de vie:* ainsi alors il nous tendra la main de là haut en nous disant, *En-*

Matt. 21. 23. *trez, serviteurs fidelles, en la joye de vostre Seigneur, & nous recueillant dedans son Royaume, nous y rendra participans de toute sa gloire.*

Voilà, chers freres, le premier but du saint Ministere que Iesus-Christ entretient au milieu de nous, de nous amener à la foy, de nous y faire croistre, & de nous y affermir & fortifier contre toutes les tentations qui nous pourroient estre liurées. L'autre est qu'en toutes choses nous nous portions les vns envers les autres avec vne vraye, sincere & cordiale charité, contribuans au bien les vns des autres, & à l'edification & consolation commune de l'Eglise, dont nous auons le bien d'estre membres, tout ce que nous auons receu de graces

chacun en son particulier, afin qu'ainsi estans tous *comme vn corps bien ajusté & serré ensemble par toutes les jointures du fournissement*, nous croissions en Iesus-Christ nostre Chef d'un accroissement conuenable à son corps mystique. Faisons nostre profit de tout ce qui nous en a esté presché, monstons la verité de nostre foy par les effects de nostre charité, qui en sont la vraye preuue; & que toutes nos paroles & nos actions soient parfumées, embaumées, & aromatisées de la bonne odeur de cette vertu si excellente en elle-mesme, si agreable à Dieu, si vtile à l'Eglise, & si salutaire à chaque fidelle. Aimons tous nos freres comme nous mesmes, pour l'amour du Pere; qui les a faits à son image, du Fils qui les a rachetez par son sang, du saint Esprit qui les anime, & de l'Eglise dont ils sont membres aussi bien comme nous. Prions Dieu pour eux, cōme pour nous mesmes. Rendons luy graces de tout le bien qu'il leur fait, comme s'il nous le faisoit à nous mesmes. Soyons touchez de leurs ioyes & de leurs dou-

leurs, comme des nostres propres. Et si Dieu nous a départy quelques graces temporelles ou spirituelles, que ce soit autant pour eux que pour nous, que nous nous en seruions. Edifions les par nos bons exemples, instruions les par nos salutaires enseignemens, consolons les par les lenitifs de nos sages discours, assistons les de nos conseils, soustenons les par nostre auctorité, subuenons les de nos aumones, aydons leur de nostre trauail, & en vn mot faisons leur, à chacun selon son besoin, ce qu'en pareil besoin nous voudrions estre fait à nous mesmes. Car comme au corps humain la teste n'a pas esté posée en lieu si eminent, & honorée de tant d'auantages, pour elle-mesme, mais pour tout le corps : ainsi ceux que Dieu esleue en honneur & en dignité, il ne les y esleue pas afin qu'ils s'en preuailent en leur particulier seulement, mais afin qu'ils employent au bien de l'Eglise & au soulagement de leurs freres l'auctorité qu'ils ont dans le monde, comme ont fait vne Esther, vn Esdras, vn Nchemie : sachans que

s'ils ne le font pas, Dieu donnera d'ailleurs respiration à son peuple, mais qu'eux & leurs maisons periront : que ceux aussi qu'il employe au saint Ministère & aux autres charges Ecclesiastiques, avec les qualitez necessaires pour les bien exercer, les facent valoir à l'avantage commun, & au salut de chaque membre de la société sur laquelle Dieu les a preposez, de peur d'estre condamnez à la peine du mauvais seruiteur qui enfoiit le talent de son maistre, ou de ces mauvais Pasteurs en Ezechiel, qui se païssoient eux mesmes, & non point le troupeau. Comme les yeux ne voyent pas pour eux seuls, mais pour tout le corps & pour chacun des membres : aussi ceux à qui Dieu a donné plus d'esprit, de iugement, d'industrie & d'experience qu'aux autres au temporel ou au spirituel, ne s'en doivent pas servir seulement pour leur profit particulier, mais aussi pour le bien de leurs freres, les adressant & conseillant lors qu'ils en ont besoin. Comme la langue & le palais ne goustent pas les saveurs pour eux seulement, mais

pour le plaisir & pour le bien de toute la personne : aussi quand Dieu nous fait gouter la douceur de sa grace parmi l'amertume de nos ennuy, nous nous devons représenter que ce n'est pas seulement pour nostre soulagement particulier, mais afin, comme dit S. Paul, que de la *mesme consolation dont nous sommes consolez, nous mesmes, nous consolions les autres en quelque affliction que ce soit.* Comme l'estomac ne garde pas pour soy toute la viande qui luy est donnée à cuire, mais apres l'auoir cuite la digere & la distribue à tous les autres membres qui en ont besoin, & n'en reçoit pour soy que ce qu'il luy en faut précisément pour sa nourriture : aussi ceux à qui Dieu a donné de grands biens, ne les ont pas receus pour eux seuls, mais pour en subuenir aux necessiteux, se montrans *faciles à distribuer, communicatifs, riches en bonnes œuvres, se faisans thresor d'un bon fondement pour l'aduenir, afin d'obtenir la vie eternelle.* Comme les mains ne travaillent pas seulement pour elles, mais pour la subsistence de tout le corps &

1. Tim. 6.
18. 19.

de chacuné de ses parties : aussi ne devons-nous pas employer nos labours & nostre industrie pour nous pourvoir seulement de ce qui nous est nécessaire, estans au reste paresseux à nous employer pour autrui ; mais, comme dit S. Paul, *travailler de nos mains en ce qui est bon, pour avoir dequoy départir à celuy qui en a besoin.* Enfin comme tous les membres du corps s'aiment, se seruent & se secourent respectivement: nous aussi aimons nous & nous aydons l'un l'autre, non point de parole & de langue, mais d'œuvre & de verité, comme n'ayans tous *qu'un cœur & une ame.* Que s'il y a quelque défaut ou quelque infirmité à supporter en nos freres, supportons les en toute equité & douceur, comme nous desirons & auons besoin qu'ils supportent les nostres. Ayons tousiours deuant les yeux ce beau caractere de la charité que l'Apostre nous fait au treizième de la premiere aux Corinthiens, *Charité est d'un esprit patient, elle se monstre benigne, elle n'est point enuieuse, elle n'use point d'insolence, elle*

ne s'enfle point, elle ne se porte point des-
honnêtement, elle ne cherche point son
propre profit, elle n'est point dépitueuse,
elle ne pense point à mal, elle ne s'éjouit
point de l'injustice, elle ne s'éjouit que de
la vérité, elle endure tout, elle croit tout,
elle espere tout, elle supporte tout. Quand
cette divine vertu, dont l'idée est si
belle & l'exercice si agreable, regne-
ra au milieu de nous, alors ferons
nous vrayment paroistre que l'Esprit
de nostre Sauueur, qui est l'Esprit de
charité & d'amour, habite dans le no-
stre. Alors verrons-nous croistre à
merueilles nos Assemblées en nom-
bre de personnes & en toutes vertus
Chrestiennes. Alors n'y aura-il forte
de benediction ni de grace que nous
ne deuions esperer du ciel. Alors le
Prince de ce monde n'ayant plus rien
en nous, ne pourra plus rien aussi
contre nous. Alors à mesure que ce
Malin sera contraint de s'esloigner
de nous, les Anges bien-heureux
prendront plaisir à s'en approcher, &
à nous assister comme Esprits admi-
nistrateurs enuoyez pour servir, pour
l'amour de ceux qui doiuent recevoir
l'heri-

l'heritage de salut. Alors en fin nous commencerons, autant qu'il se peut, à viure sur la terre, comme les Anges bien-heureux viuent dedans le Paradis, en attendant que nostre Seigneur Iesus-Christ, au iour qu'il descendra de là haut pour se rendre glorieux en ses saints, & admirable en tous les croyans, nous y esleue en effect selon ses promesses, pour y regner eternellement avec luy en la paix & en la gloire de son Royaume. A luy, comme au Pere & au Saint Esprit soit honneur, gloire, benediction & louange aux siecles des siecles. Amen.

Q



S E R M O N

SIXIESME,

Sur ces paroles de l'Apostre S.
Paul au 4. chap. de l'Epistre
aux Ephesiens.

Verf. 17. Voicy donc que ie dis & atteste de par le Seigneur, que vous ne cheminez plus comme aussi le reste des Gentils chemine en la vanité de leur pensée :

18. Ayans leur entendement obscurcy de tenebres, & estans estrangez de la vie de Dieu, à cause de l'ignorance qui est en eux par l'endurcissement de leur cœur.

19. Lesquels ayans perdu tout sentiment, se sont abandonnez à dissolution, pour commettre toute souillure, à qui en feroit pis.

20. Mais vous n'avez point ainsi appris Christ:

21. Voire si vous l'avez escouté, & si vous avez esté enseignez de par luy, ainsi que la verité est en Iesus.

C'EST vn spectacle plein de compassion & d'horreur, de voir tous les peuples du monde auoir

bien vn desir naturel d'estre bien-heureux , mais estans malheureusemēt abusez par les illusions du Prince de ce siecle en la connoissance tant de l'object auquel reside veritablement leur bon heur , que du chemin qui les y doit conduire , s'en aller errant çà & là sans autre guide que leur imagination , prendre le mensonge pour la verité , la superstition & l'idolatrie pour la vraye Religion , vne ombre legere d'honneur pour le corps solide de la gloire , & les delices du peché pour le parfait contentement de la vie , se plonger en suite en toute sorte de vices , s'estourdir les vns les autres par des voix confuses , pour ne point entendre la voix celeste , qui les rappelle au bon chemin , & continuans en ce mauuais train , tomber finalement en l'abyssme de la damnation eternelle. Au contraire c'est vn effect de l'amour de Dieu enuers ses esleus qu'ils ne sauroient iamais assez reconnoistre, qu'en vn si deplorable estat il les ait daignez *visiter par les entrailles de sa misericorde*, & que dissipant les tenebres de leurs entendemens , & les

Luc. 1. 78.

Col. 1. 13.

1. Pierr. 2. 9.

charmes de l'Esprit malin par la predication de son Euangile, & par l'efficace de son Esprit, il les ait *transportez de la puissance des tenebres à son esmerueillable lumiere*, leur découurant & leur souuerain bien qui est en luy seul; & la vraye Religion, par laquelle seule ils y doiuent estre conduits. Mais cette grace leur seroit inutile, & mesme tourneroit à leur plus grande condamnation, si apres que Dieu les a esclairez, & qu'il les a fait entrer en ses voyes, ils viuoient comme auparavant, & se souilloient, depuis leur conuersion à la Foy, des mesmes vices dont ils se polluoient durant leur infidelité. Car, comme dit S. Pierre,

si apres estre eschappez des souillures du monde par la connoissance du Seigneur & Sauueur Icsus - Christ, ils s'y entortilloient derechef, & en estoient surmontez, leur derniere condition seroit pire que la premiere, & leur vaudroit mieux n'auoir jamais connu la voye de justice, qu'apres l'auoir connue, auoir abandonné le saint commandement qui leur auoit esté donné. C'est la raison pour laquelle nostre grand Apostre, qui se réjoüis-

1. Pierr. 2.

20. 21.

soit si fort de la conuersion des Ephesiens & des autres fidelles d'entre les Gentils, & qui en rendoit graces à Dieu de si bon cœur, comme vous l'auiez oüy cy-deuant, les exhortoit avec tant de soin & d'ardeur à ne se conformer point à ce present siecle dont Dieu les auoit retirez par sa misericorde, & à ne communiquer plus aux œuures infructueuses des tenebres, mais à les redarguer & à les auoir en detestation eternelle, pour cheminer comme il est seant à la vocation à laquelle il les auoit appelez, & pour viure en la lumiere de l'Euangile, comme vrais enfans de lumiere. Voicy donc, dit-il, que je dis & atteste de par le Seigneur, que vous ne cheminez plus comme aussi le reste des Gentils chemine en la vanité de leur pensée : Ayans leur entendement obscurci de tenebres, & estans estrangez de la vie de Dieu, à cause de l'ignorance qui est en eux, & de l'endurcissement de leur cœur, lesquels ayans perdu tout sentiment, se sont abandonnez à toute dissolution, pour commettre toute souillure à qui en fera pis. Mais vous n'auex pas ainsi appris Christ, voire si vous l'auex.

esconté, & si vous avez esté enseignez de par luy, ainsi que la verité est en Iesus.

Ce Voicy donc n'est pas vne conclusion qu'il tire des versets immédiatement precedents. Car depuis le deuxiesme iusques au dix-septiesme il n'a parlé que de la charité, & de la bonne & sainte correspondance qui doit regner entre les vrais fidelles, depuis que Dieu les a receus en la communion du corps mystique de son Fils, ce qui n'a rien de commun avec ce discours. Mais c'est vne reprise d'un propos commencé, à sçavoir de ce qu'il auoit dit au commencement du chapitre, *Je vous exhorte, moy le prisonnier au Seigneur, que vous cheminiez dignement, comme il est seant à la vocation à laquelle il vous a appellez.* En suite de cette exhortation generale il leur auoit montré comme ils deuoient *entretenir l'vnité d'esprit par le lien de paix.* Maintenant il poursuit & leur apprend comment ils se doiuent comporter en tout le reste de leur vie, ce qu'il fait avec vne formule d'obtestation solennelle pleine de

nous avons deux choses; le deuoir auquel saint Paul les exhorte, & la raison sur laquelle il le fonde. Le deuoir auquel il les exhorte, c'est qu'ils *ne cheminent plus comme fait le reste des Gentils*, c'est à dire, comme font ceux qui sont encore dans les tenebres de l'infidelité; & comme ils cheminoiēt eux-mesmes quand ils estoient en la mesme condition. Car il ne dit pas, que vous ne cheminieez point, mais, *que vous ne cheminieez plus*, comme pour dire, Vous n'y auez que trop cheminé, le temps passé vous doit auoir suffi pour accomplir leurs Volontez, quand vous conuersiēz en insolences, en conuoitises, en yuongneries, en gourmandises, & en idolatries abominables. Maintenant la nuit est passée; & le iour est approché. Il est temps de vous réveiller, de rejeter les œuvres de tenebres, & de vous reuestir des armes de lumière. Vous n'estes plus du monde, vous ne deuez plus viure comme le monde. Car que vous seruiroit d'auoir en vostre Baptesme renoncé de bouche aux œuvres de Satan, si vous y perseueriez encor en effect? d'estre

1. Pierr. 4. 3.

Rom. 13. 12.

forti d'entre les Payens , si vous auiez encor le Paganisme dans le cœur ? d'auoir abandonné leurs erreurs , si vous reteniez encor leurs vices ? Vous ne seriez pas damnez comme Payens , mais si vous l'estiez comme mauuais Chrestiens , quel auantage auriez-vous en cela ? La mauuaise vie ne mène-elle pas en enfer aussi bien que la mauuaise doctrine ? la dissolution aussi bien que l'idolatrie ? Il en voyoit sans doute plusieurs parmi eux , qui comme les Israélites charnels estoient sortis d'Egypte quant au corps , mais y auoient toûjours le cœur ; & apres auoir receu la Loy , commettoient au desert , à la veüe mesme de son Arche , les mesmes crimes qui se commettoient , & qu'ils auoient eux-mesmes commis en cette terre d'infidelles. Mais quand il n'en eust point veu d'exemples presens , il consideroit qu'ils conuersoient parmi les Payens , qui seruâs à des Dieux qu'ils croyoient entachez des mesmes vices que les hommes , ne faisoient point scrupule de les imiter ; & qu'il n'y a rien si contagieux que le mauuais exemple. Il

se representoit de plus qu'encor qu'en entrant en l'Eglise ils eussent solennellement renoncé aux vices des Payens, aussi bien comme à leurs erreurs, ce n'estoit, par maniere de dire, que depuis trois jours, & qu'un flambeau qu'on vient d'esteindre, & qui est encore fumant, reprend flamme fort aisément. C'est pourquoy il a estimé necessaire de leur faire cette remonstrance, laquelle il fortifie d'une difference qui est entr'eux & les Payens, pour ce qui regarde la connoissance; les Payens ayans en leur ignorance quelque espece d'excuse de la deprauation de leurs mœurs, mais eux estans inexcusables devant Dieu & devant les hommes, s'ils s'adonnent au vice apres avoir esté instruits & formez à l'estude de la vertu en une si excellente eschole que celle de nostre Seigneur Iesus-Christ.

Examinons l'un & l'autre membre de sa comparaison. Pour les Payens, il nous mōstre leur mal, & puis quelle est la cause d'où il procede. *Ils cheminent*, dit-il *en la Vanité de leur pensée, ayant leur entendement rempli de tene-*

bres. Icy nos Interpretes ont fait vne inuersion des termes du texte. Car en la langue originelle dont a vsé l'Apostre, il y a proprement, Ils cheminent en la vanité de leur entendement, ayans leurs pensées remplies de tenebres. Mais ils ont eu égard sans doute aux paroles du mesme Apostre au premier de l'Epistre aux Romains, où les mots sont ainsi rangez. *Ils sont deuenus vains en leurs discours, & leur cœur destitué d'intelligence a esté rempli de tenebres.* En quelque façon qu'on les range, ils rendent vn mesme sens, qui est que leurs entendemens & leurs pensées ne sont que vanité & tenebres. En suite dequoy il adjouste qu'ils *sont estrangez*, c'est à dire, destournez & alienez de la vie de Dieu, c'est à dire, qu'ils prennent tout le contrepied de la vie que Dieu commande, & en laquelle il prend plaisir. Ils ont bien vn entendement pour cōprendre les sciēces humaines, pour inuēter & exercer les arts, soit liberaux, soit mechaniques, pour faire leurs affaires dans le monde, pour gouverner leurs familles, & mesme quelques

Rom. I. 21.

vns pour conduire des Republiques & des Estats : mais quant à la Religion, aux fonctions de la vie spirituelle, & aux devoirs de la vraye vertu, tout ce qu'ils en conçoient, n'est que vanité; tout ce qu'ils y voyent, n'est que tenebres. Ils reconnoissent bien qu'il y a vne diuinité, mais au lieu de la seule vraye, ils en ont des exaims de fausses & imaginaires. Ils en ont de masles & de femelles. Ils les croient sujettes aux mesmes passions & aux mesmes vices que nous. Car selon eux il y en a de dénaturées & de parricides, il y en a de cruelles & de sanguinaires, il y en a d'adonnées au larcin, à l'yurongnerie, & à diuerses autres choses qui ne valent pas mieux. Pour ce qui est de la saincteté, ils l'establissent en des sacrifices materiels, en des lustrations corporelles, en des processions publiques; en la celebration de diuers jeux & réjouiissances prophanes. Quant à leurs mœurs, ils ne font point de conscience d'estre semblables à leurs Dieux & à leurs Deesses, & d'imiter ceux qu'ils adorent; & ainsi ils se plongent licentieusement

sement dans les vices que leur Theologie leur a deifiez ; & au lieu de la vie que Dieu ordonne aux hommes, c'est à dire, de la vraye iustice & de la vraye saincteté, qui a son siege dans le cœur, & de là se respand dans toutes les parties de la vie, ils en menent vne qui est route pleine d'iniquité & de souillure, qui fait horreur au ciel, & qui est en scandale à la terre.

De cela si vous demandez la cause à l'Apostre, C'est, dit-il, *à cause de l'ignorance qui est en eux, à cause de l'endurcissement de leur cœur.* Cette ignorance est naturelle à tous les hommes de la terre, iusqu'à ce que Dieu, par vne grace speciale, les illumine & leur ouvre le cœur. Car comme le premier peché de l'homme a commencé par l'obscurcissement de son entendement, qui a esté seduit par les specieuses raisons du serpent: aussi le premier effect de ce peché est qu'il a laissé dans l'esprit d'Adam & de ses descendants de si espais & horribles tenebres qu'elles ne peuvent desormais estre dissipées que par vne lumiere surnaturelle. C'est pourquoy S. Paul

1. Cor. 2. 9 14.

dit ailleurs que *l'homme animal ne comprend point les choses qui sont de l'Esprit de Dieu, & ne les peut comprendre: que ce sont choses que son œil n'a point vues, que son oreille n'a point ouyes, & qui ne sont point montées en son cœur, parce qu'il est charnel, & qu'elles se discernent spirituellement.* Vous me direz, Si cela est que les Gentils ayent esté généralement dans cette ignorance de Dieu & de sa volonté, comment est-ce qu'au premier chapitre de l'Epistre aux Romains il dit de Dieu que *ce qui se peut connoistre de luy, est manifesté en eux, parce que Dieu le leur a manifesté, en tant que les choses invisibles de Dieu, à savoir tant sa puissance éternelle que sa divinité, se voyent comme à l'œil dès la creation du monde, estans considérées en ses ouvrages; & de sa volonté, que les Gentils, qui n'ont point la Loy, font naturellement les choses de la Loy, & ainsi n'ayans point de Loy, sont Loy à eux mesmes?* Pour le premier, il est bien vray que Dieu s'est manifesté à eux en ses œuvres, & manifesté en telle mesure, que s'ils n'eussent esté & aveugles de leur nature, & procupez dès

leur enfance de plusieurs erreurs repugnantes aux veritez que Dieu leur reueloit par cette voye, elles eussent esté suffisantes pour les amener à la grace. Mais parce qu'estans naturellement rebelles au bien, & d'ailleurs preuenus par vne mauuaise institution, & par les prejugez de plusieurs siecles & de plusieurs peuples en faueur des fausses Religions; ils ont resisté à ces veritez, & les ont *detenuës en iniustice*, & comme enseuelies sous les erreurs qu'on leur a fait succerauec le lait: c'est tres-iustement que l'Apostre dit, nonobstant cette manifestatiõ qui leur a esté faite de Dieu, qu'ils sont dans l'ignorance. Et quant à l'autre poinct, quand saint Paul dit, que *les Gentils ont fait naturellement les choses de la Loy, & ont esté Loy à eux-mesmes*, il veut specialement dire que Dieu a imprimé en eux certaines notices communes pour la distinction du bié & du mal, desquelles estans conuaincus en leurs consciences, plusieurs d'entr'eux ont fait, au moins exterieurement & pour quelque temps, diuerfes choses qu'ils connoissoient

estre bonnes, bien qu'ils n'eussent pas la Loy escrite qui les ordonne: & qu'ainsi cette Loy naturelle qu'ils auoient grauée en leurs cœurs, suffiroit à les cōdamner, pour ne les auoir pas toutes faites, & faites constamment comme elle les y obligeoit; & pour en auoir fait plusieurs qu'ils fauoient bien, par cette mesme Loy, estre mauuaises & vicieuses. Car que ce soit son sens, il est manifeste par ce qu'il adjouste immediatemēt au mesme passage, *Car ils monstrent l'œuvre de la Loy escrite en leurs cœurs, leur conscience leur rendant tesmoignage, & leurs pensees entr'elles s'accusans ou aussi s'excusans.* Mais il ne s'ensuit pas qu'ils n'ayent esté dans vne ignorance trespernicieuse de cette mesme volonté de Dieu en beaucoup d'autres choses, & qu'ainsi l'Apostre n'ait fort bien pû dire qu'ils estoient *alienez de la vie de Dieu, à cause de l'ignorance qui estoit en eux.*

Or pour monstrier que l'ignorance dont il parle, n'est pas vne simple ignorance, & qui fust bien aisée à vaincre par la prédication de la vérité;

té ; mais vne ignorance obstinée , endurcie & inueterée , qui ne pouuoit estre surmontée que par vne speciale grace de Dieu , il ne se contente pas de dire , *à cause de l'ignorance qui est en eux*, mais adiousté , *à cause de l'endurcissement de leur cœur*. Où par le cœur nous entendons l'entendement, comme ce mot en l'Ecriture est pris fort souuent en ce sens ; pour exemple, quand il est dit de Dieu qu'il est *sage de cœur*, des amis de Iob , que Dieu a *caché l'intelligence à leur cœur*; des Israélites que Dieu ne leur a pas donné cœur *pour entendre* ; des faux Prophetes, qu'ils *preschent les visions de leur cœur*; des Gentils, que leur cœur destitué d'intelligence a esté rempli de tenebres ; de Lydie , que Dieu luy a ouuert le cœur *pour entendre aux choses qui luy estoient preschées* : Et par *endurcissement* vn auuglement inueteré , tel que celuy d'une personne à qui il s'est formé vn cal sur la prunelle de l'œil , qui luy oste entierement l'usage de la faculté de la veüe. Car c'est ce que signifie proprement le mot Grec qui est employé icy par l'Apostre. Et de fait,

R

- en tous les lieux où l'Eſcriture ſainte ſ'en ſert, il eſt rapporté à l'entendement, comme quād il eſt dit en ſainct Marc & de ceux de la Synagogue, que
- Marc. 3. 5.* Ieſus-Chriſt eſtoit marri de l'endurciſſement de leur cœur, c'eſt à dire, de leur incredulité obſtinée; & des diſciples,
- Marc. 6. 52.* qu'ils n'auoient pas bien pris garde au faiect des pains, pource que leur cœur eſtoit ſtupide ou endurcy, car c'eſt le
- Marc. 8. 17.* meſme mot que nous auons icy; & quand Ieſus-Chriſt leur dit, *N'entendez vous point encores? Auez vous encor voſtre cœur ſtupide ou endurcy?* Et quand ſainct Iehan rapporte la prediſtion faite par Eſaye de l'incredulité des Iuiſ, en ces termes, *Il a auenglé & endurcy leur cœur, afin qu'ils ne voyent des yeux, & n'entendent du cœur;* & quand ſainct Paul en l'onzième de l'Epistre aux Romains eſcrit, *qu'ils ont eſté endurcis, ainſi qu'il eſt eſcrit, Dieu leur a donné vn eſprit aſſoupy, & des yeux pour ne point voir, & des oreilles pour ne point ouyr;* & là meſme, que s'ils ne perſeuerent point en incredulité, ils ſeront derechef entez, l'endurciſſement qui leur eſt aduenu, n'eſtant qu'en

partie, jusqu'à ce que la plénitude des Gentils soit entrée. Et c'est ainsi que l'interprete Syriaque l'a pris en ce lieu, ayant traduit, *aveuglement*, ce que nous auons tourné, *endurcissement*. Le prenant donc en ce sens là, c'est à dire, pour vne incredulité obstinée & confirmée par vne longue habitude dans les erreurs & dans les superstitions que le Diable a introduites dans le monde, il dit que cette ignorance ainsi endurcie est la cause de la vanité de leur entendement, & des tenebres de leurs discours, & de l'alienation de la vie de Dieu; c'est à dire, de toute l'extrauagance de leurs erreurs & de leurs superstitions, & de tous les desordres qui se voyent en leur vie. Car l'entendement estant la principale faculté de l'homme, & celle à laquelle seule il appartient de gouverner les appetits du corps, & de les ranger à la raison, ce qu'il ne peut faire que par la connoissance qu'il a de Dieu, & des choses bonnes & honnestes, auxquelles consiste l'image de sa sainteté: quand il perd cette connoissance, il perd les resnes par les-

quelles il les gouvernoit, & eux estans destituez de conduite s'en vont à travers champs comme des cheuaux eschapez, qui ayans pris le frein aux dents, ne peuuent plus ni reuenir d'eux-mesmes au timon & à la moderation qui leur seroit conuenable, parce qu'ils ne sont pas capables de raison, & ne se rangent sous ses loix que par l'empire de l'entendement, ni estre remis au bon chemin par l'entendement, qui estant luy-mesme auetugle, ne voit plus la route qu'il doit tenir, mais se laisse malheureusement entrainer à leur caprice & à leur violence. Il arriue bien encor pis, c'est qu'il deuient enfin comme vn cocher non seulement auetugle, mais yure & insensé, qui ne s'apperceuant point de son esgarement, & n'apptehendant point les precipices où ses cheuaux l'entraignent, s'esgaye luy-mesme en l'exorbitance de leurs mouuemens, les suit & les seconde fort volontiers, & ne se donne point de cesse qu'il ne se soit rompu le col avec eux. Car à mesure que son ignorance va croissant, ses

tenebres s'espaisissans , les erreurs se fortifians , le sentiment de sa conscience se diminuë , jusqu'à-ce qu'il soit perdu tout à fait, & que ne faisant plus de distinction de bien & de mal, il se porte à toute sorte d'excez sans remords & sans componction de cœur, suivant ce qui est dit au Pseau-
me, que le meschant haussant son nez *Pse. 10. 4.*
ne fait conscience de rien. C'est là le miserable estat où estoient les Payës, & où saint Paul nous les represente en ces termes, *Ils cheminent en la vanité de leur pensee, ayans leur entendement rempli de tenebres, & estans alienez de la vie de Dieu, à cause de l'ignorance qui est en eux, à cause de l'endurcissement de leur cœur, lesquels ayans perdu tout sentiment, se sont abandonnez à toute dissolution pour commettre toute souillure à qui en fera pis. Ils ont perdu, dit-il, tout sentiment. Comment cela? L'Apostre ne dit-il pas au contraire au deuxiesme chapitre de l'Epistre aux Romains, qu'ils monstrent l'œuvre de la Loy escrit en leurs cœurs, leur conscience leur rendant tesmoignage, & leurs pensees entr'elles s'accusans ou*

aussi s'excusans? Ouy, mais il faut distinguer les diuers temps & les diuers degrez de cét amortissement de la conscience. Car Dieu a mis en tous hōmes vne conscience, qui leur donne de la satisfaction de leurs bonnes actions, & qui leur fait reproche des mauuaises. Si bien que quand leurs conuoi- tises & leurs passions les emportent à faire des choses qu'ils sauent en eux- mesmes estre mauuaises, elle les en remord, afin que ce remords leur soit comme vn frein, pour les empescher d'y continuer, & pour les retenir en quelque deuoir. Mais comme leurs passions se renforcent, estans esmeües par les objects qui leur sont presen- tez, & charmée par les delices qu'ils trouuent en l'exercice du peché, elles noircissent & offusquent l'entende- ment de leur fumée, & l'empeschent de voir & de considerer comme il de- uroit la laideur du vice: & le Diable employe tous ses artifices pour le luy déguiser, & pour luy persua- der que les plus mauuaises actions aus- quelles il le tente sont bonnes, ou pour le moins indifferentes, & qu'il

n'y a pas sujet d'en faire scrupule, à quoy il se laisse aller volontiers, ayant déjà vne inclination à tout mal. Ainsi la conscience s'endort, les aiguillons s'esinouissent; & le pecheur qui ne les resent plus, se porte de là en avant avec toute licence au peché, duquel il a fait habitude. Mais encor qu'alors la conscience ne le remord plus de ce peché là, cela n'empesche pas qu'elle ne luy en ait fait reproche auparavant, qu'elle n'en ait fait reproche à d'autres, & qu'elle ne les redargüe encor luy & les autres de plusieurs autres especes de peché. Car Dieu ne permet pas que tant de millions de personnes qui vivent sur la terre, viennent tout à la fois à perdre tout sentiment de conscience pour se porter effrenément à toute sorte de pechez: parce que si cela arriuoit, la société civile ne seroit plus vne société d'hommes, mais de demons; & l'Eglise de Dieu, pour laquelle principalement il a soin de la conseruer, n'y pourroit subsister. Dieu donc, qui ne la veut pas laisser perir, ni donner ce contentement au Diable de conuertir la terre

en vn enfer, fait que la conscience s'y fait toujours sentir, aux vns plus, & aux autres moins; aux vns en vne espece de crime, aux autres en vne autre. Et cela suffit à l'Apostre pour prouuer, comme il fait en ce passage là, que Dieu jugera les Gentils par la connoissance qu'il leur a donnée du bien & du mal, & par le sentiment de la conscience de chacun d'eux. Ce qui n'empesche pas que ce qu'il dit en celuy-cy des desordres & des excès de leur intemperace, ne soit tres-vray en la plus-part d'entr'eux, *qu'ils ont perdu tout sentiment, & qu'ils se sont en suite abandonnez à toute dissolution, pour commettre toute souillure, à qui en fera pis.*

Rom. 1. 24.
26. 28.

En l'Epistre aux Romains il dit, que c'est Dieu qui les a liurez aux conuoitises de leurs propres cœurs, à leurs affections infames, & à vn esprit depourueu de tout jugement, pour commettre des choses qui ne sont nullement conuenables. Icy il dit que ce sont eux-mesmes qui s'y sont abandonnez. L'un & l'autre est tres-veritable. Ils se sont pleu à offenser Dieu, de laquelle ils ont tra-

uailé de tout leur pouuoir à esmouf-
fer les aiguillons, & à estouffer les re-
sentimens : & Dieu par son juste juge-
ment les a laissé faire. Ils n'ont pas
voulu qu'il les ait conduits, & il les a
abandonnez à eux-mesmes. Ils ont
chassé avec fureur apres le peché, &
il les a laissez déchirer à leurs propres
chiens. Car il ne leur a pas inspiré les
passions dont ils se sont souilleez, &
par lesquelles ils se sont perdus. Il
n'a fait, dit l'Apostre, que les liurer
aux cōuoitises de leurs propres cœurs
& à leurs affections infames. Qu'ils se
prennent donc de leur perdition à
eux-mesmes, & non pas à Dieu; à leur
fureur, & non pas à sa seuerité. Ce
sont eux-mesmes, dit l'Apostre, qui
se sont liurez à leurs passions, & aban-
donnez à toute dissolutiō. Mais com-
ment encor abandonnez ? *Pour com-*
mettre, dit-il, *toute souillure*, à qui en
feroit pis. O emulation de Diables !
ô rage digne de mille enfers ! Ils
se sont pressez à offenser Dieu, ils
ont inuenté tous les iours nouvelles
manieres de l'irriter, ils ont rasché de
s'y surmonter les vns les autres, &

Phil 3. 19.

ont fait gloire de leur propre confusion.
 Et de cela , sans parler du reste du monde , ces deux grandes & superbes villes , Rome d'où il enuoyoit cette Epistre , & Ephese où il l'adresloit , luy fournissoient quantité d'horribles exemples. Quelle estoit la cause de cette fureur ? Leur ignorance & leur aveuglement. Ainsi nous l'a-il enseigné par ces mots immediatemēt precedents , *A cause de l'ignorance qui est en eux , à cause de l'endurcissement de leur cœur.* Par où il ne pretend pas les excuser absolument , car l'ignorance des choses que Dieu a reuelées aux hommes pour sa gloire & pour leur salut , n'excuse personne. Et pourtant sous la Loy il y auoit des sacrifices pour les ignorances , aussi bien que pour les autres pechez , & Dauid demandoit pardon des fautes qu'il auoit *commises par erreur* , aussi bien que des autres ; & l'Apostre dit par exprés au premier de la seconde aux Theſſaloniens , que *Iesus-Christ fera vengeance de ceux qui ne connoissent point Dieu.* Mais c'est pour dire que s'ils pechent en leur ignorance , ce n'est pas chose à beau-

Pſe. 19. 13.

coup pres si estrange que s'ils pechoiēt apres auoir receu, comme nous, la connoissance de Dieu & de sa volonté. Ils ne sont pas excusables à les cōsiderer en eux-mesmes, mais si sont bien à les comparer aux mauuais Chrestiens, qui sauent la volonté de Dieu, & ne la font point.

Voila pourquoy l'Apôstre dit icy aux fidelles qui sont nourris en l'eschole de Iesus-Christ, *Ne cheminez point comme les Gentils.* Ils cheminent en la vanité de leur pensée, & sont alienez de la vie de Dieu, & s'abandonnent à toute souillure à cause de leur ignorance. *Mais vous n'avez pas ainsi appris Christ, voire si vous l'avez escouté, & si vous avez esté enseignez de par luy, ainsi que la verité est en Iesus.* Eux ont esté nourris dans les escholes de Satan, c'est à dire en des escholes d'erreur, de mensonge & d'impureté. Et ce n'est pas merueilles'ils vivent comme ils ont esté enseignez. Mais quant à vous qui avez esté instruits en celle du souuerain Docteur, qui est la verité & la sainteté mesme, vous n'avez pas appris de luy à viure

Mat. 2. 12.

dans la dissolution & dans la souillure. Au contraire, vous avez appris à renoncer à l'impiété, & aux mondaines convoitises, pour vivre sobrement, justement, religieusement, en l'attente de la bien heureuse esperance, & de son apparition glorieuse. Voire, dit-il, si vous l'avez esconté, ou, comme l'interprete Syriaque traduit, si vous l'avez vrayment oüy. Car il y en a plusieurs qui l'oyent, les vns sans intelligēce, comme les bestes des Israelites oyoient du pied de la montagne les tonnerres effrayans de la Loy de Dieu aussi biē que leurs maistres : les autres avec intelligence des mots, mais sans esmotion du cœur, comme les prophanes ouyrent la Loy tonnante sur Sinai. A ceux-là cette ouyē ne sert de rien. Car ce ne seront pas ceux qui auront oüy la Parole, mais ceux qui l'auront receuē avec foy, & qui en auront fait leur profit, qui seront justifiez deuant Dieu, c'est à dire, ceux à qui il a percé l'oreille, à qui il a donné cœur pour entēdre, oreilles pour oüir, qui comme sa sainte mere, mettent ce qu'ils oyent dire de luy en leur cœur, &

Luc. 2. 19.

qui disent avec son Prophete, *J'ay ser- Psau. 119.*
ré ton dire en mon cœur, afin que je ne pe- 11.
che point contre toy. C'est là oüir &
escouter veritablement Iesus-Christ.
Comment ? Les fidelles d'Ephese
auoient-ils oüy Iesus-Christ luy-mes-
me durant qu'il preschoit sur la terre,
ou leur auoit-il parlé depuis du haut
de sa gloire ? Non, mais ils auoient
oüy saint Paul son Apostre, qui leur
auoit presché l'Euangile au nom &
en l'autorité de Christ. Or Iesus-
Christ dit expressémēt aux Apostres,
quand il les enuoya, *Qui vous escoute, Luc. 10, 16.*
il m'escoute. C'estoit donc autant pour
leur salut, que s'ils eussent ouy Iesus-
Christ luy-mesme preschant du ciel,
puis que saint Paul leur auoit presché
la mesme doctrine que Iesus-Christ
estoit venu annoncer au monde, &
qui est la seule par laquelle les ames
doient estre sauuées. Ils auoient eu
d'autres Pasteurs, qui leur auoient en-
seigné la mesme doctrine, au mesme
nom & en la mesme autorité. Voila
pourquoy il dit, *Vous n'avez pas ainsi*
appris Christ, voire si vous l'avez escou-
ré, c'est à dire, si vous avez ouy avec

attention & docilité la doctrine de vos Pasteurs ; *& si vous avez esté enseignez de par luy , ainsi que la verité est en Iesus*, c'est à dire, s'ils vous ont fidèlement exposé la verité qu'ils auoient apprise de luy. Car ces deux choses sont requises, pour l'instruction & pour le salut des fidelles, que leurs Pasteurs leur preschent purement la verité de Iesus-Christ , & qu'eux l'escoutent avec attention , & la reçoient avec obeïssance de foy. On peut aussi entendre cecy affirmatiuement , & en prenant *si*, pour, *puis que*, comme il se prend souuent en l'Ecriture, pour dire, Puis que vous avez esté enseignez par Christ , que vous avez receu avec deuotion sa doctrine, cōme *la Parole de vostre salut*, & de ma bouche, & de celle des autres Pasteurs qui vous ont esté enuoyez , & qu'ils vous l'ont fidèlement exposée, toute telle qu'ils l'auoyent receuë de leur Maistre: vous sauez bien que ce n'est pas vne doctrine de licence , mais de sanctification, sanctification à laquelle aboutissent tous ses preceptes , & à quell e par consequent la profession

que vous faites, vous oblige à vous adonner en toute vostre vie, pour estre trouvez vrayment dignes du nom que vous portez.

C'est là, chers freres, ce que nous auions à vous dire pour l'intelligence de nostre texte. Ce qui nous reste maintenant, est de vous l'appliquer, & de vous faire la mesme remonstration qu'a fait l'Apostre à ses Ephesiens, vous conjurât au nom de nostre Seigneur Iesus-Christ de ne cheminer plus comme fait le reste du monde, mais selon les enseignemens que vous avez receus en l'eschole de ce Docteur celeste. Ce n'est pas assez que vous vous soyiez separez du monde quant à ses fausses religions, il faut aussi vous en retirer quant à ses mœurs vicieuses & deprauiées. Vous avez esté instruits tout autrement que les enfans du siecle, aussi deuez-vous viure tout autrement. Eux s'imaginent que s'il y a vn Dieu qui se mesle des affaires humaines, & qui veuille estre serui par les hommes, il se contente qu'ils le seruent par des ceremonies exterieures, quoy que leur cœur & leur

Job 4. 24.

Es. 23. 13.

Matth. 15. 8.

affection n'y soit point. Mais vous n'avez pas ainsi appris Christ. Car il vous a enseigné en son Euangile que *Dieu, qui est Esprit, veut estre servi en esprit & en verité*, & qu'il n'y a rien qui luy déplaîse si fort que le culte des hypocrites, qui *l'honorent de léures*, & *ont leur cœur aliéné de luy*. Au lieu donc qu'eux, quand il ont satisfait à leurs deuotions externes, pensent l'auoir bien appaisé, & apres cette pretendüe expiation de leurs pechez, se remettent à mal faire comme deuant, vous au contraire seruez-le avec sincerité de cœur, avec vne vraye foy, avec vne viue repentance de vos pechez & avec vn zele ardent à sa gloire, & vous estudiez à luy plaire, en viuant sobrement, justement & religieusement deuant luy. Eux qui ont leur partage en cette vie, attachent toutes leurs affections à la terre, trauaillent à y amasser des thresors, & font de Mammon leur idole, & de leurs richesses leur souuerain bien, se promettâs qu'apres les auoir amassées ils se réjouiront & feront grand' chere, & auront vie par leur moyens. *Mais*
vous

vous n'avez pas ainsi appris Christ. Car Luc. 12. 13.
il vous a esté enseigné que l'homme n'a Matth. 6. 19.
point vie par ses biens; que les thresors 10.
qu'ils s'amassent en terre, sont sujets
à la rouillure, à la teigne, au larron,
& qu'ainsi on n'en peut point faire
estat assuré; que c'est au ciel qu'il faut
thesauriser, où la rouille ne gaste rien,
& où ni la dent de la teigne ni la main
du larron ne sauroient atteindre; que
la racine de tous maux est la convoitise 1. Tim. 6. 10.
des richesses, de laquelle quelques vns
ayans eu envie se sont déuoyez de la foy,
& se sont enserrez eux mesmes en plu-
sieurs douleurs, mais que pieté avec con- 1. Tim. 6. 6.
tentement est vn grand gain; que les 1. 2. 3.
poures de ce monde, estans riches en foy,
seront heritiers du Royaume que Dieu a
promis à ceux qui l'aiment; & qu'au con-
traire ceux qui auront mis leur con-
fiance en l'incertitude des richesses,
en seront exclus à jamais, & se ver-
ront, avec le mauuais riche, reduits à Luc. 16. 24.
demander, sans pouuoir l'obtenir, vne
goutte d'eau pour rafraischir leur
langue en la flamme. Au lieu donc
qu'eux ne songent qu'à amasser de l'or
& de l'argent par voyes justes & in-

1. *Tim.* 6. 9. justes , & en voulant devenir riches, tombent en tentation & au piege, & en plusieurs desirs fols & nuisibles, qui les plongent en perdition & en destruction: vous au contraire regardans non aux
2. *Cor.* 4. 18. choses visibles, qui ne sont qu'à temps,
1. *Tim.* 4. 8. mais aux invisibles, qui sont éternelles, & sachans que la piété est profitable à toutes choses, & qu'elle a les promesses de la vie présente, & de celle qui est à venir; faites en vos principales richesses. Et
1. *Cor.* 7. 30. quant aux autres, possédez les comme ne les possédans point, sachans que la figure de ce monde passe, & que ce n'est que vanité: si vous n'en avez point, contentez vous de la condition à laquelle Dieu vous appelle. Ayans le
- Esa.* 33 6. thresor de Sion, qui est la crainte du Seigneur, & le droit assuré à son heritage celeste, vous vous devez reputed assez riches. Eux se font à croire que la vraie gloire consiste en la faueur des Princes, en l'applaudissement des peuples, en la promotion aux honneurs & aux dignitez, que c'est là la plus noble recompense de la vertu que l'homme puisse recevoir. Mais vous n'avez pas ainsi appris Christ. Car

il vous a enseigné que vostre gloire est en luy, en sa Croix, & au tesmoignage de vostre bonne conscience; que la principale loüange, à laquelle vous devez aspirer, est celle qu'il donnera à chacun de vous en la grande journée, qu'en cette journée là, en laquelle il *descendra des cieux pour se* 2. *Thess.* 1. 10. *rendre glorieux en ses saints & admirable en tous ses croyans*, vous *appa-* Col. 3. 4. *roistrez avec luy en gloire*. Au lieu donc qu'eux se tuent corps & ame, comme possédez par le demon d'une ambition furieuse, pour acquérir les loüanges des hommes, & les dignitez de la terre, vous au contraire méprisans tout cela comme vent & fumée, & recherchant la vraie & solide gloire en sa source, c'est à dire, au Seigneur, qui *honore ceux qui l'honorent*, & *donne* 1. *Sam.* 1. 30. *grace & gloire à ceux qui cheminent en* Ps. 84. 12. *intégrité*; estudiez vous à luy plaire par une conuersation vertueuse, & vrayment digne de ses enfans & de vostre Baptême. Que si, par l'iniquité du siecle, vostre vertu est mal reconnüe icy bas, contentez vous pour le present de l'approbation de

Dieu, & de la satisfaction interieure que vous auez, disans avecques Iob,
Iob. 16. 19. Mon tesmoin est au ciel, & avec S. Paul,
2. Cor. 1. 12. Cette est nostre gloire, le tesmoignage de
nostre conscience ; & attendez en pa-
tience cét heureux jour auquel vous
estes asseurez qu'il vous donnera pour
recôpense vne gloire eternelle parmi
les Anges & parmi tous les esprits triô-
phans. Eux se persuadent que tout ce
qu'il y a de meilleur & de plus doux
en la vie, c'est la volupté de la chair, &
pour en jouir, ils s'abandonnēt à toute
dissolution, de jeu, de gourmandise,
d'yurognerie, de paillardise, & d'a-
dultere, n'oubliās & n'espargnās rien
pour assouvir leur sensualité, & disans
Sap. 2. 1. 6. 9. en eux mesmes, Le temps de nostre vie
est bref & plein d'ennuy, & n'y a point
de remede à la mort, & ne se voit per-
sonne qui en soit retourné. Venez donc,
& faisons grand' chere des biens que nous
auons, vsons des creatures & de nostre
jeunesse, & laissons par tout des marques
de nos plaisirs. Car c'est là nostre part,
& le lot de nostre heritage. Mais vous
n'auex pas ainsi appris Christ. Car il
vous a enseigné que ces plaisirs sales

& vicieux , pour exemple ceux du mauvais riche , ne dureront qu'un moment , & se termineront en des regrets & en des tourmens eternels, que qui sème à la chair , moissonnera de *Gal. 6. 8.* la chair corruption ; mais que qui sème à l'esprit , moissonnera de l'esprit vie eternelle ; que les yuongnes , les paillards *1. Cor. 6. 10.* & les adulteres n'heriteront point le Royaume de Dieu , mais seront jettez *Apoc. 12. 15.* hors de la sainte Cité , & precipitez en *21. 8.* l'estang ardent de feu & de soulfhre , qui est la mort seconde ; que le vray plaisir est celuy de l'ame , c'est à dire , cette paix envers Dieu qui suit la justification par la foy , & cette joye inenarrable *Rom. 5. 1.* & glorieuse que Dieu respand en elle par son Esprit , en attendant celle qui luy est reseruee au ciel. Renoncez donc , selon cette doctrine , à toutes ces voluptez sensuelles qui enervent le corps , qui effeminent l'ame , qui poluent la conscience , & qui estans frappées de la verge de la maledictio de Dieu se doiuent tourner à la fin en sang , & vous nettoyant de toute souillure de chair & d'esprit , adonnez vous à la sanctification à laquelle Dieu

& intelligence spirituelle, & pour en departir mesmes autres. Car comme en ce qui est de la vie temporelle, l'homme est tenu de trauailler non seulement pour subuenir à ses propres necessitez, mais *pour ayder aussi à celuy qui en a besoin*: aussi en ce qui est de la spirituelle, il faut que le fidelle ait de l'instruction pour soy-mesme & pour ses prochains, qu'il soit soigneux de faire valoir enuers eux le talent de connoissance qu'il a receu, & de sauuer les ames de mort, en les radresant quād il voit qu'elles se fouruoyēt de la verité. Souuenez vous aussi de ce que nous vous auons dit que quand l'ignorance s'est enuieillie en l'entendement, & qu'il s'est fortifié par vne longue habitude dans le mensonge, il s'y forme vne dureté & vn cal, qui en rend impossible & deseperée la guérison. Nattendez donc pas que ce cal se soit formé en vostre esprit, en dilayant vostre instruction, mais taschez le plus tost qu'il est possible, de remedier à vostre ignorance par les moyens que Dieu a ordonnez.

Quand puis apres l'Apostre ad-


jouste que ce que les Payens se sont abandonnez à toute dissolution, pour commettre toute souillure, c'est parce qu'ils ont petit à petit endormi, esteint & amorti le sentiment de leur conscience, ce vous est vn aduertissement tres-necessaire de vous garder sur toutes choses des pechez qui sont contre la conscience. Car quand vous commettez des choses que vous saluez estre mauuaises, & que nonobstant les reproches que vous en fait vostre conscience vous y reuenez encor vne fois, & apres celle-là vne autre, & continuez de la façon, peu à peu les passions de peché se fortifiēt en vous, & la conscience s'y debilite, jusques à ce qu'en fin elle deuient sourde, muette, lethargique, morte & insensible, & comme parle l'Apostre au quatriesme de la premiere à Timothée, *cauterisée*, c'est à dire, semblable à la chair qui ayant esté brulée & mortifiée par vn cautere, n'a plus de sentiment; qui est l'un des plus horribles mal-heurs qui sauroit arriuer à vn homme. Car cette insensibilité là est suivie d'une licence furieuse & d'un

abandon general à toute sorte de pechez, d'intemperances & d'excez. Là où tandis que vostre conscience vit & agit en vous, que vous la reuerrez, que vous craignez ses aiguillons, bien que vos conuoitises & vos passions vous surprennent par fois, & vous facent tomber au peché, il y a tousiours esperance qu'elle vous réueillera, qu'elle vous releuera, & vous fera reparer par repentance le mal que vous aurez commis par surprise & par infirmité.

Finalemēt quand nous oyons la comparaison que fait l'Apostre de l'ignorance des Payens avec l'instruction des Chrestiens, cela vous doit faire penser d'un costé combien vous estes redevables à Dieu, qui ayant laissé tant de peuples dans l'ignorance & dans l'aveuglement, vous en a gueris par sa grace, vous ayant amenez en l'eschole de Iesus-Christ, pour y estre instruits en sa volonté, & *ren-*
duz sages à salut: & de l'autre combien vous serez coupables & inexcusables devant son iugement, si nonobstant la connoissance qu'il vous a donnée pour vous adresser en ses voyes, vous

2. Tim. 3. 15.

enseignez de par luy, ainsi que la vérité est en Iesus ; & qu'en la resurrection des justes, quand il apparoiſtra pour juger les viuans & les morts, il nous reconnoisse pour ses disciples, comme nous l'aurons reconnu pour nostre maistre, & nous mette, selon ses promesses, en possession de la gloire immortelle de son Royaume.



S E R M O N

S E P T I E S M E ,

Sur ces paroles de l'Apostre S.
Paul au 4. chap. de l'Epistre
aux Ephesiens.

Verf. 22. *A sçavoir que vous déponilliez le
vieil homme quant à la conuersation prece-
dente, lequel se corrompt par les conuoitises
qui séduisent.*

23. *Et que vous soyez renouvellez en l'esprit
de vostre entendement.*

24. *Et soyez reuestus du nouuel homme créé
selon Dieu en justice & vraye sainteté.*



Nciennement lors que
les maistres affranchis-
soient leurs serfs, ils
leur donnoient leur
nom, les inseroient
en leur tribu, & les faisoient asseoir
à leur table; & auecques cela ils leur
faisoient prendre vn aneau d'or &

*Testam. de
resurr. carn.
cap. 57.*

Ieb. 8. 36.

*Luc 15. 22.
33.*

vn robe blanche, comme nous l'apprenons par vn passage illustre d'un des plus anciens Docteurs de l'Eglise. Nostre Seigneur Iesus pratique le mesme à l'endroit de tous ceux qu'il fait participans de cette vraye & salutaire liberté, de laquelle il nous dit en son Euangile, *Si le Fils vous affranchit, vous serez vrayment francs.* Car au Baptisme il nous donne son nom, & nous incorpore dans son Eglise. En la sainte Cene il nous fait seoir à sa Table, & avec cela il nous communique le precieux seau de son saint Esprit, & prend toute sorte de soin de nous dépouiller de nos vices, & de nous parer de ses vertus, pour estre, comme ses vrays membres, dignes de comparoir deuant la face de son Pere, & de demeurer eternellement au Palais de sa gloire. C'est ce qu'il nous a figuré par la parabole de l'enfant prodigue que le pere receut en sa grace, en luy faisant apprester vn banquet, en luy donnant vn anneau en la main, & en le reuestant d'une robe neuue: & ce que signifioit aussi cette ancienne coustume qu'auoit l'E-

glise, comme elle receuoit ses Catechumenes à la profession de la foy Chrestienne & à la participation du Baptisme & de la Sainte Cene, de leur faire dépouiller tous leurs vieux habits & en prendre de neufs & tous blancs pour symbole de l'innocence à laquelle ils se consacroient. Ce beau texte dont vous venez d'entendre la lecture, nous enseigne la mesme chose, où l'Apostre parlant à ces Chrestiens d'Ephese qui auoint receu le S. Baptisme & participé à la sainte Table de nostre Seigneur Iesus-Christ, & les voulant destourner des pechez auxquels ils auoient esté adonnez durant leur infidelité, & les induire à vne vie digne de leur condition presente, & du sacré nom qu'ils portoiēt, leur dit que la verité qui est en Iesus, & qu'ils ont apprise de luy, s'ils l'ont bien escouté, est que tous ceux qui croient en Christ, doiuent dépouiller le vieil homme & reuestir le nouveau. Et nous prenons fort volontiers à vous exposer ces paroles, pour vous faire la mesme remonstrance qu'il leur faisoit, afin que comme le-

Ies-Christ vous a fait annoncer ce matin le benefice de vostre redemption par son sang, & vous a en suite admis à la Table, vous aussi de vostre costé dépoüillans le *vieil homme* quant à la *conuersation* precedente, qui se corrompt par les conuoitises qui seduisent, & estans renouvellez, en l'esprit de vostre entendement, & reueſtus du *nouuel homme*, qui est créé selon Dieu en justice & vraye saincteté, monstriez que vous estes vrayment les affranchis de ce misericordieux Seigneur.

Sainct Paul nous y enseigne deux choses, La premiere, que la *verité* qui est en Iesus, & que nous auons apprise en l'Eglise, se rapporte toute à la sanctificatiō; L'autre que cette sanctificatiō consiste à renōcer à nous mesmes, & à nostre conuersation passée, & à viure desormais comme nouveaux hommes, d'une vie toute nouvelle, pleine de justice & de saincteté. Nous examinerons l'une & l'autre de ces deux propositions avec l'ayde du S. Esprit. Vous qui estes presens de corps, soyez le aussi d'esprit, & en referrez les enseignemēs en vos cœurs, pour

pour acheuer heureusement la sanctification de cette journée, & pour en estre meilleurs & plus saints tout le reste de vostre vie. La premiere est tres-importante à l'instruction du fidelle, & à l'honneur de la vraye Religion; & tres-necessaire en vn temps où il ne se trouue par tout que trop de mauuais Chrestiens, qui prennent plaisir à s'imaginer que la Religion Chrestienne ne consiste qu'à croire en Iesus-Christ d'une foy sterile & infructueuse, & que cela suffit pour se rendre agreable à Dieu, & pour obtenir la vie eternelle, sans estre pourtant obligez à se retirer du peché, & à s'adonner à l'estude de la sainteté & des bonnes œuvres; & auquel les Aduersaires diffament la doctrine de verité, comme estant vne porte ouuerte à tout vice & à toute dissolution. Contre l'erreur pernicieuse des vns, & la calomnie puante des autres, l'Apostre nous enseigne icy que *la verité qui est en Iesus*, c'est à dire, tous les preceptes de sa discipline celeste, tendent à nous déponiller du vieil homme, & à nous reuestir du nouveau; à nous retirer

*Luc. 1. 74.
75.*

2. Cor. 5. 15.

*Tit. 2. 11.
12.*

des erreurs de nostre conuersation precedente, & à nous renouveler en l'esprit de nostre entendemēt; à mortifier nos conuoitises charnelles, & à viuifier en nous la justice & la sainteté. C'est pour cela que le Pere nous a enuoyé son Fils pour Sauueur; *afin, dit Zacharie, qu'estans deliurex de la main de tous nos ennemis, nous le seruions sans crainte, en sainteté & en justice deuant luy tous les jours de nostre vie.* C'est pour cela que le Fils est mort en la Croix, de cette mort accompagnée de l'ire & de la malediction de Dieu que nous auions meritée par nos pechez, & dont il n'y auoit que la seule satisfaction qui nous peust garentir. *Il est mort pour tous, dit saint Paul, afin que ceux qui viuent, ne viuent plus desormais à eux-mesmes, mais à celuy qui est mort, & qui est resuscité pour eux.* C'est pour cela qu'il nous reuele sa grace en l'Euangile. Car, comme nostre grand Apostre nous dit ailleurs, *la grace de Dieu, salutaire à tous hommes, nous est clairement apparüe, nous enseignant qu'en renonçant à l'impiété & aux mondaines*

*conuoitises, nous viuions en ce present
 siecle sobrement, justement & religieuse-
 ment. C'est pour cela que nous rece-
 uons le Baptisme. Car, comme il est
 dit au sixiesme de l'Epistre aux Ro-
 mains, nous sommes enseuelis avec luy en* *Rom. 6. 4.*
*sa mort par le Baptisme, afin que comme
 Christ est resuscité des morts par la gloire
 du Pere, nous aussi pareillement chemi-
 nions en nouueauté de vie. C'est pour
 cela que nous communiquons à la
 sainte Cene, afin que par le pain que
 nous rompons, & par la coupe de be-
 nediction qui nous est benite, nous
 ayons cōmunion à son corps & à son
 sang: & que comme si nos veines n'e-
 stoient pleines que de son sang, ni nos
 arteres que de ses esprits, elles ne
 poussent ni ne battent sinon pour son
 seruice. En vn mot, c'est la derniere
 perfection qu'il s'est proposé de pro-
 duire en nous par toutes les œuvres
 de la grace, c'est la conformité avec
 Christ à laquelle il nous a predestinez
 avant tous les siecles, c'est la partici-
 pation à la nature diuine que doiuent
 auoir tous ses vrais enfans, & la plus
 excellēte & plus essentielle partie de*

leur beatitude. Le contentement & la gloire dont la bonté de Dieu la doit couronner eternellement, n'en sont que des suites, des appendices & des ornemens. Car la gloire n'est rien qu'un esclat externe de la vertu, ni le contentement qu'un effect naturel & immediat de la jouissance du souverain bien. Ainsi c'est avec une tres-grande raison, que nostre diuin Apostre icy & ailleurs nous recommande si fort cette saincteté, sans laquelle nul ne verra Dieu, & par laquelle nous devons estre faits semblables à luy, c'est à dire, estre saints ainsi qu'il est saint.

Le principal est maintenant de voir en quoy elle consiste. Il la constitue en deux actes, à dépouiller le vieil homme, & à reuestir le nouveau. Actes qui en effect ne sont qu'un. Car le droit & l'oblique, le juste & l'injuste, estans des contraires qui sont immediatement opposez l'un à l'autre, quiconque en oste l'un, par cela mesme il pose l'autre. Mais il ne laisse pas de les cōsiderer sous deux égards distincts, afin d'en faire entendre tant

plus clairement la nature. Ainsi encor que la dissipation des tenebres & l'introductiō de la lumiere, l'expulsiō de la mort & la reddition de la vie, l'acte de chasser la maladie & celuy de restituer la santé, la correction de la laideur & la reparation de la beauté, ne soient effectiuement qu'une mesme chose, nous ne laissons pas de dire que les tenebres ont esté chassées, afin que la lumiere esclaire le ciel & la terre; que la mort a esté vaincuë en vn corps afin d'y remettre la vie; que la maladie en a esté ostée, afin d'y reloger la santé; que la laideur & la difformité en a esté corrigée, afin d'y reparer la bonne grace & la beauté. Pour suiure dōc les mots & l'intention de l'Apostre en cette sentence, il nous faut considerer la reformation dont il parle, sous ces deux notions sous lesquelles il nous la propose. Pour commencer par la premiere, nous auons à y voir que c'est qu'il entend par ce *vieil homme, qui se corrompt de jour en jour par les conuoitises de seduction*, & puis que c'est qu'il signifie par le *dépouillement* qu'il nous en ordonne. Il y a trois pas-

sages où il fait mention du vieil homme, au sixiesme de l'Epistre aux Romains en ces termes, *Nostre vieil homme a esté crucifié avec luy, afin que le corps de peché fust réduit à neant* : au troisieme de l'Epistre aux Colossiens en ceux-cy, *Ne mentez point l'un à l'autre, ayans despoüillé le vieil homme avec ses actes, & ayans reuestu le nouuel homme, lequel se renouvelle en connoissance selon l'image de celuy qui l'a créé* : & en ce texte que nous auons en main. En tous lesquels il n'entend autre chose que cette corruption hereditaire de nostre nature, que l'Escripture sainte appelle ordinairement *chair*, & que saint Augustin, & toute l'Eglise apres luy a appellé *peché originel*, consistant en l'ignorance qui est en nostre entendement pratic en ce qui touche nostre souuerain bien, en l'auersion qu'a nostre volonté de ce bien là, comme s'il luy estoit mauuais, en la conuersion aux creatures sensibles, comme si elles estoient son souuerain bien, en l'égarement de nos appetits hors des justes bornes que la nature leur a prescrites, & en vn mot en la depraua-

tion de toutes nos facultez morales, qui fait que ni nos passions & nos conuoitises n'obeissent point à la raison, ni la raison à la volonté de son Createur ; d'où procedent , si tost que l'homme vient en aage de connoissance, & commence à vser de sa propre raison , toutes sortes de pechez actuels, c'est à dire, de rebellions de nos pensées, de nos paroles & de nos actions contre la Loy de Dieu. Cette deprauation là, à proprement parler, n'est pas l'homme. Ce n'en est qu'un accident & un vice. Mais parce que c'est vne corruption vniuerselle qui s'est incorporée en toutes les parties de nostre nature, & comme vne lepre qui a gasté toute la masse de nostre sang, l'Apostre ne fait pas difficulté d'en parler comme d'un corps qui a ses membres & ses organes. Car il l'appelle *le corps de peché*, & les vices particuliers dont il est composé *nos membres*, quand il dit aux Colossiens, *Mortifiez dont vos membres qui sont sur la terre*, Col. 3. 5. *paillardise, souillure, appetit desordonné, mauuaise conuoitise, & auarice, qui est idolatrie*. Voire il en parle quelquefois

comme d'une personne vivante, qui a ses facultez, ses desseins, ses pensées & ses actions, agissant continuellement & avec une merueilleuse efficace là où elle se trouve. Car il l'appelle *le vieil homme* & en ce lieu & aux deux passages prealleguez. Mais pourquoy vieil ? Premièrement à l'esgard de toute la nature humaine, qui en a esté horriblement infectée par la cheute de nostre premier pere. C'est vn venin que le vieil Serpent luy a inspiré, & qui de luy s'est deriué sur tous ses descendans, qui sont tous generalement ; comme Esaie appelloit les Israélites ; *transgresseurs dès le ventre*. Il n'y a jamais eu qu'un seul Iesus-Christ, comme n'ayant point esté conçu par la chair, mais par le Saint Esprit, qui en ait esté excepté. Pour tous les autres, *tout ce qui est né de chair, est chair*. On ne peut rien tirer de net de ce qui est souillé. Moysé mesme, quand il a mis la main dan son sein, l'en a tiré lepreux David, qui estoit l'homme selon le cœur de Dieu, quand il est venu à jeter les yeux sur sa conception, &

Es. 48. 8.

Ieh. 3. 6.

Iob. 14. 4.

esté contraint de s'escrier, comme estant de mesme nature que tous les autres enfans d'Adam, *J'ay esté conçu* Pseau. 51. 7. *en peché, & ma mere m'a eschauffé en iniquité* : & l'Apostre S. Paul en la mesme consideration, s'est auoué *enfant d'ire comme les autres*. Secondemēt il est appellé vieil à l'esgard de chaque homme considéré à part. Car comme au lepreux né d'un pere lepreux sa lepre est aussi vieille que sa substance, ainsi en est-il du pecheur. Sa corruption est aussi ancienne que sa nature. C'est vne teinture dont il est imbeu non seulement dès son enfance, mais dès l'instant de sa conception, un vice qui preuient l'usage de sa raison, vne auersion de tout bien & vne inclination à tout mal, qui est en luy deuant que connoistre ni bien ni mal. Finalement il est ainsi nommé en comparaison du nouuel homme formé par l'efficace du Saint Esprit, qui suruenant en nous, & nous trouuant saisis de cette nature ainsi corrompue, la défait peu à peu, & nous en donne vne toute nouuelle : Tout de mesme que l'Alliance Legale est appelée

Vieille, parce que celle de la grace, qui luy a esté subrogée, l'a abolie & aneantie. C'est vn grand mal que ce peché originel que nous apportons tous du ventre de nos meres. Mais le plus grand mal-heur est qu'il va de jour en jour empirant & corrompant les hommes par le moyen de ces conuoitises des biens de la terre, des honneurs du monde & des voluptez de la chair, par lesquelles Satan traueille continuellement à seduire & à debaucher leurs esprits, s'ils ne sont soigneux de se premunir contre vne si dangereuse corruption, & si l'Esprit de Dieu n'y opere par vne grace speciale. C'est ce que signifie l'Apostre quand il adjouste, *qui se corrompt par les conuoitises qui seduisent*, parce que ce sont elles qui ostent aux esprits des hommes la connoissance de leur souverain bien, & qui les font courir, comme insensez & furieux, après de vaines ombres de biens & d'honneurs, qui n'ont rien d'admirable que ce que n'estans que choses terrestres & corruptibles, elles donnent de l'admiration à des ames que Dieu a créées

pour le ciel & pour l'éternité, & apres les voluptez de la chair, qui sont des delices empoisonnées pour perdre les corps & les ames. Ce sont elles qui charment & ensorcellent non vn homme icy, & vn autre là, mais generalement tous les peuples du monde. Car encor que les aspects du ciel, les proprietiez des climats, de l'air, des eaux & des nourritures leur donnent de differentes inclinations, ils s'accordent tous en ce poinct de constituer leur felicité en cette sorte de biens, & de les rechercher avec passion & avec fureur. Ce sont elles qui les débauchent du seruice de Dieu leur legitime & souuerain Seigneur, pour les engager à celuy du *Prince de ce siecle*, & qui les portent à toute sorte de pechez & de crimes, leur faisant trouuer bons tous moyens, quelques mauuais & execrables qu'ils soient, pourueu qu'ils les puissent conduire à leurs fins. C'est par ces conuoitises là que saint Paul dit que le vieil homme se va corrompant & empirant de plus en plus, c'est à dire que la corruption originelle qui est en nous, s'en-

retient & s'augmente : parce que ce sont elles qui esmeuvent cette puante sentine de vices, qui estoit cachée dās le cœur, & qui la font passer de la puissance à l'acte, & la rendent tous les jours plus forte & plus abominable. Car comme les bonnes habitudes se fortifient par l'exercice frequent de leurs actes, en sorte que *celuy qui est sanctifié, se sanctifie encores davantage* : les mauuaises aussi sont confirmées par l'usage & par l'accoustumance, en sorte que *celuy qui estoit souillé, se souille encores davantage*, jusqu'à ce qu'en fin il vient à vne extreme & irremediable corruption. C'est ce *vieil homme avec ses actes*, que saint Paul nous exhorte de dépouiller, renonceant de tout nostre cœur, selon le vœu que nous en auons fait en nostre Baptisme, & à toutes ces inclinations vicieuses de nostre nature, & à toutes ces conuoitises charnelles *qui guerroyent contre nos ames*, comme dit l'Apostre saint Pierre. Il est vray que c'est vne resolution difficile à prendre à la chair, & encor plus difficile à exécuter. Car ce n'est pas vn simple ve-

I. Pierr. 2. 11.

stement adherant exterieurement à nostre personne , & qui se dépouille sans peine , comme quand Ioseph a quitté les vieux haillons de sa prison, pour se presenter deuant Pharaon. C'est vne peau qui tient à nostre chair , & qui fait partie de nous mesmes. On ne la peut quitter , & mesme la quitter toute entiere, qu'en l'escorchant avec vne extreme douleur , & avec perte de la vie. Mais quelque peine & quelque douleur qu'il y ait , il nous est entierement necessaire de quitter cette vieille peau, & de mortifier cette chair avec ses appetits , pour nous pouuoir presenter deuant Dieu , & esperer de luy estre agreables. C'est là la premiere leçon du Christianisme. *Si* LUC 9. 23. *quelqu'un* , dit nostre Sauueur , *veut venir apres moy , qu'il renonce à soy mesme , & qu'il charge de jour en jour sa croix , & me suive.*

Mais ce n'est pas assez de renoncer au vice, & de despoüiller le vieil homme quant à la conuersation precedente. Il faut, dit nostre Apostre, reuestir le nouueau, embrasser l'estude de la justice & de la saincteté, estre re-

generez & faits nouvelles creatures. De cette regeneration & de ce renouvellement il nous monstre quel est le premier sujet & le vray principe, quand il dit que vous soyez renouvellez par l'esprit de vostre entendement; & puis quelle en est la nature & la forme quand il adjouste, & que vous soyez reuestus du nouuel homme, créé selon Dieu en justice & vraye sainteté. Son premier sujet est l'entendement. Car comme c'est par là qu'a commencé le peché & la corruption, l'entendement du premier homme ayant esté seduit par le serpent, & puis ayant entraîné apres soy la volonté & les affections, & en fin la main & la bouche; c'est par là aussi que doit commencer nostre regeneration, Dieu en chassant premierement l'ignorance & l'erreur, pour y faire reluire la lumiere de sa verité, & puis formant les autres parties du nouuel homme, la crainte de son Nom, l'amour de sa sainteté, la confiance en sa bonté & la dilection du prochain. Ainsi en la creation de cét Vniuers il fit premierement la lumiere, & puis il mit toutes les autres cho-

ses en estre. Et certes c'est vn ordre
tres-naturel & tres-necessaire. Car
l'entendement estant la principale fa-
culté de l'homme, & le premier prin-
cipe duquel dependent tous les mou-
uemens de la volonté, & toutes les
actions de la vie, tandis qu'il demeure
en tenebres, toutes les autres facul-
tez qui sont sous sa direction, tombēt
à chaque pas en peché, suiuant ce que
dit Iesus-Christ, *Si vn auetgle conduit* *March. 15.*
vn autre auetgle, ils tomberont tous deux 14.
en la fosse. Ce qui a fait dire cy-deuāt
à l'Apostre que les Gentils estoient
alienez de la vie de Dieu, à cause de l'i-
gnorance qui estoit en eux, & de l'endur-
cissement de leur cœur. Mais aussi tost
qu'il vient à estre esclairé de la lumie-
re de Dieu, pour connoistre certaine-
ment le bien & le mal, il les remet
au bon chemin, & leur donne de nou-
ueaux objects & de nouvelles habitu-
des; n'estant pas possible ni d'aimer
les choses qu'on connoist estre dignes
de haine, ni de haïr celles qu'on con-
noist estre aimables. C'est pourquoy
l'Apostre au douziesme de l'Epistre
aux Romains requiert des fidelles

Rom. 12.

qu'ils soient transformez par le renouvellement de leur entendement pour esprouver quelle est la volonté de Dieu bonne, plaisante & parfaite, c'est à dire, pour savoir quelles sont les choses auxquelles ils doivent s'adonner pour luy estre agreables. Voila pour ce qui est du sujet de ce renouvellement là; quant au principe, il le marque en ces mots, *par l'esprit de vostre entendement*, où *par l'esprit de nostre entendement* nous entendons le saint Esprit, cét *Esprit de sagesse & d'intelligence* qui nous illumine en la connoissance des choses necessaires à nostre salut, nous desabuse des fausses maximes & des persuasions erronées dans lesquelles nous auions esté nourris durant nostre conuersation precedente, & nous en donne de toutes contraires, pour nous former à des pensées, à des affections & à des œuvres toutes autres que par le passé, & pour nous mettre dans les voyes de la vie eternelle. Tout de mesme qu'en l'Epi-
Tu. 3. 4. 5. stre à Tite il luy attribué ce benefice, disant que *Dieu nous a sauuez par le l^auement de regeneration & renouelle-*
ment

ment du Saint Esprit, lequel il a espandu abondamment en nous par Iesus Christ nostre Sauueur. De nous renouuerer de nous mesmes, il nous estoit entierement impossible, parce que nostre entendement estoit auëugle & rempli de tenebres. La Loy, qui estoit vne lettre morte, & dont le Ministère n'estoit pas accompagné de l'efficace de l'Esprit, ne pouuoit pas non plus nous regenerer. Il falloit que ce fust l'Esprit mesme de Iesus-Christ que Dieu enuoyast en nos cœurs, pour nous donner vn estre tout nouveau, & pour nous faire viure de la mesme vie que Iesus-Christ.

Reste maintenant de considerer la nature & la forme de ce renouuellement là. L'Apostre l'explique en disant, *Et soyeꝝ reuestus du nouuel homme, crée selon Dieu en justice & vraye saincteté.* Par le nouuel homme il entend non vn autre substance que celle que nous auions auant nostre conuersion; Car la nature qui est sanctifiée par le Saint Esprit, est la mesme qui s'estoit souillée par le peché: mais ces nouvelles qualitez, ces nouvelles ha-

bitudes, ces nouvelles lumieres, ces nouvelles affections, ces nouveaux mouuemens, & en vn mot cette nouvelle vie & ce nouuel estre que l'action de cet Esprit engendre dans nos ames. Il en parle comme d'un homme, non qu'autre ne soit la nature de l'homme, & autre cette vie de grace que Dieu y engendre par sa vertu; mais parce que cette vie là est comme vne autre nature intelligente & tres-puissante, qui agit dans son ame pour en regenerer toutes les facultez, & dans son corps pour en sanctifier aussi tous les membres, qu'il n'y a aucune partie de l'homme sur laquelle elle ne s'estende; & qu'elle forme en luy des pensées, des affections & des actions toutes autres que n'estoient les siennes ordinaires & naturelles, comme si c'estoit vne autre personne que Dieu eust mise dedans luy pour l'animer & pour le gouverner. Et il appelle cet homme *nouveau*, ou pource que cette vie surnaturelle suruiuent à la corruption naturelle, qu'il a appelée *le vieil homme*; ou pource que c'est vne vie opposée aux vieilles erreurs & coustu-

mes du monde , & qu'elle paroist merueilleusement nouvelle aux mondains ; ou parce que c'est le style de l'Escripture d'appeller *vieil* ce qui doit finir ; comme quand l'Alliance Legale , quoy que donnée quatre cents trente ans seulement apres celle de grace, est appellée *vieille*, parce qu'elle deuoit finir, suiuant ce qui est dit au huiëtiesme de l'Epistre aux Hebreux *que ce qui est vieil est pres d'estre aboli: & nouveau ce qui est perdurable*, comme quand l'Alliance de grace, encor qu'elle soit l'aînée de la Legale, est appellée *nouvelle*, parce qu'elle ne doit jamais s'enuieillir ni estre abrogée, mais qu'elle doit toujours demeurer en sa force & en sa vigueur. De ce nouuel homme l'Apostre dit qu'il est *créé selon Dieu en justice & en vraye sainteté*. Créé, c'est à dire, formé par cette mesme puissance diuine qui a créé le ciel & la terre: auquel sens il est dit que nous sommes *le peuple* Pse. 102. 19. *que Dieu a créé, les nouvelles creatures, & son ouurage créé en Iesus-Christ à bon-* Eph. 2. 10. *œuvres que Dieu a préparées, afin que nous viuions en icelles; Selon Dieu, c'est*

à dire, fait à l'image & à la semblance de Dieu sur le moule & sur le patron de ses plus excellentes perfections; *En justice & Vraye sainteté*, c'est à dire avec toutes les vertus esquelles consiste la perfection de ses facultez morales. Car comme au sixiesme chapitre de l'Epistre aux Romains il comprend tous les vices qui sont en l'homme, & qui sont comme l'image & la semblance du Diable en luy, sous les mots de *soüillure & d'iniquité*: ainsi comprend il icy toutes les vertus que Dieu a mises dedans l'homme, & qui sont la plus considerable & la plus exquisite partie de l'image de Dieu en son ame, sous les mots de *justice & de sainteté*, qui luy sont directement opposez. Ausquels mots il adjouste, de *verité*, c'est à dire, comme nos interpretes ont fort bien traduit, *en Vraye justice & sainteté*, pour distinguer cette *justice* & cette *sainteté* soit d'avec la justice & la sainteté Legale, qui n'estoit que l'ombre de l'Evangélique; soit d'avec celle des hypocrites, qui n'en est qu'un faux masque, & qui peut bien tromper les hommes, mais non pas

Dieu, lequel, comme dit l'Apostre aux Galates, *ne peut estre mocqué*, parce qu'il *Galat. 6. 7.* est le *scrutateur des cœurs*, & que toutes *Hebr. 4. 13.* choses sont nuës & découuertes deuant ses yeux. Voila quelle est la formation, le patron & la nature de ce nouuel homme : mais voyons ce qu'il nous ordonne touchât cét homme nouveau. *La Verité*, dit-il, *qui est en Iesus* nous enseigne de le *reuestir*, c'est à dire de traualler de tout nostre pouuoir à reparer l'image de Dieu en nous, de nous adonner à la vraye justice & à la vraye saincteté, d'en orner nos corps, d'en orner nos ames, d'en orner toute nostre vie, afin qu'avec cét ornement tissü de la propre main du saint Esprit, & plus precieux mille fois que ni l'or, ni la soye, ny les pierreries, ni les perles, nous puissions nous presenter deuât Dieu, & luy estre agreables ; que l'Eglise voyant paroistre nostre saincteté en nos mœurs, en soit edifiée ; & que les hommes voyãs nos bonnes œuvres, en glorifient nostre Pere qui est es cieux. Vous me direz, Mais puis que ce que Dieu demande principalement en nostre regenera-

tion , c'est le cœur ; l'exterieur n'estant qu'un accessoire , & une escorce qui couvre cette mouëlle : comment est-ce que l'Apostre en parle, comme d'une justice externe , & d'une sainteté superficielle , la comparant avec un vestement ? Il respond que par cette metaphore des vestemens il veut simplement dire que comme l'habit orne la personne deuant les hommes, ainsi la sainteté l'orne deuant Dieu. Mais il n'est pas de cet ornement spirituel deuant Dieu comme du corporel deuant les hommes. Car parce que les hommes ne voyent que ce qu'il y a d'exterieur en l'homme, il suffit que l'habit le pare exterieurement : mais parce que Dieu voit & regarde l'intérieur du cœur , aussi bien que l'extérieur de la vie, il est necessaire que la sainteté le pare tout ensemble en la conscience en secret, & en la conuersation en public , afin de le luy rendre agreable , & qu'il soit comme l'Arche , qui estoit toute dorée dedans & dehors. Ainsi quand il est dit dans les Pseaumes que Dieu est *reuestu de Majesté & de lumiere comme d'un veste-*

ment, ce n'est pas à dire qu'il n'ait qu'une Majesté extérieure & une lumière superficielle, mais seulement qu'il est orné d'une lumière & d'une Majesté divine, comme les Roys le sont de leurs superbes & magnifiques vestemens. Et certes nostre Apostre ne parle pas icy d'un ornement corporel de la chair, mais du parement parfait du corps & de l'ame du vray fidelle, & le compare tellement à un vestement, qu'il le compose d'une justice & d'une sainteté véritable, c'est à dire, sincere, sans hypocrisie ni feintise, comme un miel bien purifié, sans cire & sans meslange; telle qu'elle estoit en David, que Dieu appelle à cette occasion *l'homme selon son cœur*, & en Zacharie & Elizabeth, auxquels il rend ce tesmoignage *qu'ils estoient* Luc 1. 6. *justes devant luy.*

Voila, chers freres, quel est le sens de ces excellentes paroles de l'Apostre saint Paul. O si nous estions si heureux qu'apres vous en auoir donné l'exposition, nous les peussions graver & enfoncer en vos memoires aussi auant que nous le desirós! O que

cette heure seroit bien employée & pour vous & pour nous ! Mais il faut que ce soit Dieu mesme qui le face par son Esprit. Pour nous, ce que nous pouuons faire, c'est de repasser, auant que finir, sur les choses plus importantes que vous venez d'entendre, pour vous en faire l'application, & de le supplier avec des vœux sinceres & ardents, qu'il les imprime luy-mesme dans vos cœurs, à mesure que nous les ferons resonner dedans vos oreilles. Premièrement vous auez entédu que toutes les parties & tous les preceptes de la discipline de Iesus-Christ, qu'il a couchez dans sa Parole, & qu'il nous propose dans son Eglise, se rapportēt & aboutissent à la sanctification. C'est là *la verité qui est en Iesus*, & s'il y en a qui s'imaginēt qu'auoir receu le saint Baptesme, auoir esté instruit dès l'enfance en la doctrine de l'Euangile, perseuerer à en faire profession, reciter les prieres, chanter les Pseaumes, participer au saint Sacrement de la Cene, soit l'essence du Christianisme, ils monstrent bien qu'ils n'ont jamais compris la verité de Iesus-Christ, &

ne sont Chrestiens que de nom. Ce n'est pas l'apparence extérieure de la Religion, que Dieu demande à ses enfans, c'est la deuotion du cœur, & la reformation de la vie. *Mon enfant, PROV. 23. 26.* dit-il, *donne moy ton cœur, & que tes yeux prennent garde à mes voyes.* Ce n'est pas vne connoissance sterile de Christ, & vne simple profession de sa doctrine, qui les luy rend agreables, mais vne *foy œuvrante par charité*, & vne vie formée sur le modèle de la sienne. C'est à celle-là seule qu'il a fait les promesses de la vie présente & de celle qui est à venir. Quand pour vn presche que vous oyez, vous en orriez cent, quand vous passeriez les jours & les nuicts à dire des prieres & à chanter des Pseaumes, quand vous luy dresseriez des temples fastueux & superbes par toute la terre, quand vous employeriez à cela toutes les forêts & toutes les carrieres du monde, vous n'en seriez en rien plus agreables à ses yeux, si vous n'estiez soigneux de vous nettoyer en effect de toute souillure de chair & d'esprit, & de poursuiure la sanctification en la

crainte. C'est à quoy nous nous devons adonner, si nous voulons qu'il nous auouë pour siens, & qu'il nous reçoie dans son Royaume. Il n'y a que *celuy qui chemine en integrité, qui fait ce qui est juste, & qui profere verité ainsi quelle est en son cœur, à qui il ait promis qu'il sejournera en son Tabernacle, & qu'il habitera en la montagne de sa sainteté.*

Vous avez entendu en suite que cette sanctification consiste à renoncer à la corruption de nostre nature & aux conuoitises mondaines, & à mener vne vie toute nouvelle, cheminant sobrement, justement & religieusement deuant Dieu. Meditons bien cela, fidelles, & en faisons nostre profit. Quand nous sommes venus au monde, nous y auons tous apporté vne auersion de tout bien, & vne inclination à tout mal. Nous auons tous esté ainsi conçus, & nous sommes tous ainsi esleuez, couuerts & reuestus de toute sorte de pechez, comme d'un habit sale & puant depuis la teste jusqu'aux pieds. En cét estat, tandis que nous y demeurons, nous sommes

execrables à Dieu & à ses Anges. Si donc nous desirons de luy plaire en qualité de ses enfans , il faut que nous facions estat de quitter cette vicille peau , de renoncer à toutes ces inclinations vicieuses avec lesquelles nous sommes nez , & pour parler avec l'Apostre , de *despouiller nostre vieil homme*. Je di de le despouiller tout à fait. Car ce n'est pas assez d'abandonner vne partie de nos vices, il les faut tous abandonner. Il y a tel qui se seure de ses plaisirs, mais qui ne peut renoncer à son avarice : tel au contraire qui renonce à son avarice , mais qui ne se peut seurer de ses plaisirs. Tel qui s'abstient & de l'un & de l'autre , mais qui ne peut fléchir son cœur à pardonner à ses prochains , quand ils l'ont offensé. Il y a telle femme qui garde son corps , & mesme avec son corps son esprit , net de toute impudicité : mais qui au demeurant est tout pleine de vanité , de malignité & d'enuie , & de qui tous les entretiens ne sont que médifance. Dequoy leur sert cela ? Pensez-vous qu'ils passent pourtant pour gens de bien deuant le grand

Marc. 6. 20.

Juge du monde ? Non plus certes qu'Herode, qui *faisoit* bien *beaucoup de choses* pour Iehan Baptiste, comme il est dit en l'Euangile, mais retenoit toujours son Herodias. Chacun d'eux retient le peché qui est le plus doux à sa chair, & auquel sa nature a de plus puissantes inclinations ; & ainsi ils portēt toujours le vieil homme, c'est à dire, la matiere de l'ire de Dieu, & le sujet de leur damnation. O homme, ne te flatte point. Vn seul poison est capable de te tuer, & vn seul vice de te damner. Il les faut tous quitter, si tu ne veux quitter ton salut. Car aucune souillure ne peut entrer au Royaume de Dieu. Helas ! si cela est, comment y pourrons-nous entrer, nous qui sommes souilleez en tant & tant de sortes, nous en qui le vieil homme n'habite pas seulement dès nostre naissance, mais se corrompt de jour en jour par les conuoitises qui se-duisent ? Car nous nous disons bien Chrestiens, mais en effect nous ne sommes non plus qu'Agrippa, persuadez qu'à peu pres de l'estre. Nous savons bien que la verité qui est en Iesus,

Mat. 23. 18.

est que nous nous dépoüilliōs du vieil homme, mais nous ne nous pouuons resoudre à le faire. Nous reconnoissons bien que pour plaire à Dieu, & pour pretendre à son salut, il faut viure tout autrement que nous ne faisons: mais les conuoitises du monde, l'or & l'argent, les honneurs & les dignitez, les voluptez & les delices, nous charment & nous enforcellent. Saint Paul nous aduertit que ce sont des *conuoitises qui seduisent*, & nous sommes si miserables que d'escouter leurs fausses persuasions, & de nous laisser prendre à leurs promesses deceuables, dont en fin il ne nous demeure que la confusion & la honte. L'or & l'argent promettent à l'auare de le mettre bien à son aise, & il se prend à cēt appast, & n'est sorte de mal qu'il ne face pour les auoir. Mais oyons ce qui est dit de luy au liure de Iob, *Si le mal luy est doux en la bouche, & s'il le cache sous sa langue, bien tost apres sa nourriture se changera en ses entrailles, deuenant fiel d'aspic dedans luy. Il a englouti les richesses, mais il les vomira, & le Dieu fort les tirera hors* Iob 20. 12. Ec.

de son ventre. Le monde promet à l'ambitieux de grands auancemens & de grands honneurs, mais puis apres il le plonge dans l'ignominie, en luy faisant, comme à Aman, espouser vn licol au lieu d'un diademe. Les plaisirs de la chair promettent aux voluptueux vne vie heureuse & contentee, & comme vn Paradis sur la terre, mais à la fin ils ne luy laissent que des douleurs & des maladies au corps, des troubles & des remords en la conscience, la honte & la confusion deuant Dieu, & vn desespoir sans remede à l'heure de la mort. Voila l'effect & le fruiet de ces conuoitises; & cependant dès qu'elles se presentent, nous voila pris à leurs tentations. Elles n'ont pas plus tost paru, qu'elles effacent de nos cœurs toute memoire des preceptes de Iesus-Christ & des remonstrances des ses seruiteurs, & leur font perdre toute leur efficace. Ainsi au lieu de nous amender, nous nous empirons. Et quand les Ministres de Christ nous en aduertissent, & nous exhortent à repentance, nous dilayons de jour en jour d'y penser

& de nous y resoudre; ne considerans pas que tant plus nous tardons, tant plus le vieil Adam se fortifie & se corrompt en nous, & qu'il nous sera beaucoup plus malaisé de nous en défaire, quand nous aurons à combattre non seulement les premieres inclinations, mais les habitudes inueterées des vices, que nous aurons depuis contractées dans le commerce de ce monde. Ne dilayons plus, tres-chers freres, ne dilayons plus vne chose qui nous est si necessaire pour estre sauuez, de peur que nostre derniere heure, qui est possible plus pres de nous que nous ne pensons, ne nous surprenne en vn habit si odieux à Dieu, & si indigne de Chrestiens, & que nous ne perissions eternellement.

Ce doit estre nostre premier soin, mais ce ne doit pas estre le seul. Il est bien necessaire qu'auant toute œuure nous renoncions à nos pechez, & que nous despouillions le vieil homme: mais pour estre vrayment Chrestiens, il faut que par mesme moyen nous soyons renouvellez par l'Esprit de nostre entendement, & que

nous reuestions le nouuel homme ; crée selon Dieu en justice & vraye saincteté , c'est à dire que le Sainct Esprit nous donne vn estre tout nouveau , & qu'espendant en nos entendemens la diuine lumiere il y remplisse tout de la connoissance de Iesus-Christ & de son grand salut ; qu'ayant desabusé nos esprits de toutes les fausses maximes du monde , il nous face veritablemēt reconnoistre quel est nostre souuerain bien , & le chemin qui nous y doit conduire , qu'il soit toûjours , comme dit le Prophe-
Es. 30. 21. te, comme *Une Voix derriere nous, nous disant , C'est icy le chemin , cheminez-y,* que nous ouurions & nos oreilles & nos cœurs à cette voix diuine & salutaire , & qu'estans faits par cēt Esprit nouvelles creatures, & *resuscitez avec Christ par la gloire du Pere , nous cheminions* sous la direction & par ses inspirations *en nouveauté de vie.* Car comme nostre Seigneur Iesus en re-resuscitant a laissé ses linges funebres dans le tombeau avecques toutes les bassesses & toutes les infirmités de sa vie precedente , & s'est reuestu pour
 toûjours

toûjours d'immortalité & de gloire, pour mener dans le ciel parmi ses Anges & ses Saints vne vie bien-heureuse, impassible & vrayment digne de la hauteſſe de ſa condition : ainſi faut-il qu'après auoir renoncé pour jamais à noſtre corruption naturelle, nous nous reſoluions à mener vne vie ſaincte, juſte & vrayment digne de ſes membres, comme ayans deſia dès ce monde *noſtre conuerſation dans le ciel*, où il nous eſt allé préparer la place. Nous auons changé de maïſtre, il nous faut auſſi changer de liurée. Ceux qui ſe conforment à ce preſent ſiecle, qui courent avec les mondains en vn meſme abandon à tout mal, & qui ne trauaillent, non plus qu'eux, qu'à aſſouir leur auarice, leur ambition, leur intemperance & leur malignité, monſtrent qu'ils ſont encor au ſeruiſſe de leur ancien maïſtre. Ils ſont encor eſclaues de Satan & du monde, & en font encores les œuvres. Nous qui n'appartenons plus au monde, mais à noſtre Seigneur Ieſus-Chriſt, lequel nous auôs reueſtu en noſtre Bap-

1. Ioh. 3. 10.

tesme, ne deuons plus porter que les couleurs de nostre nouveau maistre, qui sont la justice & la saincteté. *Par cela, dit S. Iehan, sont manifestez les enfans de Dieu & les enfans du Diable. Qui ne fait point justice, n'est point de Dieu.* Qui est à Christ, & veut estre reconnu pour sien, doit estre vestu comme luy, c'est à dire, de pieté enuers Dieu, de charité enuers le prochain, de temperance, de chasteté, de douceur, de modestie, de patience, & de toutes vertus Chrestiennes. Ce sont là les vrayes ornemens dont nous nous deuons parer deuant Dieu, si nous luy voulons estre agreables, & estre admis à son banquet celeste. Ce sont ceux que les Saints Apostres recommandent aux femmes particulièrement, comme à celles qui d'ordinaire sont plus soigneuses d'auoir de beaux habits, & d'estre bien parées. *Que les femmes, dit S. Paul, se parent d'un accoustrement honneste, avec pudeur & avec modestie, non point avec tresses, ni or, ni perles ni habillemens somptueux, mais*

2. Tim. 2.
9. 10.

comme il est seant à des femmes qui font profession de servir à Dieu, de bonnes œuvres. Que leur parement, dit saint ^{1. Pierre 3.} Pierre, ne soit point celuy de dehors, qui ^{3. 4 5.} gist en entortillemens de cheueux, ou en parure d'or, ou en accoustrement d'habits: mais l'homme qui est caché, à sçauoir celuy qui est du cœur, qui gist en l'incorruption d'un esprit doux & paisible, qui est de grand prix deuant Dieu. Car c'est ainsi aussi que se paroient autresfois les saintes femmes, esperantes en Dieu. Mais prenons garde que cette sainteté & cette justice soit vne vraye justice & vne vraye sainteté. Qu'il n'y ait point en nous d'hypocrisie ni de feintise. Car nous ne nous parons point pour les hommes, auxquels l'apparence de ces vertus pourroit aucunement satisfaire. Nous nous parons pour nostre Espoux celeste, qui demande sur toutes choses & auant toutes choses les paremens de l'homme interieur. Mais d'où est-ce que nous les aurōs? De luy-mesme, nous ne les faurions auoir d'ailleurs. Voila pourquoy il dit à l'Ange, ou Euesque de l'Eglise

& nous donnera tant pour la perfection de la sainteté que pour la plénitude de la gloire, qui sont les deux parties de la beatitude celeste, d'avoir vne entiere cōformité avec luy, comme Dieu nous y a predestinez deuant tous les siècles. En attendant cette bienheureuse condition, qui sera le parfait accomplissement de toutes ses promesses & de tous nos desirs, contentons nous de ce qu'il nous a donné aujourd'huy. En la vie temporelle, comme dit S. Paul en sa premiere à Timothée, *pourveu que nous ayons la nourriture & dequoy estre vestus, cela nous doit suffire.* De la spirituelle, nous pouuons dire tout de mesme. Pourueu que nous ayons spirituellement ces deux choses, nous auons sujet d'estre contents. Il nous a donné ce matin la premiere, qui est nostre nourriture spirituelle par la communion de sa chair immolée pour nous, & de son sang espendu pour la remission de nos pechez, & maintenant il nous a donné l'autre, & ne tiendra qu'à nous de la prendre, qui est dequoy estre vestus



S E R M O N

H V I C T I E S M E ,

Sur ces paroles de l'Apostre S.
Paul au 4. chap. de l'Epistre
aux Ephesiens.

*Verf. 25. Parquoy ayans depouillé le mensonge,
parlez en verité chacun à son prochain:
car nous sommes membres les uns des au-
tres.*

L'AFFECTION que Dieu a
eüe pour nous quand il
nous a creez à l'image de
sa sagesse & de sa sain-
cteté, & la prerogative qu'il nous a
donnée par dessus tous les animaux,
ausquels il n'a imprimé que les traces
de sa puissance & de sa bonté genera-
le, est grande en toutes sortes, mais
en deux égards principalement. Le
premier est que quant aux animaux,
ne les ayant faits que pour viure d'v-

ne vie animale , & de bien peu de temps sur la terre , il s'est contenté de leur doner le sens, pour sauoir discerner les choses qui leur sont vtils pour vne telle sorte de vie d'auec celles qui y sont nuisibles ; & l'appetit sensitif pour se porter aux commodés , & pour euites les pernicieuses : mais quant à nous , qu'il a faits pour le ciel & pour l'éternité , il nous a pourueus, outre ces basses facultez , d'un entendement capable de le connoistre , & de discerner les objets qui nous doiuent rendre éternellement bienheureux, d'auec ceux qui nous rendroient éternellemēt misérables, si nous nous y adonnions ; & d'un appetit raisonnable pour embrasser ceux qui nous peuuent mettre en la jouissance de nostre souverain bien , & pour rejeter ceux qui nous en pourroient éloigner. L'autre est que parce que les animaux ne deuoient auoir entr'eux qu'une société sensuelle & brutale , il leur a donné seulement vne voix confuse pour donner à entendre grossièrement, & autant qu'il pouuoit suffire à leur condition , les mouuemens de

leur appetit sensitif: mais parce que nous deuions auoir entre nous vne societé raisonnable, incomparablement plus parfaite & plus excellente que celle-là, il nous a gratifiez de plus de l'vsage de la parole, pour pouuoir verser dans les oreilles les vns des autres les pensées secretes & les affections intimes de nos ames. Ce qui nous est vn merueilleusement grand auantage & pour sa gloire & pour nostre felicité. Car par ce moyen d'un costé nous nous entrecommuniquons les lumieres qu'il nous donne de sa connoissance, & nous instruisons mutuellement en l'intelligence de sa verité & de sa volonté, pour le seruir & pour le celebrer chacun en son particulier, & tous ensemble dans les Assemblées de son Eglise: & de l'autre nous nous donnons fidèlement & sincerement à entēdre & nos besoins & nos affections, nous nous entr'aydons les vns les autres en toutes nos necessitez, nous nous conjoinsons respectiuelement en nos joyes, nous nous entre-consolons en nos afflictions; & ainsi nous viuons ensemble

Col. 3. 14.

Act. 4. 32.

comme membres d'un mesme corps,
 & entretenons entre nous par *le lien*
de perfection, qui est *la charité*, vne
 unité d'esprit si estroite que nous ne
 sommes tous *qu'un cœur & vne ame*.
 Mais le malin Esprit, comme depuis
 sa cheute il a toujours esté extreme-
 ment ennemi de la gloire de Dieu, &
 jaloux du bonheur de l'homme, a
 employé, comme il fait encor tous
 les jours, toute sa malice & sa ruse
 pour nous priver d'un si grand bien,
 en nous trompant par ses menson-
 ges, & nous donnant à tous vne
 inclination maudite à mentir com-
 me luy, & à nous tromper les vns
 les autres; ce qui a rendu & rend
 nostre vie pleine d'erreurs, de frau-
 des, de trahisons, de défiances,
 de querelles, d'inimitiez, & en un
 mot de toute sorte de confusions &
 de mal-heurs. Voilà pourquoy nostre
 Seigneur Iesus, qui est venu expresse-
 ment au monde pour restaurer les
 œuvres de son Pere, & pour destruire
 celles du Diable, nous a donné tant de
 preceptes & par soy-mesme & par ses
 seruiteurs, pour imprimer en nos

cœurs l'horreur du mensonge, comme de la production de Satan, & de la peste de la société humaine; & l'amour de la vérité, comme d'une des principales parties de l'image de Dieu, & d'un des plus illustres rayons de sa ressemblance. C'est la raison aussi pour laquelle nostre grand Apostre, apres auoir exhorté en general les Ephesiens, & en leur personne tous les fideles, à ne cheminer plus comme le reste des Gentils, en la vanité de leur pensée, mais à despoiller le vieil homme quant à la conversation precedente, & à estre renouvellez en l'Esprit de leur entendement, & reuestus du nouuel homme, créé selon Dieu en justice & vraye sainteté; comme il vient à descendre aux devoirs particuliers de la vie Chrestienne, commence par celuy-cy, Parquoy, dit-il, ayans despoillé le mensonge, parlez en vérité chacun à son prochain: car vous estes membres les uns des autres. Paroles qui seront aujourd'huy le sujet de nostre meditation, & où nous examinerons, moyennant la faueur de Dieu, premierement le precepte que S. Paul nous donne, &

puis la raison qu'il nous en allegue. Le precepte a deux parties, la premiere que nous *despouillions le mensonge*, & la seconde que nous *parlions en verité* chacun à son prochain.

Quant au premier, Dieu, qui est la verité mesme, n'aime rien qui ne luy ressemble. Ce qui est faux, luy est en execration. *Les fausses leures*, dit le Prov. 12 12 Sage, *sont en abomination à l'Eternel*. Elles le doiuent estre semblablement à tous ses vrayes enfans, & parce que Dieu leur defend tres-expressément tout mensonge, comme quand il dit au vingt-troisiesme du liure de l'Exode, *Tu t'éloigneras de toute parole fausse*, & au dix-neufiesme du Leuitique, *Vous ne mentirez aucun de vous à son prochain*, & au troisieme de l'Epistre aux Colossiens, *Ne mentez point l'un à l'autre, ayans despouillé le vieil homme avec ses actes, & reuestu le nouveau*; & parce qu'elles sont formellement contraires à sa nature, & par consequent à la fin pour laquelle il nous a creez & rachetez, qui a esté de faire reluire son image en nous, & de nous rendre, comme parle l'Apostre saint

Pierre, *participans de la nature divine* ; 1. *Pierr.* 1. 4.
& parce que c'est le Diable, *menteur*
& *pere de mensonge*, qui les meut & *Ich.* 8. 44.
qui les anime. Il laisse à dire qu'elles
violent indignement l'ordre de la nature,
& la fin pour laquelle nostre
Createur tres-bon & tres-sage nous
a donné l'usage de la parole, qu'elles
brisent les sacrez liens de la foy & de
la confiance par laquelle la société
ciuile & Ecclesiastique est entretenue
parmi les hommes, & qu'elles les rendent
miserables en remplissant toute
leur vie de soupçons, qui quoy que
bien souuent injustes, leur semblent
toufiours necessaires à cause de la
grande inclination qu'à la plus part
du monde au mensonge & à la tromperie.
C'est pour cela que les menteurs sont
justement haïs, & que chacun de nous
a tant de peur d'auoir la reputation de
l'estre, & prend à tres-grande offense le
dementi. Mais il y a bien plus de sujet
de craindre les maledictions & les peines
que Dieu denonce à ceux qui sont entachez
de ce vice. Car il proteste hautement qu'il
fera perir tous ceux qui proferent men- *P'seum.* 5. 7.

Apoc. 21. 8.

songe, & qu'il donnera à tous les menteurs leur portion en l'estang ardent de feu & de souphre, qui est la mort seconde.

De ces menteurs il y a diuerses especes, selon la qualité des choses dont ils parlent, & des personnes auxquelles ils parlent. Les plus abominables & plus pernicious de tous sont ceux qui parlent faussement de Dieu & des choses diuines, à l'exemple de ce vieil Serpēt, qui pour auoir calomnié Dieu, en le voulant faire passer pour menteur & pour enuieux de nostre bonheur, a esté appelé *Diable*, c'est à dire, *Calomniateur*. Tels sont tous les Docteurs de mensonge, qui introduisent & soustiennent de fausses doctrines en la Religion, ou par ambition pour se faire des sectateurs & pour acquérir reputation parmi les hommes, ou par auarice, pour profiter de la credulité des autres, & pour faire de la pieté vn mestier de gain deshoneste. Gens execrables non seulement en ce qu'ils osent violer vne chose si sainte que la verité reuelée du ciel, & mentir en parlant de Dieu en la presence de Dieu mesme; mais en ce que souuent

pour corrompre vn poinct de doctrine il faut qu'ils en alterent plusieurs, que pour defendre leurs mensonges ils employent les sophismes, les impostures & toute sorte de damnables moyens, & que soit qu'il faille tordre les Escritures, pour leur faire dire, comme à vn homme que l'on met à la gesne, ce qu'elles n'ont point intention de dire; soit qu'il soit besoin de supposer de faux liures, de fausses visions, de fausses reuelations, ou de faux miracles, pour esblouir les yeux des simples, ou pour enforceler leurs esprits, ils n'en font point de conscience

Après ceux-là viennent ceux qui mentent quand ils parlent de leur prochain & de ses actions. Et ceux-là sont de plusieurs sortes, les vns en parlans en bien, les autres en mal, & d'autres tantost en bien & tantost en mal, selon qu'ils parlent en sa presence ou en son absence. Quand c'est en mal, & que par menteries & par faux rapports ils diffament leurs freres en leur absence, c'est ce que nous appellons médifance, qui est l'vne des

plus malignes & odieuses especes du mēsonge. A ce peché les vns se portēt par ressentiment des injures & peut estre iniures de mesme nature qu'ils ont receües de leur prochain, comme s'il leur estoit permis d'offenser Dieu, parce qu'un médisant les a offensez le premier, ou cōme si les playes qu'ils font à sa bonne reputation estoient capables de guerir celles de la leur. Les autres le font par enuie qu'ils portēt à sa vertu & à sa loüange. Ils taschent bien à le dissimuler, car ils cōmencent d'ordinaire à médire de luy par de petites prefaces d'honneur, en le loüant de plusieurs choses, & ne le blasmant que d'une seule qu'ils ont choisie pour theme de leur médifance : mais en cela ils se monstrent doublemēt menteurs, de le blasmer à tort de celle-là, & de faire semblant de le loüer volontiers des autres, quoy qu'ils n'employent telles loüanges que pour couverture de leur malice. D'autres le font par plaisanterie seulement, ne sachans de quelle autre chose entretenir vne compagnie ioyeusement: qui est vn plaisir tres-malin, de blesser son

son prochain en la prunelle de l'œil, ie veux dire en la plus sensible partie qu'il ait, non par colere ni par ressentiment, mais seulement pour auoir de quoy rire & faire rire les autres à ses despens; & vne façon de médire d'autant plus dangereuse, que la detraction jointe à la raillerie est receüe avec bien plus de plaisir, penetre bien plus viuement, & rend la personne de qui on detraite bien plus ridicule & plus méprisée qu'elle ne seroit autrement. Ce vice là, de quelque cause qu'il procede, semble leger à ceux qui s'y adonnent, mais Dieu en parle en diuers lieux comme d'un crime tres-atroce, comparant les langues médisantes à *des rasoirs, à des espées, à des p^{seu}. 120. flesches tirées par vn homme puissant,* 4. parce qu'elles transpercent l'ame du prochain innocent, iusqu'au plus vif & au plus sensible; & leurs paroles à *des charbons de geneure*, parce que comme encor que ce bois là, quand il brule, jette vne douce & agreable odeur, le feu en est merueilleusement aspre, & dure fort long temps, brulant & consumant sourdement le sujet

Y

*Pse. 50. 19.
20. 21.*

auquel ils s'attache. Et comme l'Esprit de Dieu les décrit en paroles tragiques, aussi tonne-il horriblement alencontre, protestant qu'il les oit, & qu'il en tient registre, & qu'il en fera rendre vn jour vn terrible conte à tous les médifans, quoy qu'il ne leur en diemot sur l'heure. *Tu lasches, dit-il, ta bouche à mal, & par ta langue tu brasses fraude. Tu te sieds & parles contre ton frere, & mets blasme sur le fils de ta mere. Tu as fait ces choses là, & je m'en suis teu, & tu as estimé que ie fusse comme toy. Mais ie t'en redargüeray, & deduiray le tout par ordre en ta presence.* S'il a vne si grande haine contre cette espece de menteurs qui parlent de leurs prochains en mal, il n'en a pas moins contre ceux qui en parlent en bien pour les perdre par la flatterie, flatterie qui est la vraye nourrice des vices, l'ennemie jurée des vertus, le charme commun de la Cour, le poison ordinaire non seulement des Princes & des Grands, mais de tous ceux qui sont dans la prosperité, vne douce & agreable meurtriere, dont les blesseurs sont

d'autant plus inévitables & mortelles que l'amour de nous-mêmes & nostre presumption naturelle nous en rend difficile la resistance; vne Iahel qui nous donne du lait à boire pour nous endormir & pour nous ficher le clou dedans la temple; vne Sirene enfin qui, comme celle des Poëtes, nous chante nos loüanges, pour charmer nos sens par son harmonie, & pour engloutir nos vaisseaux dans le gouffre d'une damnation éternelle. C'est cette dangereuse sorte de gens à qui Dieu denõce par Esaie, *Malheur à ceux qui appellent le mal bien, E/ai. 5. 20.* & le bien mal; qui font les tenebres lumière, & la lumière tenebres; qui font l'amer doux, & le doux amer: & dont le Psalmiste prie Dieu qu'il les veuille retrancher du monde, où ils ne sont que pour le corrompre, en y entretenant les vices, lesquels ils erigent frauduleusement en titre de vertu. Il y en a encor vne troisieme espece, qui est de ceux qui mentent en parlant d'eux-mêmes, & ceux là sont de plusieurs sortes. Les vns s'attribuent des vertus lesquelles ils n'ont point, com-

autres mentent en la profession de la Religion, adoptans exterieurement les corruptions qu'ils desaduouent en leur interieur. Tels sont ces faux Nicodemites, qui pour couter les *persecutions* auxquelles ils voyent exposez *ceux qui veulent vivre selon pieté en Ie-* 2. Tim. 3. 12.
sus-Christ, font profession de croire aux erreurs & d'adherer aux faux ser- uices qu'ils condamnent en leur conscience. *Timides & menteurs*, qui au- ront aussi bien que les plus grands *ido-* Apr. 23. 7.
latres, leur portion en l'estang ardent de feu & de souphre, qui est la mort secon- de. Il y en a vne autre espece qui est beaucoup plus ordinaire, & parmi les autres Religions, & mesme parmi la Chrestienne, qui est de ceux qui aux choses de cette vie déguisent leurs intentions par vne belle monstre de sincerité en leurs conuentions avec leurs prochains, pour les surprendre quand ils se fient en eux; & qui font de belles protestations d'amitié à ceux pour qui ils n'ont qu'ou vne grâde indifferēce, ou mesmes vne extrême haine. Four- berie dont tout le monde se plaint, & que tout le monde pratique.

Quand nous nous y trouuons trompez, & qu'un homme dont le visage, la contenance, les paroles nous donnoient tout sujet de prendre confiance en luy, a meschamment surpris nostre simplicité, nous nous en fâchons, ce semble, fort justement, tant à cause du dommage qui nous en reuient, qu'à cause de l'affront que ce nous est d'auoir esté traittez en enfans ou en bestes, & de la honte qui nous demeure d'auoir par vne trop grande credulité pris vn fourbe pour vn homme de bien, vn masque pour vn vray visage, & vn doublet pour vn fin diamant, & d'estre par là exposez à la moquerie du monde. Mais sinous sommes les premiers à en vser enuers nostre prochain, comme il ne nous arriue que trop souuent, quel sujet auons-nous de nous plaindre de ce qu'il en vse en nostre endroit, veu qu'il nous mesure en cela de la mesme mesure dont nous luy auons mesuré? Et aux vns & aux autres nostre Apostre condamne icy telles dissimulations & tels déguisemens, comme formellement contraires à la

candeur & à la sincerité des Chrétiens, quand il nous ordonne généralement de despouiller le mensonge. Car c'en est là l'une des principales & des plus communes especes.

Nous auons dit encor, que les menteurs sont de plusieurs sortes, selon la qualité des personnes à qui ils parlent; & cela est considerable: Car ceux à qui ils parlent, sont ou particuliers, ou personnes publiques, comme sont les Princes & les Magistrats en l'Estat, & les Pasteurs & Anciens en l'Eglise. Ceux qui mentent aux particuliers, font bien vn grand péché, car le mensonge est toujours odieux à Dieu: & il est dit généralement au sixiesme du Leuitique, que celuy qui ment à son prochain, *commet forfait contre l'Eternel*: Mais ceux qui mentent aux personnes publiques en commettent vn bien plus atroce & plus pernicieux. Pour exemple, ceux qui ayans l'oreille des Princes, les abreuent de calomnies, soit contre les particuliers, soit contre les peuples entiers, ou les entretiennent de

flatteries pour les endormir en leurs vices: vrayz empoisonneurs des sources publiques, que l'on ne sauroit assez detester, & que David Prince tres-religieux & tres-sage, protestoit de chasser de sa Cour: *Celuy, dit-il, qui detracte en secret de son prochain, ie le retrancheray; celuy qui vsera de fallace, ne demeurera point parmi ma maison; celuy qui profere mensonge, ne sera point affermi deuant moy.* Ceux aussi qui comparoissans ou deuant les Pasteurs assistez de leur Consistoire, ou deuant les Magistrats assis en leur siege judicial, & estans adjurez par eux au nom & en l'autorité de Dieu de dire la verité, la nient ou la déguisent, soit en leur propre fait, pour en euitier la censure & la peine, comme si celle de Dieu qu'ils encourēt, n'estoit pas beaucoup plus à craindre que celle des hommes qu'ils fuyent; soit au fait d'autrui, en portant faux tesmoignage contre luy, qui est l'espece que Dieu a nommément defendue au neuuesme commandement. Car comme dire la verité franchement & sincerement, en

estant adjuré par telles personnes qui ont le caractère de Dieu, & commission expresse de luy pour informer des crimes, c'est *donner gloire à Dieu*, suivant ce que disoit Iosué à Hacan en l'interrogeant sur son sacrilege, *Mon fils, je te prie, donne gloire à Dieu & fay confession. Declare moy ce que tu as fait, ne me le cele point: aussi leur respondre en mētant, c'est mentir à Dieu mesme.* Et pourtant l'Apostre saint Pierre dit à Ananias, qui estant interrogé par luy nioit la verité de son crime. *Pourquoy a Satan* Ios. 7. 19.
remply vostre cœur, pour mentir au saint Esprit? Tu n'as point menti aux hommes, mais à Dieu. Surquoy nous ne pouuons que nous ne blasmons avec vne tres-grande, mais tres-juste indignation, la doctrine pestifere & diabolique de ceux qui ont introduit parmi les Chrestiens, en cette lie des siecles, l'vsage de ce qu'ils appellent Equiuocations & Reseruations mentales, par lesquelles, pour exemple, vn Prestre estant interrogé par le Magistrat, s'il est Prestre, respond que non, entendant à part soy qu'il n'est

Act. 5. 3.

pas Prestre d'Apollon; ou vn criminel enquis judicialement s'il a commis le crime dont il est accusé, respond que non, entendant qu'il ne l'a pas commis en la prison, ou qu'il ne l'a pas commis pour le dire. Car ces gens là disent qu'on peut faire telles responses en bonne conscience, non seulement en respondant deuant vn Iuge incompetant, ou qu'on peut pretendre ou soupçonner estre tel, mais mesme deuant son vray Iuge, jusques à tant que lon soit conuaincu d'ailleurs par preuues suffisantes. Ils font bien encor dauantage, ils enseignent impudemment (car qui pourroit parler plus doucement d'un dogme si impie?) qu'on peut nier le fait, quoy que tres-veritable, avec serment, en mettant la main sur les Euangiles, & mesmes, ô horreur! en prenant le saint Sacrement pour confirmation de son dire; voire mesme jurer par le salut de son ame qu'on dit la verité en cela, & qu'on la dit sans aucune equiuation ni reseruation mentale. Ce qui est le comble de l'impudence & de l'impiété, & la doctrine la plus

abominable que l'Enfer ait jamais vommi sur la terre pour autoriser le mensonge & le parjure parmi les hommes. O Dieu du ciel & de la terre, est-il possible qu'il y ait des hommes entre les Chrestiens, ou qui proposent telles impietez sans honte, ou qui les oyent sans horreur !

Mais c'est assez parlé du mensonge & de ses principales especes : oyons ce que l'Apostre nous enseigne icy au contraire au nom de la Verité mesme dont il est le Ministre. *Parquoy, dit-il, ayons depouillé le mensonge, parlez en verité chacun avecques son prochain.* Où apres avoir condamné le mensonge, il nous recommande la verité aux mesmes termes dont auoit vsé Zacharie au huiëtiesme de ses Reuelations. Ce n'est pas qu'il entende que nous soyons obligez de dire toute verité indifferemment à toute sorte de personnes, en quelque lieu & en quelque temps que ce soit. Car en certaines choses & en certaines occasions nous sommes tenus de la taire par nostre conscience, par nostre promesse, ou par les loix des Compagnies dans

lesquelles nous viuons. Par nostre conscience, comme quand on nous sollicite à decouurir le secret d'autrui pour luy nuire; ou quand des Iuges infidelles pressent vn Martyr de reueler les Chrestiens orthodoxes qui sont dans vne ville, où on les feroit mourir s'ils estoient connus. Par nostre promesse, comme quand nous nous sommes obligez à vn ami de ne point reueler vne chose qu'il nous a dite en secret. Par les loix des Compagnies où nous viuons, comme quand vn Senateur taist les choses qui ont esté traittées dans le Conseil, ou les Pasteurs & les Anciens celles qui se sont passées dans vn Consistoire. De plus ni l'humilité ne nous permet pas de publier les biens qui sont en nous, ni la charité de manifester les defauts qui sont en nos freres à ceux qui n'ont point de droit de les connoistre ni de les corriger. Il y peut auoir encor d'autres veritez que ni la prudence ciuile, ni mesme la fidelité & la conscience ne permettent point de reueler. Les Princes trahiroient leurs propres conseils, dont l'ame est le secret,

s'ils en donnoient la connoissance à ceux qui les pourroient trauerser & s'en preualoir contre eux-mesmes. Et leurs Ministres, qui en sont les depositaires, leur seroient infidelles, s'ils ne les gardoient sous le seau du silence religieux à quoy leurs charges les obligent. Les particuliers mesmes seroient blasmables de trop d'intemperance de langue, s'ils ne sauoient taire les veritez dont la reuelation leur peut nuire, & ne peut seruir qu'à leurs ennemis. Aussi Dieu n'a pas voulu que nostre cœur & nostre cerueau fussent exposez aux yeux du monde comme nostre visage, ni que toutes nos pensées fussent connues à autres qu'à luy seul. Seulement nous a-il donné la faculté d'en exprimer autant que nous jugeons ou expedient pour nous mesmes, ou vtile à sa gloire & à nostre prochain. Mais quand l'Apostre nous ordonne de parler en verité à nos freres, c'est seulement pour dire que quand nous leur parlons, ce doit estre en sincerité, comme en la presence de Dieu; en forte que nous ne disions jamais rien qui soit contraire

à la verité de nostre intention & de nostre pensée, que nostre parler soit plein de candeur, & que nos simples paroles vallent des sermens, estans toutes seellées du *seau de Dieu*, qui, selon les Docteurs des Hebreux, n'est autre que *la Verité*, & que ceux à qui nous parlons en puissent prendre vne aussi entiere assurance que s'ils li-
 soient eux mesmes nos pensées & nos affections dans le secret de nostre cœur. La langue est la gloire de l'homme. Car c'est ce qu'entend le Prophete, quand il dit au Pseaume
Pse. 16. 9. Mon cœur s'est esjouï, & ma gloire s'est égayée : Comme le mon-
 stre l'Apostre S. Pierre quand il tra-
Act. 2. 26. duit, Et ma langue en a eu lieffe. Et la gloire de la langue, c'est la verité; vertu agreable à Dieu & aux hom-
 mes, par laquelle est entretenuë dans le monde, & principalement dans l'Eglise, la confiance mutuelle, & l'vnion des cœurs & des affections. C'est à cette diuine marque que se re-
 connoissent les vrays disciples de ce-
Apoc. 3. 14. luy qui s'appelle en ses Escritures l'Amen, le tesmoin fidelle, le veritable,

& duquel il est dit par S. Pierre qu'il nous a esté donné pour patron, afin que nous ensuiuions ses traces, en ce qu'aucune fraude n'a esté trouuée en sa bouche. C'est là en fin la disposition que Dieu requiert aux vrayes membres de son Eglise. *Eternel*, luy dit le Prophe-
te, qui est-ce qui sejournera en ton Tabernacle? Qui est-ce qui habitera en la montagne de ta sainteté? Ce sera celuy, respond-il, qui chemine en integrité, qui fait ce qui est juste, & qui profere verité, ainsi qu'elle est en son cœur. *1. Pierre 2. 21. Ps. 15. 11. 2.*

Il y a beaucoup de choses qui nous conuient à l'amour & à l'exercice de cette tant aimable sincerité, mais la raison qui nous y oblige principalement, & que l'Apostre nous propose icy, est que nous sommes tous membres les vns des autres, & comme hommes & comme fidelles. Je di comme hommes, parce que la société humaine est comme vn seul & mesme corps, non de ceux que dans les Escholes on appelle similaires, comme celuy de la terre ou de l'eau, dont toutes les parties sont semblables & yniformes; mais de ceux qu'on ap-

pelle dissimilaires, comme le nostre, qui est composé de plusieurs membres differents & en leur nature & en leur vsage. Car cōme en nostre corps il y a bien vne grande diuersité de membres; autre estant la température, la forme, la figure, la situation & la fonction du cœur, & autre celle du cerueau; autre celle des yeux & autre celle des oreilles; autre celle des bras & autre celle des pieds: mais neantmoins tous ces membres ainsi diuers sont vnis ensemble par vne mesme ame, qui les fait tous agir, selon ce à quoy ils sont naturellement destinez, & les assemble tous en vn commun suppost, lequel profite de toutes leurs vertus & fonctions particulieres. Et il y a entr'eux vne si admirable correspondance, que lorsque chacun d'eux agit, il n'agit pas moins pour l'vtilité de tous les autres membres, & pour la conseruation de toute la personne que pour la sienne propre: ainsi en doit-il estre de la société des hommes, Dieu leur ayant donné diuerses facultez, diuerses graces, & diuerses vocations, par lesquelles il
les

les a rendus vtils & necessaires les vns aux autres , & par lesquelles il veut qu'ils s'entr'aydent & s'entresecourent selon la connoissance qu'ils reçoivent les vns des autres ou de leurs necessitez ou de leurs desirs. Je dis encor comme fidelles , parce qu'outre cette vnion que nous auons en la societé ciuile , nous en auons vne beaucoup plus estroite & plus excellente au corps mystique de l'Eglise , qui est composé d'un grand nombre de personnes fort differentes en aage , en sexe , en qualité , en offices , en dons & en graces spirituelles , mais attachées toutes ensemble par l'Esprit du Seigneur Iesus , qui est comme leur ame , c'est à dire , l'unique principe de leur vie spirituelle , & qui doiuent toutes agir par mesmes interests & par mesmes affections , non chacune pour soy seulemēt , mais pour la sanctification , pour la consolation & pour le salut de toutes les autres , & pour l'edification commune de toute la societé de l'Eglise. C'est à cette seconde vnion que l'esprit de Dieu regarde principalement en ce texte , tout de mesme que

quand il dit au douzième de l'Épître aux Romains , *Nous qui sommes plusieurs , sommes un seul corps en Christ, & un chacun en son endroit membre l'un de l'autre : &* au douzième de la première aux Corinthiens , *Dieu a temperé le corps ensemble, donnant plus d'honneur à celui qui en avoit faite, afin qu'il n'y ait point de division au corps, mais que les membres aient un soin mutuel les uns des autres : & soit que l'un des membres souffre quelque chose , tous les membres souffrent avec luy ; soit que l'un des membres soit honoré , tous les autres s'en réjouissent.* Or estes-vous le corps de Christ, & les membres d'iceluy chacun en son endroit. Il ne nous appelle pas seulement membres de Christ, ou membres de l'Eglise, mais *membres les uns des autres*, parce que nous ne devons pas seulement rapporter nos facultez, nos dons & nos vocations au service de Iesus-Christ, & au bien commun de l'Eglise, mais à l'avantage, à l'honneur & au salut de chacun de nos freres. Car comme au corps humain il n'y a que les yeux qui voyent, que les oreilles qui enten-

dent, que la langue qui parle, que l'estomach qui digere, que les pieds qui cheminent, selon l'employ & la propriété que Dieu a donnée a chacun : mais les yeux voyent, les oreilles entendent, la langue parle, l'estomach digere, & les pieds cheminent pour tous les autres membres aussi bien que pour eux-mêmes : aussi devons-nous faire estat que tout ce que nous auons de grace, d'esprit, de sa- uoir, d'eloquence, de courage, de conseil, d'adresse, de credit, de moyēs & d'autorité, nous l'auons receu de Dieu pour les autres aussi bien que pour nous ; comme aussi tout ce qu'ils ont, leur a esté donné pour nous aussi bien que pour eux. Car nous sommes tous en Iesus-Christ, & faisons tous partie d'une mesme société. Remarquez encor vne chose en ces paroles de l'Apostre, c'est qu'encor qu'il ait dit, *Parlez en verité chacun avecques son prochain*, au lieu d'adjouster, comme il sembloit qu'il deust faire, Car vous estes membres les vns des autres, il change de personne, & dit, *Car nous sommes membres les vns des*

titres fastueux & superbes & de Chefs de l'Eglise, & de Patriarches vniuersels, que celuy-là abhorroit si fort en autrui. En ce titre de membres que saint Paul prend, il comprend aussi avec soy tous les autres fidelles, aussi biẽ qu'aux deux lieux que nous auons alleguez de l'Epistre aux Romains, & de la premiere aux Corinthiẽs; comme estans en cela de mesme qualité que luy, quand il dit, *Car nous sommes membres les vns des autres.* De cela il conclut en ces autres passages là que nous ne deuons point ni nous porter enuie les vns aux autres, ni nous enorgueillir les vns contre les autres: & en celuy-cy il infere que nous deuons agir avec toute sincerité & toute candeur les vns avec les autres, & ayans dépouillé le mensonge, parler en verité chacun avecques son prochain. Car comme les membres de nostre corps ne se trompent point, & ne se trahissent point l'un l'autre; ce qui seroit se trahir eux-mesmes, & rompre la belle harmonie qui les entretient tous en vie, mais s'entr'aydent, s'entre-supportent & s'entresecourent

sincèrement: ainsi veut-il que nous en facions les vns enuers les autres, nous portans mutuellement vne affection cordiale, & agissans aussi sincèrement enuers nos freres qu'enuers nous-mesmes. Si vn Chrestien mentoit à vn Chrestien, vn membre de l'Eglise à vn autre membre de la mesme Eglise, ce ne seroit pas vn moindre prodige que si les membres de nos corps se trompoient & faudoient l'vn l'autre. Les interets de nostre prochain sont les nostres, & le tromper, c'est nous tromper nous-mesmes, & rompre l'harmonie, & la correspondance de charité, qui nous fait estre le corps de l'Eglise de Iesus-Christ, & qui nous entretient en la vie spirituelle. Comme donc tout nostre corps a vn mesme Esprit, & vn mesme cœur, & les membres qui le composent vne telle vnion entr'eux qu'ils conspirent tous sans feintise, sans déguisement & sans fraude au bien les vns des autres: ainsi en la *Communion des saints* nous deuons tous auoir & vne mesme intention & vne mesme affection pour nostre bien & nostre contentement mu-

tuel, bannissant du milieu de nous tout mensonge & toute tromperie, & nous aimans & cherissans l'un l'autre, selon l'exhortation de S. Iehan, *non point de parole & de langue, mais d'œuvre & de verité.* 1. Ieh. 3. 18.

C'est là, chers freres, ce que nous auions à vous dire sur le sujet de nostre texte, reste maintenant de vous exhorter à le pratiquer comme il faut en toute vostre vie pour la gloire de Dieu, pour l'honneur de la vraye Religion, & pour vostre propre salut. Pour cet effect representez vous qui vous estes, où vous estes, deuant qui vous estes, quelle profession vous faites, & combien c'est chose des-honneste que le mensonge; la feintise, la fraude, la detraction & la flatterie, pour retrâcher toutes ces pestes d'entre vous, & pour y faire regner en leur place la verité, la foy, la candeur & l'integrité; vertus dont nostre commun Maistre & ses fidelles seruiteurs nous ont donné & de si saincts enseignemens & de si beaux exemples. Vous estes Chrestiens, c'est à dire membres de celuy qui entre ses

Tit. 1. 12.

Hebr. 4. 13.

eloges de gloire prend nommément ceux de *fidelle & de veritable*. Les *Creteins* sont toujours menteurs, dit le proverbe qui est rapporté par l'Apostre en son Epistre à Tite. Les Chrétiens au contraire doiuent estre toujours veritables. Vous estes en l'Eglise, c'est à dire en l'eschole de verité, où on ne vous presche rien tant que l'integrité au cœur, la verité aux paroles, la foy aux conuentions, la rondeur & la probité en toute la vie. Si vous estiez nourris dans les escholes de l'erreur, parmi de fausses deitez & de fausses doctrines, ce ne seroit pas chose estrange de vous voir aimer le mensonge, & vous plaire en la fausseté: mais qu'estans esleuez, comme vous estes, en la maison du vray Dieu & parmi les enseignemens de sa verité, le mensonge & l'hypocrisie regnassent parmi vous, comme parmi les infidelles, ce seroit vne chose prodigieuse. Vous estes deuant Dieu, qui fait parfaitement la verité de toutes choses, & *deuant qui*, comme dit l'Apostre aux Hebreux, *elles sont toutes nuës & decouuertes*. Vous n'avez

pas à faire, comme les Payens, à des idoles qui ayēt des yeux, & ne voyent point ; des oreilles , & n'entendent point : mais à vn Dieu tout sage & tout voyant , qui lit dans vostre cœur, qui entend toutes vos paroles, qui les escrit en son registre, qui vous en fera rendre conte à l'heure de la mort & au jour de son jugement, & qui fera bien connoistre alors aux menteurs, aux trompeurs & aux hypocrites qu'il n'est ni sourd ni aveugle. Vous avez renoncé en vostre Baptesme aux œuvres de Satan ; & partant la menterie & l'hypocrisie, qui sont ses plus dangereuses productions, ne doiuent point auoir lieu au milieu de vous, si vous ne voulez renoncer au lauement de vostre regeneration & à la profession que vous avez embrassée. Que vous seriez heureux, chers freres, si ce que quelques anciens ont escrit de S. Iehan Chrysostome qu'il n'a jamais menti depuis son Baptesme, on le pouoit dire de vous, & que vous ne souillassiez jamais par mensonge la belle robe d'innocence que vous y avez reuestüe ! Mais si par le passé vous n'avez

pas esté assez soigneux d'en conseruer la pureté, au moins à l'auenir gardez vous le plus qu'il vous sera possible de la contaminer. Vous auez appris des saincts liures qu'il n'y a rien de si honnesté, de si beau ni de si agreable à Dieu que la verité, ni au contraire rien de si des-honnesté, de si difforme ni de si execrable à ses yeux que la menterie, & que *les fausses leures sont en abomination à l'Eternel, mais que ceux qui se portent loyaument, luy sont agreables.* Si donc vous desirez de luy estre agreables, comme vostre deuoir & vostre interest vous le doit faire desirer, ne mentez jamais à vostre escient, ni pour plaisir ni pour profit qui vous en doiue reuenir. *N'vse de mensonge quelconque*, dit Iesus de Sirach, *car l'vsage n'en vient jamais à bien.* Quand il n'y auroit que la mauuaise reputation que le mensonge apporte aux menteurs parmi les gens de bien, & mesme parmi leurs semblables, qui ne les croient plus & ne se fient plus en eux, lors mesme qu'ils parlent en verité, depuis qu'une fois ils les ont surpris en déguisemēt & en fourberie,

Pro. 12. 22.

Eccles. 7. 13.

cela deuroit suffire à nous le faire detester. Car, comme dit Salomon au 13. du liure des Prouerbes, *le juste hait la parole mensongere, mais elle rend puant & confus le meschant.* C'est vn mauvais blasme que le mensonge, comme il est dit en l'Ecclesiastique. *Vn larron vaut mieux qu'un menteur ordinaire: mais tous deux auront confusion pour leur part.* Car coustumierement le menteur perd tout honneur, & sa honte se tient toujours avec luy. Les Payens mesme qui ont eu quelque vertu naturelle & morale, ont eu ce vice en detestation, leur Philosophie l'a condamné comme chose lasche & honteuse; & leurs Poëtes, desquels tout le mestier consistoit en feintes & en fables, nous introduisent leurs herôs disans qu'ils haïssent ces gens qui cachent vne chose au cœur, & en ont vne autre en la bouche, comme les portes des enfers. Et de fait ne voyez-vous pas que ceux là mesme qui en vsent le plus, apprehendent extremement d'y estre surpris, comme en vne action sale & honteuse? Ils ne font point de conscience d'en vser, & ils en redoutent le

*Eccles. 20. 25.
16. 27.*

reproche autāt que de chose du monde. O que nous serions gens de bien, si nous craignons autant de mentir que d'estre dementis ! Mais nostre corruption naturelle nous fait cherir le menfonge, comme le voile & l'instrument ordinaire de nos malices, & nostre orgueil nous met en fureur & en rage, mesme à l'ombre d'un dementi ; tesmoin tant de querelles nées & tant de sang versé à cette occasiō. Si nous craignōs ainsi les reproches des hommes, cōbien plus deuriōs nous redouter les menaces de Dieu, qui nous denonce si haut en sa Parole que *celuy qui profere mensonge, ne demeurera point impuni*, & que toutes sortes de maux le suiuront en ce siecle & en l'autre. Car pour ceux de cette vie, oyez ce qu'il dit par la bouche de ses Prophetes ; *Chacun a la paix en sa bouche avecques son intime ami, mais au dedans il dresse des embusches. Ne puniroy je point ces choses là ? Et mon ame ne haïroit-elle point Vne nation qui est telle ? Celuy qui profere mensonge, n'eschapera point. Les trompeurs ne paruiendront point jusqu'à la fin de leurs jours. Enfans*

Jer. 9. 8. 9.

*Prou. 19. 5.
Pse. 116. 55.
24.*

d'Israël, escoutez la parole de l'Eternel. *Osee 4. 1. 2. 3.*

Car l'Eternel a debat avec les habitans du pais. Il n'y a par tout que mensonge, ils se sont du tout débordéz. Pourtant tout le pais en sera en deuil, & tout homme qui y habite sera en langueur. Et d'où pensez-vous que soit procedée cette grande indignation que Dieu a conceuë contre nous depuis quelques années, & tant de fleaux espouventables qu'il a déployez tant sur l'Estat que sur l'Eglise, sinon de ce qu'il n'y auoit plus parmi nous de verité, de foy, de candeur & de loyauté, mais que le mensonge, l'hypocrisie, la fraude & la fourberie regnoit par tout ? Et tant que ces vices y regneront, tant que nous mentirons l'un à l'autre, comme s'il n'y auoit point de Dieu pour nous entendre, tant que l'on n'y verra que tromperie contre ceux qui se fient en nous, tant que l'on n'y orra que complaisance & flatterie enuers les presents, que médisance & calomnie contre les absens, que protestations de bien-veillance à ceux pour qui nous n'auons pas la moindre estin-

celle de charité ; comme , hélas ! tout cela n'est que trop commun parmi nous , mesme depuis tous nos desastres , que pouuons-nous attendre que de voir continuer les mal-heurs & publics & particuliers que ces pechez ont attirez sur nous ? Voila pour ce qui est de ce siecle , mais en l'autre , ce sera bien pis. Car oyez ce qui est dit au 21. & au 22. de l'Apocalypse , *Tous ceux qui aiment fausseté seront jettez avec les chiens dehors de la sainte Cité , & aux menteurs , aussi bien qu'aux meurtriers , aux paillards & aux idolatres , est preparée leur portion en l'estang ardent de feu & de souphre , qui est la mort seconde.* Tremblons à ces menaces , mes freres , & nous mettons en deuoir d'euiter ces horribles vengeancees , en nous abstenant de ces vices , qui sont le souphre & l'huyle qui alume & qui embrase son ire contre nous , & conuersans desormais avec nos prochains avec la candeur & l'integrité que Dieu requiert de nous en nos paroles & en nos actions. Que chacun de nous face le vœu & le serment de Iob , *L'Eternel est vivant que*

tout le temps que mon souffle sera en
 moy, & l'esprit de Dieu en mes narines,
 mes leures ne diront point iniquité, &
 que ma langue ne gazouillera point cho-
 se fausse. Et pour cet effect prions
 Dieu, qui est le Dieu de Verité & de *Pseau. 31. 6.*
 sainteté, qu'il nous enuoye du ciel
 son Seraphin, avec le charbon vif
 pris de sur son autel, qui purifie nos
 leures souillées; & que chacun de
 nous luy die comme Salomon, *Sci- Prou. 30. 3.*
 gneur, esloigne de moy Vanité & parole
 mensongere.

A cette leçon de sincerité joignons
 celle de la charité, & apprenons d'icy
 à affectionner nos prochains comme
 nostre chair & nos os. Car nous som-
 mes membres les vns des autres. Vous
 donc qui avez receu plus de graces
 spirituelles ou plus de benedictions
 temporelles, seruez cōme Iob d'yeux *Iob 29. 15.*
 à l'auengle, & de pieds au boiteux; Par-
 lez & vous employez pour tous ceux
 qui en ont besoin, comme font la lan-
 gue & les mains pour tous les autres
 membres du corps. Faites-leur office
 de nerfs & de muscles, quand pour
 leur extreme foiblesse ils ne peuvent

se mouuoir eux-mesmes ; & les poussez dans le lauoir quand ils ne s'y peuvent porter , & qu'ils n'ont personne qui les y jette. Vous à qui Dieu a donné de grands biens, comme de la viande en plus grande abondance , soyez cōme l'estomach de ce corps, & vous contētans d'en prēdre pour vo^s autant qu'il vous est necessaire , distribuez le reste aux poures selon la connoissance que vous auez de leurs necessitez. Et quant à vous que Dieu a mis en vn plus bas degre , comme les pieds au corps , contenez vous par humilité au rang & en l'estat auquel il luy a pleu vous mettre ; respectez les autres qu'il a logez au dessus de vous , & leur rendez auec contentement & avec plaisir les petits & foibles offices dont vous pouuez estre capables en vostre condition. En fin employons tous ce que nous auons receu de dons , temporels ou spirituels , au profit de nos freres aussi bien comme au nostre propre. Espousons & les interests & les affections legitimes les vns des autres pour nous entre-secourir & nous entr'ayder de tout nostre pouuoir , & traittons


traittons tous franchement & sincerement les vns avec les autres , sans dol, sans artifice & sans déguisement; non comme d'estranger à estranger, mais cōme de frere à frere , de membre à membre, & , s'il faut ainsi dire, d'un homme à un autre soy mesme. Alors aurons-nous vrayment profité de cette salutaire doctrine de son Apostre qui vient de nous estre exposée, & nous monstrerons vrays enfans de Dieu , & vrays disciples de son

Fils bien-aimé. Alors comme *Dieu* Prov. 21. 1. *tient les cœurs en sa main , pour les incliner où il veut ainsi que des ruisseaux d'eaux courantes , il fleschira ceux de tous nos aduersaires en nostre endroit. Car, comme dit le Sage , quand* Prov. 16. 7. *il prend plaisir aux voyes de l'homme il appaise ses ennemis envers luy. Alors verrons - nous retourner nostre ancienne prosperité , en sorte que chacun de nous mangera son pain en paix & en seurté sous son figuier & sous sa vigne, suivant cette promesse que nous en auons au troisieme de Sophonie, Les restes d'Israël ne feront plus d'iniquité, & ne profereront plus de mensonge,*

Et en leur bouche ne sera plus vne langue trompeuse ; Et aussi paistront-ils , Et gisteront , Et n'y aura personne qui les espouuante. Alors en fin pourrons nous esperer, d'une esperance qui ne nous confondra jamais , d'estre associez au bon-heur de ces cent quarante quatre mille de l'Apocalypse qui ont esté rachetez d'entre tous les hommes pour estre premices à Dieu Et à l'Agneau ; & qui le suivent quelque part qu'il aille , comme nous estans estudiez à leur estre rendus conformes en ce qu'il est dit qu'en leur bouche il n'a esté trouué aucune fraude, & qu'ils sont sans tache devant le throne de Dieu.

Apoc. 14. 4.
5.

Veuille ce bon Sauueur qui nous en a donné les promesses, nous rendre dignes par l'Esprit de sa verité & de sa charité d'en obtenir l'effect, & par ses benedictions sur la terre, & par sa beatitude dedans le ciel, afin que nous puissions l'y benir & l'y glorifier eternellement parmi ses Anges & ses Saints. A luy, comme au Pere & au S. Esprit, soit rédu tout honneur, seruice, benediction & loüange par les hommes & par les Anges, au siecle & en l'eternité. Amen.



S E R M O N

NE VFIESME,

Sur ces paroles de l'Apostre S.
Paul au 4. chap. de l'Epistre
aux Ephesiens,

*vers. 26. Courroucez vous, & ne pechez point:
que le Soleil ne se couche point sur vostre
courroux.*

27. Et ne donnez point lieu au Diable.



L n'y a rien entre toutes les choses créées que Dieu aime avec tant de tendresse ; ni que Satan haïsse avec tant de fureur que l'Eglise ; qui est le corps mystique de nostre Seigneur Iesus-Christ. C'est pourquoy ce précieux corps ne s'entretenant que par la concorde, ni la concorde que par la verité, par la candeur & par la cha-

rité, cét Esprit *meurtrier & menteur* dès le commencement a toujours travaillé, comme il travaille encor sans cesse, à y semer la noise & la discorde, en inspirant aux vns le mensonge, la fraude & la perfidie pour tromper leurs prochains, & pour les offenser, & excitant aux autres des mouuements de colere, de haine & d'appetit de vengeance contre ceux par lesquels ils pensent auoir esté offensez. Dieu au contraire, qui est vn Dieu de verité & de paix, a toujours recommandé tres-affectueusement aux fidelles la concorde, la verité, la candeur, la douceur & la patience. Vous le voyez particulièrement au discours que le diuin Apostre fait en ce lieu aux Chrestiens d'Ephese, où apres leur auoir dit en general qu'ils soient *soigneux d'entretenir l'vnité d'Esprit par le lien de paix*, leur remonstrant qu'il n'y a qu'un seul corps & vn seul esprit, vne seule esperance de leur vocation, vn seul Seigneur, vne seule foy, vn seul Baptisme, & vn seul Dieu & Pere de tous; il les exhorte pour cét effect premiere-

ment à dépouiller le mensonge, & à parler en verité chacun à son prochain, comme estants membres les vns des autres, & puis à ne se laisser jamais transporter à des mouuements de colere par lesquels ils offensent Dieu, & donnent prise à leur Aduersaire sur eux. Quant à l'exhortation à la concorde, & à la verité, nous vous en auons parlé amplement en l'exposition des versets precedents. Maintenant nous passons à celle qu'il leur fait à moderer les ressentiments de leur chair en sorte qu'ils ne pechent point, & que leur commun aduersaire ne se preuaille point contre eux de leurs animositez & de leurs coleres. *Courroucez vous, dit-il, & ne pechez point; que le Soleil ne se couche point sur vostre courroux. Et ne donnez point lieu au Diable.* Cette remonstrance, comme vous voyez, consiste en trois chefs, le premier que s'il nous arriue de nous esmouuoir contre nostre prochain pour quelque occasion que ce soit, nous prenions garde qu'elle ne nous emporte à offenser Dieu; le second que pour cét effect nous soyons foi-

gneux d'en estouffer le feu si tost qu'il commence à fumer & à s'esprēdre en nostre cœur; & le dernier que nous ne donnions point lieu au Diable de nous diuiser entre nous, & de nous briser, comme pots de terre, en nous heurtant les vns contre les autres.

Il semble icy d'abord à prendre les paroles comme elles sonnent, qu'il soit commandé aux fidelles de se courroucer, ce qui a fait croire à plusieurs des interpretes anciens & modernes que quand l'Apostre dit, *Courroucez vous*, il entend parler de la colere loüable, à laquelle non seulement les fidelles se peuvent porter sans offenser Dieu, mais il se doiuent animer eux mesmes par vn saint zele à son honneur; telle que celle de Moyse contre les adorateurs du veau d'or, de Phinées contre Zimri & la Madianite, lesquels il transpercea d'un seul coup de sa jâueline à la porte du Tabernacle, de nostre Seigneur Iesus-Christ contre les profanateurs du Temple de Dieu, & de saint Paul contre ces Galates enforcelez qui s'estoient laissez si legerement transpor;

ter à vn autre Euangile. Mais outre que cela ne seroit pas à propos du discours de l'Apostre, ce qu'il adjouste immédiatement apres, *que le Soleil ne se couche point sur vostre courroux*, fait voir euidentement qu'il parle d'une colere vicieuse, qu'il faut estouffer promptement, & non pas du vray zele, qui au contraire doit estre constant & durable. D'autres reconnoissans cela disent qu'il faut lire ces mots avec interrogation, *Vous courroucez-vous ? Ne pechez point* : c'est à dire, Si vous vous courroucez, ne pechez point ; tout de mesme que quand il est dit en saint Iaques, *Y a-il quelqu'un* 149. 5 13. 14. *qui souffre entre vous ? qu'il prie* ; c'est à dire, s'il y a quelqu'un qui souffre ; *Y a-il quelqu'un qui soit en repos d'esprit ? qu'il psalmodie* ; c'est à dire, S'il y a quelqu'un qui soit en repos d'esprit. *Y a-il quelqu'un de malade ? qu'il appelle les Anciens de l'Eglise* ; c'est à dire, S'il y a quelqu'un de malade. En quoy ils prennent bien le vray sens de l'Apostre, mais les paroles, ainsi qu'elles sont couchées dans le texte, ne souffrent point cette construction qu'ils

leur donnent. Elle seroit fort bonne s'il disoit, Vous vous courroucez, ne pechez point. Mais au lieu de cela il dit, *Et ne pechez point.* Or on ne peut pas dire, Vous courroucez vous? & ne pechez point. Au passage cité de S. Iaques cette particule, *&*, ne se trouue point, & ainsi ce lieu là n'est pas bien comparé avec celui-cy. Nous estimons donc que sans qu'il soit besoin de rien changer en la construction de ces mots, on les doit prendre en ce sens, En cas qu'il vous arriue de vous courroucer, prenez garde que ce soit sans offenser Dieu en vous portant aux pechez auxquels cette passion a accoustumé de porter les hommes. Car les paroles de l'Ecriture qui ont forme de commandement, ne sont pas tousiours des commandemens en effect, mais bien souuent se doiuent prendre en tout autre sens. Ce sont bien quelquefois des commandemens, qui prescriuent à l'homme vn certain deuoir enuers Dieu : mais d'autresfois ce sont des paroles d'indulgence & de permission, qui sont au benefice de l'hom-

me. Pour exemple, quand Dieu dit à Adam, *Tu mangeras de tout arbre du Jardin, mais quant à l'arbre de science de bien & de mal, tu n'en mangeras point*; ce qu'il dit de ce dernier, Tu n'en mangeras point, c'est vn commandement prescriuant vn certain deuoir enuers Dieu; mais quand il dit des autres, *Tu en mangeras*, ce n'est pas vn commandement, c'est vne permission & vne indulgence au profit de l'homme. Ainsi quand il dit au quatriesme article du Decalogue, *Six iours tu travailleras, mais au septiesme tu ne feras aucune œuvre*; la defense de travailler au septiesme est vn commandement; mais ce qu'il dit des autres six, *Tu travailleras*, ce n'est qu'une permission. Ainsi quand Iesus-Christ dit au dix-huitiesme de saint Matthieu, *Si ton frere a peché contre toy, repren le entre toy & luy seul. S'il ne t'esconte, di le luy en presence d'un ou de deux tesmoins. S'il ne les esconte, di le à l'Eglise*; ce n'est pas simplement & absolument vn commandement, mais en partie vne permission en ce qui regarde la reparation de l'injure ou du prejudice que nous

Gen 2. 16. 17.

Exod. 10. 9.

10.

Matth. 18.

15. 16. 17.

auons receu de nostre prochain, laquelle il nous permet de poursuiure, pourueu que ce soit par les voyes qu'il nous ordonne, & en partie vn commandement, entant que cela est necessaire à la correction de nostre prochain, duquel nous deuons auoir à cœur le salut aussi bien que le nostre propre. Mais les paroles que nous vous exposons, ne sont point encores de cette sorte, car elles ne sont proprement ni de commandement ni de permission. C'est seulement vne façon de parler que les Rhetoriciens appellent Concession, comme quand le Prince de l'Eloquence Romaine dit en l'vne de ses Oraisons, en parlant de l'enuie, *Qu'elle domine dans les assemblées du peuple, mais qu'elle n'ait point de lien dans les jugemens*; non qu'il l'approuue comme legitime dans les Conseils populaires, mais seulement pour dire que quand elle domine en telles Assemblées, ce n'est pas chose si estrange ni si blasmable, que quand elle a lieu parmi des Iuges, qui sont obligez par serment à juger en conscience & sans passion. Et sans sortir

*Cic. pro
Cluon,*

de l'Ecriture & de nostre sujet, l'Ecriture mesme s'en sert, comme quand il est dit au Pseaume quatriesme, *Soyez esmeus, & ne pechez point*; ou comme ont traduit les Septante, *courroucez vous & ne pechez point*, à quoy l'Apostre fait vne manifeste allusion en ce lieu: non que le Prophete incite les siens à s'esmouuoir des persecutions qu'on luy fait, mais pour leur dire que s'ils s'en esmeuent & s'en courroucent, comme il ne se peut autrement, ils prennent garde de ne pecher point, & de ne se despiter point contre Dieu, mais qu'ils considerent en leurs cœurs que cela se fait par sa Prouidence, & qu'ils se taisent en acquiesceant humblement à sa volonté. L'Apostre donc veut dire, Il seroit bien à desirer que vous n'eussiez iamais d'esmotion ni de colere cõtre vostre prochain: mais si l'infirmité de vostre chair est telle que vous ne vous en puissiez garder tout à fait, au moins moderez vous enforte que vous rameniez incontinent vostre passion sous l'empire de la raison & de la crainte de Dieu, &

que vous n'alliez point jusques aux excès de fait & de parole auxquels se laissent emporter ceux qui ne sont point regenez ni conduits par l'Esprit de Dieu. La colere en son premier mouuement , à la considerer comme vne simple ebullition de sang autour de vostre cœur sur l'imagination d'une offense receüe , semble estre peu de chose ; mais si vous luy laissez prendre force dedans vostre ame , il n'est sorte de mal à quoy sa fougue ne soit capable de vous entraîner. Depuis qu'une fois vostre bile se fera eschauffée , & que vostre passio esmeue aura rompu son mors & sera eschapée des mains de la raisõ , elle vous portera à des desseins de vengeance , elle vous fera vomir des paroles pleines de fiel , elle vous obligera par sermēt à ne pardonner point , elle vous precipitera à des actions violentes , & à la fin aux extremes fureurs , au meurtre & à la cruauté. Tenez-la donc en bride , attachez-la comme vne beste furieuse , & considererez à part vous cõtre qui vous vous courroucez , quel est le sujet de vostre

côlere, & quel profit il vous en reuiendra. Vous vous courroucez contre des hommes, qui sont faits à l'image de Dieu comme vous, & lesquels vous ne pouuez offenser sans mespriser son caractere & sa sauuegarde qu'ils portent sur le front, & sans violer le commandement qu'il vous a fait si expressement en sa Loy de les aimer comme vous-mesmes. Vous vous courroucez contre les enfans & contre les membres de son propre Fils, sans reuerer leur profession ni son Baptisme. Vous vous courroucez en fin contre vos propres membres. Car comme l'Apostre dit au verset immediatement precedent, *nous sommes membres les vns des autres.* N'est-ce pas là vne action de phrenesie? Certes vn homme qui a le libre vsage de sa raison, si quelcun de ses membres luy fait douleur, ne s'en courrouce point contre luy, & ne l'afflige point à cette occasion. Au cōtraire il trauaille de tout só pouuoir à l'appaïser, la teste s'y incline, les yeux le visitent, les mains le fomentent, l'oignent & le bandēt, tous les membres

en fin contribuent tout ce qu'ils pēt-
uent pour luy donner quelque soula-
gement. Ne serions-nous pas bien-
heureux, si nous prattiquions le mes-
me entre nous? Mais nostre malheur
est que nous prenons d'ordinaire les
choses par la mauuaise anse, & ne les
regardons que du mauuais costé.
Quand quelqu'un nous a offensé, ou
que nous le croyons ainsi, nous di-
sons, C'est vn malicieux, vn enuieux,
vn médisant, vn ingrat, vn superbe.
Il m'a offensé, il faut que j'en aye
ma raison. Au lieu que nous deurions
dire, C'est vn homme, aussi suis-je.
Il a ses défauts, & moy j'ay les miens.
Nous ne sommes pas tous deux d'un
mesme aage & d'une mesme com-
plexion; mais nous sommes d'une
mesme foy & d'une mesme Religion.
Nous sommes tous deux seruiteurs de
Dieu, il faut que nous nous suppor-
tions l'un l'autre pour l'amour de no-
stre commun Seigneur. Cét homme
est bilieux, & je suis phlegmatique;
il est jeune, & je suis vieil; il est gay,
& je suis austere. Il faut qu'il supporte
mon phlegme & que ie supporte sa

bile ; qu'il excuse l'humeur chagrine de ma vieillesse , & que je pardonne aux chaleurs & aux fougues de la jeunesse , qu'il s'accommode à mon austerité , & que ie donne quelque chose à la gayeté de son naturel. Si c'est vn homme sage qui m'a fasché , ie doy presumer de son iugement qu'il n'a pas fait sans raison ce dont ie me plains. Si c'est vn fol , j'en dois auoir pitié , & faire pour ceux qui ne sont pas sages la priere que Iesus-Christ faisoit pour ses ennemis en la croix, *Pere, pardonne leur , car ils ne sauvent ce qu'ils font.* Lu. 23.34. Se courroucer contre les fols, c'est leur ressembler. Vn homme de bon sens ne se courrouce point contre vn phrenetique. Il se contente de s'en garder , & ainsi en feray-je. Si je l'ay offensé le premier , je me doy plaindre de moy-mesme , & non m'esmouuoir contre luy. Nous auons tort tous deux , mais j'en ay plus que luy , puis que c'est moy qui ay commencé. Si je ne l'ay point offensé , peut-estre a-il pensé que si , ou sur quelque vaine apparence, ou sur quelque mauuais rapport. Il a esté en ce-

la trop credule , mais peut -estre qu'en semblable cas je ne l'eusse pas esté moins que luy , & c'est vne foiblesse à laquelle les bonnes ames ne sont que trop sujettes. Si vous consideriez ainsi, fidelles, la qualité de ceux qui vous offensent, vous trouueriez par tout matiere de les excuser , au lieu que la prenant autrement , vous rencontrez partout de quoy vous irriter contre eux. Mais encor voyons vn peu de quoy c'est que vous vous escarmouchez si fort. C'est , dites vous , de ce que vostre prochain vous a offensé. Mais premierement ne vous trompez-vous point en cela ? N'est-ce point vne imagination fondée ou sur de faux rapports, ou sur de foibles conjectures ? Car combien de fois arriue-il ou que nous nous trompons sur la premiere apparence des choses, donnant de tres-sinistres interpretations aux actions les plus innocentes , ou que ceux qui nous font des rapports contre nostre prochain, les font ou par malignité contre luy , ou par flatterie enuers nous ; sans qu'en effect il ait fait ou dit chose dont

dont nous ayons sujet de nous plaindre? En consciēce, personne ne vous a-il jamais fait ce tort à vous mesme? Ne croyez donc point de leger, & ne vous precipitez point à le condamner deuant que de l'auoir oui. Et puis quand il vous auroit offensé au poinct qu'on vous le persuade, ou que vous vous l'imaginiez, & que vous auriez veu & oui vous mesme ce de quoi vous vous courroucez, c'est bien souuent chose de si peu d'importance, que quand vous excitez là dessus de grandes tragedies, outre que pour des choses legeres vous offensez Dieu grieuement, vous vous rendez ridicule à tout le monde. Car n'est-ce pas chose vraiment ridicule de voir vn homme s'esmouuoir, grincer les dents, escumer de colere pour vne chose de neant, pour vn verre cassé, pour vne petite raillerie, ou pour vn hochemēt de teste? Mais je veux que ce soit pour des choses plus graues & plus atroces. Ce ne peut estre en fin que pour quelque outrage receu en vostre bien, en vostre honneur, ou en vostre corps. Car en ce qui est du principal, ie veux

dire vostre ame, la paix de vostre conscience & vostre salut eternal, nul ne vous peut offenser que vous-mesmes. Or je vous prie, ne vaut-il pas bien mieux dissimuler vne injure qui ne vous blesse qu'en l'homme exterieur, & qui n'est par maniere de dire qu'une esgratigneure en la peau, qu'en vous en voulant ressentir faire vne playe mortelle à vostre ame, troubler la paix de vostre conscience, vous exposer à nouvelles injures, & attirer la vengeance de Dieu sur vous en voulant exercer la vostre contre vostre prochain?

C'est là tout ce qui vous peut reuenir de vostre colere, & partant, si vous estes sages, vous y resisterez de bonne heure, & le plus tost c'est le meilleur. C'est la raison pour laquelle l'Apotre adjouste, *Que le Soleil ne se couche point sur vostre courroux.* Si vous apperceuiez le feu s'estre pris en vostre maison, encor qu'en ce commencement il ne jettast qu'un bien peu de fumée, vous ne seriez pas si mal aisé que de vo^{us} aller coucher sans l'esteindre, sachans combien le feu est vne

chose violente & soudaine en son action, & en combien peu de temps il se fait d'une bien petite estincelle un grand embrasement. Celuy de la colere que vous voyez s'esprendre en vostre ame est encor bien plus prompt, plus actif & plus aspre, & les embrasements en sont bien plus pernicioeux. Mais en ce mal il y a ce grand bien qu'au lieu que bien souuent le feu se prend en vostre maison sans que vous vous en apperceuiez, & gaigne tellement que quand vous venez à l'appercevoir, il est bien tard d'y apporter du remede: Celuy de la colere au contraire, aussi tost qu'il s'allume, se fait sentir & reconnoistre, & que si vous voulez, il vous est alors aisé de l'esteindre. Hastez vous donc d'y jeter de l'eau avant qu'il se renforce. Comme le Soleil en se couchant met fin à l'ardeur & à la secheresse du jour, & vous laisse apres soy une fraischeur & une moisteur agreable & fort fauorable à vostre repos, qu'il mette fin aussi à vos esmotions & à vos coleres, & vous laisse en la conscience une tranquillité, par le moyen de laquelle vous vous

pas ainsi. Car tant plus elle agist, tant plus elle s'anime, & ne cesse de s'aigrir & de s'irriter jusqu'à-ce ou qu'elle se soit satisfaite par la vengeance, ou qu'elle desespere de se pouuoir vëger, ou que la raison face en fin avec beaucoup de peine, ce qu'elle eust pû faire au cōmencement avec beaucoup plus de facilité. Voila pourquoy le plus seur est de luy resister dès qu'elle paroist, & lors qu'elle ne fait encor que de naistre. Il est bien plus aisé de la combattre le premier jour qu'elle se met aux champs, qu'il ne sera apres que le Soleil se sera leué & couché beaucoup de fois sur elle, & que le temps luy aura dōné de la force. C'est donc vn tres-sage conseil que celui que l'Apostre nous donne icy, *Que le Soleil ne se couche point sur vostre colere.* Cōseil que les Docteurs des Hebreux ont bien seu donner à leurs disciples, comme nous le lisons en quelques vns de leurs plus celebres escrits, & qu'entre les Payës mesmes quelques sectes de leurs Philosophes ont soigneusement prattiqué; car nous lisons dans les anciens autheurs que les Pytha-

goriciens entr'eux obseruoient cela que s'ils s'estoient courroucez l'un à l'autre, ils ne manquoient iamais auāt que le Soleil se couchast, à se reconcilier & à s'embrasser : mais auquel les Chrestiens, nourris qu'ils sont en l'eschole de Iesus Christ, & sous la discipline de son Esprit, qui est l'Esprit de charité & de paix, sont beaucoup plus obligez que tous les autres. Car ils sauent beaucoup mieux que tous autres combien c'est chose agreable à nostre Seigneur de se monstrier prompt & facile à se reconcilier avec son prochain, & combien il est dangereux d'en vser autrement, ayans vn aduersaire si vigilant à toutes les occasions de leur nuire, & si capable de se preualoir de leurs passions. C'est pourquoy nostre Apostre adjouste, *Et ne donnez point lieu au Diable.*

Le Syriaque & quelques-vns des interpretes modernes traduisent, *Et ne donnez point lieu au calomniateur*, comme certes le mot de Diable signifie cela originellement. Et en le prenant en ce sens l'Apostre voudroit dire, *Ne diffamez point l'Eglise de Dieu parmi*

les infidelles, qui nous obseruent, & veillent comme des dragons sur nos moindres defauts, & ne leur donnez point sujet de blasphemer contre la doctrine de l'Euangile à l'occasion de vos querelles & de vos animositez, & de dire entr'eux mesmes, Quelles gens sont-ce là? A les ouir parler vous diriez que c'est la douceur & la charité mesme. Ils disent que le Dieu de dilection & de paix demeure au milieu d'eux. Ils s'appellent tous freres, & tous membres d'un mesme corps. Ils se glorifient tous d'estre animez d'un mesme Esprit. Et neantmoins sur les moindres intersts d'honneur ou de profit qui se presentent, ils se piquent & s'esmeuent l'un cōtre l'autre, médisent l'un de l'autre, s'entremordēt & s'entredéchirēt l'un l'autre. N'est-ce pas là vne preuue biē euidēte que toute cette religion, dont il nous vantent tant l'efficace, n'est riē qu'un vain babil? Quand l'Apostre le prendroit ainsi, ce seroit certes vne consideration qui deuroit estre de grand poids enuers nous, qui de- uons faire tout nostre possible pour

rendre de plus en plus honorable la doctrine de nostre Sauueur, afin que ceux de dehors soyent gaignez, mesme sans parole, par la douceur de nostre conuersation. Mais il y a beaucoup plus d'apparence, veu l'article qui est dans le Grec & le style ordinaire de l'Escripture d'entendre icy par ce mot de Diable cét Esprit malin duquel il est dit au 12. de l'Apocalypse, *Le grand dragon, le Serpent ancien, appelé le Diable & Satan, qui seduit tout le monde, fut jetté en terre, & ses Anges avecques luy; & au 5. de la premiere de S. Pierre, Soyez sobres & veillez, d'autant que vostre aduersaire le Diable chemine comme vn lion rugissant alentour de vous, cherchant qui il pourra engloutir.* Et cette consideration est beaucoup plus puissante que l'autre. Car l'Apostre veut dire, Prenez garde en vous courrouceant, & en dormant sur vostre colere, que le Diable qui ne dort jamais, mais qui espie jour & nuit les occasions de vous surprendre, ne vous sollicite & ne vous induise à des desseins de vous venger, à des serments de ne pardonner point à vostre frere qui vous a of-

fensé, à des paroles outrageuses contre son honneur, & en fin à des actions violentes contre sa personne, dont vous ayez vous mesme horreur apres que vous les aurez commises. Car encor que ce capital & implacable aduersaire de la gloire de Dieu, du nom de Christ, du salut des fideles, de la paix de l'Eglise & de l'honneur de la vraye Religion, soit vn esprit finy de sa nature, & que partant il ne puisse pas en mesme temps estre par tout, & voir en vn mesme moment toutes les actions & toutes les passions des hommes pour inspirer à chacun d'eux les pechez auxquels ils se doiuent porter: neantmoins comme il est esprit, & esprit tres-agile, tres-actif & tres-vigilant, il circuit toute la terre de jour en jour avec vne diligēce incroyable, comme luy mesme s'en glorifie au premier chapitre de Iob. Et puis il a vne infinité d'émissaires & d'instruments de perdition, soit les demons, desquels il est le Chef & le Prince, soit les meschants & enfans de rebellion, dans les cœurs desquels il agist & regne avec pleine efficace. Et il se

fert des vns & des autres pour executer ses maudits & damnables desseins à la subuersion des ames & à la propagation du vice parmi les hommes, pour les mettre mal avec Dieu, & les auoir pour complices de ses pechez & pour compagnons de ses peines. Tous temps & toutes dispositions ne luy sont pas propres. Car quand les fidelles sont sur leurs gardes, quand ils cheminent religieusement en la voye de Dieu, quand ils implorēt affectueusement sa grace, quand ils resistent fermement aux conuoitises & aux affections de leur chair, il ne peut rien sur eux. Mais quand ils sont saisis de quelque grande passion ou de concupiscence charnelle, ou de tristesse, ou de colere; il ne manque point de les tenter ou aux voluptez illicites, comme ces mariez qui brulent pour s'estre separez l'un de l'autre plus que la loy du mariage ne permet, auxquels l'Apostre dit au 7. de la 1. aux Corinthiens qu'ils retournent ensemble, de peur que Satan ne les tente à cause de leur incontinēce; ou au desespoir de la grace de Dieu & de leur salut, cōme cēt incestueux de

Corinthe, duquel le mesme Apostre disoit au deuxiesme de la seconde aux Corinthiens, *Vous luy devez pardonner & le consoler, afin qu'il ne soit englouti par vne trop grande tristesse: & ie luy pardonne aussi, afin que Satan ne gagne le dessus, en jettant ce pource homme dans le desespoir, & rendant odieuse la seuerité de la discipline Ecclesiastique, car nous n'ignorons point ses machinations; Ou aux inimitiez, aux injures, aux batteries & aux meurtres; qui est la tentation que S. Paul entend quand il dit, Courroucez vous, & ne pechez point, que le Soleil ne se couche point sur vostre courroux. Et ne donnez point lieu au Diable. Tentatiō tres-dangereuse, & dont en cette passion il est merueilleusemēt difficile de se garder. Car cōme en la guerre quand l'ennemi qui est alētour d'une place la voit en trouble pour quelque grand embrasement qui est au dedans, qu'il y remplit tout de cri & de tumulte, qui tiēt tous ceux qui la gardent occupez à l'esteindre, il prend son temps, & la surprend avec grande facilité: ainsi quand cēt ennemi de nostre salut voit vne ametrout-*

blée par la colere, que tout y est en feu, que la raison & la crainte de Dieu n'y sont point escoutées, il y entre facilement à la faueur de ce grand trouble, & y fait d'estranges desordres. Representez vous pour exemple, ce qu'il fit autresfois par le moyen de la colere que Simeon & Leui, & generalement tous les enfans de Iacob conceurent à cause du violement de Dina, & qu'ils retinrent en leur cœur durant plusieurs jours, au lieu de l'étouffer deuant que le Soleil fust couché, & à quelle fureur il les porta, quand ils entrerent dans la ville où auoit esté fait ce rapt, & qu'ils assassinerent non seulement Sichem qui l'auoit fait, mais avec luy Hemor son pere, & consequemmēt tous les masles de cette ville-là, & emmenerent toutes les femmes prisonnières, & prirent leurs troupeaux & toute leur substāce en la ville & aux champs, enueloppans en ce pillage & en ce massacre l'innocent avec le coupable, & attirās entant qu'en eux estoit la maledictiō de Dieu & la fureur des hommes non seulement sur eux, qui auoient bien

merité l'une & l'autre, mais sur leur pource pere, qui n'auoit nulle part en leur crime, & qui en fut extrememēt troublé quand il vint à sa connoissance, qui en garda le souuenir durant toute sa vie, & qui mesme dit à sa mort, comme pour protester deuant Dieu & deuant toute la posterité de son innocence en ce faict, *Simeon & Gen. 49. 5. Leui sont instruments de violēce en leurs 6. 7. cabanes. Que mon ame n'entre point en leur conseil secret, & que ma gloire ne soit point jointe à leur assemblée. Car ils ont tué les gens en leur colere, & ont enleué les bœufs pour leur plaisir. Que maudite soit leur colere, car elle a esté impudente; & leur furie, car elle a esté roide. Et pourtant ils seront diuisez en Iacob, & espars en Israël. Voyez à quoy ce Tentateur pensa porter Dauid, quand il le mit en colere pour l'inhumaine & brutale responce qu'auoit fait Nabal à ses gens, & à quoy il l'eust porté en effect, si Dieu par vn soin special de sa prouidence ne l'eust empesché. Dieu 1. Sam. 25. face ainsi, dit-il, aux ennemis de Dauid, 22. & ainsi y adjouste, si entre cy & demain matin ie laisse en sa maison vne seule*

personne en vie. Ha ! poure Daud que dis-tu ? Et où s'est esgarée la lumiere de ton iugement ? où s'est perduë ta raison ? où est cette pieté, cette charité, cette justice, par laquelle jusques icy tu t'es rendu si agrable à Dieu & aux hommes ? Parce que tu as esté offensé par vn homme, faut-il que tu offenses ton Dieu par vne si grande injustice ? Parce que Nabal t'a fait tort, est-ce à dire que tu doiues t'en venger toy-mesme, & vsurper le droict de ce grand Dieu qui a dit, *A moy est la vengeance, & je le retribueray ?* Feras-tu donc mourir pour vn homme brutal vne femme sage & vertueuse, des enfans innocents, de pources domestiques, qui non seulement n'ont point de part au crime de leur maistre, mais qui tesmoignent par leurs paroles à leur maistresse Abigail d'en estre extremement déplaisans ? Et encor tu te presses à l'executiõ de ce sanguinaire dessein, *entre cy & demain matin,* & pour t'y obliger dauantage tu y interposes le nom de Dieu, afin de ne t'en pouuoir retracter ! Voyez-vous l'artifice de cét Esprit malin ? Comme il

voit vn homme en colere, il se melle parmi le tumulte & le trouble de sa passion, comme il fait bien souuent parmi les tonnerres & parmi les foudres. Il forme incontînēt en son cœur de furieux desseins, il le presse desesperément de les executer, & afin qu'il ne s'en puisse repentir, mais qu'il soit contraint de se rendre cruel ou parjure, il luy fait faire des sermēs de n'oublier jamais l'injure qu'il a receuë, & de ne voir jamais de bon œil la personne qui l'a offensé : & ainsi il se sert contre la conscience du pecheur des liens mesme les plus sacrez de la conscience. Il sauoit que Dauid auoit l'ame fort bonne, & qui n'estoit nullement portée à la cruauté ; qu'il estoit homme comme les autres, & sujet à se courroucer, sur tout contre des actiōs indignes & insolentes comme estoit celle de Nabal, mais qu'il reuenoit biē tost à luy mesme, & se rappaisoit aisément. Pour luy oster donc le moyen de venir à nouuel aduis, & de pardonner à Nabal, il luy met en l'esprit de confirmer par vn serment le dessein qu'il luy fait faire de se venger de l'in-

gratitude de ce barbare. Voulez-vous voir vn autre exemple bien tragique de ce que Satan fait faire à vn homme quand cette passion le maistrise ? Remettez-vous deuant les yeux ce cruel & impitoyable massacre que l'Empereur Theodose fit faire en la ville de Thessalonique. En cette ville là il auoit esté tué par seditiō quelques vns de ses officiers. Il n'estoit ni raisonnable en soy ni vtile pour le public de dissimuler vntel crime. Il en falloit faire vn exemple, mais par les voyes ordinaires de la justice, en faisant valoir cōtre les coupables la juste seuerité des loix. Au lieu de cela que fit ce Prince, ou plustost le Diable en luy & par luy ? Il attisa le feu de sa colere auecque tant de violence qu'ayāt fait assembler vn grand peuple dedās le Cirque, il fit massacrer sans distinction de coupable ni d'innocent tous ceux qui s'y trouuerent, & apres cela cōtinuer le meurtre par toute la ville durant trois heures, si bien qu'au dire de Theodoret il y eut sept mille hommes tuez, entre lesquels y auoit plusieurs estrangers, marchands & autres
qui

qui n'estoient là que par rencontre, & qui n'auoient nullement trempé en la mutinerie. O passion furieuse & diabolique, à quoy ne portes-tu les hommes, & principalemēt ceux qui ont en main du pouuoir & de l'autorité, quād vne fois tu viens à les saisir, & à dōner prise à leur aduersaire, & que c'est bien avec grande raison que ce grand Apostre nous auertit de t'estouffer dès le commencement, & de ne donner point lieu au Diable !

Remarquez bien, ie vous prie, qu'il ne dit pas, Prenez garde que le Diable ayant vne fois jetté en vostre ame ce funeste flambeau, ne l'y attise, & ne vous consume; mais, *Ne donnez point lieu au Diable*. Cela nous doit apprēdre deux choses. L'une, qu'il n'est pas des fidelles & des gens de bien comme des infidelles & des meschans. Car quant aux infidelles & aux meschans, ils sont au Diable, qui les possede paisiblement & les tient comme ses esclaves, & qui leur fait faire tout ce qu'il veut, sans combat & sans resistance. C'est pourquoy l'Ecriture ne dit pas d'eux qu'ils donnent lieu au Diable, mais que le

Diabie domine en eux avec efficace, & que comme estâs issus de luy, ils s'estudient à executer ses desirs. Au contraire, quant aux fideses & aux gens de bien, depuis qu'ils sont recôciliez avec Dieu, rachetez par son Fils, regenerez par son Esprit, l'ennemi de leur salut n'a plus de droit ni de domination sur eux. Seulement parce que leur regeneration est encor imparfaiite, il leur arriue quelquefois de luy donner sujet de les tenter, & mesme quelquefois de succomber à la tentation. Voila pourquoy la Parole de Dieu ne dit pas que le Diabie les possede, ou qu'il les anime, mais qu'ils donnēt lieu au Diabie, lors qu'ils se laissent emporter à leurs passions. Car se voyant decheu de la puissance que la corruption naturelle qui estoit en eux luy auoit acquise sur eux, il supporte leur liberte fort impatiemment, & cherche incessamment les moyens de les surprendre & de les enlacer pour les ramener sous le joug de leur anciēne seruitude : ce que s'il pouoit obtenir sur les esleus de Dieu, aussi biē qu'il le fait sur ceux qui n'ont qu'une foy temporelle, & qui n'ont renôcé

à la tyrannie que de profession seulement, il rentreroit en eux avec sept autres esprits pires que leur premier possesseur, & rendroit leur dernière condition plus malheureuse que la première. Voila pourquoy cōme il veille sans cesse pour nous surprendre, nous devons veiller jour & nuict pour nous conserver, & ne luy donner jamais de prise sur nous ni par nos convoitises, ni par nos aigreurs. L'autre poinct que cette façon de parler nous apprend, est que le Diable n'a de pouuoir sur nostre conscience qu'autant que nous luy en donnons, qu'il n'y sauroit entrer s'il ne corrompt nos passions, & si estans d'intelligence avec luy elles ne luy en ouvrent la porte. Quand il nous est auenu de pecher, ne disons point comme nostre première mere, C'est le serpent qui me la fait faire. Si elle n'eust escou-
té le serpent, il n'eust point eu de puissance sur elle. Il frappa bien à la porte de son cœur par la tentation qu'il luy proposa, mais ce fut elle qui la luy ouvrit par son lasche acquiescemēt à cette tentation là. Et ainsi en est-il de tous les autres pechez auxquels Satan nous sol-

licite. Il a bien présenté à nostre Sei-
 gneur Iesus-Christ en sa passion tous
 les sujets d'une juste indignation qu'on
 se sauroit imaginer ; mais Iesus-Christ
 n'a point peché pourtant. Pourquoi ?
 Pource que la tentation estoit au de-
 hors, & qu'au dedans il n'y a jamais
 presté de consentement. Car ses enne-
 mis luy ont bien fait de fort grandes
 indignitez, il a bien enduré de grandes
 douleurs en son corps, il a bien ressenti
 d'extremes angoisses en son esprit.
 Mais tout cela n'a pas esté capable de
 le porter à des ressentimens qui luy fis-
 sent ou dire ou faire chose mal conue-
 nable ou à sa charité enuers les hom-
 mes, ou à sa pieté enuers Dieu. Ainsi il
 n'a point donné lieu au Diable, mais a
 toujours pû dire avec verité, *Le Prince*
de ce monde vient, mais il n'a rien en moy.
 Il n'auroit riē non plus en nous, si nous
 ne luy prestions point l'oreille, & si no^s
 n'acquiescions point à ses suggestions.
 C'est la raison pour laquelle encor qu'il
 soit appelé le *Tentateur*, Matth. 4. &
 1. Thessal. 3. neantmoins il est dit par
 S. Iaqués que *quiconque est tenté est tenté*
par sa propre conuoitise. Ne t'excuse donc

Job, 14. 30.

1. J. 1. 14.

point, ô pecheur, lors que tu as offensé Dieu, sur ce que le Diable l'y a induit. Si tu n'eusses interieurement consenti à cette sollicitatiō externe, elle ne t'eust point fait pecher, & ne t'eust point porté de dommage. Nul n'est vaincu par luy que qui le veut estre. Si quand quelcun t'agace & que tu sens ta chair s'en esmouvoir, tu la reprimois d'abord comme il faut, & resistois genereusement à la tentation de Satan, te defendant avec les armes de la raison & de la patience, il s'enfueroit de toy, & ta colere ne te donneroit plus d'ennuy. Car il n'est rien de plus aisé à vaincre en son commencement. Mais depuis qu'une fois elle s'est rendue maistresse des sens, & qu'elle a renuersé la raison de dessus son thrône, elle se rend facilement maistresse de l'esprit, qui ne luy ayant pas resisté quand il en estoit temps, deuient par elle esclauē du Diable, & n'est plus en estat de luy refuser son consentement. Voila pourquoy l'Apostre nous dit avec grande raison, *Courronceꝝ vous & ne pechez point; que le Soleil ne se couche point sur vostre couronx. Et ne donnez point lieu au Diable,*

C'est là, chers freres, ce que nous auions à vous dire sur ces trois parties de nostre texte. O que nous serions bien heureux si nous les engrauiions comme nous deuons dedans nos memoires, si nous les meditions souuent & bien attentiuement en nos ames, si nous les prattiquions avec soin en toute nostre vie! Nous la déchargerions d'une grande partie des maux qui la troublent, & qui la rendent desagreceable à Dieu & amere à nous mesmes. Nous serions en edification mutuelle les vns aux autres, en bon exemple à ceux de dehors, en suiet d'admiration à tout le monde. La paix, la charité, la douceur, la benignité & la patience regnans, comme elles doiuent au milieu de nous, le Dieu de dilection & de paix y regneroit aussi, En fin nous viurions sur la terre comme en vne espede de Paradis. Mais, hélas! au lieu de cela, je le dis a regret, parce que c'est à la honte du nom Chrestien, & de cete sainte Reformation dont nous faisons profession, nous nous laissons aller trop souuent aux passions turbulentes de nostre chair, qui est delicate, sen-

sible & fort prompt à se mutiner sur les plus legers interests. Et ces passions estâs vne fois esmeues en nous, se vont de plus en plus irritant, & font que nous donnons plustost lieu aux malignes suggestions du Diable pour nous venger, qu'aux douces & salutaires remonstrances de nostre Seigneur pour nous reconcilier avec nos prochains. Corrigions nous de ce vice, chers freres, retrenchons en avecques soin toutes les causes & toutes les racines. Elles sont en grand nombre, le soupçon, la diffiance, la credulité, la delicateffe, l'impatience. Mais il y en a deux principales, lesquelles si nous ne corrigeons, en vain essayerons nous de corriger toutes les autres; l'une, l'amour excessif de nous mesme, qui nous rend fiers & orgueilleux & fait que nous voulons que lon supporte tout de nous, & que nous ne voulons rien supporter de personne; l'autre, l'affection trop ardente aux choses de ce monde, pour lesquelles nous nous passionnons & nous eschauffons les vns contre les autres, comme si c'estoiēt nos principaux interests, au lieu qu'estans resuscitez

PROV. 12. 24.
25.

avec Christ, nous ne deurions penser qu'aux choses de là haut. Arrachons tout cela, & la colere tombera d'elle mesme. Fuyons la compagnie des personnes hargneuses & querelleuses, nous souuenans de ce que dit le Sage, *Ne t'accompagne point de l'homme colere, & ne va point avec l'homme furieux, afin que tu n'apprennes son train, & que tu ne reçoies vn laqs en ton ame.* Recerchons celle des personnes moderées & paisibles, qui nous soyent en exemple de douceur & de patience. Ayons toujours quelque homme sage & quelque bon ami pres de nous, à qui nous donnions plein pouuoir d'observer tous nos mouuements, & pour peu que nous nous escartions, de nous en reprendre avec liberté, & de nous remettre dans les voyes de la raison & de nostre deuoir. Ne soyons point curieux de sauoir ce que lon dit de nous & les iugements qu'on en fait, n'ayans pour but que de plaire à Dieu seul, & nous contentâs pour cela du témoignage de nostre conscience. Au contraire fuyons de sauoir ce qui nous peut fascher & alterer la tranquillité de nostre ame,

N'escoutons point les rapporteurs, qui sont les instruments de Satan pour semer noise entre les freres; ni les flatteurs, qui sous ombre de s'interesser en nostre bien & en nostre honneur, nous entretiennēt en nos vices, & nous font beaucoup plus de mal que ne sauroient auoir fait ceux contre lesquels ils nous aigrissent. Ne regardons point nostre prochain comme celuy qui nous a offensez, c'est prendre le tison par où il brule, mais comme nostre citoyen, nostre voisin, nostre frere, avec qui Dieu nous a liez par les liens sacrez de la nature & de la Grace. Donnons toūjours à ses actions les interpretations les plus fauorables qu'elles puissent receuoir d'vne ame equitable. Et si nous ne trouuons de quoy les excuser, vsons enuers eux de l'indulgence dont nous voulons qu'ils vsent enuers nous. Pour vne offense imaginaire ne nous causons point vn mal veritable, & si nous en auons receu de vrayes, considerons quelle est l'infirmité humaine, & la supportans en autruy rendons nous dignes qu'on la supporte en nous, qui en auons possible plus de besoin que nos prochains.

En vn mot, s'il se peut, ne nous courrouceons iamais contre eux. Et si la foiblesse de nostre nature est si grande que quand nous sommes offensez nous ne nous puissions empescher de nous en ressentir, moderons tellement nos ressentimens que la passion de nostre chair ne soit point plus puissante en nous que la raison & la pieté. Courrouceons nous & ne pechons point. Nous pouuons bien auoir vne colere sainte & loüable contre les pechez de nos prochains, parce que Dieu y est offense, ce que nous ne deuons iamais voir sans indignation cõtre le Diable qui en est l'auteur, & qui par ces pechez auxquels il les induit & lesquels il foment en eux, traueille tout ensemble contre le salut de leurs ames & contre la gloire de leur Createur. Mais contre la personne de nostre frere il n'y en a point de legitime. Car ou nous le reconnoissons pour nostre frere, & si cela est, comment le pouuons-nous haïr, & nous esmouuoir contre luy: ou nous ne le reconnoissons point pour tel, & si cela est, commẽt disons nous avec luy, en cette Eglise dõt il a l'honneur d'estre

membre aussi bien comme nous, *No-*
stre Pere qui es és cieux ? Il est vn de nos
membres, car, comme dit l'Apostre,
nous sommes membres les vns des autres:
si bien que nous courroucer contre luy,
c'est nous courroucer contre nous mes-
mes, qui est vne action de manie. Au
contraire quand il nous fait mal, ou
qu'il croit nous en faire par vne phre-
nesie spirituelle, nous en deuons auoir
pitié, & traualier à le guerir, & prier
Dieu pour luy avec vne affection d'au-
tant plus grande que nous voyons sa
maladie estre plus violente. Quant
mesme il seroit porté cōtre nous d'une
fureur diabolique, nous le deuons re-
garder comme vn possédé, & d'autant
plus mal-heureux que les possédez, que
cette posséssió n'est pas quant au corps,
comme celle de ces pures Energume-
nes que l'Eglise a de tout temps recom-
mandez à Dieu avec tant de cōpassion;
mais quant à l'ame, qui est beaucoup
plus precieuse, & dont les maux sont
bien plus dangereux, puis qu'il y va de
la damnation eternelle. Il nous fait
tort, mais il s'en fait beaucoup plus à
luy mesme. Car en nous offensant, il

offense Dieu, & attire sur soy, entant
 qu'en luy est, la malediction du ciel, &
 pour nous au contraire s'il nous esgra-
 tigne en l'exterieur de nostre bien, de
 nostre honneur ou de nostre personne,
 il nous fait en l'interieur vn grád bien,
 entant qu'il fournit de matiere à nostre
 patience & d'exercice à nostre charité,
 & ainsi ayde à nous rendre conformes
 à nostre Seigneur Iesus-Christ; qui nous
 a bien esté donné pour patron en tou-
 te sorte de vertus, afin que nous ensui-
 uions ses traces, mais specialement en
 ce que quand on luy disoit outrages, il n'en
 rendoit point, & que quand on luy faisoit
 mal, il n'vsoit point de menaces, mais se
 remettoit à celuy qui juge justement; &
 mesme prioit Dieu pour ceux qui l'ou-
 tragoient, comme nous le voyons en
 l'histoire de sa Passion. C'est en cela
 particulierement qu'il prend plaisir d'e-
 stre imité. Apprenez, dit-il, de moy
 que je suis debonnaire & humble de cœur,
 & vous trouuerez repos à vos ames.
 Ayons tousiours ce grand & glorieux
 exemple deuant nos yeux, & l'en-
 suiurons de tout nostre pouuoir, afin
 que luy estans semblables icy bas en

1. *Pietr.* 2. 21.
 23.

Matth. 11. 29.

douceur & patience, nous le soyons vn iour là haut en beatitude & en gloire. Proposons nous touïours cette grāde misericorde dont celuy auquel nous disons tous les jours, *Pardonne nous* Luc. 11. 4. *nos offenses, comme nous pardonnons à ceux qui nous ont offensez*, vñe enuers nous pures & miserables pecheurs. Nous l'offensons à toutes heures en vne infinité de sortes, & neantmoins il nous pardonne nos offenses, & supporte nos infirmitéz avec vne indulgence plus que paterhelle, *éloignant de nous nos forfaits autant que* Pse. 103. 12. *l'Orient est éloigné de l'Occident*. Serions nous biē si malheureux & si dissemblables à vn si bō Pere, que d'offenser ceux qu'il a faits à son image, qu'il a rachetez par le sang de son Fils bien aimé, qu'il a honorez de son Baptisme, qu'il a admis à sa sainte Table, & qu'il nous a si expressement commandé d'aimer comme nous mesmes! Luy porterions nous si peu de respect que reprimans bien nos colores deuant les hommes, l'enfant en la presence de son pere, le seruiteur en celle de son maistre, & le sujet en celle de son Prince, nous ne les

reprimassions point en la sienne? Aurions nous si peu de respect à son commandement, que d'entreprendre de nous venger nous-mesmes sous les yeux & comme en despit de celuy qui

Rom. 12. 19. nous crie du ciel, *Ne vous vengez point vous mesmes, mais donnez lieu à l'ire?*

Chers freres, que cela ne vous arriue jamis. Si la vëgeance vous semble vne chose si douce, vengez vous à la bonne heure, mais que ce soit d'une vengeance qui luy soit agreable, & profitable à vos freres & à vous-mesmes; que ce soit en mesprisant & enseuelissant leurs injures par vne charité Chrestienne, & comme dit l'Apostre, en *surmon-*

Rom. 12. 21.

Matt. 5. 44.

tant le mal par le bien. Aimez vos ennemis, benissez ceux qui vous maudissent, faites bien à ceux qui vous persecutent, priez pour ceux qui vous courent sus.

Quand vous en userez ainsi, ou vous les gagnerez à Christ, les reconciliez avec Dieu, & couvrirez par vostre charité vne multitude de pechez, ou vous assemblerez des charbons de feu sur leur teste; & Dieu, les hommes & les Anges blasmeront la malice & la fierté de leur courage, qui n'aura pû

estre vaincue par vne si grande bonté, & au contraire loueront vostre patience, celebreront vostre vertu & beniront vostre charité, qui n'aura pû estre surmontée par vne si grande malice. O la belle & douce vengeance, & de laquelle on peut bien dire avecques vérité, Il n'y a rien si doux que la vengeance ! Au lieu que l'autre dont les hommes sont si auides, quelque douce qu'elle semble au commencement, deuiant en fin plus amere que fiel, & est mortelle à tous ceux qui l'exercent.

Si ie vous disois simplement, Ne vous courroucez jamais contre vostre frere, quelque chose qu'il die ou face contre vous, quand il vous aura bien dit des injures, que vostre cœur n'en soit non plus esmeu que si c'estoiēt des roses qu'il vous eust jettées au visage; quand il vous auroit creué vn œil, regardez-le de l'autre avec autant d'amour que s'il ne vous auoit jamais fait que plaisir, j'exigeroiy chose tres-juste, & tres digne de vostre Baptisme & de vostre profession, mais plus grande peut-estre qu'elle ne se peut esperer de la fragilité humaine. Mais ie me con-

tente de vous dire, Courroucez vous
& ne pechez point plus avant, qu'au
moins il ne vous auienne jamais que le
Soleil se couche sur vostre courroux.
Imposons nous tous cette loy de ne
nous aller jamais coucher sans dire en
nous mesmes, Comment ay-je passé
la journée? Ne m'est-il point arriué
d'offenser quelcun de mes prochains
de fait ou de parole, ou de me cour-
roucer contre luy s'il m'a offensé? Et
si nostre conscience nous reproche
de l'auoir fait, au lieu de fomen-
ter ce feu qui s'est allumé en no-
stre ame, estouffons-le, & ne nous
donnons point de repos que nous
ne le voyons esteint tout à fait. O que
nous reposerons doucement dans le
sein de nostre Sauueur quand nous au-
rons nettoyé nostre cœur de toute pas-
sion, & que la charité & la paix repo-
seront à nos costez! Que si d'auenture
il nous arriue, comme la chair est fiere
& difficile à vaincre, de passer quel-
ques jours & quelques nuits sur nostre
colere, que nous ne puissions nous dis-
poser de nous mesmes à la reconcilia-
tion, au moins lors que nos Pasteurs,
nos

nos proches , nos amis trauaillent à nous appaiser, ne resistons point à leurs remonstrances , & aux salutaires conseils que Dieu nous adresse par eux , & ne nous rendons point inflexibles & inexorables. Mais je suis colere de ma nature & sensible aux injures , ie m'en veux mal, mais je ne puis vaincre mon courage. O parole honteuse & indigne d'hommes raisonnables ! Nous appriuoisons bien les lions, quand nous l'entreprenons , & les faisons deuenir , par maniere de dire, des hommes en douceur : & serôs-nous si mal-heureux que d'hômes que nous sommes , nous nous rendions pires que des lions , & que nous aimions mieux imiter la ferocité des bestes sauuages & l'obstination des demons que la douceur & la benignité de nostre Pere & de nostre Sauueur ? Ah mes freres , mes tres-chers freres, plustost ne fussions-nous jamais nés ! Car quãd il viendra pour juger le monde, ce sera principalement par la charité qu'il examinera nostre vie. Et quand en ce jour non moins redoutable aux naturels farouches que souhaitable aux ames misericordieuses, il vous deman-

deroit , Auez vous pardonné à vos freres ? en vain luy diriez vous , I'ay fait toute ma vie vne constante profession de la verité, je me suis rendu assidu à tous les exercices de pieté, j'ay ieusné, j'ay pleuré, j'ay fait plusieurs aumônes. Il vous demanderoit encor , Mais auez-vous pardonné à vos freres ? Alors que luy respondriez-vous ? Ce seul péché auquel vous vous seriez obstinez, ne seroit-il pas suffisant pour vous perdre eternellement ? Ne sauez-vous pas ce qu'il a dit si hautemēt en l'Evangile,

Matth. 6. 15.


Si vous ne pardonnez aux hommes leurs offenses, vostre Pere celeste ne vous pardonnera point les vostres ? Et quand il vous feroit endurer le ver qui ne meurt point & le feu qui ne s'esteind point, parce que vous n'aurez pas voulu estouffer, quelque chose qu'il vous eust peu dire, le ver de vostre haine & le feu de vostre colere, ne vous feroit-il pas justice ?

Au nom de Dieu, chers freres, si vous vous aimez, & si le soin de vostre salut vous touche, ne vous trahissez point vous-mesmes, & ne donnez point lieu aux suggestions de vostre aduersaire plustost qu'aux conseils de vostre Sau-

ueur. Le Diable traualle à vous perdre vous & vostre prochain, en attisant le feu de vos coleres, & en vous induisant luy d'un costé à vous offenser, & vous de l'autre à vous en ressentir. Ne donnez point ce passetemps à vostre commun ennemi de vous voir entremordre & entredéchirer l'un l'autre: mais que s'il a eu le plaisir de vous mettre en querelle, il ait le regret & la honte de vous voir meilleurs amis que jamais. Ainsi au lieu de vous venger l'un de l'autre à vostre commune ruine, vous vous vengerez tous deux de luy à vostre consolation & à vostre salut, & vous redrez vainqueurs tout ensemble de luy & de vous-mesmes. Et si vostre prochain ne veut point prendre part à cette victoire, aimant mieux se ranger du party du Diable pour satisfaire à sa malice, vous la remporterez tout seul avec tant plus de gloire deuant Dieu & deuant ses Anges. Et ne dites point icy que le monde s'en moquera & vous mesprisera comme vn homme sans cœur & sans ressentiment, mais méprisez genereusement ce mépris. Que

vous souciez-vous de tous les jugemens de la terre, vous qui estes assis és lieux celestes avec Christ ? Ce ne sera pas ce monde là qui vous jugera. Au contraire si vous vivez selon la Loy de Dieu, mettans tout vostre honneur & tout vostre contentement à luy plaire, ce sera vous qui jugerez le monde. Nostre Seigneur Iesus sera vostre seul Juge, c'est de luy seul que vous devez rechercher l'approbation, afin qu'au jour de son apparition glorieuse en la presence de ce monde mesme qui vous aura ainsi mesestimé, il vous donne vostre loüange, qu'il ceigne vostre teste d'une couronne d'honneur & de gloire qui ne se flestrisse jamais, & que vous trouviez en son Pere la misericorde que vous aurez exercée enuers vos prochains. Je prie le Seigneur Dieu qui a dicté à son Apostre ces diuines paroles dont vous venez d'entendre l'exposition qu'il en face par son Esprit une si profonde impression dans le nostre, que comme nous en auons esté aujourd'huy les auditeurs, nous en soyons par tout les obseruateurs en toute nostre vie, pour participer enfin

tous ensemble, selon ses promesses
& nos esperances, à tous les auanta-
ges & à toutes les joyes de son Royau-
me. A luy, comme au Fils & au S.
Esprit soit rendu tout honneur &
toute benediction aux siècles des
siècles. Amen.




S E R M O N

D I X I E S M E,

Sur ces paroles de l'Apostre S.
Paul au 4. chap. de l'Epistre
aux Ephesiens.

Verf. 28. Que celuy qui desroboit, ne desrobe plus, mais plustost qu'il travaille en besognant de ses mains en ce qui est bon : afin qu'il ait pour departir à celuy qui en a besoin.



I nous estions d'une nature purement spirituelle ; comme les Anges, nous n'aurions besoin d'autres biens que des spirituels. Tout nostre exercice seroit de contempler Dieu face à face, & d'adorer & magnifier sa grandeur. Après la sagesse & la vertu, les deux grands biens de l'ame, nous n'aurions rien à souhaiter pour la perfection de

nostre estre, & pour la beatitude de nostre estat. Mais estans composez, comme nous sommes, de chair & d'esprit; outre ces biens spirituels qui font la vie & la felicité de nostre ame, il nous est force de donner vne partie de nostre soin à ceux sans lesquels la vie de nostre corps ne sauroit subsister. Comme ce soin est necessaire aux hommes, aussi est-il tres-agreable à Dieu, pourueu qu'ils acquierent ces biens en bonne conscience, & qu'ils en vsent avec vne vraye charité. Mais le mal est que s'ils ne sont instruits en son eschole, & regenez par son Esprit, ils ne sauent faire ni l'un ni l'autre. Ils sont bien soigneux d'acquies des biens, mais par larcin, par fraude, par extorsion, par rapine, ou par des arts infames & damnables, & apres qu'ils les ont acquis, ou ils les enfouissent par auarice, ou ils les perdent par prodigalité, donnans au luxe & à la vanité ce qui deuoit estre voüé au seruice de Dieu, & au soulagement du prochain. Tant l'ennemi de leur salut a seu corrompre puissamment leurs esprits, pour conuertir à

2. Pier. 3. 9.
Luc 16. 9.

la damnation de leurs ames ce que Dieu auoit institué pour la conseruation de leurs corps. C'est pourquoy Dieu, qui *ne veut point qu'aucun perisse*, mais *que tous hommes soient sauuez*, pour nous garder des pieges du Diable, & pour nous adresser au chemin de salut, nous a donné en diuers lieux de sa Parole plusieurs salutaires instructions tant sur l'acquisition de ces biens que sur leur legitime vsage, afin que les gagnant & les dispensant selon sa volonté, nous luy soyons agreables en l'un & en l'autre, & qu'outre le profit que nous en tirerons pour cette vie temporelle, *nous nous en facions des amis qui nous recueillent aux tabernacles eternels*. C'est à quoy tend cette exhortation de l'Apostre que vous venez d'entendre, *Que celuy qui desroboit, ne desrobe plus, mais plustost qu'il travaille en œurant de ses mains en ce qui est bon ; afin qu'il ait pour departir à celuy qui en a besoin.*

Il fait icy deux choses, dont l'examen fera aussi les deux membres de nostre meditation. Premicrement il

monstre cominent nous deuons acquerir les commoditez de la vie , à sauoir non par larcin , mais par vn honneste labeur : & puis il nous enseigne quel est l'vsage auquel nous les deuons employer apres que nous les auons acquises ; à sauoir de nous en ayder tellemēt nous-mesmes , que ce soit aussi pour en subuenir à ceux qui se trouuent en necessité. Quant au premier, l'homme estant sorti nud du ventre de sa mere, & n'ayant rien apporté au monde dequoy il se puisse nourrir & vestir , il faut qu'il acquiere par industrie ce qu'il n'a pas receu de la nature , & qui est necessaire à l'entretenement de sa vie. Là dessus le Diable traueille à nous induire à jetter nostre conuoitise & nos mains sur ce qui appartient à nos freres pour nous engraisser de leur substance , & nous reuestir de leurs dépouilles. Dieu au contraire nous ordonne de gagner nostre pain à la sueur de nostre visage , & d'acquérir ce qui nous fait besoin pour nostre propre subsistence , & pour le soulagement de nos freres , par le labeur d'vne honneste

vocation. C'est pourquoy l'Apostre parlant à ceux qui sont passez du seruice du Diable à celuy de Dieu, les exhorte premierement à s'abstenir des larcins auxquels ils s'adonnoient, tandis qu'ils estoient au seruice de leur premier maistre, & puis à s'appliquer à vn juste & innocent labeur, gardans en toutes choses la bonne conscience enuers Dieu & enuers les hommes, comme il est conuenable à la saincteté, à l'equité & à la justice de leur nouveau Seigneur. *Que celuy, dit-il, qui déroboit, ne dérobe plus.* Où il entend par dérober non seulement cét infame peché qu'on appelle vulgairement larcin, & qui est puni par les Loix ciuiles en toutes les Republiques bien ordonnées; mais toute actiō par laquelle nous nous approprions le bien qui appartient à autrui: soit que nous n'y employiōs que des fraudes & de sourds artifices, par lesquels, comme par vne espece de magie, nous facions passer insensiblement dans nos vignes & dans nos champs les vendanges & les moissons de nos voisins, soit que nous y vsions d'extor-

sion & de violence, abusans de nostre pouuoir contre la foiblesse de ceux qui ne se peuuent pas defendre de nostre injure. Ce peché s'exerce diuersement selon la differente qualité des personnes ou qui le commettent ou qui en souffrent, & selon les diuers moyens & les diuerses occasions qu'en fournit la condition des vns & des autres. Mais en quelque façon qu'il se pratique, & quelque nom que le monde luy donne, c'est tousiours vn larcin deuant Dieu, c'est à dire vn peché auquel sa Majesté est offensée en plusieurs sortes. Car premierement celuy qui le commet viole euidemment la Loy, tant celle de l'équité naturelle, qui defend de faire à autrui ce que nous ne voudrions pas estre fait à nous mesmes, que celle que Dieu donna jadis à son peuple sur la montagne avec foudres & avec tempestes, signes visibles des vengeance qu'il déployeroit sur ceux qui entreprendroient de l'enfreindre, Loy en laquelle il crie hautement, *Tu ne déroberas point.* Et puis il attente avec vne audace qui n'est pas tolerable

contre l'autorité par laquelle le souverain Seigneur & Maistre de tous les biens du monde les a distribuez aux hommes, en assignant à chacun la part qu'il a jugé luy estre convenable : & fait vne tacite reproche à sa sagesse de n'y auoir bien procedé, mais d'auoir trop donné à l'un, & à l'autre trop peu. Outre cela il luy monstre manifestement qu'il se défie de sa bonté & de sa Prouidence, comme si Dieu n'estoit pas suffisant pour le nourrir avec la portion qu'il luy a donnée, & pour luy adjouster de jour en jour tout ce qui luy fera besoin pour sa subsistence, luy qui nourrit les corbeaux & les passereaux avec bien moins de prouision ; & croit que le Diable est plus capable de l'entretenir par le larcin & par la rapine, que Dieu par le labour legitime de la vocation à laquelle il l'a appelé. Finalement il brise avec mépris & avec insolence les deux liens les plus sacrez de la société des hommes, qui sont la justice & la charité. Car la justice veut qu'on rende à chacun ce qui luy appartient : au lieu que luy par vne ex-

treime injustice raut à son frere ce qui luy a esté laissé par ses peres, où qu'il a acquis par son industrie, & se l'approprié à soy mesme, encore qu'il n'y ait aucun droit ni en l'un ni en l'autre titre. Et la charité requiert de nous que nous aimions nostre prochain comme nous mesmes, & qu'au lieu de luy raut son bien, nous luy donnions le nostre propre, quand il est necessaire.

Aussi Dieu a ce crime en vne si grande execration qu'il n'est sorte de peine ni de malheur qu'il ne denonce à ceux qui s'en trouuent entachez. Car il les menace de honte, de confusion & de ruine en ce siecle, & de la damnation eternelle en l'autre. Pour celuy-cy oyez ce qu'il dit au dix-septiesme de Ieremie, *Celuy qui acquiert des richesses, & non point selon le droit, est vne perdrix qui couue ce qu'elle n'a point pondu. Il les laissera au milieu de ses jours, & sera trouué fol à la parfin.* Et au vingtiesme de Iob, *Si le mal luy est doux en la bouche, & s'il le cache sous sa langue, s'il l'espargne & ne le lasche point, mais le retient au dedans de son palais, sa nourriture se*

changera en ses entrailles, deuenant fiel d'aspic dedans luy, Il a englouti les richesses, mais il les vomira. Le Dieu fort les jettera hors de son ventre. Il n'en sentira point de contentement, & ne retiendra rien de ce qu'il a tant conuoité. Metaphore prise, ce semble, de ces vautours gloutons qui lors qu'ils rencontrent vne large proye, s'en soulent excessiuelement, & puis sont contrains de reuomir tout jusques à leurs propres entrailles. Et quand cette malediction ne leur arriueroit pas à eux-mesmes, elle arriue ordinairement à leurs heritiers; les biens de Dieu qu'ils detiennent en injustice, estans comme en trauail, & souspirans entre leurs mains, & se faisans en fin des ailles d'aigle pour s'enuoler de ces tabernacles d'iniquité. Car il faut necessairement que la maison bastie de biens mal acquis s'en aille en ruine. *Hab. 2. 9. 10.* ne. Malheur, dit Habacuc, sur celuy qui est conuoiteux pour sa maison d'un mauuais & deshonneste gain. Tu as pris un conseil de confusion pour ta maison de consumer beaucoup de peuples; voire as peché contre toy-mesme. Car la pierre

*criera de la paroy , & la trauaison luy
respondra d'entre le bois. Ce sont là des
denonciations formidables , qui doi-
uent faire trembler les larrons , &
tous les vsurpateurs & les detenteurs
du bien de leurs prochains. Mais ce
n'est rien encor au prix de celle que
nostre Seigneur Iesus-Christ leur fait
par la bouche de son Apostre au sixié-
me de la premiere aux Corinthiens,
*Ne vous abusez point , ni les larrons ni
les auaricieux , ny les raiisseurs n'heri-
teront point le Royaume de Dieu. Et cer-
tes il y a bien apparence que s'il en
ferme la porte à ceux qui ne l'auront
pas nourri & vestu en ses membres,
beaucoup plus la fermera-il à ceux
qui l'auront depouillé & reduit à la
faim. Or s'ils n'heritent point le
Royaume de Dieu , qu'heriteront-ils
donc sinon la malediction du ciel , les
horreurs de l'enfer , les tenebres ex-
terieures , le grincement de dents , le
ver qui ne meurt point , & le feu qui
ne s'esteint point ?**

Voila quelle est l'atrocité de ce cri-
me, & celle de la peine qui luy est des-
noncée du ciel. Ce n'est donc pa-

sans vne tres-grande raison que nostre Apostre prend ce soin de l'éloigner autant qu'il peut de la vie des Chrestiens, quand il crie dans ce texte, *Que celuy qui desroboit, ne desrobe plus* ; c'est à dire, que ceux qui ont jusques icy exercé ce malheureux & infame mestier, soit durant le temps de leur ignorance, soit depuis leur conuersion au Christianisme, s'en deportent à l'aduenir, qu'ils cessent de charger l'Eglise de Christ de ce blâme d'estre vne compagnie de larrons & de ravisseurs, & que gardans la bonne conscience enuers Dieu & enuers les hommes, & se tenans religieusement dans les regles de la justice & de la charité Chrestienne, ils fassent voir à tout le monde combien est sainte & innocente la Religion qu'ils ont embrassée. De ce discours de l'Apostre nous recueillons deux choses, l'une, qu'il y en auoit alors plusieurs en l'Eglise qui ayans renoncé aux superstitions & aux idolatries des Infidelles, en auoient retenu les vices, & ne les pouuoient déraciner de leurs mœurs ; qui est la mesme chose

chose que nous voyons , à nostre grand regret , en ces derniers siècles en la conuersion d'une grande partie de ceux qui des erreurs de Rome se conuertissent à la vraye & pure Religion ; L'autre qu'encor qu'ils fussent tels , les saints Apostres ne les retranchoient pas pourtant tout incontinent de la communion de l'Eglise, mais se contentoient de les exhorter à une vraye repentance , & à un serieux amendement de vie. Ce que les anciens Peres ont releué tres-à propos contre l'heresie des Noutiens, qui disoient que tous les pechez que les hommes auoient commis durant leur ignorance , estoient effacez en leur Baptisme : mais que si apres le Baptisme ils venoient à tomber derechef en quelque vn de ces pechez là, il n'y auoit point de lieu de repentance pour eux, & que l'Eglise ne les pouoit plus receuoir en sa communion : au lieu que l'Apostre ordonoit à celle de Corinthe de receuoir l'incestueux 1. Cor. 2. 7. 8. à sa paix apres les témoignages suffisans de sa repentance ; & icy en parlant à ceux qui estoient coupables de

larrecin se contentoit de dire , *Que celui qui déroboit , ne dérobe plus.* Vous trouuerez possible estrange qu'il die simplement à celui qui a dérobé, qu'il ne dérobe plus ; au lieu de luy dire qu'il restitue. Mais quand il dit, *Qu'il ne dérobe plus* ; en ces mots là est nécessairement compris le deuoir de restituer. Car qui a dérobé & ne restitue point , il perseuere en son peché, & demeure tousiours larron ; la detention du bien d'autrui n'estant pas moins digne du nom de larrecin que la premiere vsurpation qui en a esté faite par le larron. Mais quand il se repent de sa faute , & qu'il restitue ce qu'il auoit dérobé , alors il cesse vraiment d'estre larron , & peut-on dire de luy avec raison que celui qui déroboit , ne dérobe plus.

Pour obtemperer donc au commandement de l'Apostre , il faut que l'homme à qui sa conscience reproche qu'il a acquis injustement les moyens qu'il possède, restitue premierement ce qu'il detient à son prochain , faisant comme le bon Zachée, *Je donne la moitié de mes biens aux*

pources, & si j'ay circonuenu quelqu'un
 en quelque chose, je rends le quadruple; &
 puis apres qu'il prenne vne bonne &
 ferme resolution de n'acquerrir jamais
 du bien par larcin ni par rapine, mais
 par des voyes justes & conuenables,
 c'est à dire par vn labeur legitime en
 l'exercice de sa vocation. C'est ce que
 S. Paul nous enseigne quand il adjou-
 ste, *Mais que plustost il travaille de ses*
maines en ce qui est bon Il y en a plusieurs
 qui sont tentez à dérober par la neces-
 sité, & pourtant Agur demandoit à
 Dieu qu'il ne luy donnast point pourté, Pro. 30 8.9.
 de peur qu'estans apouré il ne dérobast, &
 ce qui les reduit à cette necessité là
 c'est là faineantise. Car cependant que
 le paresseux tiét ses maines en son sein,
 ne songeant point à l'aduenir, & ne Pro. 24. 30.
 tenant conte de cultiuer les vignes & 31. 34.
 les champs, tout y monte en ronces
 & en chardons: & la pourté s'auan-
 ceant sans qu'il s'en apperçoie, se rüe
 tout à coup sur luy, comme vn soldat,
 & le dépouille de tout ce qu'il a, com-
 me le Sage le represente au liure des
 Prouerbes. C'est pourquoy l'Apostre
 pour exempter l'homme & de la

poureté, & de la tentation au larcin; luy ordonne de travailler. Et à cela nous sommes tous généralement obligez premièrement pour faire valloir les talents que nous auons receus de Dieu, & tout ce qu'il nous a donné d'industrie corporelle ou spirituelle. Car il ne nous a pas pourueus de tant de graces & du corps & de l'ame pour les laisser en oisiveté, oisiveté qui est la paralysie de l'ame, la rouillure de l'esprit; l'engourdissement du corps, l'oreiller du Diable, la peste des vertus, & le seminaire de tout vice; mais afin que nous en vsions à sa gloire, selon les moyens & les occasions qu'il en donne à chacun de nous en l'exercice de la vocation en laquelle il l'employe. Secondement pour acquierir ce qui nous fait besoin pour l'entretien de nostre vie & de celle des nostres. Car il est raisonnable que ceux qui veulent auoir le plaisir de jouir des commoditez de la vie, participēt aussi à la peine de les gagner. Et quant aux faincans il ne seroit pas juste qu'ils vescuissent de la sueur de ceux qui travaillent, & que des bourdons qui ne

font point de miel vinssent manger
le labour des abeilles. *Qui ne veut* ^{1. Theff. 3. 10}
point travailler, ne doit point manger,
comme le remonstroit l'Apostre aux
fidelles de Thessalonique, s'il s'en
trouue de tels en l'Eglise, comme il
ne s'en trouue tousiours que trop, ils
meritent d'estre appelez la vermine
de la societé humaine, comme vn
ancien Empereur appelloit ceux qui
suiuoient sa Cour, & qui luy estoient
inutiles, la vermine de son Palais: &
d'estre chassez par les personnes dili-
gentes & industrieuses, tout de mesme
que les frelons le sont par les abeilles.
Ni en l'Estat ni en l'Eglise nul ne doit
demeurer oisif. Qui ne peut traual-
ler du corps, le doit faire de l'esprit; &
qui ne le peut de l'esprit, le doit faire
du corps. Il n'y a qu'une extreme
impuissance de l'un & de l'autre qui
puisse excuser l'homme de traual-
ler. C'est pourquoy nostre Apostre dit si
generalement, *Que celuy qui déroboit,*
ne dérobe plus. Vous me direz possi-
ble, Mais y ayant ces deux especes
de traual, celuy de l'esprit & celuy
du corps; & celuy de l'esprit estant le

plus considerable , le plus vtile , le plus noble & le plus digne de l'homme ; comment l'Apostre se restraint-il icy à celuy du corps , quand il dit , *en œuvrant de ses mains* , A quoy s'il falloit necessairement prendre ces paroles comme elles sonnent , ie respondroy qu'alors l'Eglise estoit composée pour la plus part d'artisans & de gens de travail , suiuant ce que l'Apostre disoit au premier de la premiere aux Corinthiens , *Vous n'estes pas beaucoup de nobes , ni beaucoup de puissans , ny beaucoup de sages ; & que c'est à eux proprement & principalement que sa remonstrance s'adresse.* Mais il n'est nullement necessaire d'en venir là , pour d'un commandement donné à tous les hommes faire vne particuliere leçon donnée à quelques-vns seulement. Au contraire par vne espece il faut entendre tout le genre , selon le style ordinaire de l'Ecriture , qui appelle *labeur* ou *œuvre de nos mains* tout labeur de corps ou d'esprit , dont nous seruons ou le public ou le particulier , & dont en le servant nous gagnons nostre vie , en

quelque vocation que ce soit. Ainsi au Pseaume nonantiesme Moyse dit, *Que la plaisance du Seigneur nostre Dieu soit sur nous, & qu'il dispose l'œuvre de nos mains.* Et David au Pseaume cent vingthuitiesme, *O que bienheureux est quiconque craint l'Eternel, & chemine en ses voyes. Car tu mangeras le labour de tes mains, tu seras bienheureux, & bien te sera.* Et Salomon au cinquiesme de l'Ecclesiaste, parlant à celuy qui fait des vœux & qui ne les accomplit point, *Pourquoy l'Eternel dissiperoit il l'œuvre de ses mains?* C'est à dire, *Pourquoy attirerois tu la malediction sur tout ton travail?* Et cette façon de parler est si familiere aux auteurs sacrez, que mesme en parlant des œuvres de Dieu, encor qu'il n'ait ni mains ni corps, ils ne laissent pas de les appeller *les œuvres de ses mains*, par vne metaphore prise des œuvres corporelles qui se font presque toutes par le ministere des mains, dont les anciens les ont justement appellées l'organe des organes. A quoy j'adjouste que le labour est tellement ordonné à tous hommes, que

quand ceux mesmes qui exercent les plus nobles & plus saintes vocations, où ils vivent non du travail de leurs bras, mais de celuy de leurs esprits, ne pourroient point s'entretenir de leur seule industrie spirituelle, ils devroient travailler de leurs propres mains, plustost que de venir ou au larcin ou à la mendicité, qui en des personnes valides est vn vray larcin devant Dieu. *Que celuy qui déroboit,* dit l'Apostre, *ne dérobe plus, mais qu'il travaille plustost œuvrant de ses mains.* Et pour monstrier qu'il n'estoit pas comme les Pharisiens desquels il est dit qu'ils lioient de pesans fardeaux lesquels ils mettoient sur les espaules des hommes, mais qu'ils eussent esté bien marris de toucher du bout de leur doigt, & qu'il ne preschoit pas aux autres le travail pour demeurer luy-mesme en oisiveté, il leur en a donné le premier l'exemple, travaillant de ses propres mains, & mesme à vn travail fort vil, qui estoit de faire des tabernacles, ou des tentes de cuir. Il savoit bien qu'il n'y estoit pas obligé, non plus que les autres Apostres,

& qu'exerceant , comme eux , vne charge qui requeroit vn homme tout entier, & vaquant jour & nuit à l'œuvre du saint Ministère, il n'estoit pas raisonnable qu'outre cela il fust occupé à vn mestier corporel , pour gagner sa vie , tesmoin ce qu'il disoit au neufiesme de la premiere aux Corinthiens , *Moy seul & Barnabas n'auons nous pas la puissance de ne traualler point ? Qui est-ce qui jamais va à la guerre à sa solde ? Qui est-ce qui plante la vigne , pour n'en manger point du fruit ? Qui est-ce qui paist le troupeau, pour n'en manger point du lait ? La Loy mesme ne dit-elle pas , Tu n'emmuseleras point le bœuf qui foule le grain ? Ne sauez-vous pas que ceux qui vaquent aux choses sacrées , mangent de ce qui est sacré , & que ceux qui seruent à l'autel , participent à l'autel ? De mesme aussi le Seigneur a ordonné que ceux qui annoncēt l'Euangile , vivent de l'Euangile. Et s'il eust veu que ce traual corporel l'eust distrait de sa fonction principale , ou s'il eust eu , comme Timothée , vn corps infirme & maladiſ , qui n'eust pas peu supporter ce traual , il ne faut nullement*

douter qu'il ne s'en fust exempté, pour mieux vaquer à son Ministère. Mais si sentant vn corps assez robuste & vigoureux, & n'estant pas obligé, comme nous, à vn grand estude pour la predication de l'Euangile, parce qu'à mesure qu'il preschoit, l'Esprit de Dieu luy suggeroit immediatement ce qu'il auoit à dire, il a creu qu'il deuoit prēdre quelques heures pour gagner sa vie par le trauail de ses mains, sans estre en charge aux Eglises, & a subi volontairement ce trauail pour proposer l'Euangile de Christ sans porter coust à personne. S'il en eust vsé autrement, il eust pensé abuser de sa puissance en l'Euangile, s'espargnant soy mesme pour charger l'Eglise, & donnant prise à ses aduersaires & enuieux qui l'eussent voulu faire passer pour vn mercenaire. Et pourtant il disoit qu'il eust mieux aimé mourir que si quelqu'un eust aneanti en cela sa gloire. Ce qui a donné vn merueilleux poids aux exhortations qu'il faisoit aux autres à trauailler, à ne fouler personne, s'il se pouuoit, mais à subuenir aux necessiteux. C'e-

2. Cor. 9. 35.

estoit là ce qui luy donnoit cette grande
 assurance & cette sainte gloire avec
 laquelle vous voyez qu'il disoit aux An-
 ciens d'Ephese à Milet, *Je n'ay conuoiré* ^{ad. 20. 33.}
ni l'argent, ni l'or, ni la robe d'autrui : ^{34. 35.} *&*
vous-mesmes saluez que ces mains ont four-
ni les choses qui m'estoient necessaires, & à
ceux qui estoient avec moy. Je vous ay mon-
stré en tout qu'en travaillant il faut sup-
porter les infirmes, & auoir memoire des
paroles du Seigneur Iesus, que c'est chose
plus heureuse de donner que de recevoir. Et
aux Thessaloniens, au troisieme de la
seconde, Nous vous denonceons au nom
de nostre Seigneur Iesus Christ que vous
vous retiriez de tout frere cheminant desor-
donnément, & non point selon l'enseigne-
ment que vous avez receu de nous. Car vous
saluez comme il faut que vous nous ensui-
uiez. Car nous ne nous sommes point por-
tez desordonnément entre vous, & n'a-
uons mangé le pain d'aucun pour neant :
mais auons esté en labour & en travail, tra-
vaillant nuit & jour, afin de ne charger
aucun de vous.

Mais reuenons à nostre texte, &
 considerons la nature & la qualité du
 travail qu'il exige du fidelle. *Qu'il au-*

*Psa. 129.
5. 7. 8.*

ure, dit-il, *de ses mains en ce qui est bon.* Ce n'est pas assez de travailler. Le larron travaille bien aussi, & quelquefois plus que l'homme de bien : mais d'un *labeur* qui est *comme l'herbe des toits, laquelle est seche avant qu'elle mûte en tuyau,* & dont les passans ne disent point, *La benediction de Dieu soit sur vous.* Il faut que ce soit en ce qui est bon, en une vocation legitime, où il n'y ait rien qui ne soit juste & honneste en soy, & qui ne serue à la société des hommes ; non en des arts ou inutiles ou infames, qui ne sont bonnes qu'à amuser les sens par de vaines curiositez, qu'à corrompre les mœurs par des actions scâdaleuses, qu'à circonuenir & à fouler le prochain par fraudes & par tromperies, & mesme qu'à appourir & à opprimer les peuples tous entiers par des inuentions maudites, que le Diable, auteur & inuenteur de tout mal, suggere à ceux qui s'y adonnent. Que tels arts, veut dire l'Apostre, soient bannis d'entre les Chrestiens, & que l'on n'y voye exercer que des vocations honnestes, & des mestiers je ne di pas seulement innocents, mais profitables au public & au particulier.

Voilà quelle est l'occupation qu'il dōne au fidelle en ce qui est de l'acquisition des commoditez de la vie, mais voyons maintenant à quel vsage il veut qu'il les destine. C'est *afin*, dit-il, *qu'il ait de quoy departir à celuy qui en a besoin*. Il ne condamne pas les richesses, ni ceux qui les possèdent, comme a fait temerairement l'heretique Pelagius, qui disoit qu'un homme riche, s'il ne vënd tous les biens, quand mesme il les employeroit à toute sorte de bonnes œuvres, ne peut entrer au Royaume de Dieu, & auquel le Synode de Palestine fit retracter & anathematiser cet erreur. Il en regle seulement l'vsage, disant que l'homme en travaillant pour acquérir des biens, ne doit pas auoir simplement pour but de se mettre bien à son aise, & d'entretenir sa famille avec plus de cōmodité & plus de splendeur, mais qu'il faut qu'il le face pour auoir de quoy subuenir à celuy qui en a besoin; c'est à dire, afin que se contentant d'en prēdre ce qui est nécessaire à l'honneste entretiē tant de sa personne que de sa famille, il face part du reste à ceux qui se trouuent en nécessité. Remarquez biē, je vous prie,

les termes dont il yse. Car il les a choisis avec vne singuliere prudence, & ils nous expriment parfaitement bien ce qui est de nostre deuoir. Premièrement il ne dit pas, afin qu'il donne tout son bien aux autres, mais seulement, afin qu'il ait de quoy leur departir, c'est à dire, leur en faire part. C'est ce que signifie le mot Grec qu'il employe en ce lieu, comme nos Interpretes l'ont fort bien compris. Car il veut biē que nous exercions charité, mais non pas que ce soit en sorte que les autres soient soulagez, & que nous en demeurions foulez, comme il le proteste en termes exprés au huietiēme de la seconde aux Corinthiens. *Que tes fontaines, dit Salomon, s'espandent dehors, & les ruisseaux d'eau par les rues: mais qu'elles soient à toy seul, & non aux estrangers avec toy. Qui a deux robes, dit Iehan Baptiste, en eslargisse à celuy qui n'en a point.* Il ne luy ordonne pas de demeurer nud, mais en ayant deux robes, d'en eslargir vne, c'est à dire, à soulager son pource frere d'une partie de ses commoditez, qui est vne charité raisonnable & bien ordonnée. Secondement il ne dit pas generalemēt & confusēment, pour departir aux autres,

Prov. 5. 16.
17.

Euc 3. 12.

mais plus précisémēt, *pour departir à celuy qui en a besoin*. Car il n'entēd pas que de ceux qui sont sains & robustes, les vns trauaillent & acquierent, & que les autres pouuans trauailler aussi bien qu'eux, mais aimās mieux demeurer en oisieté, viuent du labeur de ceux-là. Il veut que tous ceux qui peuuent trauailler, trauaillent : mais que la charité de ceux qui le peuuent, subuienne à la nécessité de ceux qui ne le peuuent pas. Ce qui, encor qu'il semble libre & volontaire, est en effect vn deuoir fondé sur vn droit tres-naturel & tres-raisonnable. Car soit qu'on nous considere cōme hommes, soit qu'on nous regarde comme Chrestiens, nous sommes tous membres les vns des autres, appartenās à vne mesme societé ciuile & Ecclesiastique. Or comme les membres doiuent bien tous trauailler pour l'entretien de tout le corps, chacun selon la fonction que la nature luy a assignée : mais quād il y en a de malades & d'impotens, qui ne peuuent pas trauailler, il faut que les autres les seruent & les supportent : ainsi en doit-il estre entre tous les hommes, mais principalement entre les fides.

Ceux qui sōt sains & vigoureux doiuent tous traualier & s'entr'ayder les vns les autres de leur traual. Mais quād il y en a quelques vns que l'aage, que la maladie, que la multitude d'enfans, que quelque grand & soudain defastre a reduits ou à vne totale impuissance de gagner leur vie par leur traual, ou à vne si grāde foiblesse que leur petit labeur ne peut pas suffire à l'entier entretien de leurs personnes & de leurs familles, il faut que ceux ou qui ont des moyēs, ou qui par leur traual en peuuent acquerir, soulagent leur misere, & subuiennent à leur indigence. C'est pour cela que le Diaconat a esté institué, & que les hospitaux, ou les hostels-Dieu, cōme on les appelle, ont esté dressez de tout temps dans les villes où le Christianisme a esté receu. Institution si humaine & si raisonnable, que mesme Iulian, ce capital ennemy des Chrestiens, a esté contraint de les en loüer, & qu'il s'est proposé, par enuie qu'il portoit à la gloire de charité, & non par vne vraye charité en effect, à les introduire parmy les Payens. Mais outre cēt ordre public, il faut que chaque fidelle en particulier, la où

là où il apperçoit vne vraye necessité, y tende la main, & y exerce sa beneficence. Je di là où il apperçoit vne vraye necessité, par ce que c'est là seulement que cette sorte de charité est bien mise. Car quant aux autres, ils n'y doiuent point auoir de part, n'estant pas raisonnable que les aumônes qui appartiennent aux vrais pourceux, soit données à des ventres oyseux, & à des caimands volontaires, pour les entretenir en leur fainctise. Aussi les anciens Conciles ont fait plusieurs beaux Canons contre cette infame sorte de gens pour les exclure des subuentions de l'Eglise; & les Empereurs & Princes Chrestiens, plusieurs constitutions tresprudentes pour bannir & exterminer vne telle vermine de leurs Estats. Mais là où le Chrestien voit vne vraye pourceté iointe à vne grande misere, & à vne extreme impuissance, comme estoit celle du pource Lazare, c'est là qu'il doit eslargir ses entrailles, & les esmouuoir à charité enuers son pource frere. C'est là qu'il doit donner gayement, promptement & libe.

ralement. C'est là qu'a lieu ce que dit la Loy au 25. du Leuitique, *Quand ton frere sera appouri, & qu'il tendra ses mains tremblantes vers toy, tu le soustiendras.* C'est là qu'il est appelé à ce ieusne dont il est dit en Esaye, *Le ieusne que j'ay choisi, n'est-ce pas que tu rompes ton pain à celui qui a faim, que tu faces venir en ta maison les affligez qui sont en poure estat, que quand tu vois celui qui est nud, tu le couvres, & que tu ne te caches point arriere de ta chair?* C'est là qu'il te faut souuenir de ces beaux aduertissemens de l'Ecclesiastique, *Mon enfant ne fay point de tort au poure de sa vie, ne tien point en suspens les indignes qui te regardent. Ne differe point long-temps ce que tu donnes à celui qui en a à faire. Ne rejette point la priere de l'opresse, & ne destourne point ta face du poure. Ne destourne point ton œil du souffreteux, & ne donne occasion à personne de le maudire. Car le poure te maudissant en l'anertume de son ame, sa priere sera exaucée de celui qui l'a creë. Sois aux orphelins comme pere, & comme mari à leur mere. Alors tu seras comme fils de*

Esai. 58. 7.
Eccl. 4. 3.
4. 5. 6. 10.
11.

Souuerain, qui t'aimera plus que ne fait ta mere. C'est là en fin qu'il faut pratiquer cette diuine exhortation de l'Apostre, Que celuy qui déroboit ne dérobe plus; mais plustost qu'il traueille en œurant de ses mains en ce qui est bon: afin qu'il ait pour departir à celuy qui en a besoin.

Nous desirerions, tres chers freres, à mesure que nous vous proposons ces choses, en pouuoir faire vne si profonde impression en nos cœurs, qu'elle ne s'en peust iamais effacer. Mais il faut que ce soit l'esprit de Dieu qu'il le face pour nous, tout ce que nous pouuons, c'est apres vous les auoir exposées, de vous en ramenteuoir les principaux chefs, & de vous exhorter prier & coniuurer au nom de nostre commun Seigneur & Sauueur de les bien retenir, &, ce qui est le principal, de les mettre soigneusement en pratique. Souuenez-vous donc premierement que Dieu qui est le souuerain Seigneur de tous les biens du monde, & qui a en cette qualité droit de les distribuer à qui il luy plaist, & en la mesure que bon luy semble;

Que ce que chacun des hommes en a, est la part que Dieu luy en a faite, & que vous ne pouuez sans vn intolérable attentat entreprendre deuant ses yeux de dérober ou de raurir à vostre prochain la portion qu'il luy en a donnée. En quelque façon & sous quelque façon que vous le faciez, c'est vn larrecin deuant Dieu, vous le pourrez bien faire en sorte que vous n'en serez pas repris par la Iustice humaine, mais vous ne scauriez euitier d'en rendre conte à celle de Dieu, qui est bien plus seuerre & plus formidable en mettant chez vous du bien mal acquis, vous pensez faire vn grand profit : mais en effect vous faites tout de mesme que si dans vn grãd tas de bois sec vous mettiez vn tison ardent pour bruler tout le reste. Il ne faut que ce peu d'argent, ce lingot d'or, & cette manteline de Sinar pour vous faire bruler, comme le miserable Acham, vous & vostre famille par ce *feu non soufflé* dont il est parlé au liure de Iob, c'est à dire par vne secrette vengeance de Dieu, qui tost ou tard ne manque iamais à punir les

Ios. 7. 25.

Iob. 20. 26

larrons & les ravisseurs. Que chacun examine icy sa propre conscience, & qu'il considere à quel titre il possède tout ce qu'il a. Si elle vous reproche que vous en ayez de mal acquis, restituez le promptement à qui il appartient. Que la mort & le iugement ne vous surprenne point avec l'anathème dessous la robe, ou avec l'interdit dedans vostre maison. Estans chargez du bien d'autrui, vous ne sçauriez passer par la porte estroite du Paradis. Deschargez vous en au plus tost, & conservez desormais vos mains nettes, pour ne toucher jamais au bien d'autrui, non pas mesme de la convoitise ; mais pour vous contenter de celui de vostre patrimoine, ou de vostre juste labeur, afin que la benediction de Dieu soit sur vous *Prou. 10.*
Car c'est elle qui enrichit, comme dit 22.
le Sage au liure des Prouerbes : au lieu que des *thresors de meschanceté*, il est dit, *qu'ils ne profiteront de rien.*

Retenez en second lieu que Dieu ne vous appelle point à la faincantise, mais au travail ; que la main lasche fait deuenir pource, mais que la main

des diligens enrichit; que l'ame du paresseux souhaite & n'a rien, mais que l'ame de ceux qui travaillent, sera engraissee, c'est à dire, quelle abondera en toute benediction. Ne vous fiez point sur ce que vous avez presentement des moyens. Il ne faut qu'un malheur, un embrasement, un naufrage, un vol, une banqueroute, pour vous ruiner & pour vous rendre miserable, si vous n'avez quelque industrie & quelque Art pour gagner vostre vie. Ne vous attendez point à la succession de vos proches, qui peut estre viuront plus que vous, ou qui frustreront vostre attente, en disposant de vos moyens autrement que vous ne pensez. Ne vous fiez pas à la charité & à la beneficence d'autrui, qui est une chose incertaine, & bien souuēt fort froide & fort escharse, mais pouruoyez en travaillant à n'en auoir iamais besoin. Imitiez la prudence du bon Ioseph, & durant les années de l'abondance faites provision pour celles de la sterilité. Vous qui estes jeunes & vigoureux, travaillez auant que la vieillesse & les

maladies vous accueillent. Autrement vous aurez danger de mourir miserables, & de n'estre plains de personne. Ayez tousiours deuant les yeux cette exhortation du Sage, *Va, paresseux, à la fourmy, regarde ses Prou. 6. voyes, & sois sage. Elle n'a ny Capitaine, 6. 7. &c. ne, ni Preuost, ny Dominateur, & neantmoins de son propre instinct elle prepare en esté sa viande, & amasse durant la moisson sa mengeaille. Paresseux iusques à quand te tiendras-tu au lict? Quand te leueras-tu de ton somme? un petit de sommeil, un petit de sommeil, un petit deployment de bras pour dormir : & ta poureté viendra comme un passant, & ta disette comme un Soldat : & ces paroles de l'Apostre au troisieme chapitre de la seconde aux Theſſaloniens. Nous entendons qu'il y en a quelques uns entre vous qui cheminent desordonnément, ne faisant rien, mais viuans curieusement. Parquoy nous denonceons à ceux qui sont tels, & les exhortons par nostre Seigneur Iesus-Christ, qu'en trauaillant ils mangent leur pain paisiblement. Par là vous pouuez voir en passant*

quel jugement vous devez faire de ces gens qui estans sains & vigoureux au lieu de gagner leur vie par leur travail, se vouent à une mendicité oisive, & s'imaginent que par là ils méritent beaucoup envers Dieu. Surquoy leurs propres Euesques declament fort hautement contr'eux leur opposans, & la doctrine de S. Paul, & celle de tous les anciens Docteurs de l'Eglise, & celle de S. Augustin particulièrement en son écrit de l'ouvrage des Moines, & de leurs propres Regles, qui toutes leur ordonnent de travailler, & ne leur permettent de mendier que lors que leur travail corporel ou spirituel ne peut suffire à l'entretienement de leur vie, & les Ordonnances Impériales, Royales & Politiques qui ont esté faites depuis long-temps contre les Mendians oisifs, comme contre des sangsues qui tirent le sang des veines de tout le monde, des cigales qui boient la rosée de la sueur des fronts de ceux qui travaillent pour gagner leur vie, des frelons & bourdons qui ne font que du

bruit sans fruit, qui broutent les fleurs & les corrompent, & qui sans faire aucun miel troublent l'oeconomie des abeilles, & veulent engloutir leurs rayons. Pour nous nous leur laissons demesler leurs querelles, & n'entrons point icy en ce discours, comme ne montans pas en ce lieu pour reformer ceux de dehors, mais pour corriger ceux qui vivent sous nostre discipline. Nous nous contenterons de parler de certains *ventres par sseux*, qui ne se trouuent qu'en trop grand nombre parmy nous, aussi bien que parmy ceux de Crete & de Thessalonique au temps de S. Paul, lesquels pouuans gagner leur pain à la sueur de leur visage n'ont pas honte de charger l'Eglise de leur entretien, & de celuy de leurs femmes & de leurs enfans. Gens qui, comme parle l'Apostre, *cheminent d'sordonnément*, & sont indignes d'estre admis dans les compagnies des fideles; Premièrement parce qu'ils mangent le pain d'autrui sans rien faire; Car si vn ancien Philosophe en sa Republique ne permettoit

point qu'aucun allast puiser de l'eau au puits de son voisin, qui n'eust premierement creusé dans son propre fonds iusqu'à l'argille, pour essayer de ne luy estre point importun, combien moins doiuent estre soufferts en celle de nostre Seigneur Iesus-Christ, qui est regie par des Loix beaucoup plus justes & & plus saintes, ceux qui pouuans s'entretenir de leur propre industrie, aiment mieux croupir en oisiveté, & viure du labour d'autrui? Et puis parce qu'ils attirent à eux les aumosnes qui sont destinées aux vrayes pources. L'appelle les vrayes pources ceux qu'une inuolontaire necessité a reduits à l'impuissance de traualler: au lieu que ces gueux volontaires, pouuans bien traualler, & mesme, s'ils vouloient, subuenir aux autres de leur traual, aiment mieux par vne lasche faineantise viure des subuentions de l'Eglise; qui est par vne tres-meschante & honteuse espee de larrecin, afin que ie ne die de sacrilege, dérober sur les pources membres de Christ, à qui tels deniers ap-

partiennent. Vous donc qui sans conscience & sans honte auez exercé iusqu'icy vn mestier si infame, deportez vous en desormais, & trauallez, puis que vous le pouuez, non seulement pour vous, pour vos femmes & pour vos enfans, comme les loix diuines & humaines vous y obligent, mais aussi pour ayder à ceux qui ne le peuuent pas, comme l'Apostre vous y exhorte. Je say bien qu'il n'y a aucun de vous qui ne trouue des excuses à sa paresse, & qui ne suppose des infirmittez, des maladies & des disgraces qui l'empeschent de traualler. Mais quand vous pourriez tromper les hommes par telles feintes, pensez si vous pourrez vous deguiser de mesme à Dieu, qui sonde les cœurs & les reins, & à vos propres consciences, qui sauent le contraire de ce que vous dites.

Souuenons nous en troisieme lieu, tres-chers freres, qu'il faut bien traualler, mais qu'il faut que ce soit en ce qui est bon, c'est à dire, en vaquant à l'exercice d'une sainte & honneste vocation, & à vn labeur qui

soit vtile à l'Eglise & à la République.
Le joueur ordinaire trauaille bien.
Car il passe au jeu les iours & les nuits
avec vne tres-grande attention d'es-
prit. Mais c'est vn trauail tres mau-
uais, auquel il vaque, non par simple
diuertissement, ce qui ne seroit qu'oi-
sieté ; mais par vne damnable aua-
rice, ce qui est vn vray larrecin : &
tres-pernicieux , car il luy arriue de
deux choses l'une, ou qu'il s'y ruine,
& qu'en pensant attrapper l'autrui,
il y perd le sien propre; ou que s'il y
fait quelque profit, c'est vn profit qui
ne reuient iamais à bien, & dont la
fin est la perdition de son ame. Et ne
me dites point icy, vn tel s'y est gran-
dement enrichy, il en a achetée vne
charge, vne belle maison, vn gros he-
ritage. Donnez-vous patience, & at-
tendez la fin : & vous verrez ou qu'il
se fendra petit à petit comme vne
chandelle, & qu'il ne laissera apres
soy qu'une puante odeur & vne repu-
tation infame, où que venant à mou-
rir sans enfans, il laissera tout son
bien à des estrangers, qui ne luy en
sçauront point degré, ou que s'il le

laisse à ses enfans, il perira malheureusement entre leurs mains. Car d'ordinaire ces biens-là s'en retournent comme ils sont venus. Je di le mesme de tous ceux qui s'occupent à d'autres mauuaises inuentions pour enuahir le bien de leurs prochains, ou mesme pour se preualoir en particulier des miseres publiques : auxquels on peut iustement appliquer ce qui est dit en Esaie, *Ils conçoient travail, & enfantent tourment. Ils ont esclos des œufs de basilic, & tissu des toiles d'aragne. Leurs toiles ne seront point pour en faire des vestemens, & ne se couurira-on point de leurs ouurages. Car leurs ouurages sont des ouurages de tourment, & actes de violence sont en leurs mains.* Il y a encor vne autre sorte de gens qui peehent contre ce commandement de l'Apostre. Ce sont ceux qui font des ouurages qui doivent seruir à l'idolatrie & à la superstition. Car encor qu'ils n'adorent pas les œuvres de leurs mains, ils ne laissent pas d'offenser Dieu aussi bien que ceux qui les adorent, de travailler à ce qui est mauuais, & de loër

leurs mains & leur industrie au Diable. D'alleguer comme ils font, C'est mon mestier, il faut que j'en gagne ma vie, c'est vne fort mauuaise excuse. Car n'y a-il point en ces mestiers-là d'ouurages innocens auxquels ils la pourroyent gagner sans offenser leur conscience? Et en tout cas ne vaudroit-il pas bien mieux prendre toute autre vocation, comme ont fait en l'ancienne Eglise plusieurs peintres & statuaires, que de se damner en celle-là, en faisant des idoles avec ces mesmes mains qu'ils esleuent tous les iours à Dieu en leurs prieres, & avec lesquelles ils prennent le saint Sacrement à sa Table? Gagner sa vie par des moyens illegitimes & damrables n'est pas la gagner, mais la perdre, & pour vn miserable profit attirer sa malediction eternelle sur soy mesme & sur sa famille. Vous qui estes Chrestiens en effect aussi bien que de nom, & qui aimez vraiment vostre salut, n'en ferez pas ainsi. Vous trauaillerez, mais en choses bonnes, dont vostre conscience ne vous fera jamais reproche

deuant Dieu, & pour lesquelles vous ne baisserez point les yeux deuant les hommes. Vous laisserez des biens à vos enfans, mais des biens purs, legitimes & innocents, dont vous aurez sujet d'esperer que comme ils seront venus de la benediction du Seigneur, aussi leur seront-ils conseruez par elle, tant qu'ils continueront à les posseder en sa crainte.

Finallement apprenez d'icy quel est le vray & legitime vsage de nos biens. C'est afin dit l'Apostre que vous en départiez à celuy qui en a besoin, que vous en soulagiez les necessiteux, que vous en secouriez les pourceux orphelins, & les vefues destituées de moyens & d'apuy, que vous en faciez, comme Tabitha, des robes à ceux qui sont nuds, que vous en rachetiez des captifs, que vous en releuiez des maisons tombées en ruine par quelque extraordinaire desastre, que vous en faciez apprendre des mestiers à de jeunes enfans, qui autrement pourroyent deuenir vagabonds, & des caimands, que vous en matiez de pourceux filles, & ainsi les ga-

rentiffiez de la misère & de la tentation tout ensemble, & en vn mot que vous les employiez en toute sorte d'œuvres de charité & de miséricorde. A cela sont obligez de contribuer tous les hommes, chacun selon les facultez que Dieu luy a données. Car ceux là mesmes qui n'en ont que fort peu, mais qui ont de l'industrie pour en gagner, doiuent tousiours mettre quelque chose à part de ce qu'ils acquierent par leur travail, pour subuenir à ceux qui sont plus pources qu'eux, & qui ne peuvent pas trauailler comme eux, ainsi que Iesus Christ nous le monstre par l'exemple de la pource vefue qui mit sa pite dans le tronc. Mais beaucoup plus encor les riches, auxquels Dieu a donné toutes choses en abondance, afin qu'il en fassent du bien, qu'ils soient riches en bonnes œuvres, qu'ils soient faciles à distribuer, communicatifs, se faisant thresor d'un bon fondement pour l'aduenir, afin qu'ils obtiennent la vie eternelle. Cette exhortation qui est tres necessaire en tout temps, l'est particulièrement en celuy des calamitez

mitez publiques de la Chrestienté, dont nous voyons tant de pources familles incommodées & reduites en des miseres extremes : & notamment encor en la rigueur de la saison où nous allons entrer, dont la froidure doit eschauffer l'ardeur de nostre charité, pour reuestir ceux qui sont nuds & recréer les entrailles des Saints. C'est là la fin, mes freres, pour laquelle nostre Seigneur vous a donné les biens que uous auez, & vn moyen tres-assuré de vous les conseruer, & mesme de vous les accroistre. Car ne craignez pas qu'en donnant vous veniez à vous espuiser.

Qui a pitié du chetif, dit le Sage, il ^{Prou 19}
preste à l'Eternel, & il luy rendra son ^{17.}
bien-fait. Dieu est puissant pour faire
abonder toute grace en vous, afin qu'a- ^{2. Cor. 9.}
yans tousiours toute suffisance en toutes ^{8. 9.}
choses, vous soyez abondans en toute
bonne œuvre : ainsi qu'il est escrit, il a
espars. & a donné aux pources, sa justice
demeure eternellement. Pour ietter en
terre cette semence, vous ne la per-
drés pas, mais la recueillirez en son
temps avec tres-grande vsure. Car

2. Cor. 9.
10.

2. Cor. 9.
6.

Matth. 25.
34.

celuy qui fournit de semente au semeur vous pouruoir de pain à manger, multipliera vostre semente, & augmentera les reuenus de vostre justice. Vn iour viendra que chacun receura selon ce qu'il aura fait durant cette vie. Celuy qui n'aura rien semé, ne recueillira rien, celuy qui aura semé chichement recueillira de mesme. Mais celuy qui aura semé liberalement, recueillira aussi liberalement. Donnez donc franchement; alegrement & abondamment à celuy qui en a besoin, lors que l'occasion s'en presente: & outre les benedictionstemporelles que Dieu vous en promet, nostre Seigneur Iesus, au nom duquel nous vous exhortons à ces charitables deuoirs, & pour l'amour duquel vous les aurez pratiquez, vous en recompensera largement en son apparition glorieuse, quand il vous dira deuant Dieu son Pere & deuant ses saints Anges, Venez les benits de mon Pere, possédez en heritage le Royaume qui vous a esté preparé dès la fondation du monde. Car j'ay eu faim, & vous m'avez donné à manger, j'ay eu

soif, & vous m'avez donné à boire;
i'estois estranger, & vous m'avez recueilli;
i'estois nud, & vous m'avez vestu;
i'estoy malade, & vous m'avez visité,
i'estois en prison, & vous estes venus vers
moy. En verité ie vous di qu'entant
que vous l'avez fait à l'un de ces plus
petits de mes freres, vous me l'avez fait
à moy mesmes. A luy comme au Pere
& au S. Esprit, soit rendu tout hon-
neur, benediction & louange aux sie-
cles des siecles.




SERMON

VNZIESME,

Sur ces paroles de l'Apostre S.
Paul au 4. chap. de l'Epistre
aux Ephesiens.

*Verf. 29. Que nul propos infect ne sorte
de vostre bouche: mais celuy qui est
bon à l'usage d'edification, afin qu'il
donne grace à ceux qui l'oyent.*



Est vne exhortation
excellente, & qui est di-
gne d'estre graüée en
l'ame de chaque fidelle
comme avec vne tou-
che de fer & avec vne ongle de dia-
mant, que celle que nous fait l'A-
postre au sixiesme de la premiere aux
Corinthiens en ces mots, *Vous n'estes
point à vous mesmes, vous avez esté
achetez par prix, Glorifiez donc Dieu*

en vos corps & en vos esprits, lesquels appartiennent à Dieu. Et si nous l'observions comme nostre deuoir & nostre interest nous y obligent également, nous nous monstrierions vrayement dignes de cet honorable nom de Chrestiens, qui autrement ne nous est qu'une reproche d'ingratitude envers nostre Sauueur : & en reconnoissant les bien-faits passez de nostre bon Dieu envers nous, nous en attirerions tous les jours de nouveaux. Mais nostre corruption originelle est si grande qu'à moins d'estre renouvellez tout à fait en toutes les facultez de nos ames, en tous les membres de nos corps, en nos pensées, en nos paroles, & en nos actions, il est impossible que de nous mesmes nous nous portions à la reconnoissance religieuse que nous deuons à ce bon Dieu pour nous auoir rachetez par le sang de son Fils bien aimé, & à consacrer nos corps & nos ames à la celebration de sa grace, & à l'illustration de sa gloire. C'est pourquoy nostre Apostre ayant à nous donner les preceptes de la vie Chrestienne,

a dit premierement, comme vous l'avez entendu en nos predications precedentes, qu'il faut que nous depouillions le vieil homme quant à la conuersation precedente, lequel se corrompt par les conuoitises qui seduissent, & que nous soyons renouvellez en l'Esprit de nostre entendement, & reuestus du nouuel homme crée selon Dieu en justice & vraye saincteté: & puis pour adresser nos langues, nos cœurs & nos mains à leurs fonctions legitimes, afin de glorifier Dieu en nos corps & en nos esprits, & de rendre toute nostre vie agreable à ses yeux à adiousté, *Parquoy ayant depouillé le mensonge, parlez en verité chacun avecques son prochain: car nous sommes membres les uns des autres. Courroucez vous & ne pechez point. Que le Soleil ne se couche point sur vostre courroux, & ne donnez point lieu au Diable. Que celuy qui déroboit, ne dérobe plus, mais plustost qu'il traueille en œurant de ses mains en ce qui est bon, afin qu'il ait pour départir à celuy qui en a besoin. Mais parce que ce n'est pas assez*

que la langue soit repurgée de mensonge & ornée de verité, mais qu'il faut qu'elle soit aussi purifiée de toutes ses autres souillures, & douée de toutes les autres parties de la vraie sainteté, il y reuient encor & dit, comme vous venez de l'entendre, *Que nul propos infect ne sorte de vostre bouche, mais celui qui est bon à l'usage d'edification, afin qu'il donne grace à ceux qui l'oyent.* Et il insiste plus long-temps sur ces vices & sur ces vertus de la langue, parce que de toutes les parties exterieures c'est celle par laquelle les hommes doivent plus glorifier Dieu, & celle toutesfois par laquelle ils l'offensent plus frequemment, & avec d'autant moins de scrupule qu'ils s'imaginent que c'est fort peu de chose, n'estant question que de paroles, qui s'esuauouissent en l'air. Au vingt-cinquieme verset il luy a ordonné la verité, qui est son premier & principal ornement: en celui-cy il luy recommande la sainteté, qui en doit estre la cōpagne perpetuelle. C'est enseigne-

ment qu'il en donne consiste en deux parties, l'une touchant le vice qui est à fuir, & l'autre touchant la vertu qui est à pratiquer.

Quand au premier il dit, *Que nul propos infect ne sorte de vostre bouche.*

*Math. 7.
18.*

Le mot Grec que nos Interpretes ont rendu par *Infect*, signifie proprement pourri, & en l'usage de l'Ecriture Sainte designe generalement toutes choses mauuaises & vicieuses, comme quand Iesus-Christ dit *qu'un arbre pourri, c'est à dire vn mauuais arbre, ne sauroit porter de bons fruits, & ailleurs que les pescheurs ayant tiré leur filé, où il y a toutes sortes de choses bonnes & mauuaises confusement, mettent à part en leurs vais-*

*Math. 13.
48.*

seaux ce qu'il y a de bon, & jettent hors ce qui est pourri, c'est à dire, comme nostre version l'a fort bien rendu, ce qui ne vaut rien. Et certes justement ce qu'il y a de corrompu en nos paroles ou en nos actions, est ainsi appelé, parce que comme vne pomme pourrie est tout ensemble desagreable à voir, puante à sentir, amere & nuisible à manger: ainsi

le vice est def-honneste en foy, scandaleux à l'Eglise, & preiudiciable au salut. Cette corruption des propos consiste en vanité, en prophaneté, en malice & en vilenie. j'appelle vanité celles des discours & des entretiens qui ne seruent de rien ni à ceux qui en vsent, ny à ceux qui les oyent, comme sont la plus part de ceux auxquels les conuersations du monde se consument. Qui est vn vice indigne d'un homme, mais principalement d'un Chrestien. Car nostre Createur ne nous a pas donné la langue pour vn entretien inutile, mais pour vne communication fructueuse, Et si vn Philosophe Payen disoit autrefois à vn jeune homme vain & leger en son propos, N'as-tu point de honte de tirer d'un fourreau d'yvoire vne espée de plomb, c'est à dire d'une ame raisonnable des paroles vuides de bon sens? combien plus y a il de suiet de dire aux Chrestiens, N'avez-vous point de honte de tirer des ames que Dieu a formées à son image, & rachetées par le sang de son Fils, des propos mondains & fri-

uoies? Il vous a donné tant de matière de vous entretenir soit de ses propres perfections, qu'il vous a si euidentement reuelées en sa Parole, soit de ses œuvres qu'il a si magnifiquement estalées deuant vos yeux, soit de ses graces qu'il a déployées sur vous en si grande abondance, soit des merueilles de sa Prouidence qu'il fait reluire en la conseruation de cet Vniuers, en la propagation & defense de son Eglise, & en la conduite particuliere de la vie de chacun de vous. Pourquoi enseuelissant tout cela dans vn ingrat silence, perdez-vous si malheureusement vostre temps, dont les moindres minutes vous deuroient estre precieuses, à vous entretenir de choses de neant, & qui ne sont vtilles ny à sa gloire, ny à vostre salut? Encor seroit-ce peu s'il n'y auoit que de l'inutilité aux propos des hommes, mais quant à la vanité ils ioignent la prophaneté, prenans en vain le Nom de Dieu, & conuertissans en risée les matieres les plus sacrées, combien en est le peché plus enorme? veu qu'il s'adresse immediatement à

Dieu mesme, & qu'il procede d'un mespris manifeste des choses qui le touchent. C'est le peché dont se rendent coupables ceux qui se trouuans dans les compagnies, n'y parlent de la pieté & de la deuotion que pour rire, & mesme qui abusent des paroles sacrées de l'Ecriture à des propos de raillerie & de bouffonnerie. Peché d'autant plus grand que celuy du prophane Roy Belsasar qui employoit en ses yurongneries avec ses courtisans & avec ses concubines les sacrez vases de la maison de Dieu, que la Parole de Dieu est sans comparaison plus precieuse & plus venerable que n'estoient les vaisseaux d'or & d'argent de ce temple materiel, & qui par consequēt ne peut qu'attirer sur leurs testes des jugemens encor plus formidables que celuy dont il punit l'impieté de ce Prince. Il y a vne troisieme sorte de mauuais propos, qui est tres-nuisible & tres-condamnabile, & neantmoins merueilleusement commune parmi les hommes, qui sont ceux de malice, de tromperie, de mocquerie & de mesdisance. Chose

pitoyable, que la parole qui a esté donnée aux hommes pour leur estre vn moyen de communication agreable, vtile & salutaire des vns avec les autres, soit employée par eux, tout au rebours de l'intention de celuy qui les a gratifiez d'un tel don, à s'entr'offenser & à s'entre-nuire, soit en se circonuenant l'un l'autre en leurs affaires, soit en flestrissant malicieusement l'honneur & la reputation l'un de l'autre, que ce qui le deuoit estre le ciment de leur vnion, en soit au contraire le dissoluant, & que par cette

Iaq. 3. 9.
II. *mesme bouche avec laquelle nous benissons Dieu nostre Pere, nous maudissons les hommes faits à la semblance de Dieu, comme si vne fontaine jettoit d'un mesme pertuis le doux & l'amer, pour vser des mots de S. Iacques. La quatriesme & derniere espece de corruption qui se trouue aux propos des hommes, & à laquelle l'Apostre semble plus particulierement regarder par ce mot de pourri, ou d'infect, duquel il se sert, ce sont les mots de gueule, & les propos lascifs & impudiques. Vice que non seulement les Iuifs, qui*

estoyent nourris en la Loy de Dieu, ont iustement blasmé disans, comme nous le lisons dans les escrits de leurs Docteurs, que qui a de mauuais propos en la bouche, est comme qui introduiroit vn pourceau dans le saint des Saints: mais qu'entre les Payens mesmes les personnes graues & modestes ont tres-sagement condamné, le renuoyant aux farceurs, aux bouffons, aux parasites & autres personnes infames. Car ils n'ont pas seulement detesté l'impudence brutale de ces Cyniques, qui se licentioyent à faire en public des actions honteuses & infames, dont iustement ils ont esté appelez Chiens; mais ils ont semblablement reiecté cette liberté des Stoiques, qui tenoient pour maxime qu'il falloit nommer toutes choses, quoy que sales & vilenes par leurs propres noms, sans periphrase ni aucun honneste déguisement; & en general ont condamné tous propos lascifs & contraires à la pudeur & à l'honnesteté, comme nous le voyons dans leurs escrits moraux. Ce qui doit faire vne grande honte à ceux

des Chrestiens qui estans adorateurs du vray Dieu, c'est à dire du S. des Saints, n'ont pas la mesme retenue qu'ont eu des infidelles qui adoroyent des Dieux lascifs, adulteres & incestueux; & ne font nul scrupule ou de tenir eux mesmes tels sales propos, ou de les ouir & d'en rire avec ceux qui en vsent, comme si ce n'estoit que ieux & gentillesse: Car combien y en a-il de tels en l'Eglise, ou plustost combien peu qui se trouuent exempts de ce vice? En cela certes Dieu est grandement offensé. Car puis qu'il est le Saint des Saints, & qu'il est par tout avec nous, & que nous ne parlons iamais que ce ne soit en sa presence, n'est-ce pas vne extreme irreuerence enuers luy, de proferer des paroles sales à ses oreilles, au mespris manifeste de tant d'exhortations qu'il nous fait de nous repurger de toutes souillures de chair & d'esprit, & de le glorifier par paroles & par oeuvres, & en vn mot d'estre Saints ainsi qu'il est Saint? Outre cela c'est decouvrir à nostre grand opprobre deuant Dieu & deuant les Anges vne extreme cor-

ruption qui est en nostre cœur. Car comme dit nostre Seigneur Iesus, *de l'abondance du cœur la bouche parle, Math.* & comme l'homme qui est bon, *tire du* ^{12. 34. 35.} *bon thresor de son cœur choses bonnes : aussi celui qui est mauuais, ne peut tirer du mauuais thresor de son cœur sinon choses mauuaises.* Si nous auions comme nous le deurions auoir, le cœur plein de l'amour de Dieu & de la vraye saincteté, il ne sortiroit de nostre bouche que des propos saints & honnestes, & qui tesmoigneroient au dehors la pureté & la bonne disposition de nostre interieur. Mais n'y ayant que des pensées sensuelles & des affections impures, il est force que nos propos soyent de mesme nature. On connoit l'homme à ses paroles, comme l'arbre à ses fruits. Et pourtant vn ancien disoit, Parle, afin que ie te voye. S'il ne tiert que des propos graues, chastes & selon Dieu, c'est signe que l'Esprit de Dieu l'anime & le gouuerne. Si au contraire il n'en tient d'ordinaire que de sales & impudiques, c'est vne preuue tres-certaine que c'est l'Esprit immonde qui

habite en son cœur & qui conduit sa langue. Car cet ennemy de nostre salut est appellé *l'Esprit immonde*, parce qu'il est l'auteur des sales conuoitises, & des paroles impures & lasciuës : & il les inspire à ceux qui en vsent pour produire tousiours quelque pernicieux effect, non seulement en eux, mais aussi en ceux qui les oyent. Car ou ce sont des personnes bien regenerées & bien munies contre toute tentation à impudicité ; & en ce cas encor qu'ils ne corrompent pas leurs esprits chastes & honnestes, ils ne laissent pas de les offenser, cōme qui leur presenteroit à sentir vne odeur fort puante, & leur donnent vn grand déplaisir de voir ces marques d'impureté en eux, & la sainteté de Dieu offensée par telles paroles lubriques. Ou ce sont des personnes encores foibles en l'estude de la Sainteté, & capables de receuoir des impressions dangereuses de tels mauvais discours ; & quand ils en rencontrent de telles, ils excitent sur l'heure dans leurs esprits des imaginations des-honestes, qui puis apres come
me

me des taches d'huyle s'y espandent & s'y dilatent, & ne s'en ostent que fort mal-aisémēt. Et quand ils ne leur feroient autre mal, ils les accoustument à ouir des paroles d'impureté, ils les appriuoisent avec le vice, & petit à petit ils font qu'ils ne l'ont pas en l'horreur & en la detestation qu'ils deuroient. Où ce sont des personnes dissoluës & desbauchées, & quant à celles-là, ils les entretiennent en leur peché, donnent de l'aliment à leur flamme, & font que celuy qui est souillé se souille encores d'avantage.

Mais remarquez bien, ie vous prie, que l'Apostre ne defend pas seulement de faire vn ordinaire de tels propos, mais qu'il defend absolument & vniuersellement d'en vser. *Que nul propos infect*, dit-il, *ne sorte de vostre bouche.* Ce que ie releue, parce qu'il y a quelques fois des gens de bien, qui aiment Dieu & la vraye Religion, & qui sont charitables & pleins de bonnes œuvres, à qui neantmoins, parce que les appetits, les sentimens & les mouuemens de la chair ne sont pas encor bien morti-

fiez en eux, il arriue quand ils sont dans les compagnies, & principalement en quelque occasion de réjouissance, non de dire des vilenies crument & à descouuert, ce qui n'appartient qu'à des personnes eshontées & dissoluës, mais de lascher, quoy que sans autre dessein que de rire & de passer le temps, des paroles qui ont vn sens lubrique & des-honneste, ou d'en donner vn tel à des mots que quelcun de la compagnie aura proferez innocemment, & sans y entendre aucun mal. Or ceux-là pechent aussi bien que les autres, quoy que non en mesme degré, contre ce commandement de l'Apostre. Et pourtant les hommes pieux s'en doiuent abstenir, considerans qu'ils sont en la presence de Dieu, qu'il tient registre de toutes leurs paroles, qu'ils ont à luy en rendre conte à l'heure de la mort & au iour de son iugement, & que par elles ils seront iustifiez ou condamnez; & ne disans iamais aucune parole qu'ils ne voulussent dire en la presence de Iesus-Christ mesme, s'il conuersoit icy corporellement avec eux,

ainsi qu'il faisoit aux iours de sa chair avec sa bien-heureuse mere, avec ses Saincts Apostres & avec les autres personnes religieuses dont il est fait mention en l'Euangile. Car si nous conceuons aisément que c'eust esté alors vne impudence prodigieuse de dire des paroles lasciuues en sa presence, soit couuertement ou à decouvert: nous nous deuons représenter que toutes les fois que nous en disons nous tombons au mesme pechié, puis que nous sauons qu'il est par tout, qu'il nous voit, qu'il nous oit, & que mesme son S. Esprit habite en nous comme en ses temples; & prendre garde à ne violer jamais par tels propos la reuerence qui est due à sa sainte presence, & à ne contrister point cet Esprit par lequel nous sommes scellez pour le iour de la redemption, comme parle l'Apostre au verset immediatement suiuant.

Voila, mes freres, les vices que S. Paul condamne en nos propos & en nos entretiens. Entendez maintenant ce qu'il nous ordonne au con-

Hh ij

traire; *Mais tout propos*, dit il, *qui est bon à l'usage d'edification*, afin qu'il donne grace à ceux qui l'oyent. Où pour ce qui est de la construction des paroles, il faut sauoir qu'il y a proprement au Grec, à l'edification d'usage où de besoin. Ce qui peut estre pris en deux sens, ou comme nostre version l'a pris, edification d'usage, pour usage d'edification; c'est à dire, comme le Syriaque l'a exposé, utile à edification; car ces inuersions & permutations de mots sont assez frequentes en l'Escripture: ou bien à l'edification de besoin, c'est à dire à edifier le prochain, lorsqu'il en est besoin, & que les occasions de profiter à son salut se presentent. Mais cela est de fort peu d'importance; car toutes les deux expositions neuient à un mesme sens, a sauoir qu'en tous nos propos nous deuons auoir pour visée d'edifier nostre prochain. Le principal est de sauoir que quand il parle d'edifier nostre prochain, il entend de l'affermir de plus en plus en la grace de Dieu, de l'instruire de jour en jour en la doctrine de sa verité, de l'exciter

à la deuotion & à l'exercice des bonnes œuures, de luy donner conseil & consolation, s'il en a besoin, & en vn mot d'aider de tout nostre pouuoir, à l'auancement de sa sanctification & de son salut. C'est ce que signifie ce mot *d'edification* en l'vsage de l'Escripture, sur tout du Nouueau Testament, encor qu'il ne se trouue employé nulle part ailleurs en ce sens. Car parce que l'Eglise est souuent appelée la *Maison de Dieu*, comme estant construite de tous les Fidelles, qui comme *pierres viues* sont assemblez en vn par la predication de l'Euangile, fondez sur vn mesme Iesus Christ, & cimentez par vne mesme foy & par vn mesme Esprit, les escriuains sacrez suiua's le fil de cette Metaphore ont pris ce mot *d'edifier* pour signifier le travail de ceux qui assemblent ces pierres viues dont elle est composée, qui les taillent, qui les polissent, qui les posent sur le fondement, qui est nostre Seigneur Iesus, & les vnissent & adaptent les vnes aux autres, pour la composition & pour l'ornement de ce bastiment spirituel

de l'Eglise; soit les Ministres de l'Evangile, selon la charge publique que Dieu leur a donnée; soit les fidèles particuliers, selon le deuoir commun de la charité: Car il n'est pas dit seulement des Apostres, des Prophetes, des Euangelistes, des Pasteurs & Docteurs, qu'ils nous ont esté donnez d'enhaut pour *l'edification du corps de Christ*: Mais il est dit generalement à tous les fidèles au quatorzième de l'Epistre aux Romains, *Pourchassez les choses qui sont de paix & d'edification mutuelle*; & au cinquième de la premiere aux Thesaloniciens, *Exhortez vous l'un l'autre, & vous edifiez un chacun l'un l'autre*; c'est à dire, contribuez tout ce que vous pouuez à l'instruction, à la sanctification, à la consolation & au salut les vns des autres. Comme au contraire pour ruiner ou destruire nostre prochain ils entendent luy donner achoppement & scandale, & nuire à son salut, cōme quand il est dit au passage preallegué de l'Epistre aux Romains, *Ne destrui point pour ta viãde celuy pour lequel Christ est mort. Ne rui-*

ne point l'œuvre de Dieu pour ta viande. Il veut donc dire icy que tous nos entretiens pour estre agreables à Dieu, & vrayment dignes du nom que nous portons & à la vocation à laquelle nous sommes appelez, doivent estre tels qu'ils soient vtils au salut de nostre prochain, & que comme il adjouste incontinent apres, *ils donnent grace à ceux qui les oyent*, c'est à dire, qu'ils leur soient agreables, & selon la phrase Hebraïque qu'ils nous facent trouver grace envers eux, où selon l'exposition commune qu'ils leur communiquent quelque nouvelle grace de Dieu, ou qu'il leur augmentēt & leur fortifient celles qu'ils ont desia receues: & qu'en fin jamais nostre frere ne converse avec nous qu'il ne recueille quelque bon fruit de nostre compagnie, c'est à dire qu'il ne s'en aille d'avec nous ou mieux instruit en la verité & en la volonté de Dieu, ou plus ardent en la deuotion, ou plus affectionné à la sainteté, ou plus aisé en sa conduite, ou plus consolé en ses ennuy. C'est la mesme chose qu'il dit au quatriesme chapitre

de l'Epistre aux Colossiens, *Que nostre parole soit confite en sel*, c'est à dire, accompagnée d'une sainte discretion, & d'une prudence Chrestienne, avec grace, afin que vous sachiez comment vous avez à répondre à un chacun; & autroisieme, *Que la Parole de Christ habite en vous plantureusement en toute sagesse, en vous enseignant & admonestant l'un l'autre par Pseaumes, par louanges & par chansons spirituelles avec grace, chantans de vostre cœur au Seigneur*, c'est à dire qu'au lieu que les personnes dissolües, quand elles se veulent réjouir, se jettent dans la débauche, s'entretenant de propos deshonnestes, & chantans entr'eux des chansons d'yrongerie ou de lubricité, vous au contraire vous réjouissiez entre vous d'une joye spirituelle, pure, honneste, innocente, vous entretenant de la Parole de Christ, des louanges de Dieu, & de tous propos de sagesse, estans comme dit nostre mesme Apostre au cinquiesme de cette Epistre, *non enyurez de vin, auquel il y a dissolution, mais remplis de l'Esprit, auquel il n'y a que*

saincteté & sagesse, & *psalmodians* en vostre cœur à celuy qui est l'vnique authcur, & qui doit estre aussi l'vnique obiect de toute nostre joye. Car il ne nous a pas donné la parole afin de nous entre communiquer nos mauuaises pensées & nos sales affections, & de nous estre les vns aux autres des instrumens de corruption. Il ne nous l'a pas mesme simplement donnée pour les vsages ordinaires de cette vie, bien qu'elle doiue aussi seruir à cela : mais principalement afin de nous communiquer les graces, les lumieres & les saincts mouuemens qu'il excite au cœur de chacun de nous par son S. Esprit.

C'est à quoy nous la deuons employer, nous entretenans ordinairement de Dieu & des choses de Dieu, de sa sagesse, de sa bonté, de sa justice, de sa puissance, de l'excellence de ses œuvres, des mysteres de son Euan-gile, de la grace de ses Sacremens, de la grandeur de ses biens-faiets enuers le genre humain, des merueilles de sa Prouidence en la propagation & en la deffense de son Eglise, de la ter-

reur des jugemens qu'il d'eploye sur les impies, des biens & des faueurs qu'il fait à chacun de nous en particulier, au temporel & au spirituel, de la saincteté à laquelle il nous a consacrez, des bonnes œuvres qu'il nous a commandées, du conte que nous auons à luy rendre à l'heure de la mort, du dernier iugement auquel nous deuons tous comparoistre, & des biens incomprehensibles qui nous sont preparez au siecle à venir. Ce sont là les propos qui sont véritablement à l'usage d'edification, qui donnent grace à ceux qui les oyent, & que l'Apostre nous enjoinct d'auoir ordinairement en la bouche. Comme nostre Seigneur Iesus apres sa Resurrection ne parloit plus à ses Apostres, quand il se trouuoit avec eux que des choses du Royaume de Dieu, comme il est dit au premier chapitre des Actes: ainsi nous, *Si nous sommes vraiment resuscitez avec luy, ne deuons plus penser qu'aux choses d'en haut, ni nous entretenir d'autre chose.* Chacun deuise volontiers de ce qu'il affectionne le plus. Les gens du mon-

de, desquels le partage est en cette vie, ne parlent que des choses qui la concernent, de leurs biens, de leurs honneurs, de leurs voluptez, parce que c'est en ces choses là qu'ils ont leur thresor & leur cœur. Nous qui auons le nostre en Dieu, en Iesus-Christ, au Royaume qu'il nous a acquis & qu'il nous reserve là haut, & qui ne vivons sur la terre que pour nous preparer à la vie du Ciel, deuõs faire aussi de ces grands & celestes objects la matiere de nos entretiens & de nos deuïs ordinaires. Comme les Prophetes disoient du premier aduenement du Seigneur, & de l'Eglise qu'il deuoit fonder sur la terre; les peuples iront & diront, *Venez & montons* Esa. 2. 3. *en la montagne de l'Eternel, à la maison du Dieu de Iacob, & il nous enseignera touchant ses voyes, & nous chemineront en ses sentiers.* Nous aussi qui nous attendons à son second aduenement, nous deuons prédre les vns les autres par la main; & en nous entretenant des choses du Royaume des cieux, & nous entre-communiquant les graces necessaires pour y paruenir, nous

y acheminer avec vne vraye deuotiō,
& avec vn zele ardent à sa gloire;
comme autresfois les fidelles Israëli-
tes alloient psalmodiant & chantant
les loüanges de Dieu, lors que de tous
les endroiçts de la terre ils s'assem-
bloient en sa maison aux Festes so-
lennelles.

Meditons attentiuement, tres-
chers Freres, cette admonition de
l'Apostre, & que ce nous soit vne re-
gle inuiolable en tous nos propos. Ne
la méprisons point, comme estant de
peu d'importance, sous ombre qu'il
est questiō de paroles. Il est question
vrayement de paroles, mais de paro-
les par lesquelles Dieu est offensé ou
glorifié. Il n'y va donc pas de si peu
qu'il nous pourroit sembler d'abord.
Il y va de la verité de la Religion de
chacun de nous. Car comme dit S.
Iaq. 3. 2. Jacques, Si quelcun pense estre religieux
entre vous, ne tenant point en bride sa
langue, mais seduisant son cœur, la Reli-
Prou. 13. 3. gion d'un tel homme est vaine. Et au
contraire, si quelcun ne chope point en
paroles, il est homme parfait. Il y va de
nostre ame; car, comme dit le Sage,

qui contregarde sa bouche, garde son ame.
 Il y va du bon-heur de toute nostre
 vie, car *qui aime sa vie*, dit le Psalmiste *Pf. 34. 13.*
 & apres luy S. Pierre, & *veut voir ses* *1. Pierr. 3.*
iours bien-heureux, il doit garder sa *10.*
langue. Il y va en fin de nostre salut
 ou de nostre damnation. Car le Sou-
 uerain Iuge nous dit par exprés que *Math. 12.*
 nous serons iustifiez ou condamnez *37.*
 par nos paroles. Puis donques qu'il y
 va de tant, ou plustost qu'il y va de
 tout, prenons bien garde à nos entre-
 tiens, afin qu'ils soient tels que nostre
 qualité le requiert, & que nous n'en
 rougissions point deuant Dieu. Ban-
 nissons en entierement tous propos
 vains & inutiles, nous souuenans de
 ce que dit nostre Seigneur Iesus, que
 de toute parole oïteule nous rendrōs
 conte au jour du iugement. Alors
 nos paroles seront pesées aussi bien
 que nos actions: & si elles n'ont leur
 iuste poids, il nous fera dit comme à
 Belsasar; *Tu as esté pesé à la balance, &* *Dan. 5. 27.*
as esté trouué leger. Or si les paroles
 qui n'ont autre vice que d'estre lege-
 res & inutiles, sont examinées à la ri-
 gueur, comment oseront comparoi-

estre deuant ce tribunal redoutable
ceux qui n'auront eu en leur bouche
que des propos impies & prophanes?
Comment oseront leuer les yeux de-
uant luy ceux qui auront vsé de paro-
les pleines de fraude, de malignité ou
d'enuie! Où est-ce que s'iront cacher
ceux auxquels leur conscience repro-
chera d'en auoir lasché à diuerses fois
de lasciues & des-honnestes; infectās
l'air de son Eglise, & les oreilles de
leurs freres des puantes exhalaisons
de leur corruption & de leur impudi-
cité? Vous qui abusez de vostre lan-
gue avec tant de libertinage à toutes
fortes de propos déreglez; entrez icy
en cetre consideration avec moy, &
pensez à vous amender, & à mieux en
vsar desormais. Je say bien qu'il est
difficile de regler si bien nostre langue
qu'il ne nous eschappe iamais de pa-
role qui ne soit parfaitement pure,
mais d'autāt plus sommes nous obli-
gez à y bien prendre garde, voyans
combien il nous importe d'auoir en
tous nos propos l'approbation de ce-
luy qui est le S. des Saints, & qui
doit estre nostre iuge.

Pour cet effect premierement faisons à Dieu chacun en son particulier ces prieres que luy faisoit l'homme selon son cœur, *Eternel mets garde à ma* *Psf. 141. 3.*
bouche, garde le guichet de mes levres,
Seigneur, ouvre mes levres, & ma bouche *Psf. 51. 17.*
annoncera ta louange. Car nous sommes tous naturellement souillez de leures, & habitons parmy vn peuple qui est souillé semblablement, comme le Prophete Esaie le reconnoissoit de soy mesme. Nous ne saurions parler en pureté si Dieu ne nous purifie luy mesme en touchant nos levres d'un charbon vif pris de sur son autel. Prions le donc de tout nostre cœur qu'il le face, & que cette remonstrance de son **A**postre que nous venons d'entendre, nous tienne lieu de ce charbon, & opere en nous avec efficace pour la sanctification de nos entretiens durant tout le reste de nostre vie.

En suite de cela prenons soin sous la direction de son S. Esprit de purifier nous mesmes nos entretiens de tout ce qui luy peut déplaire, & auant toute chose mettons peine à nettoyer

nettoyer nostre cœur de toute mau-
uaise pensée & de toute affection vi-
cieuse. Car tandis que la source est
impure, il est impossible que les rui-
seaux qui en coulent, soyent purs.
Que si apres que nous y auons fait
tous nos efforts, Satan qui ne se rend
jamais, ou nostre chair qui n'est ja-
mais parfaitement mortifiée en nous
vient à nous suggerer quelque pensée
prophane, maligne ou deshoneste;
estouffons la promptement là dedās,
& ne permettons pas qu'elle passe
iusqu'à nostre langue au prejudice de
la gloire de Dieu, de l'edification de
nos freres, & de nostre propre salut.
Souuenons nous que nostre corps est
le temple de Dieu, que tous nos mē-
bres sont à luy, & non pas à nous mes-
mes; mais qu'il s'est consacré particu-
lièrement nostre langue pour estre
comme l'encensoir sur lequel nous
luy presentions les parfums de nos
prières & de nos actions de graces,
& que nous ne pouuons sans impieté
& sans sacrilege la transferer de ce
religieux vsage au seruice des esprits
immondes par des propos ou de pro-
phaneté,

phâneté, ou de haine & d'enuie, qui sont le plus agreable encens qu'ils puissent receuoir de ceux qui les seruent.

Representons nous qu'en quelque part que nous soyons, nous sommes deuant Dieu, & que nous ne disons rien qu'il n'oye. O si nous pensions bien à cela ! Que ce seroit vne puissante consideration pour tenir nostre cœur & nostre langue en regle ! Car si l'enfant quand il se voit deuant son pere, le seruiteur en la presence de son Maistre, & le suiet en celle de son Souuerain se tiennent en deuoir & parlent avec respect ; & si tous les Stoïques se contenoient & reprimoyent tous leurs vains mouuemens en se figurant volontairement d'estre en la presence ou d'un Socrate ou d'un Caton, car c'estoit là l'un des preceptes de leur Philosophie : combien plus nous retiendrions nous par le respect de la presence réelle & effectiue de ce grand Dieu, qui est là sancteté & la sagesse mesme ?

Mais il nous en prend pour la plupart comme à vn aueugle, à qui on

dit qu'il est en la presence d'un Prince ou de quelque autre personne fort venerable. Durant qu'il s'en souuient, il se tient bien en quelque respect. Mais parce qu'il ne le connoist pas, pour peu qu'il se diuertisse à quelque autre imaginatiõ, cette pēsée luy sort aisémēt de l'esprit, & avec cette pensée la reuerence en laquelle il s'estoit mis au commencement. C'est pourquoy il importe de nous ramenteuoir souuent ce que nous enseigne l'auteur du liure de la Sapiēce, qui encor qu'il ne soit pas Canonique, ne laisse pas de contenir plusieurs salutaires enseignemens pour la conduite de la vie. *L'Esprit du Seigneur, dit il, remplit toute la terre, & en maintenant toutes choses entend bien ce qu'on dit. Pourtant celui qui deuise de choses mauuaises, ne luy peut estre caché; & le jugement ordonné pour le chastiment ne le laissera point passer. Car il y aura inquisition faicte des discours du meschant, & le son de ses paroles viendra jusques à Dieu pour la correction de ses iniquitez, parce que l'oreille de jalousie entend toutes choses. Parlons donc*

*Sap. 1. 7.
8. 9. 01.*

toufiours comme devant luy. Abste-
nons nous religieusement de toute
parole qui est capable d'exciter ou en
nous mefmes, ou en ceux qui nous
oyent quelque imagination des-hon-
nefte. Que ces pechez infames de la
chair *ne foyent pas mefmes nommez en-
tre nous, ainsi qu'il appartient aux
Saints.* Que fi en certaines occa-
fions pour la neceffité de la correctiō
du prochain il nous est force de les
nommer, que ce foit toufiours avec
pudeur, & avec de grands tesmoi-
gnages de la detestation en laquelle
nous les auons.

Fuyons la compagnie des hommes
prophanes & dissolus, *desquels la bou-
che*, comme dit le Prophete & apres
luy l'Apostre S. Paul, *est un sepulcre
ouuert*, qui exhale à toute heure de
puantes exhalaisons capables d'infe-
cter les ames infirmes & imparfaites,
& d'offenser les plus saintes & les plus
chastes. Ramenteuons nous sou-
uent le dire celebre & tres-veritable
de ce Poete Grec que S. Paul alle-
gue au quinzieme de la premiere *1. Cor. 15.*
aux Corinthiens, *Les mauuaises com- 33.*

qu'il y a entr'eux & nous en cela, est qu'ils ont le Diable en la bouche, & que nous l'auons dedans les oreilles par le moyen de telles paroles infectes. Car ils prennent plaisir à les dire, & nous à les ouïr. Ainsi nos compagnies qui deuroient estre comme celles des mouches à miel, lesquelles s'assemblent pour composer cette douce & precieuse liqueur qu'ils ont cueillie sur les fleurs, deuient cōme celle ou des guespes qui ne se joignent que pour succer quelque pourriture, ou des corbeaux qui ne s'assemblent que pour se repaistre de quelque charogne. Chers freres, si par le passé nous auons offensé Dieu en cela, demandons luy en pardon de bon cœur, & corrigeons désormais ce defect. Fuyons la frequentation de telles personnes, & si elles se rencontrent dans nos compagnies, tesmoignons leur & par gestes & par paroles combien leurs propos infects nous déplaisent. L'aimeroiy mieux, disoit vn ancien Pere, qu'on me jettast des pierres, que de me dire des paroles sales & impudi-

- ques. Disons en tout de mesme, & gardons nos oreilles, aussi bien comme nostre langue, nettes de toute impureté. Le temple de Dieu autresfois estoit couuert & comme herissé de petits obelisques & de petites pointes d'or, pour empescher que les oiseaux ne se vinsent poser dessus, & y faire quelque ordure. Nous qui sommes le temple du S. Esprit, herissons nous semblablement, & nous rendons inaccessibles à ces ordures, & à ces infections de paroles. Abstenez nous pour la mesme raison de toute mauuaise lecture, & que ni la gentillesse des inuentions, ni l'elegance des paroles, ni la subtilité des pointes qui se trouuent en tels escrits, ne nous attirent point à les lire. Plus vn mauuais liure flatte & recrée l'imagination, plus il est dangereux. C'est vn aspic qui chatouille en piquant, & qui par ce petit plaisir qu'il cause fait que la coër vient à se dilater, & reçoit tant plus promptement le poison qui le tue.

Si nous voulons auoir vne lecture qui nous soit delectable & profitable

tout ensemble, lisons la Parole de Dieu, cette Parole qui est *esprit & vie*, qui fait que les yeux voyent, qui réjouit le cœur, & qui restaure l'ame. Là nous rencontrerons, outre les leçons de la vraye sainteté & les preservatifs contre l'infection pestifere des paroles du monde, des plaisirs & des contentemens tels qu'y rencontroit le Prophete quand il disoit au Pseaume cent dix neufiesme, *O* Ps. 119.
combien j'ayme sa Loy! C'est ce dont je 97. 54.
deuise tout le jour. Tes tesmoignages sont mes plaisirs. Tes statuts m'ont esté autant de cantiques de Musique en la maison où j'ay demeuré comme estranger: & mesme de beaucoup plus grands, parce qu'il n'auoit lors que les escrits de Moyse; & nous auons de plus les siens, nous auons de plus ceux des autres Prophetes qui l'ont suivi, nous auons de plus ceux des Euangelistes & des Apostres, qui contiennent vne beaucoup plus grande abondance de toute sorte de saints & salutaires enseignemens, soit pour nostre instruction en la foy,

soit pour la conduite de nostre vie,
soit pour nostre consolation en la
grace de Dieu. Là nous trouuerons
la matiere de ces propos d'edification
& qui donnent grace à ceux qui les
oyent, dont l'Apostre nous recom-
mande l'vsage à l'opposite des pro-
pos infects des prophanes. Car ce
n'est pas assez, mes freres, que nous
nous abstenions des souillures aus-
quelles ceux qui n'ont point la crain-
te de Dieu, prostituent leur langue.
Il faut que nous ayons tousiours en la
bouche des propos qui soyent bons à
l'edification de nos freres, & propres
à entretenir & mesmes à accroistre
les dons & les graces de Dieu en eux,
afin qu'en nous se verifie ce qui est
dit par le Sage au quinziemesme du li-
ure des Prouerbes, que *la parole saine,*
c'est à dire, qui n'est point corrom-
puë de vice, ni infectée de mauuais
discours, *est vn arbre de vie.* Que la
nostre soit semblable à ce vray arbre
planté *au milieu du Paradis de Dieu,*
Apoc 22.2 & dont il est dit en l'Apocalypse qu'il
porte des fruits tous les douze mois de
l'année. Qu'elle en porte en tout

temps, ie dis des fruits d'instruction, d'exhortation, de consolation, de conseils & d'admonitions salutaires. Qu'il soit de l'ouuerture de nostre bouche comme de celle d'un cabinet Royal, où on voit toutes sortes de choses rares, exquisés, precieuses. Mais que ce soit avec cette difference qu'au lieu que là ceux auxquels on ouure tels cabinets, doiuent porter des yeux, & non des mains, & se contenter de la veüe des richesses qui y abondent, icy nous ouurons nostre bouche non pour faire voir & admirer nostre sagesse & nostre sainteté, mais pour donner grace à ceux qui nous oyent, en leur parlant de Dieu, afin qu'ils l'adorent; de sa sainteté, afin qu'ils l'imitent; de ses merueilles, afin qu'ils les admirent; de sa Parole, afin qu'ils la croient, de ses commandemens, afin qu'ils les observent; de ses jugemens, afin qu'ils les craignent; de ses bien-faits, afin qu'ils s'en rendent reconnoissans; des vices qu'il defend, afin qu'ils les abhorrent; des vertus qu'il ordonne, afin qu'ils les pratiquent, de l'infer,

afin qu'ils l'eussent ; de la vie éternelle, afin qu'ils y aspirent, & qu'ils y parviennent enfin avec nous. Quand nous sommes avec nos prochains, que ce soit ou pour profiter des graces que Dieu leur a départies, ou pour leur faire part de celles que nous auons reçues de luy ; en les instruisant, s'ils sont ignorans ; en les reprenant, s'ils sont vicieux ; en les exhortant, s'ils sont lâches ; en les conseillant, s'ils sont en peine ; en les consolant, s'ils sont affligés ; & en fin en contribuant tout ce que nous pouvons à l'avancement de leur salut, comme ils le doivent faire à celui du nostre. Que tout nostre entretien soit Saint & honneste, comme il est convenable à des enfans de Dieu. Que les mondains s'entretiennent des choses du monde, qui est leur passion & leur idole. Nous qui sommes Chrétiens, entretenons nous des choses de Christ, qui est tout nostre amour ; & de celles de son Royaume, qui est toute nostre prétension, & nostre espérance : afin que comme quand les deux disciples allans en

Emmaus apres sa resurrection, parloient de luy, il se trouua au milieu d'eux, leur exposa les Escritures, leur rompit son pain, & leur remplit le cœur de consolation & de joye, nous aussi parlans de luy ordinairement, l'ayons ordinairement au milieu de nous pour en estre instruits, consolez & amenez à la vie eternelle. On disoit autres fois à S. Pierre, Tu es aussi de ses disciples, car ton langage te donne à connoistre. Montrons par nos paroles que nous le sommes en effect. Parlons comme de vrais Chrestiens, nourris en son Eglise, instruits en ses preceptes & animez de son Esprit. Que cette bouche qui a eu l'honneur tant de fois de receuoir le Sacrement du corps & du sang du Seigneur, & qui tous les jours luy presente nos actions de graces & nos prieres, soit toute cōsacrée à sa gloire & à l'edification de nos freres, qui sont ses membres aussi bien comme nous; & que tous nos propos soyent parfumez de la bonne odeur de son Euangile, & rendent de plus en plus honorable sa sainte discipline. Ainsi

nostre Sauueur sera glorifié en nous, nos prochains edifiez, ses graces espandues & multipliées de plus en plus & en nous & en eux. Et à la fin cette sainteté que nous aurons gardée, tant en nos propos qu'en nos actions, sera couronnée & récompensée d'une gloire immortelle, en laquelle nous le benirons & le célébrerons à jamais de cœur & de parole parmi ses Anges, & tous les esprits bien-heureux.



SERMON

DOVZIESME, .

Sur ces paroles de l'apostre, au 4.
chap. de l'Epistre aux Ephesiens.

*Verf. 30. Et ne contristez point le S.
Esprit de Dieu, par lequel vous avez esté
scellez pour le iour de la redemption.*



Ntre vne infinité de dōs
que Dieu a faits aux hō-
mes, il y en a deux tres-
illustres & vrayment di-
gnes de sa grandeur &
de sa liberalité, lesquels comme il leur
auoit long-temps promis par la bou-
che de ses Prophetes, aussi les leur a-il
effectiuement exhibez en la plenu-
de des temps. L'un est celuy de son
Fils bien-aimé, l'autre celuy de son
Esprit. Tous deux tellement dons
qui sont d'une mesme nature que le
donateur, voire qu'ils sont les dona-
teurs d'eux-mesmes. Le premier
a esté d'une amour ineffable à

l'endroit des hommes, & d'une nécessité absolue pour les sauver, parce qu'il estoit impossible qu'ils fussent delivrez de la damnation eternelle où ils estoient tombez par leur peché que par une entiere satisfactiō à la justice souveraine de Dieu, qui ne se pouuoit faire que par une personne qui fust & homme pour souffrir les peines deues à nos pechez, & Dieu pour donner à ses souffrances vn prix & vne valeur infinie. Mais ce don là, tout grand & nécessaire qu'il estoit, leur eust esté tout à fait inutile ; parce qu'estans sourds, aueugles & endurcis en leurs pechez, & ayans tous vn entendemēt qui n'estoit que tenebres, vn cœur qui estoit tout de pierre, & vne chair qui ne se peut assujettir à la Loy de Dieu, ils n'eussent jamais satisfait à la condition sous laquelle Iesus-Christ leur presentoit son salut, en se conuertissant à luy par la foy & par la repentance: mais fussent morts en leur impénitence & en leur incredulité, si à cette premiere grace il n'eust adjousté la seconde. C'est pourquoy apres auoir donné son Fils au monde, il a donné

son Esprit aux Esleus, pour les illuminer, les regenerer & les faire nouuelles creatures, & pour leur estre vn seau de sa grace, & vne arrhe assuree de la redemption eternelle qu'il leur a acquise par son merite, & dont il est allé prendre possession pour eux en la gloire de son Royaume. Comme ce don est grād, & d'ineestimable valeur, aussi pour peu qu'ils ayent ou de ressentimēt de l'amour qu'il leur a montré, ou de soin de leur propre bien, ils sont tenus & de s'en monstrier fort reconnoissans enuers Dieu par toute sorte de fidelité, de respect, de seruice & d'obeïssance, & de le cōseruer fort precieusement en eux, comme le lien principal de leur vnion avec Christ, le thresor de leurs vrayes richesses, la source de toute leur joye, le seau de leur adoptiō, & *l'arrhe de leur heritage.* C'est pourquoy l'Apostre S. Paul les admoneste si souuent de *ne receuoir point sa grace en vain*, de ne laisser point *esteindre sa flamme*, & de *n'outrager point l'Esprit de grace.* C'est à quoy tend aussi l'exhortation qu'il fait en ce lieu aux fidelles d'Ephese,

en leur disant, comme vous venez de, l'entendre, *Et ne contristez point le S. Esprit de Dieu, par lequel vous avez esté sceillez pour le jour de la redemption.*

Exhortation importante en laquelle pour en bien comprendre le sens en toutes ses parties, & en tirer les instructions salutaires que Dieu nous y presente, nous auons à considerer premierement la qualité qu'il donne à cette personne diuine en l'appellant le *S. Esprit de Dieu*; Secondement l'estroite obligation que luy ont les fidelles auxquels il parle entant qu'il les a *sceillez pour le jour de la redemption*; Finalement le deuoir qu'ils luy ont & pour sa qualité & pour leur obligation, a sauoir de *ne le contrister point*, mais de s'estudier plustost à luy plaire de toute leur puissance.

Le mot *Esprit*, originellement signifie l'air ou le vent, comme quand il est dit au Pseaume cent quatriesme, & rapporté par l'Apostre au premier chapitre de l'Epistre aux Hebreux. *Il fait les Esprits, ses Anges*, c'est à dire les vêts, cōme nos interpretes l'ont bien traduit, & en S. Iean, *l'Esprit souffle où il veut*, c'est à dire, le vent, comme l'a tourné

tourné nostre Version. Mais de là il a esté transferé aux natures spirituelles, parce qu'estans charnels comme nous sommes, nous ne les pouuons conceuoir que sous la figure des corporelles; entre lesquelles l'air & le vent sont celles qui ont le moins de corps, qui tombent le moins sous nos sens, & qui pourtant approchent le plus des esprits, & peuuent estre dites spirituelles au prix des autres massiues & grossieres. C'est pourquoy nous appellons les Anges & les ames humaines *esprits*; & nous donnons mesme ce nom à Dieu, comme fait aussi Iesus-Christ au quatriesme de l'Euan-gile selon saint Iehan, pour donner à entendre qu'il n'a rien de materiel, de visible ni de palpable.

Or combien que ce soit vne propriété absolue, essentielle & commune à toutes les personnes de la Trinité, le Pere estant aussi bien Esprit que le Fils, & le Fils que le Saint Esprit: neantmoins cela est attribué particulièrement à la troisieme, soit parce qu'il agit en l'œuvre de nostre sanctification, de nostre consolation & de

nostre salut d'une façon imperceptible, & toutesfois avec une merueilleuse efficace, semblable au vent qu'on ne voit point, & dont la vertu est tres-penetrante, & l'operation tres-puissante; soit parce que comme l'homme produit toutes ses actions par son esprit, ainsi le Pere & le Fils operent en nous par le Saint Esprit, qui est la vertu par laquelle ils exploitent leurs grands ouvrages. Car l'Ecriture Sainte nous represente d'ordinaire le Pere comme l'auteur principal de ses œuvres; le Fils comme la Sapience par laquelle il les arrange & les ordonne; le S. Esprit comme la Puissance par laquelle il les met à execution. C'est la raison pour laquelle l'Apostre l'appelle icy l'Esprit de Dieu.

A quoy il adjouste, comme vous voyez, l'eloge de *Sainct*, comme fait par tout l'Ecriture, l'appellant ordinairement ou *le Sainct*, ou *l'Esprit de Saincteté* ou *de sanctification* : parce qu'encor que la Saincteté appartienne indifferemment à toutes les trois personnes diuines, le Pere estant aussi

bien saint que le Fils, & le Fils que l'Esprit qui procede du Pere & de luy: neantmoins comme le Pere a pris à foy l'office de nous creer, & a donné au Fils celuy de nous racheter ainsi le Pere & le Fils ont donné au S. Esprit celuy de nous sanctifier; & que de tous les effets qu'il produit en nous la sainteté est le principal, & celuy par lequel il nous rend plus semblables à Dieu & plus conformes à nostre Redempteur. Car il produit bien en nous la foy par laquelle nous embrassons le Seigneur Iesus, & sommes asseurez de la remission de nos pechez en son sang, & l'esperance d'une meilleure vie, *par laquelle nous pénétrons iusqu'au dedans du voile ou Iesus est entré comme avant-coureur pour nous:* mais ni la foy n'est qu'un moyen pour nous amener au salut, lequel consiste d'une part en la sainteté, & de l'autre en la gloire & en la beatitude, mais en la sainteté sur tout, sans laquelle la gloire & la beatitude seroit comme la splendeur & la prosperité des enfans du monde, avec laquelle quelques bien-heureux qu'on les croye ou

qu'ils se croient eux mesmes, & de quelques rayons de gloire qu'ils soyent environnez, ils ne laissent pas d'estre en effect tres-miserables & tres-odieux à Dieu & à ses Anges; ni l'esperance n'est autre chose que l'attente de ce grand salut, dont comme nous venons de vous dire la sainteté parfaite fait la plus considerable partie, n'y ayant non plus de comparaison entre cette esperance & cette sainteté qu'entre l'attente d'un grand bien & son plein accomplissement. De fait & cette foy & cette esperance là cesseront aux premiers rayons de la gloire, comme les astres disparoissent en la presence du Soleil: au lieu que la sainteté qui consiste en une vraie charité envers Dieu & envers les hommes, durera eternellement. C'est la propriété par laquelle Dieu veut sur tout estre glorifié entre les hommes & les Anges; l'excellence de sa nature consistant plustost en ce qu'il est saint, qu'en ce qu'il est ou grand, ou puissant, ou tres-simple, ou eternal, ou infini. Aussi en l'hymne que luy chantent les Seraphins dans

les reuelatiōs d'Esaie il n'est pas exalté pour sa grandeur, pour son eternité ni pour sa puissance, quoy que telles perfections soyent tres-dignes de leurs admirations & de leurs loüanges, mais pour sa sainteté; ces bienheureux Esprits crians alentour de son thrône, *Sainct, Sainct, Sainct est l'Eternel des armées*. Et en la prophetie de Daniel l'Ange parlant de nostre Seigneur Iesus-Christ l'appelle non le grand des grands, ou le puissant des puissans, mais *le Sainct des Saincts*. C'est la raison aussi pour laquelle son Esprit ayant à former son image en nos cœurs n'y graue pas celle de sa grandeur, de son eternité ou de sa puissance, mais celle de sa sainteté. Ayant donc esgard à l'office qu'il exerce enuers nous, & pour lequel Iesus-Crist nous l'a enuoyé de par son Pere, & à cette efficace sanctifiante qu'il desploye en tous les fideles, il est tres-conuenablement qualifié icy par l'Apostre *le Sainct Esprit de Dieu*.

Or il ne se contente pas de le designer en cette façon aux fideles d'Ephese, il leur ramentoit d'abondant

la grande obligation qu'ils luy ont, de ce qu'entrant en eux il les a marquez comme enfans de Dieu, afin qu'ils soient reconnus comme tels, & admis vn jour à la jouissance de l'héritage de sa gloire. *Par lequel, dit-il, vous avez esté scellez pour le jour de la redemption.* Ne vous estonnez pas de ce qu'il dit *vous*, & non *nous*. Car ce n'est pas pour dire que le S. Esprit n'ait pas agi de mesme en luy, veu qu'ailleurs il s'y comprend formellement avec tous les autres, comme quand il dit au premier de la seconde aux Corinthiens, *Celuy qui nous confirme avec vous en Christ, & qui nous a oincts, c'est Dieu; lequel aussi nous a scellez, & nous a donné les arrhes de son Esprit en nos cœurs.* C'est seulement pour continuer le fil du propos qu'il auoit commencé aux Chrestiens d'Ephese, pour lesquels il apprehendoit qu'apres auoir en leur conuersion renoncé à Satan & au monde, ils ne se laissassent tenter à retourner aux façons de viure des infidelles, & qu'ainsi ils ne se rendissent indignes des graces spirituelles qu'ils auoient receuës.

Car il leur auoit dit dès l'entrée de ce chapitre, *Je vous prie, moy le prisonnier au Seigneur, que vous cheminiez dignement comme il est seant à la vocation à laquelle vous estes appellez.* Il auoit dit en suite, *Je vous dis & atteste de par le Seigneur que vous ne cheminiez plus comme le reste des Gentils qui cheminent en la vanité de leur pensée, vous n'avez point ainsi appris Christ, voire si vous l'avez escouté & si vous avez esté enseignez de par luy. Parquoy dépouillez le vieil homme. Parlez en verité chacun à son prochain. Courroucez vous & ne pechez point. Ne donnez point lieu au Diable.* Il poursuit donc icy à parler en seconde personne, disant, *Et ne contristez point le saint Esprit de Dieu, par lequel vous avez esté scellez; comme s'il leur disoit, Autresfois que l'Esprit du monde regnoit en vous, comme aux autres enfans de rebellion, vous prostituiez en toute licence & vos corps & vos ames à toute sorte d'abomination. Maintenant vous n'estes plus en cet estat là. Car quand Dieu vous a admis à sa grace & à l'honneur de son Baptisme, il a ou-*

uert les cieux sur vous, il a dit, **Ce** sont icy mes enfans bien-aimez, auxquels je prens mon bon plaisir, & a fait descendre sur vous son Esprit, qui vous a imprimé sa marque, afin que vous soyez reconnus à jamais pour siens, & faits vn jour participans de sa beatitude celeste. Vous n'estes plus de la condition des enfans du monde, il ne faut plus viure comme eux. Vous ne deuez plus auoir rien de commun ni avec la malignité de leurs passions, ni avec la saleté de leurs conuoitises. Le seau de Dieu vous a distinguez d'auec eux par les diuines marques qu'il a imprimées en vous. Reuez-le & viuez desormais dans la pureté & dans l'innocence, comme personnes qu'il s'est consacrées par son Esprit. Car l'Apostre ne parle pas icy à ceux qui ayans oui de leurs oreilles charnelles la parole de verité, auoient receu les seaux extérieurs des saints Sacremens en leurs corps, & riẽ plus, pour estre reputez enfans de l'Eglise tant qu'ils viuroient en sa communiõ visible : mais à ceux qui ayans creu veritablement en nostre Seigneur le-

Iesus-Christ , auoient esté vrayement entez en son corps mystique, & faits vrayment enfans de Dieu pour estre vn iour les heritiers de ses couronnes immortelles. C'est à ceux-là qu'il dit qu'ils ont esté *seellez par le S. Esprit pour le jour de la redemption.*

Seeller c'est proprement imprimer la figure & les caracteres d'un cachet sur de la cire , ou sur quelque autre matiere capable de son impression. Ainsi lors que le S. Esprit forme par sa vertu en nos ames la vraye sainteté, qui naturellement n'y est point, & n'y peut estre produite que par luy seul , en qui elle reside originellemēt & tres-parfaitement , il est dit nous seeller. Et c'est en ce sens qu'il a dit au premier chapitre de cette Epistre, *Ayans ouï la Parole de Verité, l'Euan-gile de vostre salut, vous avez esté seellez du saint Esprit de la promesse.* Le seau avec lequel il le fait, c'est luy-mesme. Car comme Iesus-Christ nous reconciliant à Dieu par sa mort , a esté tout ensemble le Sacrificateur & le sacrifice : aussi le saint Esprit nous consacrant à Dieu par sa vertu , est tout en-

semble le scellant & le seau. Je dy le seau qui seul peut imprimer la sainteté en nous. La Loy certes ne le pouvoit. Car elle ne donnoit point d'esperance de pardon aux hommes, mais disoit absolument à tous ceux qui y contreuiendroient, *Maudit est quiconque ne sera permanent en toutes les choses qui sont escrites au liure de cette Loy pour les faire.* Or où il n'y a point d'esperance de pardon, il n'y a point de vraye repentance; & où il n'y a point de vraye repentance, il n'y a point aussi de vraye sainteté. Tout ce qu'elle pouvoit exciter en les auditeurs, c'estoient des mouuemens de mercenaires & d'esclaves, non des affections franches & filiales. Car en leur disant, *Fay ces choses & tu vivras, Maudit est qui ne les fera,* elle ne leur donnoit qu'un esprit de servitude pour estre en crainte, mais non l'esprit d'adoption pour honorer & servir Dieu en qualité de Pere. Tant s'en faut qu'elle peust donner la vraye sainteté, que selon l'Apostre au sixiesme de l'Epistre aux Romains, pour estre vrayment saint, il faut n'estre plus

sous la Loy. *Le peché*, dit-il, *n'aura plus de domination sur vous, pource que vous n'estes plus sous la Loy, mais sous la Grace.* La Philosophie encor beaucoup moins. Car que pouuoit-elle imprimer en ceux qu'elle enseignoit, qu'une vaine & superficielle apparence de sainteté, & des vertus morales & ciuiles ? Or ces vertus là estoient bien capables de donner quelque forme & quelque esclat aux actions exterieures, pour remplir de presumption ceux qui les possedoient, & pour leur acquérir l'applaudissement des theatres, & la vaine gloire du monde, mais elles ne reformoient nullement les ames ni les affections. Non, non, ni l'une ni l'autre ne pouuoit pas nous redonner cette venerable image de Dieu, que nous auons perduë par le peché. Le seul cachet qui le peut imprimer veritablement & avec efficace en nous, c'est le Saint Esprit. Le sujet ou la cire où il fait son impression, n'est pas nostre ame seulement, mais aussi nostre corps. Car saint Paul ne dit pas, par lequel vos ames ont esté scellées, mais, *par lequel vous avez esté*

*i. Cor. 6. 19.
20.*

Rom. 6. 11.

Rom. 12. 1

seellez. Dieu a crée nostre corps & nostre ame, Iesus-Christ a racheté l'un & l'autre. L'un & l'autre donc luy appartenant par deux si justes titres, celuy de la Creation & celuy de la Redemption, il est bien raisonnable que l'un & l'autre porte sa marque par vne vie vraiment sainte. Vous n'estes point, leur dit-il ailleurs, à vous mesmes, vous avez esté achetez par prix. Glorifiez donc Dieu en vos corps & en vos esprits, lesquels appartiennent à Dieu. Que le peché ne regne point en vostre corps mortel, pour luy obeir en ses couuoitises, Et n'appliquez point vos membres pour estre instrumens d'iniquité à peché : mais appliquez vous à Dieu, comme de morts estans faits viuans, & vos membres pour estre instrumens de justice à Dieu. Je vous exhorte, freres, par les compassions de Dieu, que vous presentiez vos corps en sacrifice viuant, saint, plaisant à Dieu, qui est vostre raisonnable seruice. Pour cet effect il est necessaire que le Saint Esprit de Dieu imprime cette vraye sainteté, instruisant nos entendemens en toute sagesse & intelligence spirituelle, for-

mant en nostre volonté vne entiere conformité à la sienne, creant en nos affections vne ardente amour enuers Dieu, vne charité cordiale enuers nos prochains, la patience, la benignité, la douceur, & les autres vertus Chre-
stiennes, rendant tous les membres de nostre corps souples & obeïssans à l'Esprit, reprimant les regards lascifs, les entretiens oïseux, les propos des-
honnestes, prophanes & malins & tous mouuemens déreglez; en vn mot consacrant toutes les facultez de nos
ames & de nos corps à la gloire de Dieu par l'exercice de la saincteté & de la justice. Car ce sont là les vrays
characteres de ce cachet, les fruits propres de cét Esprit, les traits enfin & les lineamens auxquels Dieu reconnoi-
stra au jour de la redemption ceux à qui aura esté appliqué son seau.

C'est pour ce jour là que l'Apostre dit que cét Esprit les seelle; là où ce que nos interpretes ont traduit, *pour le jour*, se peut aussi tourner, *jusques au jour*, comme ils l'ont eux-mesmes tourné au premier chapitre. Mais l'un & l'autre reuient à vn mesme sens,

à sçauoir que tous ceux qui auront esté icy scelez & sanctifiez par le saint Esprit, seront aduoüez de Dieu pour siens au jour auquel il mettra à part ses plus precieux joyaux, & se verront affranchis pour jamais de toute sorte de dangers & de maux & du corps & de l'ame, Dieu essuyant toutes larmes de dessus leurs yeux, & les rendant jouïssans à toûjours d'une liberté, d'une paix, d'une gloire, & d'une beatitude immortelle. Car Il nous est fait mention au Nouveau Testament de deux sortes de redemption. L'une est la deliurance de la malediction de la Loy que nous auïos encouruë pour nos pechez, laquelle deliurance s'est faite par nostre Seigneur Iesus en sa Croix, où il a payé pour nous nostre dette. C'est celle de laquelle il disoit au premier chapitre que nous auons redemption en Christ par son sang, à sçauoir la remission de nos offences : & au troisieme de l'Epistre aux Romains, que nous sommes gratuitement justifiez par la grace de Dieu par la redemption qui est en Iesus Christ, c'est à dire, par le sacrifice qu'il a fait.

de son propre corps , pour satisfaire à la justice de son Pere. La seconde est la deliurance de la main de nos ennemis, qui est vne suite necessaire de la premiere. Car puis que Christ est mort pour nous, nous sommes reconciliez avec Dieu : & puis que nous sommes reconciliez avec luy , & que mesme nous sommes ses enfans , nos ennemis ne doiuent plus auoir aucune puissance sur nous. A raison dequoy l'Apostre nous dit ailleurs que *Christ* 1. Cor. 1. 30. *nous a esté fait de par le Pere sagesse, justice , sanctification & redemption; Sagesse* pour nous illuminer en la connoissance de Dieu & des choses diuines , *Justice* pour nous rendre justes deuant le Tribunal supreme par l'imputation de son obeissance; *Sanctification*, pour nous regenerer à sa ressemblance; & *Redemption* , pour nous retirer de la main de nos ennemis. C'est ce qu'il appelle au premier chapitre *la redemption de la possession acquise de Christ* : & au huietiesme de l'Epistre aux Romains , *la redemption de nos corps* : parce qu'encor que nous soyons bien deliurez de la maledi-

*Rom. 8. 1.**Ieb. 5. 24.*

tion à laquelle la Loy en sa rigueur condamne absolument tous ceux qui la violeront, & qu'il n'y ait point de condamnation à ceux qui sont en Iesus-Christ, veu que luy mesme nous assure que qui croit en luy ne viendra point en condamnation, mais est passé de la mort à la vie : neantmoins nous auons, tant que nous sommes en ce monde, plusieurs ennemis à combattre, tant ceux de l'ame, comme nostre corruption naturelle, le Diable & le monde, qui à toute heure nous sollicitent au peché ; que ceux du corps, cōme les maladies, les playes, les douleurs, la vieillesse, & finalement la mort mesme, qui est, dit l'Apostre au 15. de la 1. aux Corinthiēs, le dernier de nos ennemis. A l'heure de la mort nous sommes bien affranchis quant à l'ame de toutes les tentatiōs de Satan, de la chair & du monde, & quant au corps, de toute sortes de douleurs : mais neantmoins nos corps estans separez d'auecques nos ames, reduits en poudre & detenus dessous l'Empire de la mort, nostre redemption n'est pas encores accomplie. Elle le
fera

fera lors seulement que nos ames seront parfaitement repurgées de tout peché & de toute mauuaise conuolition, déchargées de tout soucy, guerries de toute tristesse, & rejointes avec leurs corps impassibles & glorieux, lesquels nostre Seigneur Iesus aura rendus conformes au sien, selonc cette efficace par laquelle il peut mesmes assujettir toutes choses à luy. *phil. 3. 21.*

A cette glorieuse redemption est destiné vn certain jour, auquel toute l'Eglise en corps & tous ses membres vn par vn seront rendus & en ame parfaitement victorieux de tous leurs ennemis, & introduits en pompe triomphale parmi les acclamations des Anges & de tous les Esprits bienheureux en la Ierusalem celeste pour y jouir des biens qu'œil n'a point veus, qu'oreille n'a point ouïs, & qui ne sont montez en cœur d'homme, que Dieu a preparez à ceux qui l'aiment.

Vous me demanderez, peut estre, pourquoy c'est qu'il a reserué la redemption entiere de tous ses esleus à vn mesme jour, & jour si esloigné de plusieurs qui l'ont serui & adoré dès

les premiers aages du monde. Car, direz-vous, puis qu'il leur a promis son salut pourueu qu'ils croient & se repentent, pourquoy ne les en rend-il jouissans aussi tost qu'ils ont satisfait à cette condition là ? Pourquoy dès lors ne les deliure-il tout à fait de toute leur corruption naturelle, de toutes les tentations de Satan & du monde, de toutes les miseres de cette vie, & principalement de la necessité de mourir ? Je vous pourroy respon- dre simplement, Pource qu'il luy a pleu ainsi ; & cela vous deuroit suffi- re. Car comme les Israélites se con- tentoient d'adorer deuant l'Arche, sans aller leuer les voiles qui la cou- uroient : aussi nous doit-ce estre assez de sauoir que toutes les dispositions de la Prouidence de Dieu en la con- duite du monde & de l'Eglise sont tres-sages, tres-justes & tres vtils à sa gloire & à nostre salut, sans vouloir penetrer plus auant dans les secrets motifs de ses conseils. Mais parce qu'encor que nous ne nous deuions pas rendre indulgens à la curiosité de la chair, neantmoins quand nous

auons des raisons par lesquelles nous pouuons edifier les esprits , & faire voir & admirer les merucilles de la sagesse , de la bonté , de la justice & de la puissance de Dieu en ses œuures , nous ne les deuons pas negliger , je vous en proposeray quelques vnes , que vous ne jugerez pas , je m'asseure , indignes d'estre considerées. Si Dieu amenoit ses esleus à vne parfaite saincteté & à vne pleine felicité dès le moment qu'il croyent en son Fils , ce seroit ou pour apres cela les laisser à. toûjours icy bas , ou pour les esleuer en corps & en ame dedans le ciel. Dire que ce fust pour les laisser à toûjours sur la terre , en vne region de mort & de corruption , parmi vn monde tout confit en vice & en meschanceté , ce seroit dire vne chose qui repugneroit formellement à la nature de la vraye & parfaite felicité. Car comment pourroit estre parfaitement heureux vn homme qui brulant de zele pour la gloire de Dieu , auroit à viure parmi des impies & des prophanes , & auroit tous les jours les oreilles battues de leurs blasphemes ; vne ame

chaste qui comme Lot auroit à habiter dans vne Sodome, pour y voir & entendre leur abominations à toute heure; vn esprit doux & paisible comme le Psalmiste seroit obligé à séjourner en Messec, & à demeurer és tabernacles de Kedar, c'est à dire, parmi des gens barbares & cruels? Avec cela vne telle demeure ne conuendroit aucunement à des membres de Iesus-Christ, qui seroient parfaitement vnis avec luy par la vraye sainteté. Car le chef & les membres doiuent estre d'une mesme condition. Or celle de Iesus-Christ nostre Chef apres sa resurrection n'est pas de demeurer sur la terre, mais de regner dedans le ciel, qui est le sanctuaire de la Diuinité, & le domicile des saints & bien-heureux esprits. Là donc aussi faut il que tous ses saints dès qu'ils sont parfaitement resuscitez avec luy en nouueauté de vie soyent recueillis avecques luy. Et pourtant disoit-il

Job. 17. 24. luy mesme, *Pere, mon desir est touchant ceux que tu m'as donnez, que là où je suis, ils soyent aussi avecques moy, afin qu'ils contemplent ma gloire. De dire aussi*

que ce fust pour les esleuer dès lors dans le ciel, il n'y a point d'apparence. Car il faudroit qu'il le fist ou en les faisant passer par la mort ou en les exemptant. Or ni l'un ni l'autre ne se peut dire. Non le premier, car pourquoy mourroient-ils ? Pour satisfaire à la justice de Dieu pour leurs fautes ? Mais Iesus-Christ y a desia parfaitement satisfait par sa mort. Pour esteindre tout à fait le peché en eux ? Mais il y auroit desia esté entièrement esteint par la parfaite sainteté à laquelle Dieu les auroit amenez. Non aussi le second. Car s'ils estoient esleuez dans le ciel sans passer par la mort, premieremēt ils ne seroient pas conformes à Christ qui n'est entré que par la mort en sa gloire. Et puis la puissance qu'il fait paroistre soit en leur conuersion à sa grace soit en leur exaltation en sa gloire, en seroit beaucoup moins admirable. Car voyans tous les jours ceux qui croyroient en Iesus-Christ, estre ravis au ciel en corps & en ame, sans voir aucunement la mort, ce ne seroit pas grande merueille qu'ils creussent en

son nom, & qu'ils embrassassent son Euangile. Au contraire ce seroit vn prodige qu'ayans tous les jours de si admirables spectacles deuant les yeux, neantmoins ils ne creussent point Mais quand ils voyent les fidelles mourir aussi biẽ que les autres, & qu'ils ne laissent pas de croire en luy comme au Prince de leur salut, & de s'y attacher tellement qu'il n'y a mort ny vie qui les en puisse separer, Dieu leur faisant voir la splendeur de la vie celeste au trauers des honneurs & des tenebres de la mort: C'est là qu'est la merueille, c'est là que paroist veritablement cette puissance de Dieu ẽs croyans, que l'Apostre a recommandée si hautement au premier chapitre de cette Epistre, & de laquelle il dit que c'est la mesme par laquelle Dieu a resuscité Iesus-Christ. Je dy le mesme de l'efficace du saint Esprit qui reluit en leur esperance. Car si c'estoit chose ordinaire que les fidelles aussi tost apres auoir creu fussent esleuez dans le ciel, & ce sans passer par la mort, ce ne seroit pas chose fort admirable, que ceux qui en

auroient veu mille exemples , esperassent qu'en croyant en Christ ils seroient exemptez tout de mesme de la necessité de mourir & esleuez tout de mesme en son Paradis. Mais que n'en ayans jamais veu d'exemple , & au contraire voyans tous les jours les fidelles mourir aussi bien que les autres hommes , & sachans bien qu'eux mesmes mourront vn jour de mesme qu'eux , ils se promettent avec certitude que plusieurs siecles apres leur mort Christ les releuera du tombeau, rendra leur corps , tout vil qu'il est, conforme à son corps glorieux , & les esleuera en corps & en ame en sa gloire celeste , c'est ce qui est vrayment digne d'estre admiré. De plus ne vous semble-il point que la vertu de Dieu en nostre glorification paroistra avec bien plus d'esclat quand il releuera nos corps tous ensemble de leurs tombeaux, restituant à chacun le sien propre , encores que les cendres en ayent esté meslées & confondues en cent mille façons depuis trois mille, quatre mille, cinq mille & six mille ans, que s'il auoit esleué chacun de nous dans

le ciel à mesure qu'il se seroit conuertī à luy ? Vous m'auoüerez enfin qu'il est beaucoup plus conuenable à la bonté, à la justice & à la sagesse de Dieu qu'il y ait vn jugement general qui se fasse à vn mesme jour en presence de tout le monde, où soit rendu à chacun selon ses œuvres, les mechans estans releguez au feu eternel preparé au Diable & à ses Anges, & les bons mis en possession du Royaume qui leur a esté preparé dès la fondation du monde ; que de ne faire qu'un jugement particulier de chacun à mesure qu'il le retireroit de ce monde, ce qui ne seroit connu qu'à fort peu de gens, à sauoir à ceux qui se trouueroient à l'exaltation de chacun d'eux en sa gloire, sans que les autres hommes en eussent aucune connoissance. Vous voyez donc que ce n'est pas sans de tres-grande considerations que la sagesse de Dieu a trouué estre plus à propos de differer nostre entiere redemption jusques à ce jour là..

Mais afin qu'il ne nous arriue ce que dit le Sage au treiziesme du liure

des Prouerbes, que *l'esperance differée fait languir le cœur*, il nous a enuoyé des cieux son Esprit, le grand Conso- lateur des ames, qui imprimant en nous sa marque & sa diuine image, commence dès ce monde à y former la vraye saincteté, qui est la principale partie de nostre salut: & quant à l'autre, qui est la beatitude de la gloire, que ce nous est, comme a dit quelcun des anciens, vn Paradis auant le Paradis. C'est ce qu'entend l'Apostre quand il dit que Dieu nous a scelez pour le jour de la redemption. Cet Esprit estant tel en soy qu'il nous l'a descrit, & nous rendant de si bons offices au sejour qu'il fait dedás nous, si nous auons quelque ressentiment des graces qu'on nous fait, & quelque affection à nos propres contentemēs, nous deuons sans doute estre fort soigneux de le bien entretenir en nos cœurs, & de ne faire jamais chose qui luy puisse desplaire, & l'obliger à nous oster la joye de son salut. C'est pourquoy saint Paul dit icy, *Ne contristez point le saint Esprit de Dieu*, c'est à dire, Gardez vous bien de fai-

re aucune chose qui luy déplaïse, qui empesche l'effect & les progres de la sanctification qu'il a commencée en vous par sa grace, qui souille & empuantisse le lieu qu'il a choisi pour sa demeure, & qui en fin altere la paix, la joye & les consolations qu'il nous donne en Iesus-Christ nostre Seigneur. Car quand il parle de le contrister, il ne faut pas s'imaginer quelque chose de tel que ce que disent les Docteurs des Juifs au Thalmud que tous les jours à certaine heure Dieu pleure à chaudes larmes la desolation de son Temple & la dissipation de son peuple. Le Dieu bienheureux, comme le qualifie l'Apostre au premier chapitre de la premiere à Timothée, n'est point susceptible des passions qui agitent nostre nature. Car, comme il est dit au liure de Iob, *il maintient la paix en ses hauts lieux,* & en la jouissance paisible de ses propres perfections possède vn bonheur immuable, & qui ne souffre point de meslange de son contraire. Il est lumiere, & n'y a point de tenebres en luy, dit saint Iean en parlant du Pe-

re : ainsi pouuons nous dire du saint Esprit, il est la joye mesme, & n'y a point de tristesse en luy. Mais nous sommes dits l'offenser, l'irriter, l'attrister, quand nous faisons des choses contraires à sa nature & à sa gloire, & qui empeschent l'effect salutaire que deuroit auoir son operation en nous, soit pour nostre sanctification, soit pour nostre consolation, parce que si nous nous comportions ainsi à l'endroit d'un homme qui auroit un pareil amour enuers nous, & à qui nous aurions de pareilles obligations, nous luy donnerions sans doute un tres-grand ennuy; & que si le saint Esprit estoit d'une nature capable de sentir ces facheuses passions là, nos actions sont telles que nous les exciterions infailliblement en son cœur. Or quelles sont ces choses là, sinon celles qu'il a marquées dans les versets precedens, avec lesquels il lie celuy-cy par la particule copulative, *Et*, quand il dit, *Et ne cōtristez point le saint Esprit de Dieu ! Car qu'est-ce qu'il leur auoit dit ? Dépouillez le vieil homme, reuestez le nouveau, dépouillez*

le mensonge, parlans en verité chacun à son prochain, Courroucez vous, & ne pechez point, que le Soleil ne se couche point sur vostre colere, ne donnez point lieu au Diable; que celuy qui déroboit, ne dérobe plus, mais qu'il travaille à ce qui est bon, afin d'auoir à départir à qui en a besoin; que nul propos infect ne sorte de vostre bouche, mais celuy qui est bon à l'usage d'edification. Quand dōc maintenant il adjouste, Et ne contristez point le saint Esprit; n'est-il pas euident que c'est pour leur dire, Ne faites point ces choses là, parce qu'en les faisant vous le contristeriez. Et certes on ne peut point douter que comme le nouuel homme créé selon Dieu en justice & vraye sainteté; la verité, l'esprit patient, le travail de chacun en sa vocation legitime, l'aumosne, les propos d'edification, luy sont merueilleusement agreables: aussi le vieil homme, le mensonge, les coleres excessiues & inexorables, le larcin & les propos infects luy déplaisent extremement. Et si voir des choses contraires à nostre nature, à nostre volonté & à nostre honneur, nous

est vne juste matiere d'ennuy ; il n'est nul qui ne voye que nous luy en donnons , entant qu'en nous est , vn tres-grand , quand nous nous portons à ces choses là , qui sont si repugnantes à sa saincteté , si contraires à sa volonte , si prejudiciables à son honneur ; sur tout depuis qu'il est entré en nous , & qu'il a entrepris & commencé nostre sanctification. Car qui est l'ouurier qui ne s'attriste quand il est troublé en son œuvre , sur tout en vne œuvre excellente , qu'il a heureusement commencée , & qu'il a grandement à cœur ? Qui est le Peintre qui ne se fasche quand apres qu'il a employé beaucoup de temps & vn grand art à faire vn excellent tableau , on vient à y jeter de l'ancre ou de la boie , ou à y tirer d'autres traicts qui peruertissent & deshonnorent tout à fait son ouvrage ? Qui est le maistre qui ayant vn disciple , à l'instruction duquel il n'espargne rien , & voyant qu'il recule au lieu de s'auancer , ne s'en chagrine en soy-mesme , & n'y plaigne son temps & sa peine ? Qui est le laboureur qui n'ait vn déplaisir

extreme de voir qu'une vigne qu'il a cultivée avec toute sorte de soin, ne luy porte que des lambruches & des grappes sauvages? Le S. Esprit n'est-il pas de même envers nous, quand nous recommençons toujours à pecher? Car que ne fait-il point pour nous sanctifier? N'y employe-il pas au dehors ses preceptes, & au dedans ses inspirations? N'y employe-il pas ses promesses & ses menaces? N'y employe-il pas en fin ses benedictiōs & ses chastimens quand il en est besoin? Si donc apres qu'il nous a montré tant d'amour, & qu'il a pris un si grand soin de nous, nous nous souillons tous les jours de nouveaux pechez, est-il possible que cela ne l'offense? Ce n'est pas que pour luy il y ait aucun interest, car que nous soyons bons ou mauvais, que nous nous sauvions que nous nous perdions, il n'en sera ni plus ni moins heureux. Comme nos biens ne vont point jusqu'à luy, aussi ne font nos maux. *C'est à l'homme tel que nous, comme le remonstroit Eliu à Iob, que nostre meschanceté fait quelque chose; mais quant*

à luy, si nous pechons, qu'aurons-nous brassé contre luy ? Et quand nos forfaits se multiplieront, que luy aurons-nous fait ? Mais parce qu'il nous aime, il luy deplaist de nous voir perdre, qu'après qu'il nous a sceillez pour le iour de la redemption, grauant l'image de sa saincteté en nos ames, nous permettons que le Diable y vienne replanter la sienne, nous conformans à ce present siecle, & courans avec les mondains en vn mesme abandon de dissolution, qu'après qu'il est entré en nous, pour donner prix à nostre conscience, nous asséurer de l'amour du Pere, nous appliquer le benefice du Fils & nous consoler en l'attente de sa beatitude eternelle, nous troublions nous mesmes nostre repos, que nous alterions nostre joye, que nous diminuions nostre esperance, & que nous nous priuions mal-heureusement des doux fruits de son habitation en nos cœurs. C'est pourquoy il nous dit icy par la bouche de son Esprit, *Ne contristez point le Saint Esprit de Dieu, par lequel vous avez esté sceillez pour le jour de la redemption.*

Voila, chers freres, la substance de ce fruit salutaire que nous vous auons icy apporté pour en repaistre vos esprits. Mais comme au fruit materiel, outre l'agreable couleur avec laquelle il nous conuie à en manger, & le suc nourrissant dont puis apres il nous sustente, il y a dans son centre certaines petites cellules où il tient sa graine cachée, pour en produire nombre d'autres apres qu'il aura esté consumé : ainsi apres tout ce que nous venõs de vous dire sur l'excellence de cette remonstrance du grand Apostre, & des enseignemens salutaires qui nous y sont donnez, si vous l'examinez jusqu'au cœur, vous y trouuerez vne graine tres-abondante de doctrines tres-vtiles & tres-necessaires, soit pour nostre instruction en la foy, soit pour la sanctification de nos ames & de nos corps, soit pour nostre consolation & en la vie & en la mort. Car premierement nous y apprenons quelle est la vraye qualité de cet Esprit au nom duquel nous auons esté baptisez, & dont nous disons tous les jours, Je croy au
saint

Sainct Esprit ; que ce n'est pas seulement vn don , ou vne simple qualité imprimée en nos ames , comme plusieurs des ennemis de la diuinité ont creu, mais vne personne viuante, intelligente, operante ; veu qu'il est dit & icy & ailleurs, estre *offensé*, irrité, attristé, ce qui ne se peut dire sinon d'une personne ; Que cette personne là est Dieu , aussi bien que le Pere & le Fils ; veu qu'elle est dite estre l'Esprit de Dieu , & que tout ce qui est en Dieu, est Dieu mesme ; Qu'elle est infinie & en son essence & en son efficace , veu qu'elle est en tous les fidelles tout à la fois , seellant en mesme temps chacun d'eux pour le jour du salut ; Qu'elle est la cause vnique de nostre sainteté, veu qu'elle l'imprime en nos cœurs comme son image, formant en nous avec vne diuine efficace & le vouloir & le parfaire selon son bon plaisir : & qu'ainsi nous ne la tirons point du fonds de nostre propre nature, comme l'araignée tire sa toile de ses propres entrailles, mais que nous l'auons de la grace toute-puissante & misericordieuse de cét

Esprit, qui par son diuin pinceau là pourtrait en nous, & que nous n'auons non plus de sujet de nous en glorifier en nous mesmes qu'une toile vile & grossiere de s'enorgueillir d'un excellent pourtrait qui auroit esté tiré sur elle. Elle en est le sujet, mais elle n'en est pas la cause. Ainsi, dit un Ancien, à l'œuvre de nostre salut est bien requise & la grace & le franc arbitre : mais celle-là comme la cause, celui-cy comme le sujet. *Que fait, dit-il, la grace ? Elle sauue. Que fait le franc arbitre ? Il est sauvé.* Adorons donc en toute humilité cette grace du Saint Esprit qui nous sauue, & nous reputons bien-heureux de ce que nous sommes sauuez par elle. Remarquons encor vne autre chose en ces belles paroles de nostre Apostre, à sauoir ce qu'il dit que l'impres-sion de ce seau est faite *pour le jour de la redemption*, & apprenons de là que la sainteté qu'il graue en nos ames, aura vn jour pour fruiet *la redemption de nos corps* en la resurrection glorieuse, & que cette redemption ne doit pas estre attribuée, comme ont imaginé

quelques Docteurs celebres des Adversaires, à certain germe & caractère seminal d'immortalité & de gloire, qui se forme en nos corps par la manducation orale de la chair de Christ; chose absurde en mille façons, & qui n'a aucun fondement en l'Escriture Sainte; mais à l'Esprit sanctifiant que nous avons receu pour ce jour-là. C'est ce que nous enseigne l'Apostre au huitiesme chapitre de de l'Epistre aux Romains, quand il dit *que le corps est bien mort à cause du peché, mais que l'Esprit est vie à cause de la justice* : c'est à dire que le corps meurt bien à cause du peché qui y a habité; mais que l'Esprit le resuscitera à cause de la sainteté & de la justice qu'il y a gravée pour l'éternité. Car, comme il dit là mesme, *si l'Esprit de celuy qui a resuscité Christ des morts, habite en nous : celuy qui a resuscité Christ des morts, vivifiera aussi nos corps mortels, à cause de son Esprit habitant en nous.*

Voila pour nostre endoctrinement en la foy. Mais pour la sanctification, combien rencontrons-nous icy de

sujets qui nous y doiuent exciter ?
 Ce bon Dieu, tres-chers freres, ne
 s'est pas contenté de nous donner sa
 Loy, qui est la regle infailible,
 de sainteté, ni de nous proposer
 son Fils, qui en est le parfait & in-
 comparable patron: mais nous a en-
 uoyé des cieux son Esprit, pour en
 imprimer l'image en nos cœurs. Et
 serions-nous si malheureux, si ingrats
 enuers luy & si ennemis de nous mes-
 mes que de fouler aux pieds vne re-
 gle si sainte, de mépriser vn si diuin
 patron, & de résister sciemment &
 volontairement à vne impression
 si douce, si puissante & si salu-
 taire ? Iesus-Christ nous a ensei-
 gné qu'il y a vn jour destiné à la re-
 demption des saints, & à la puni-
 tion des meschans, qu'en ce jour là
 la sainteté sera la marque à laquelle
 seront discernez ses enfans d'auec
 ceux du Diable, que comme il de-
 mandoit autresfois de la monnoye
 du tribut, *de qui est cette image ?* pour
 rendre à Cesar ce qui estoit à Cesar,
 & à Dieu ce qui est à Dieu: ainsi exa-
 minera-il la marque que portera cha-

*Matth. 22.
 19.*

cun de ceux qui se presenteront de-
 uant luy pour estre jugez, & au con-
 traire qu'où il rencontrera l'impure-
 té, l'impudicité, le mensonge, l'hy-
 pocrisie, l'injustice, la fraude, la ma-
 lice, la cruauté, quand mesme ce se-
 roit avec la profession exterieure de
 son Euangile, & toutes les plus belles
 apparences du monde, il dira, Ce
 n'est point là ma marque, ce n'est
 point là mon seau ny mon image.
 C'est là la forme du Diable, c'est là
 la figure du monde. Retirez vous
 donc de moy, ouuriers d'iniquité, je
 ne vous connois point. Puis donc
 qu'il nous a aduertis que c'est à cette
 marque là qu'il doit reconnoistre les
 siens en cette grâde & dernière jour-
 née, & qu'il nous a fait cette grace de
 l'engrauer luy - mesme en nos ames
 par le burin sacré de son Esprit, au-
 tant que nous nous aimons nous mes-
 mes & nostre propre felicité, autant
 deuons nous auoir de soin de l'y en-
 tretenir, & de nous nettoyer de toute
 fouillure de chair & d'esprit, afin
 qu'en ce jour là le Prince de ce mon-
 de n'ait rien en nous, mais que le

Psalm. 4. 23.

grand Iuge de l'Vniuers y reconnoissant tous ses traits & ses lineamens nous auoie pour siens, & comme tels nous presente luy-mesme à son Pere, qui de sa propre main nous couronne de beatitude & de gloire. Contregardons donc, tres-chers freres, *contregardons* soigneusement *nos cœurs de tout ce dont il les faut garder*, afin que le Diable & le monde n'y vienne point gaster l'ouurage de Dieu, & deshonorer son image que son Esprit y a grauée. Ne faisons point comme l'infame Iulian, qui ayant receu le seau de Dieu au Baptisme & en la sainte Cene, l'effaça malheureusement de dessus sa personne, voulant estre arrousé en son initiation en la charge de souuerain Pontife du sang prophane des viétimes, & y lauant ses mains, avec lesquelles il auoit receu les sacrez symboles de sa redemption. Ne souffrons point que sur le seau de Dieu que nous auons receu en nos ames l'Esprit malin vienne imprimer le sien, & n'attirons point sur nous la reproche que Dieu faisoit aux Juifs impies au soixante troisieme

des reuelations d'Esaie , *L'Ange de sa face les a deliurez, il les a rachettez par sa dilection & par sa mercy, & les a portez & esleuez en tout temps: mais ils ont esté rebelles, & ont contristé l'Esprit de sa sainteté, dont il leur a esté tourné en ennemi, & a bataillé luy mesme contr'eux.* En ce passage du Prophete, mes freres, & en celuy-cy de l'Apostre, remarquez, ie vous prie, la propriété, la nature & la malignité du peché, pour l'auoir de plus en plus en horreur. Il ne contriste pas seulement nostre esprit nous estant *en achoppement & en aheurtement de cœur,* 1. Sam. 15 31. comme disoit Abigail à Dauid troublant la paix de nostre conscience & y estant comme vn ver immortel qui la ronge sans cesse. Il ne contriste pas seulement celuy de nos freres, comme il est dit du peché d'Esau quand il se maria avec des femmes infidelles, qu'il fut en amertume à l'Esprit de sa mere. Il contriste le S. Esprit qui nous doit estre infiniment plus cher & plus precieux que le nostre. Comme donc le Saint Esprit qui est nostre consolateur le hait pour-

ce qu'il nous contriste; haïssons le pareillement pource qu'il contriste le Saint Esprit. Peché maudit & malheureux éloigne toy de nous pour jamais, & ne vien point troubler nostre joye & celle de ce bon Esprit qui demeure en nous. Bon & tres-bon le pouuons nous bien dire; car il est entré dedans nous pour consoler nos consciences, & pour leur donner vne paix qui surmonte tout entendement, & vne joye inenarrable qui ne leur soit jamais rauie. Et pour toute cette joye il ne nous demande sinon que nous ne le contristions point. Quelle moindre reconnoissance pouuoit-il demander? Et ne la luy rendrons nous point? N'euiterons nous point au moins de l'offenser dedans nostre maison où il nous fait l'honneur de nous visiter, & de choisir son domicile; pour la remplir de toutes ses benedictions spirituelles & celestes. Ah! mes freres, ce n'est pas assez que nous ne le contristions point par nos mauuaises actions; Il le faut réjouir par les bonnes, & nous estudier à luy plaire en fructi-

fiant à toute bonne œuvre, afin qu'il se plaise chez nous, & qu'il y continuë volontiers sa demeure. Nous en vsons bien ainsi envers nos parens, envers nos amis, & sur tout envers ceux qui nous tiennent rang de supérieurs. Quand ils nous viennent voir chez nous, nous faisons tout nostre possible pour les y recréer, & leur y rendre leur séjour agreable, afin de leur monstrier combien nous honorons leurs personnes, combien de cas nous faisons de leur amitié, & combien nous nous sentons obligez de l'honneur qu'ils nous ont fait de nous visiter. Combien plus le devons nous envers luy? Et ainsi certes l'entendoit nostre Apostre. Car encore qu'en ce verset il ne nous ordonne sinon de ne contrister point l'Esprit, neantmoins en ceux qui ont precedé immédiatement à mesure qu'il nous a deffendu les vices qui le contristent, il nous a ordonné les vertus qui luy plaisent, & qui le réjouissent. *Déponillez le vieil homme, & soyez reuestus du nouveau. Déponillez le mensonge, & parlez Verité chacun à son prochain. Que*

celuy qui déroboit ne dérobe plus , mais qu'il traualle à ce qui est bon , afin qu'il ait pour departir à qui en a besoin. Que nul propos infect ne sorte de vostre bouche , mais celuy qui est à l'usage d'edification.

Ich. 3. 16.

Ce discours , comme vous voyez , tres-chers freres , est excellent pour nous sanctifier ; mais ie m'en vay vous faire voir qu'il ne l'est pas moins pour nous consoler. Premièrement ne sommes-nous pas bien-heureux d'auoir , comme nous auons , Dieu pour Pere, Iesus-Christ pour Sauueur & le Sainct Esprit pour sanctificateur & consolateur ? Le Pere nous a tant aimez qu'il a donné son Fils vnique, afin que quiconque croit en luy , ne perisse point , mais qu'il ait la vie eternelle. Le Fils nous a tant aimez qu'il a mis vne fois sa vie pour nous , & qu'il fait requeste sans cesse pour nostre confirmation en la grace , & pour nostre exaltation en la gloire. Le Sainct Esprit nous a tant aimez qu'il n'a point dédaigné de descendre comme du thrône de sa gloire dans la basse demeure de nostre cœur , pour y pren-

dre son domicile, & y imprimer son image, afin de nous rendre dignes de l'amour de Dieu & de la beatitude de son Royaume. O Pere, O Fils, O Saint Esprit, Saintes & glorieuses personnes, qui estes toutes trois nostre seul & vray Dieu, que vostre nom soit benit à jamais, & pource que vous estes en vous mesmes, & pource que vous daignez estre enuers vous, n'y ayant aucune de vous qui n'ait voulu particulierement s'employer à l'œuvre de nostre salut. Mais pour nous arrester à celle dont il nous est parlé specialement en ce texte, puis que nous auons en nous cét Esprit dont il est dit que *ce qui est né de l'Esprit est Iehan. 3. 16.* Esprit, & que tous ceux qu'il conduit, *Rom. 8. 14.* sont enfans de Dieu, & doiuent estre vn jour ses heritiers, quand nous n'aurions d'ailleurs aucun des auantages, des plaisirs, des honneurs & des commoditez de la terre; nostre bon-heur n'est il pas incomparablement plus grand que celuy des enfans du monde, qui ont tous ces biens là, & n'ont point cét Esprit, & pourtant n'ont

rien à pretendre à l'heritage de sa gloire ? Car il n'y a que ceux qu'il seelle qui ayent droit à sa redemption. *Il vous a seellez*, dit l'Apostre, *pour le jour de la redemption*. Si donc, chers freres, vous desirez d'avoir en ce jour là vostre portion entre les Saints, & en estre dès maintenant assurez, examinez vous vous mesmes, si vous avez receu l'impression de ce seau. Car il n'en est pas du Saint Esprit & de nos cœurs comme du cachet corporel & de la cire materielle. Le cachet ne fait pas l'impression qu'il fait, ni la cire l'empreinte qu'elle reçoit. Mais comme le saint Esprit, qui est vn cachet viuant, connoist fort bien ceux qui sont siens, & l'operation qu'il fait en leurs ames & en leurs corps: aussi nos cœurs, qui sont vne cire viuante, sentent aisémēt cet Esprit quand il opere en eux, & qu'il les forme à la vraye sainteté. Si vous ne trouuez point cette marque en vous, comme hélas! il y a tousiours parmy nous plusieurs mauvais Chrestiens, qui sont ou tel-

lement ramolis par les voluptez, que l'Esprit de Dieu par son Euangile & par ses inspirations n'y fait non plus d'impressiõ qu'un cachet en de l'eau, ou en de la boüe; ou tellement endurcis en leurs vices, en leur fierté & en leur obstination, qu'ils ne deferent à aucune exhortation, & ne ployent non plus dessous les censures que feroit un rocher sous un seau que l'on luy voudroit imprimer, vous estes en un tres mauuais & dangereux estat. Toutesfois ne vous desesperez point pour cela, mais hastez vous d'en sortir avant que le puits de l'abyssme ait fermé sa gueulle sur vous. Vous n'avez pas la sainteté, sans laquelle vous ne pouuez estre sauuez; mais vous voyez icy qui est celuy qui la donne. C'est le saint Esprit: Allez à luy, & la luy demandez avec vne vraye foy, avec vne serieuse repentance, avec vne horreur extreme de vostre estat, avec un desir ardent de sa grace, & ne doutez point qu'il ne vous la donne; & comme il vous la donnera & s'appliquera sur vostre ame, qu'elle s'amolisse,

s'humilie , & s'enfonce deffous luy comme la cire sous le cachet , avec vne demission volontaire de vos affections , & vne profonde submission de vos volonteze à la sienne , pour recevoir la forme , les caracteres & les traicts qu'il luy plaira de vous donner. Si au contraire vous la reconnoissez desia en vos cœurs rejouïssiez vous d'une joye inenarrable & glorieuse. Vous estes des enfans de Dieu , vous serez vn jour de ses heritiers. Son salut est entré en vostre maison , vous entrerez vn jour en la sienne & y demeurerez eternellement. Vous en auez de trop bonnes assurances pour en douter. Vous auez sa Parole , vous auez son serment , vous auez son Baptisme , vous auez sa table , vous auez son Esprit , & ne pouuez a moins que de le faire menteur , desloyal & parjure entrer en doute qu'il ne vous en donne l'effect en son temps. C'est le Dieu fort de verité il ne se reniera point soy mesme , ne reuoquera point sa promesse , ne desauouera point son seau. Estans

munis de ce seau presentez vous hardiment deuant luy & remettez vostre esprit en ses mains en toute confiance sans redouter aucune chose. Car il n'y aura mort ni vie qui vous puisse separer de l'amour qu'il vous a monsté en son Fils & dont il vous assure par son Esprit.

Ce seau nous est donné, dit l'Apostre, pour le jour de la redemption. Nostre redemption a bien desia esté faite entant que le prix de nostre rançon a esté payé, & l'arrest de nostre damnation reuoqué. Mais elle n'est pas encore consommée par l'exemption de toute sorte de maux, de dangers & d'infirmitez, & par la pleine jouissance de nostre souverain bien. Tous les jours encores nous offensoons Dieu en trop & trop de sortes. Tous les jours encores nous sommes tentez, vexez & molestez par les ennemis de nostre ame; tous les jours encores nous endurons & maladies, & playes, & langueurs, & tout cela nous conduit à la mort, qui est la fin commune de tous viuans. Mais nous verrons la fin de toutes ces miseres là

en cette grande & tant desirable journée, & la verrons avec des contentemens eternels. Vous donc, chers freres, qui affligez aujourd'huy vos ames pour le ressentiment douloureux que vous avez de vos cheutes frequentes & de vos infirmités ordinaires, consolez vous en l'attente de ce grand jour auquel vous resuscitez exempts de tous vices, & laisserez toutes vos imperfections dedans vos tombeaux. Alors il n'y aura plus en vous ni d'ignorance ni d'erreur, parce que vos entendemens seront de toutes parts esclairez de la lumiere de sa gloire. Alors vous ne sentirez plus de *loy en vos membres, qui bataille contre la loy de vostre entendement*; ni de *chair qui conuoite contre l'Esprit*, parce qu'il n'y aura plus rien de charnel en vous, mais que vos volontez seront parfaitement purifiées par son Esprit; & dans vne entiere conformité à la sienne. Alors vos passions, qui aujourd'huy vous font tant de peine, ne vous en ferons plus, parce que Dieu les aura nettoiyées de toutes leurs impuretez, & tout à fait remplies

plis de son amour & de sa joye. Vous qui avec tant d'amertume de cœur vous plaignez tous les jours de l'importunité des tentations du Diable, & des vexations que ses satellites vous donnent tant que vous estes en cette vallée de larmes, consolez vous en cette promesse qu'en ce jour là vous serez entierement deliurez & de leur ruse & de leur rage; qu'en ce jour là le Diable & le faux Prophete seront precipitez dans l'abyfme, & vous laisserôt dās vn repos & dās vne paix eternelle entre les bras de vostre bon Sauueur; qu'en ce jour là au lieu des malins Efprits qui vous guettēt & des meschans qu'ils fuscitent journellement contre vous, entre lesquels & vous il y aura *vn grand abyfme, tellement qu'on ne pourra point passer d'eux à vous*, vous viurez parmi les Anges esleus, qui se presseront alentour de vous pour vous feliciter de vostre gloire, & en la compagnie de vos freres, qui ne seront pas moins joyeux de vostre beatitude que de la leur, comme vous cherirez aussi la leur à l'égal de la vostre propre. Vous qui

apprehendez la mort pour vous mesmes , ou qui la deplorez és vostres esleuez vos esprits à la meditation de cette journée de vostre grande & finale redemption , en laquelle la mort apres auoir fait mourir pour vn peu de temps tous les Saints, venant à mourir elle mesme ; vous consolera pour vn bon coup de toutes les tristesses & de toutes les peurs quelle vous aura jamais données. Vous vieillards, qu'elle menace de plus pres que les autres hommes, leuez vos yeux vers ce bien-heureux jour , auquel vostre deliurance vous est promise, & auquel à cause du nom de vostre souverain Sacrificateur , qui a esté écrit en vos cœurs il vous fera reuerdir & fleurir , comme la verge d'Aaron, en vne vigueur eternelle. Vous qui estes encor en la fleur de vostre aage, mais qui sauez par les exemples d'un grand nombre de vos semblables enleuez du monde deuant vos yeux par diuers accidens , qu'il n'y a point d'aage si vigoureux qui puisse asseurer personne contre la mort, & que souvent elle enleue plustost vn Absalon

en sa plus grande force qu'un Barzillai
en son extrême vieillesse, ne vous
chagrinez point de vous voir exposez
aux mêmes dangers que les autres,
mais vous consolez en l'attente de cet
estat auquel vous ne serez plus sujets
a tous les accidens funestes de cette
vie mourante, mais viurez en vne vie
asseurée, & en vne felicité immuable,
avec nostre Seigneur Iesus & avec
tous les saints. Vous jeunes hom-
mes, qui voyans emporter tantost
l'un, tantost l'autre de vos compa-
gnons au tombeau, apprehendez ce
qui vous peut arriuer à vous mesme;
regardez à cette belle journée où
vous serez non comme vous estes icy,
aujourd'huy sains, demain malades,
& où vous perdez tous les jours quel-
que chose de vostre fleur & de vostre
beauté, mais en vne jeunesse toujours
également florissante, & exempte
de tout danger de maladies, de vieil-
lesse & de mort. Vous peres & me-
res, qui avez porté de vos enfans en
terre avec tant de dueil & de larmes,
& qui avez encor tant de peine à vous
en consoler, soulagez vos pources

cœurs affligez , par l'esperance de ce jour de la redemption glorieuse de tous les saints où Dieu commandera à la terre de vous restituer ces chers & precieux deposts que vous luy avez commis ; où leur presence glorieuse vous donnera mille fois plus de joye, que leur triste depart ne vous auoit apporté d'ennuy ; & où vous jouïrez, vous & eux , en la compagnie de Iesus-Christ & en la communion eternelle de tous les saints , d'un mesme heritage , en la maison d'un mesme pere, sans que jamais plus aucun accident les puisse separer de vous ni vous esloigner d'eux. Vous maris qui avez porté avec larmes vos femmes au tombeau ; vous femmes qui avec tant de regrets & de pleurs y avez mis reposer vos maris , vous tous en fin qui regrettez ou vos peres , ou vos freres, ou vos amis, dont la memoire vous est chere, comme la perte vous en a esté douloureuse réjouïssiez vous en l'attente, de cet heureux & souhaitable jour où leur mort & la vostre sera engloutie à victoire, où vous les recouvrerez tous, où ils vous recouureront tous.

& où vous verrez tous ensemble celui auquel vous croyez maintenant, & serez faits participans d'une mesme beatitude dedans un mesme Paradis. Alors, alors, mes freres, en quelque estat que nous soyons maintenant, ou que nous puissions estre pour l'auenir, tous nos desirs seront pleinement satisfaits, toutes les promesses de Dieu parfaitement verifiées, & nostre fidelité & perseuerance couronnée de sa propre main. Nous ne iouïssons pas encore de ce grand bien, pource que ce grand iour de la redemption n'est pas encor escheu. Mais puis que nous sçauons tres-certainement qu'il doit arriuer, & mesme, veu les tēps auxquels nous sommes paruenus, qu'il ne sçaurroit gueres plus tarder, nous auons grand sujet de nous en réjoüir & de nous en glorifier dès cette heure. Car comme quand entre les Iuifs l'année du Iubilé venoit, encore que dès le premier iour les serfs ne fussent pas actuellement affranchis, ni les pources reintegrez effectiuement en leurs biens (ce qui se faisoit seulement au dixiesme



lonté de Dieu , nous en remportions la promesse. Encore tant soit peu de temps; & celui qui doit venir, viendra. Cependant qu'un chacun vive de sa foy, & que pour obtenir bien tost apres tous ces combats cette couronne de justice que le Souuerain Iuge doit rendre à tous ceux qui auront aimé son apparition, il haste par maniere de dire par ses souhaits son bienheureux aduenement, luy disant avec son Espouse, *Vien Seigneur Iesus, voire Seigneur Iesus vien.*

& du salut de l'homme, ait en si grande haine, ni qu'il voye plus mal volontiers regner entre les hommes. C'est pourquoy on a veu autresfois des Capitaines qui en vne bataille navale auoient des pots de terre pleins de viperes, qu'ils lançoient dans les vaisseaux ennemis; d'où il aduenoit que ces pots venans à se rompre, elles s'éparpilloient parmi les soldats, & les mordans aux jambes, & par tout où elles les pouuoient atteindre, y remplissoient tout de cris lamentables, & d'une extreme & horrible confusio: ainsi ce malheureux Esprit pour troubler & pour affliger nostre société, y a jetté dès le commencement, & y jette encor tous les jours, quand Dieu le laisse faire, l'amertume, la colere, l'ire, la médifance, & toute forte de malice, comme vne vraye engeance de viperes, dont les morsures veneneuses causent de soudaines enflures & des douleurs fort violentes à tous ceux qu'elles atteignent. Mais ce bon Dieu, qui nous aime infiniment plus que Satan ne nous hait, nous a donné pour preser-

uatifs salutaires contre toute cette sorte de maux la patience, la douceur, la miséricorde & la charité : afin ou que ces passions malignes ne nous touchent point, ou que si elles s'attachent à nous, nous les secouïons tout incontinent, sans qu'il nous en demeure aucune inflammation ni douleur. Ce sont les diuins antidotes dont son Apostre nous recommande icy l'vsage, quand il dit aux Ephesiens, & à nous tous en leur personne, *Que toute amertume, & colere, & ire, & crierie, & médifance, soyent ostées de vous, avec toute malice. Ains soyez benins les vns enuers les autres, pleins de compassion, & pardonnans les vns aux autres, comme aussi Dieu vous a pardonné par Christ.*

Ephes. 4. 31.

Où nous auons à considerer premierement le mal qu'il nous defend, & puis le bien qu'il nous ordonne. Il nous defend en premier lieu *l'amertume, la colere & l'ire.* Apres cela il nous interdit *la crierie & la médifance,* qui sont des vices par lesquels ces premiers là esclattent au dehors. Et puis en fin il nous exhorte à retrancher

route malice & de nostre cœur & de nos mœurs. Pour l'amertume, l'Escriture nous en propose de deux sortes; l'une d'affliction, comme quand No-
hemi disoit, Ne m'appellez point No- Ruth.1.10.
hemi, c'est à dire l'agreable, Appelez
moy Mara, c'est à dire, l'amere. Car
l'Eternel m'a remplie d'amertume : &
quand Iob disoit qu'il parleroit en l'a-
mertume de son ame. De celle-là il
n'est point parlé en ce lieu, comme il
est manifeste : L'autre de malignité
ou de haine contre Dieu, ou contre
nos freres, comme quand S. Pierre
dit à Simon le Magicien, Repens toy Act.8.22.23.
de cette tienne malice, & prie Dieu si
d'aventure cette pensée de ton cœur se
seroit pardonnée. Car je voy que tu es en
fiel tres-amer, & en liens d'iniquité ; &
quand l'Apostre dit au douzième de
l'Epistre aux Hebreux, Prenez garde Heb.12.15.
qu'il n'y ait quelque racine d'amertume
& de fiel, qui bourgeonne en haut, pa-
roles prises du vingt & neuvième du
Deuteronomie, selon la version des
Septante. C'est de cette seconde que
l'Apostre parle, entendant propre-
ment par ce mot vne mauuaise affe-

Etion que nous auons contre nostre prochain , procedante non du vice d'un temperament bilieux ou melancholique , qui naturellement rend les homes ou aigres, ou chagrins: mais de la corruptiõ interieure de nôtre cœur, qui fait que nous auons du dégoust de nos freres, que nous prenons en mauuaise part leurs paroles & leurs actiõs, que nous nourrissons dedans nostre esprit des défiances, des soupçons, des mécontentemens & des haines secretes contr'eux. C'est ce que les Hebreux appellent *la masse de leuain*, & dont vn de leurs plus celebres Docteurs disoit à Dieu, *Tu fais, Seigneur du monde, que mon desir est de faire ta volonté, mais la masse de leuain, qui est en moy, m'en empesche*: parce, disent-ils, que comme il ne faut qu'un bien peu de leuain pour en aigrir toute la paste; ainsi *le mauuais germe* (terme par lequel ils entendent ce que l'Eglise appelle Peché Originel) corrompt & depraue tout l'homme. L'Apostre donc veut qu'auât toutes choses nous retranchions cette maudite racine d'amertume ; qui pousse & qui bour,

geonne si naturellemēt en nous tous, & qui est cause que si souuent nous nous enaigrissons contre ceux pour qui, selon toutes les loix de la Nature & de la Grace nous ne deuons auoir que de la douceur & de la bien-veüillance.

En suite de cela il nous exhorte à bannir du milieu de nous les passions vicieuses que cette racine a accoustumé de produire toutes les fois que ceux avec qui nous viuons, nous offensent, ou en effect ou en imagination seulement, qui sont la colere & l'ire : entendant par la *colere* cette premiere esmotion que nous sentons d'abord lors que nous nous imaginons que nostre prochain nous a fait quelque injure; & par *l'ire* le despit & le déplaisir qui nous en reste dans le cœur, avec le desir de nous en venger. Qui sont plustost deux degrez d'un mesme vice, considéré premierement en sa naissance, & puis en son progres, que non pas deux vices distincts. Or quand l'Apostre met icy la colere au nombre des vices, ce n'est pas en intention de condamner abso-

lument toute colere comme vicieuse & mauuaise. Car la colere estant vne affection qui a pour autheur le Createur mesme de nostre nature, elle ne peut estre que bõne en qualité d'estre naturel; & entât qu'elle a vn estre moral, elle peut estre bonne ou mauuaise selon qu'elle se tient dans les bornes ou qu'elle en sort, qu'elle s'esmeut pour des causes legitimes ou illegitimes, & qu'elle a pour visée vne bonne fin, ou vne mauuaise. Il y en peut auoir vne tres-loüable, comme celle de Iesus-Christ indigné contre les prophanateurs de la maison de son Pere, & les en chassant avec vn foüet de cordelettes. Il y en peut auoir aussi vne tres-blasmable, à sçauoir quand on se courrouce iniustement & avec excez, & qu'on ne cherche qu'à assouuir sa passion, & non à auancer ou la gloire de Dieu, ou le bien de l'homme. Icy l'Apostre signifie par ces mots de *colere* & *d'ire*, cette derniere, qui est vne passion bouillante & impetueuse, qui nous fait sortir hors des bornes d'une moderation raisonnable, qui nous fait

eschauffer pour des causes illegitimes, & en laquelle celuy qui en est transporté n'a autre but que de satisfaire à son despit & à son appetit de vengeance, laquelle passion est vne maladie spirituelle tres-pernicieuse: tout de mesme que les Medecins, quand ils parlent de la colere, la metrans entre les maladies aiguës, entendent par là non cette passion naturelle, qui n'est autre chose que l'ebullition du sang alentour du cœur sur l'imagination d'une iniure receuë; mais vne grande & violente eruption de la bile qui en leur art est ainsi proprement nommée, & est vn mal tres-dangereux. De cette maladie donc, c'est à dire, de la colere injuste & excessiue; de cette colere dont S. Iaques dit qu'elle *n'accomplit point la justice de Dieu*, S. Paul veut que nous trauailions de tout nostre pouuoir à guerir nostre esprit. *Qu'elle soit*, dit-il, *ostée de vous*, & qu'il n'y ait aucun parmy vous qui soit si peu soigneux de son salut & de sa liberté, que de se laisser maistriser à cette passion aveugle & incensée; passion qui tient plus de

l'humeur des bestes ou des demonz que de la nature de l'homme, & qui foulant aux pieds tout respect des loix de Dieu & de son caractere, attire sa vengeance sur tout homme qu'elle possede, luy interdit la raison & le jugement, & luy met le trouble & le feu dedans la consciẽce. Et mesme bien souuent pour des sujets fort legers & fort maigres. Car comme en la nature les esclairs, les tonnerres, & les foudres qui y font tant de bruit, se forment de quelques legeres exhalaisons qui sont montees de la terre: ainsi ne faut-il bien souuẽt qu'une parole, un geste, un rire ou un regard qui ne vous plaira pas pour vous mettre en grande colere. Et quand les sujets en seroient plus grands, ce ne peuẽt estre apres tout que quelques injures receuẽs en l'homme exterieur, & aux choses appartenantes à cette vie: au lieu que celle que vous vous faites à vous mesmes, en vous en voulant ressentir, est en la conscience. Si bien que pour auoir raison d'une egratignure que vous auez receuẽ en la peau, vous vous faites

vous-

vous-mesmes par cette aveugle passion vne large & profonde playe dans l'ame.

A cette defense de la colere & de l'ire il joint celle de la Crierie & de la Médifance, qui sont encor d'autres productions de cette malheureuse racine d'amertume qu'il a interdite en premier lieu. Car quand nous auons conceu quelque dépit & quelque mescontentement contre nostre prochain, nous les faisons d'ordinaire esclatter par des paroles offensiuës, par des reproches & par des menaces; & mesme par diuers cōuices que nous vomissons contre luy comme vne bile amere, & par des detractions par lesquelles nous déchirons sa reputation dedans les compagnies. En quoy nous ne blessons pas seulement nos freres, mais offensoys Dieu mesme, qui est nostre Pere commun, contristons son Esprit, donnons scandale à son Eglise, & nous deshonorons nous-mesmes deuant Dieu & deuant les hommes, comme vn tonneau plein de vin doux qui se salit de sa propre escume. Parmi ces crieries confuses

la voix de Dieu ne s'entend point. Parmi ces violens orages la rosée ne tombe point. Parmi ces tumultes & ces fureurs le Dieu de paix n'habite point. Car comme vous voyez en la vision du Prophete Elie, Dieu n'estoit point parmi le vent qui fendoit les montagnes, parmi le tremblement qui escrouloit la terre, parmi le feu qui pouffoit avec bruit ses flammes, mais dans le son coy & subtil: ainsi si nous voulons qu'il nous fauorise de sa presence & de sa grace, il faut que nous soyons en vn estat de tranquillité & de paix, & que, comme dit nostre Apostre, toute amertume, & colere, & ire, & crierie, médisance soit ostee de nous.

Or parce que cette hydre a plusieurs autres testes, & qu'il y a mesme de ces passions que les hommes cachent & dissimulent par vn artifice malin, le Saint Esprit pour les comprendre toutes adjouste, avec toute malice. Ce n'est pas assez que nous retranchions quelques vnes des principales parties de nostre corruptiō naturelle. Quand nous n'en laisserions qu'une seule, elle seroit capable de nous perdre & de

nous damner. Il les faut toutes arracher avecques toutes leurs racines jusques aux moindres fibres. Il y en a qui en leurs coleres s'abstiennent bien de crier, de menacer, d'outrager & de detrafter: mais qui cependant couvent leur maltalent en leur ame, attendant de l'esclorre avec vne tant plus haute vengeance, quand ils veront leur temps: comme ceux qui au siege d'une place cessent de tirer, pendant qu'ils font sous terre vne mine, pour faire sauter la muraille tout à vn coup, & y entrer par vne large breche. C'est la vne double malice, car c'est adjouster à la colere la fraude, & offenser Dieu & le prochain de sang froid, ce qui est beaucoup moins excusable que quand l'homme le fait dans l'accez d'une passion violente, durant laquelle il n'est point à soy mesme.

Mais il ne nous doit pas suffire de nous abstenir de ces vices; il faut nous exercer aux vertus contraires, à la douceur, à la patience, à la misericorde & à la charité. C'est pourquoy l'Apostre en la seconde partie de no-

stre texte adjouste , comme vous voyez , mais *soyez benins les Vns envers les autres , pleins de compassion , & pardonnans les Vns aux autres , comme aussi Dieu vous a pardonné par Christ.* Oû il entend per la *benignité* vne humanité & vne douceur qui fait que nous aimons nos prochains quels qu'ils soyent , que nous prenons en bonne part tout ce qui vient d'eux ; que s'ils ne sont de nostre humeur , nous nous accommodons à la leur , & que quâd l'occasiõ se presente de leur tesmoigner par effect nostre affection charitable , nous l'embrassons avec plaisir , ce qui est directement opposé à l'aigreur & à l'amertume qu'il vient de condamner : Et par la *compassion* la condescendance à l'infirmité de la nature humaine , qui fait que nous nous rendons indulgens aux foiblesses & aux défauts de nostre prochain , que nous le plaignons quand nous le voyons agité par ses passions , que nous auons pitié de luy lors mesme qu'il nous offense plus malignemēt , & que quâd il nous auroit coupé la main droite , nous luy tendons la gauche

pour le releuer, s'il est tombé, n'y ayant aucun interest, de profit ou de perte, de loüange ou de blasme, qui soit capable de nous tenter à luy vouloir du mal, ou à lui en faire. Car quād il parle de *benignité* & de *compassion*, il entend que ce soit de la bonne, de la franche, de la legitime : & non vne douceur affectée, qui ne consiste qu'en paroles de compliment, lesquelles ne partent nullement du cœur, & ne se disent que par forme d'agencement & de cajollerie. Toute cette affectation de douceur n'est rien que fard, que vanité, que perfidie, comme cela se void ordinairement dans le monde, & principalement dans les Cours des Princes & des Grands. Dieu ne veut point de cette douceur là, qui n'est qu'en la mine & en la parole. Il en veut vne qui procede d'une franche & naïue cordialité. Et de fait le mot Grec qui est employé par l'Apostre signifie proprement vne bonne & fauorable disposition de nos entrailles enuers nostre prochain.

C'est de cette disposition interieure que naist la facilité à pardonner les

offenses que nous auõs receües de nos freres , & à nous reconcilier avec eux, laquelle saint Paul nous recommande en ces mots , *& pardonnans les vns aux autres , comme aussi Dieu vous a pardonné par Christ.* Deuoir qu'il est d'autant plus necessaire de nous bien inculquer , que nous auons tous vne inclination naturelle à nous venger nous mesmes , & que toute vengeance que l'homme exerce en son particulier, est vn attentat sur les droits de Dieu, lequel luy qui est jaloux de sa gloire, ne peut souffrir sans indignation. Car il est bien necessaire pour l'ordre du monde & pour la conseruation de la societé humaine que les offenses ne demeurent point impunies , mais il n'a pas voulu en laisser la punition à la disposition des particuliers pour plusieurs raisons fort notables. Car premierement estans, comme nous sommes, aucuglez par nos passions, & mesme quelquefois tres-mal informez des actions de nos prochains, bien loin de penetrer dans la verité de leurs intentions, lesquelles ne sont conneuës qu'à Dieu, nous

nous imaginerions bien souuent qu'il y a de l'offense là où il n'y en a point: & ainsi si c'estoit à nous à nous venger nous mesmes, nous nous vengerions souuent sur des innocens. Outre cela quand nous aurions esté véritablement offensez, nous mettrions nostre interest à vn si haut prix, que nous voudrions tirer des satisfactions excessiues du tort qui nous auroit esté fait. Finalement comme nous ne sommes pas tous d'un mesme naturel, d'une mesme condition, ni en vne mesme autorité & mesme puissance; la vëgeance n'auroit point de regle juste & asseurée. Car ceux qui sont d'un esprit plus violent & plus aspre, y procederoient trop seuerement: & ceux qui sont d'une humeur plus patiente & plus douce, s'y porteroient avec trop de mollesse, ou mesme laisseroient les fautes sans aucune correction. Les puissans se vengeroient puissamment, & les foibles seroient contraincts de laisser sans punition les outrages qui leur seroient faits; ce qui seroit vn tres-grand desordre dedans le monde. C'est pour-

quoy Dieu, qui en est le souverain Seigneur & Gouverneur, qui voit universellement tout ce qui s'y passe, qui connoist tres-parfaitement non seulement les actions qui esclattent aux yeux des hommes, mais les intentions secretes des cœurs; qui est & infiniment juste pour proportionner les peines aux pechez, & souverainement puissant pour cōserver les bons, pour reprimer les mēschans, & pour tenir tout le monde dans son deuoir, s'est reserué le droict d'exercer la vengeance, & l'exerce en effect, immediatement par soy-mesme, & mediatement ehcor par les Magistrats, qu'il a establis dans le monde pour faire justice en son nom. Ce que quand ils font sans passion & sans aucun particulier interest, ils n'exercent pas leur propre vengeance, mais Dieu exerce la sienne par eux. Et ceux qui y recourent en des injures griefues, & qu'ils ne peuvent supporter sans faire vn trop grād prejudice à eux-mesmes & aux leurs, pourueu qu'ils le facent sans aucune haine ni animosité, n'en peuvent estre justemēt blasmez, parce

qu'ils se retirent à la Justice de Dieu, & aux Officiers legitimes auxquels il en a commis l'exercice. Mais d'estre juge en sa propre cause, & de se venger soy-mesme, il n'est permis à personne qu'à Dieu. Pourtant nous dit-il par S. Paul au douzième de l'Epistre aux Romains, *Ne vous vengez point vous-mesmes, mes bien-amez, mais donnez lieu à l'ire; c'est à dire, laissez faire à l'ire & à la justice de Dieu, à qui il appartient proprement de punir les pechez des hommes. Car il est escrit, A moy appartient la vengeance, & je luy rendray, dit le Seigneur. Et icy, Soyez benins, pleins de compassion, & pardonnans les vns aux autres. Or par ce pardon il entend vn franc & volontaire dépouillement de tout ressentiment de haine & de toute passion de colere contre nostre prochain apres qu'il nous a offensez, non seulement pour ne luy en vouloir point de mal, mais pour l'aimer & luy bien faire avec vne affection aussi cordiale que s'il ne nous auoit jamais fait déplaisir: & ce pour la seule consideration de Dieu & de nostre Seigneur*

Iesus-Christ, qui nous l'a ainsi ordonné. Car ceux-là se trompent bien fort qui pensent se bien acquitter de ce charitable deuoir quand ils protestēt deuant les hommes qu'ils *ne veulent point de mal à leur ennemi*, & quand en effect ils ne recherchent point de vengeance de l'offense qu'ils en ont receuë. Cela c'est n'auoir pas de haine contre son frere. Mais ce n'est pas assez, il faut auoir de l'amour pour luy, & reuerer Dieu & son image en la personne de vostre ennemi, aussi bien qu'en celle de vostre amy. Car l'un & l'autre est également creature de Dieu, également formé à son image, également capable & de sa grace & de sa gloire. Il y en a d'autres qui vont plus auant, & qui disent, *Non seulement je luy pardonne l'offense qu'il m'a faite, & ne luy en veux point de mal : mais encores je luy souhaite les mesmes biens de nature, de grace & de gloire que je desire pour moy-mesme. Mais ie ne me puis resoudre à le voir, ni à conuerser avec luy, parce que cet object present esmeut mes puissances, & je crains de r'ouuir mes playes en le voyant*

& me ressouvenant du tort qu'il m'a fait.
Cela est specieux, veu la grande foiblesse de nostre nature, mais lors que Dieu commande, toute excuse qu'on met en auāt, pour ne luy obeir point, est friuole. Il n'est pas question d'alleguer vostre foiblesse & vostre crainte, il est question de les vaincre, & d'obeir à sa volonté. Vous dites, *Je ne puis gagner cela sur moy-mesme,* mais il le faut pouuoir, & vous vaincre vous mesme, en faisant succeder à la haine & à la colere vne franche & cordiale amitié. Je say bien qu'apres qu'on a coupé vn arbre par le pied, les racines ne laissent pas de demeurer dans la terre, & qu'il faut du temps pour les arracher. Mais je di que vous y deuez trauailler sans intermission, comme à vne chose absolument necessaire au salut de vostre ame, & vous representer que vous ne serez jamais bien avec Dieu que vous ne soyez bien, entant qu'en vous est, avec vostre prochain, & que vous n'estes pas bien avec luy tant qu'il y a dans vostre esprit quelque secret ressentiment qui empesche que vous ne

le voyiez aussi volontiers, & ne parliez à luy aussi franchement que deuant l'offense receüe. Car comme quand vne personne que la fièvre a quittée, boit encor avec quelque sorte d'empressement & d'ardeur, c'est signe qu'il y a quelque reste d'émotion & de chaleur estrangere dedans ses veines: ainsi quād entre les personnes reconciliées il reste encor de la froideur & de l'auersion, la reconciliation n'est pas franche & accomplie, comme elle le doit estre. Il faut pour se bien reconcilier surmonter tout cela, haine, colere, froideur, auersion, par vne vraye & cordiale charité, & apres la reconciliation viure en sorte que vostre amitié à laquelle vostre prochain auoit fait brèche, ayant esté bien resoudée; elle soit, comme on dit du fer, plus forte alendroit de la soudure; & que l'offense & le mécontentement suruenü entre vous & luy, semble n'auoir esté qu'un vent pour allumer dauantage le feu de vostre affection mutuelle.

Remarquez encor là dessus que nostre Apostre ne dit pas simplement

pardonnans à vostre prochain, mais, *pardonnans les vns aux autres*, pour vous monstrier que c'est vn deuoir reciproque de vous enuers eux, & d'eux enuers vous. Et vous & eux estes enfans d'Adam, infirmes & pecheurs; & si aujourd'huy vostre frere a failly; & a besoin que vous luy pardonniez; demain possible vous ferez quelque chose pour laquelle vous aurez besoin qu'il vous pardonne aussi. Comme le besoin est commun, aussi est le commandement. Ce qui nous monstre combien Dieu a de soin de nous; & combien il nous aime tous, de nous lier ainsi les vns avec les autres par ces doux liens de la charité. Quand il vous dit, *Ne vous vengez point vous mesmes, mais pardonnez aux hommes leurs offenses*, car autrement je ne vous pardonneray point les vostres; Aimez vos ennemis, si vous voulez estre vraiment mes enfans. Vous dites quelquefois à part vous, que c'est là vn commandement fort fascheux & fort difficile. Et au contraire, si vous le considerez bien, c'est le commandement le plus doux, le plus aimable

Rom. 12. 19.

Math. 6.

14.

& le plus obligé qu'il nous pouvoit donner. Car comme il vous a commandé de pardonner aux autres, aussi a il commandé aux autres, c'est à dire, à tous les hommes du monde, de vous pardonner, de vous aimer, voire de vous aimer comme eux-mêmes, procurans vostre bien, vostre repos, vostre contentement, vostre honneur & vostre salut, aussi sinceremēt, aussi ardemment, & aussi constamment comme le leur propre. Au lieu donc de nous plaindre de ce commandement, n'est-ce pas vn des plus insignes sujets que vous ayez au monde de vous louer de sa bonté & de son amour enuers vous, auxquels il concilie par là les cœurs de tous les hommes.

Reste maintenant de considérer la raison pour laquelle saint Paul oblige icy les fidelles à ce mutuel pardon des offenses, à sçauoir l'exemple de ce grand Dieu, qui est la charité & la miséricorde mesme. *Ainsi, dit-il, que Dieu vous a pardonné par Christ. Je ne vous allegue pas la miséricorde dont il a usé enuers d'autres. Je vous*

allegue seulement celle dont il a usé enuers vous-mesmes, vous ayant reconciliez à soy par le merite de son Fils. O misericorde ineffable du Dieu de gloire enuers ses pources creatures ! Nous estions tous coupables enuers Dieu d'une infinité d'offenses atroces, pour lesquelles nous auions merité la mort & la damnation eternelle. Et il nous a gratuitement pardonné toutes ces offenses-là, & les a effacées pour n'en auoir jamais de souuenance. Mais encor comment effacées ? Par le sang de son propre Fils qui a esté respandu sur la Croix pour la remission de nos pechez. Car c'est ce que signifie l'Apostre quand il dit que *Dieu nous a pardonné par Christ*, c'est à dire, à cause de la satisfaction & du merite de ce grand Redempteur du monde. Il n'estoit pas possible que Dieu nous pardonnast nos pechez sans vne satisfaction preallable, je di sans vne satisfaction infinie en prix & en valeur, laquelle nostre Seigneur Iesus-Christ seul pouuoit fournir à la justice de son Pere. Mais quand il eust esté possible

que sans avoir égard à sa justice il nous eust pardonné nos fautes par le seul mouuement de sa miséricorde, sans aucune satisfaction ni interuention d'un Mediateur, sa miséricorde n'eust pas paru à beaucoup pres si admirable comme elle a fait lors que pour de misérables esclaves il n'a pas esparagné son propre Fils, & que pour des personnes coupables, & coupables en tant de fortes, il a liuré l'innocent à la mort, & exposé le *saint des saints* à la malediction de sa Loy, afin que nous eussions *redemption en son sang*, à *sauoir la remission de nos offenses*.

Dan. 9. 24.

Rom. 3. 24.

Ephes. 1. 7.

C'est là le grand & incomparable patron sur lequel ce diuin Docteur veut que les fidelles se moulent pour l'exercice de la patience, de la miséricorde & de la charité Chrestienne. Et certes il ne leur en pouuoit proposer ni de plus accompli en foy, veu que Dieu est la source de toute bonté & de toute perfection; ni de plus obligeant enuers eux, veu que cette charité est telle qu'ils en ressentent continuellement les effets à leur grand auantage & à leur singulière conso-

consolation. Car ce que les Juifs disoient autresfois touchant leur conservation temporelle parmy les fureurs & les rages des Babylonniens, tous les fidelles le peuuent bien dire de leur reconciliation avec Dieu, & du pardon qu'il leur a fait de leur fautes, *C'est de la misericorde de Dieu ce* *Lament. 3.*
que nous n'auons point esté consumez. *22.*

Mais parce que nous auons à traiter plus amplement de cette matiere en l'examen des premiers versets du chapitre suiuant, nous en reseruerons jusques là la deduction plus particuliere, & nous contenterons pour cette heure de ce que nous venons de vous dire pour l'exposition de ce texte.

C'est à nous, tres-chers freres à engrauer bien auant en nos ames ces diuins & salutaires enseignemens, estans comme vne cire molle sous le seau de son Saint Esprit, afin que receuans en nous vne profonde impression de son caractere, elle nous soit vne assurance interieure, & à nos prochains vn tesmoignage sensible que nous sommes vrayment du nombre

des enfans de Dieu. Il seroit bien à desirer que nous n'eussions besoin d'aucune remonstrance sur ce sujet, estans parfaitement repurgez, comme de vrais Chrestiens le deuroient estre, des passions qui trauaillent les autres hommes, & disposez de nous mesmes à la douceur, à la misericorde & à la patience qui doit regner en l'Eglise de Dieu. Mais, hélas ! combien y en a-il parmi nous qui encor qu'ils soyent nez dans ce doux air de l'Eglise, ne sont jamais sans aigreur & sans amertume contre quelqu'un de leur prochains, se laissent à toutes rencontres, & souuent sur des sujets de neant, gagner à la colere & à l'appetit de vengeance & sont à toute heure dans les crieries, dans les reproches, dans les menaces, dans les imprecations, dans les conuices & dans la médifance, & qui encor qu'ils ayent succé avec le lait les preceptes de la pieté & de la charité, ne connoissent de ces vertus que le nom ? Aux meilleurs mesme & aux plus patiens d'entre nous n'arriue-il pas quelquefois de se laisser surprendre à la pas-

sion de leur chair , & apres auoir long temps supporté ou l'indiscretion ou la malice de leurs freres, de conuertir en fin leur patience en fureur, faisans comme l'huyle & le miel, qui estans les plus douces de toutes les liqueurs ; quand elles sont bouillantes, sont les plus ardentes de toutes. Ainsi & les vns & les autres nous auons grãd besoin que cette exhortation de l'Apostre , *Que toute amertume, & colere, & ire, & crierie, & médifance, soit ostée de vous, avec toute malice. Soyez benins les vns enuers les autres pleins de compassion, & pardonnans les vns aux autres, comme aussi Dieu vous a pardonné par Christ* ; que cette exhortation di-je, nous soit fort soigneusement inculquée , & avec vne forte & bien expresse application. Mais principalement en ce temps, auquel nous deuons commencer à nous preparer à la participation de ses saints mysteres. Car comme anciennement entre les Iuifs lors qu'on auoit à celebrer la Pasque, on recerchoit avec des soins extraordinaires par tous les coins & recoins des maisons , s'il y auoit de

leuain quelque part, afin de le jeter
 dehors, & quand apres auoir bien
 fouillé par tout avec des lampes & des
 chandelles, mesmes jusques aux plus
 petis trous des rats on n'y en trouuoit
 point, on faisoit encor vne protesta-
 tion solennelle qu'on l'auoit recher-
 ché avec toute la diligence possible,
 & que s'il y en auoit de caché, on de-
 siroit qu'il fust tenu *comme la poussiere*
de la terre : ainsi quand nous auons à
 nous presenter à la Table de nostre
 Seigneur Iesus Christ, nous deuons
 fort soigneusement examiner nos
 consciences, & repurger nos cœurs
 de toute aigreur & de toute animo-
 sité contre nostre prochain, afin de
 pouuoir faire la feste de nostre Pasque
 qui a esté sacrifié pour nous, non avec
 vieil leuain, ni avec leuain de mauuaistié
 & de malice, mais avec des pains sans
 leuain de sincerité & de verité. Icy
 donc, freres bien-aimez, nous vous
 exhortons & vous conjurons par les en-
 trailles des misericordes de Dieu, par le
 sang du Seigneur Iesus, par la pro-
 fession que vous faites de son Euan-
 gile, par le respect que vous deuez à
 ses Sacremens, par l'interest de vo-

1. Cor 5.7.

Rom. 12.1.

estre propre salut, de renoncer desormais de bon cœur à toute aigreur que vous pourriez auoir contre qui que ce soit de vos freres. Viuez doresnauant en l'Eglise *comme des colombes sans fiel*, & *comme des brebis sans aucune malice*. Faites voir par effect que vous estes vrayz disciples de Iesus-Christ, qui auez vrayment appris de luy à estre *debonnaires & humbles de cœur*. Les lions & les tigres ayans esté recueillis par Noé en son Arche, y ont bien deposez leurs ferocitez naturelles, pour viure doucement & paisiblement là dedans avec les autres animaux: & vous ayans esté recueillis par Iesus-Christ en son Eglise, y retiendrez-vous vos aigreurz, vos coleres & vos appetis de vengeance; & n'y pourrez-vous estre ensemble sans vous quereler les vns les autres, & sans vous déchirer par conuices & par medisances? Quel opprobre seroit-ce à l'Eglise de Dieu & au nom Chrestien, qu'au lieu qu'en l'edificatiō du temple de Salomon on n'entēdis pas vn coup de sciē ni de marteau, tout s'y faisant dās vn silence & dās vn respect merueilleux, on n'entendist au contraire au milieu

de nous que le bruit importun de nos querelles & de nos débats, & qu'il y eust parmi nous des gens qui prissent plaisir à troubler & retarder l'œuvre de Dieu en l'edification des âmes. Si en cela, chers freres, Dieu a esté offensé, & la charité violée par le passé, que cela ne continue plus, mais que *vous ayez paix* non seulement les vns avec les autres, mais, *s'il est possible, avec tous les hommes*. Que la colere, le ressentiment des injures, l'appetit de vengeance ne trouve plus de lieu parmi vous. Que toute cette maudite graine que l'homme ennemi a semée de nuit en nostre champ, toutes ces plantes veneneuses que le

Rom. 12. 18. Pere celeste n'y a point plantées, en soient arrachées, & jetées au feu. Conduisez vous en sorte qu'il apparaisse que vous estes vrayment de ces debonnaires dont Iesus-Christ a dit, *Bienheureux sont les debonnaires, car ils heriteront la terre; de ces misericordieux, auxquels il a promis que misericorde leur sera faite; de ces pacifiques, dont il prononce qu'ils seront appelez Enfans de Dieu*. N'offensez jamais per-

Matth. 15. 13.

Matth. 5. 5.

sonne, s'il est possible, & considerez que vostre Createur ne vous a pas faits avec des cornes au front, comme les taureaux; avec des griffes & des dents effroyables, comme les lions; ou avec le venin à la bouche, comme les viperes & les aspics; mais avec des membres tous innocens, comme vous ayant destiné non à la guerre & aux combats, mais à vne vie toute paisible, & à vn exercice continuel de beneficence & de charité. Mais si par infirmité humaine il vous arriue de fascher quelcun de vos freres, ou de luy faire tort, si tost que vous vous en apperceuez, monstrez que vous en auez du regret, n'ayez point honte de luy en demander pardon, & taschez à reparer vostre faute le mieux & le plus promptemēt qu'il vous sera possible. Si au contraire c'est vous qui auez esté offensez, soyez faciles à pardonner, & souffrez plustost toutes choses, mesmes en ce qui est de vos plus chers & plus precieux interests, que de troubler la bonne intelligence & l'vnanimité fraternelle qui doit estre entre vous & vostre

Matth. 5. 38. prochain. Vous avez entendu, dit Iesus-Christ en l'Euangile, qu'il a esté dit, Oeil pour oeil, & dent pour dent. Mais je vous dis moy que vous ne resistiez point au mal. Si quelcun te frappe en la joue droite, tourne luy aussi l'autre. A celui qui veut plaider contre toy, & t'oster ton saye, laisse luy aussi le manteau. Qui te voudra contraindre d'aller vne lieue, vas en deux avec luy. C'est à dire, souffre plustost toutes ces choses là que d'entrer en debat & en contestation avec ton prochain. Que si vous estes si infirmes, que vous ne puissiez souffrir vne injure sans en auoir quelque ressentiment, que le

Matth. 5. 22. dire du souuerain Iuge, Quiconque se courrouce à son frere sans cause sera punissable par jugement: qui luy dira, Raca, sera punissable par conseil; & qui luy dira, Fol, sera punissable par la gehenne du feu; vous empesche d'en venir jamais jusques aux menaces & aux conuices. Si la colere vous a surpris d'abord, si elle vous a mis tout en feu dans ses premiers ressentimẽs, que ce ne soit qu'un feu de paille espris & esteint en mesme moment,

que le Soleil ne se couche point sur vostre *Ephes. 4. 26.*
conroux, ne donnez point lieu au Dia-
ble. Faites tout ce que vous pouuez
pour vous reconcilier promptement
avec celuy qui vous a offensé. S'il se
reconnoist & reuient à vous, faites la
moitié du chemin, & le receuez à bras
ouuerts. C'est le commandement de
nostre grand Maistre. *Si ton frere a* *Matth. 18. 15.*
peché contre toy, dit-il, & il s'amende,
pardonne luy. Et afin que nous ne
disions point, Mais je luy ay déjà par-
donné plusieurs fois sous la promesse
qu'il me faisoit de mieux faire, & il re-
tourne toûjours à son mauuais natu-
rel & à sa premiere insolence, oyez
ce qu'adjouste nostre Seigneur, *Et si* *Matth. 18. 21*
sept fois le jour il a péché contre toy, &
que sept fois le jour il retourne à toy, di-
sant, Je me repen, tu luy pardonneras,
voire, dil-il, non jusques à sept fois,
mais jusques à sept fois septante fois.
Mais quand mesme il ne se reconno-
ist point, & qu'il tiendrait son mau-
uais cœur contre vous, allez à luy, &
le recerchez d'amitié. Que l'orgueil
& la vanité ne vous empesche point
d'en venir là, comme si c'estoit trop

pres affections, & vn beaucoup plus parfait renoncement à vous mesmes. Et si c'est vostre interest qui vous mène, considerez si ce ne seroit pas estre bien mal auisé pour vne petite vanité de vous mettre en danger de perdre vn bien solide & eternal, tel qu'est la remission des pechez & la vie eternelle. Vous avez peur de vous trop abbaïsser, & vous n'en avez pas peur aux choses du monde. Si vous avez quelque affaire importante ou chez vn Prince, ou chez les principaux Ministres, à quoy ne vous abbaïssiez-vous pour obtenir ce que vous desirez ? Pour y entrer avecques liberté, & y estre les bien-venus, vous n'estimez pas qu'il vous soit honteux de rechercher, de saluer & de caresser tous ceux de la maison, mesme jusqu'à des portiers & à des valets, & vous ne dites point que cela est indigne de vous. Tout vous est bon, pourueu que vous parueniez à vos fins. Et icy, où il s'agit de vostre salut, vous amusez-vous à ces vaines considerations ? Si vous estiez prisonnier pour vn crime digne de mort, & qu'on vint dire

en la prison que le Roy veut donner la vie avec la liberté à tous les prisonniers, mais à condition que chacun d'eux se reconcilie premieremēt avec son ennemi, si aucun il en a : diriez vous que vous ne voulez pas rechercher le vostre, & que c'est à luy de venir à vous, & de vous demander pardon ? Au contraire ne recourrez vous pas tres-volontiers & avec toute diligence à vne reconciliation qui vous deuroit produire vn si grand bien ? Combien plus le deuez vous faire icy où il s'agit non de la vie de vostre corps, mais du salut eternal de vostre ame ? Vous ne voulez pas commencer. O aveuglement ! ô folie ! Dieu vous a commandé à vous & à vostre prochain de vous reconcilier l'un à l'autre, & de vous reconcilier avant que mourir. Vous ne sauez qui de vous deux mourra le premier. Mais vous sauez que vous pouuez mourir à toute heure, & que celuy qui mourra sans s'estre mis en deuoir de se reconcilier avec son prochain, il mourra damné. Et vous tergiverserez encores ? & vous marchandez en-

encores? Et vous dites encores que vous ne voulez pas commencer! Mais encores, pourquoy? *Parce*, dites vous, *qu'il en deviendra plus fier & plus audacieux*. Premièrement c'est violer la charité enuers vostre prochain de presumer si mal de luy, & offenser la grace de Dieu, comme si elle n'estoit pas capable de le conuertir & de l'amener à repentance. Mais quand ce que vous dites arriueroit, & que de vostre charité il deuroit prendre occasion de se rendre plus insolent, ce ne sera pas vostre faute, ce sera la sienne. Pour luy il en sera tant plus inexcusable, & vous luy aurez amassé des charbons de feu sur la teste: mais quant à vous, qui encor que vous preuissiez biẽ que si vous le recherchiez d'amitié il en deviendroit plus fier contre vous, n'aurez pas laissé pour l'amour de Dieu de le preuenir, vostre charité en sera tant plus pure, tant plus parfaite, tant plus agreable à Dieu, & tãt plus salutaire à vous mesme. Tout le monde me l'imputera à vne lascheté. Et si c'est pour l'amour de Dieu seul que vous recherchez là

reconciliation & la paix , pourueu que vous ayez son approbation, que vous souciez vous de tous les iugemens du mōde, vous qui deuez estre les Iuges du monde au jour de l'apparition glorieuse de nostre Redempteur ? C'est de Dieu , & non pas du monde que dépend vostre vie & vostre salut eternal. C'est à Dieu, & non pas au monde , que vous deuez regarder , & en cela & en toute autre chose. Il vous commande de pardonner ; pardonnez, & de bon cœur, afin que vostre charité & vostre obeissance luy soit agreable.

Ce qu'il vous commande de pratiquer à l'endroit des autres, il l'a fait le premier enuers vous. S'il ne l'eust fait, vous seriez aujourd'huy dedans les Enfers avec les Diables & les reprouuez : & s'il ne le faisoit encor tous les jours, vous seriez encor tous les jours en danger d'y tomber , & de perir eternellement. Car n'auons nous pas tous esté cōceus en peché ? Ne sommes-nous pas tous venus au monde avec vne inclination maudite à mal faire ! Dés nostre enfance n'a-

uons-nous pas commencé à faire paroistre la corruption de nos cœurs par des effets de malignité, de mensonge, & de vengeance contre nos semblables? A mesure que nous nous sommes auancez en aage, nos vices ne sont-ils pas allez aussi en croissant? N'auons-nous pas commis vne infinité de pechez & contre la premiere Table de la Loy de Dieu & contre la seconde? Et neantmoins il n'a pas voulu en faire la vengeance cōme nous l'auions merité. Il a mieux aimé vser enuers nous de sa grande misericorde, en nous pardonnāt nos pechez, & en nous ramenant à la vie. Et parce qu'il ne le pouuoit ni ne le vouloit pas au prejudice de sa justice; pour la satisfaire par vne souffrance infinie en valeur, ce qui ne se pouuoit que par l'incarnation & par la mort de son Fils bien-aimé, il a bien voulu employer ce moyen-là pour nous, en donnāt cette precieuse Personne de son Vnique à la mort, afin que croyans en luy, nous ne perissions point, mais que nous eussions la vie eternelle. O clemence inouye! O

nous conuie nostre Seigneur Iesus, *Soyez misericordieux*, dit-il, *comme vostre Pere est misericordieux*. C'est à quoy S. Paul nous appelle, *Pardonnez*, dit-il, *les vns aux autres, comme Dieu vous a pardonné*. C'est à quoy nous nous deuons exciter nous mesmes & par l'amour d'un si bon Pere, & par la reconnoissance que nous deuons à sa misericorde enuers nous, & par le besoin continuel que nous en auons, & par la priere que nostre Maistre nous a appris de luy presenter tous les jours, *Pardonne nous nos offenses, comme nous pardonnons à ceux qui nous ont offensés*; & enfin par la crainte que nous deuons auoir que si nous traittons nos freres avec rigueur, il ne nous traite tout de mesme. Chrestien, qui apres auoir offensé Dieu en tant de façons as esté reconcilié avec luy par Christ, & qui te monstres inexorable à ton frere pour vne seule injure qu'il t'a faite; souuient toy de ce mauuais seruiteur de la parabole, auquel son maistre auoit *Matth. 18. 23.* quitté vne dette de dix mille talens, & qui tourmentoit son compagnon

de seruice pour cent deniers qu'il luy deuoit : & pren garde que ton Seigneur ne te die de mesme qu'à luy, *Serviteur mauuais, je l'ay quitté toute la dette, parce tu m'en as prié. Ne te falloit-il pas aussi auoir pitié de ton compagnon, comme je l'auois eu de toy ?* & qu'il ne te liure aux sergeans de son espouuantable justice ; où il te face esprouuer à jamais la verité de ce qu'il a dit par S. Iaques que *condemnation sans misericorde sera sur celuy qui n'aura point vsé de misericorde.* Ne vous y flattez point, mes freres, de telle mesure que vous mesurerez à autrui, il vous sera mesuré à vous mesmes. Si vous ne supportez, Dieu ne vous supportera point. Si vous ne pardonnez, il ne vous pardonnera point. Quand vous auriez toutes sortes de graces & de vertus, quand vous feriez toutes sortes de bonnes œuures, quand toute l'année vous ne manqueriez pas vn presche, quand vous donneriez tout vostre bien aux pources, quand vous seriez assidu plus qu'homme du monde à la meditation des graces de Dieu, au chant de ses loüanges, à la celebration


[149.2.13.]

de sa gloire , à l'inuocation de son Nom , quand tous les jours vous vous fondriez en larmes deuant luy, quand tous les fidelles du monde le prioient pour vous , quand tous les Saints du Paradis seroient icy bas avec vous & qu'ils joindroient leurs prieres aux vostres: si vous ne pardonnez à vos freres , ni vos graces, ni vos vertus , ni vos bonnes ceuures , ni vos aumosnes, ni vos chants, ni vos loüanges , ni vos oraisons, ni vostre compunction, ni vos larmes, ni les prieres des hommes & des Anges , ne sauroient faire que vous obteniez de Dieu le pardon je ne dis pas de tous vos pechez , mais de la moindre de toutes vos fautes. Car il est impossible que la parole de Christ se trouue mensongere , parole qui doit faire trembler jusques au fonds de l'ame toutes les personnes vindicatives & inexorables en leurs coleres , *Si vous ne pardonnez aux hommes leurs offenses, vostre Pere celeste ne vous pardonnera point les vostres. Pensez-y , je vous prie , mes freres, aimans vos prochains comme vous desirez que Dieu*

Matth. 6. 15.

vous aime ; supportans leurs défauts ;
comme vous souhaitez qu'il supporte
les vostres , & leur pardonnans leurs
offenses ; comme vous voulez qu'il
vous pardonne celles dont vous estes
coupables deuant son jugement.
Ainsi serez-vous asseurez qu'il ag-
gretera vos personnes , qu'il exaucera
vos prieres , qu'il vous pardonnera vos
pechez , qu'il vous donnera à sa Table
lors que vous vous y presenterez vne
vraye communion au corps & au
sang de son Fils ; & pour comprendre
tout en trois mots , qu'il vous benira
en la vie , qu'il vous recueillira en la
mort , & qu'il vous glorifiera en fin
dedans son Royaume celeste pour
l'amour de son Fils vnique , auquel ,
comme à luy & au Saint Esprit , soit
honneur , gloire , benediction &
louange aux siècles des siècles.
Amen.

F I N.



10-2-3

